

LIV. B. 4

N. 116. 4.

BIBLIOTECA NAZ.
Vittorio Emanuele III

LIV

B

4

NAPOLI


Ms. lib. 4.

I, IV

B

A

• 2 • 10 • 11



2
NICOLAI BVRGVNDI I. C.
ET PROFESSORIS ORDINARI
CODICIS IN ACADEMIA
INGOLSTADIENSI,

HISTORIA BELGICA,

AB ANNO M. D. LVIII.



70




INGOLSTADII,
Ex Officinâ WILHELMIEDERI.
1.4 Apud IOANNEM BAYR.

ANNO DOMINI M.DC. XXXIII.

P.





SERENISSIMO AC POTENTISSIMO
P R I N C I P I
MAXIMILIANO

S. R. I.
ARCHIDAPIFERO
ELECTORI,
VTRIVSQUE BAVARIÆ
DVCI
ET
COMITI
PALATINO RHENI.



ON offendam, MAXIMI-
LIANE Princeps Serenissi-
me, si hunc libellum sub no-
minis Tui Magnitudine ex-
ire patiar. Belgium meum
cū felicissimum ac miser-
rimum simul fuit, veluti in pictura quadam
repræsentō. Videbis virtutis vitiorūque
certamen. Videbis perfidiam cum fide lu-

stantem. Sectasque nostrorum temporum
in religionem attollentes supercilium. Bre-
viter, quidquid malorum prorupit in pu-
blicam perniciem, ex æmulatione & invidiâ
Magnatum, Principi suo non sat obe-
dientium. Hæc sunt initia, quibus populus
ille distractus est in partes. His causis inter
se nunc commissus, totius Orbis oculos,
tanquam ad spectaculum quoddam gladia-
torium, in se avertit. Pulchrum tibi erit a-
liene gentis calamitates percurrere, ut sub-
ditorum tuorum felicitatē agnoscas, quos
pestilentissimum hoc sydus nunquam af-
flavit, in mediis tamen collidentium inter
se religionum fluctibus deprehensos. Ego
cū hæc scriberem, non semel inhorruī.
In acerbā illā miseriarum contemplatione
diutiūs hære non erat animus, nisi relu-
ctantem coëgissent viri magni, quibus nec
negare quidquam debebam, nec poteram.
Fatigatus igitur forensium occupationum
molestiā, alienas curas in hoc otio deposui,
posteritatisq; negotium agere institui. Ne
autem liber iste jamdiu neglectus, inter
quisquilias meas pulverulentus ingemiscat,
sub nomine Serenitatis Tux manumisi. Ut
si livorem cōtrahat, inveniat patrocinium:
si pu-

si publicum favorem, inter donaria numeretur. Persis olim nefas fuit sine munusculo Reges accedere. Horum exemplo Serenitati Tuæ voveo, quod semper habui inter pignora charissimum. Agnosco enim quo me favore exceperis, cum è Belgio evocatum, celeberrimæ Tuæ Academiæ Ingolstadiensi adscripsisti. Sed si quæsissem Fastigio Tuo dignum munus, non invenirem satis idoneum. Possem equidem in virtutes Tuas ire, Victorias extollere, quibus contumaces inimicorum spiritus confecisti. Sed laudes Tuas tam ægre admittis, quam cæteri mortales lubenter audiunt. Virtutis mercedem in conscientia facti reponis, solidamque gloriam, nullâ adulatione libatam, à posteritate expectas. Admitte igitur benigno oculo exile monumentum ingenij mei, & hoc donario Serenitatem Tuam adorari patere.

SERENITATI TVÆ

Devotus

Nicolaus Burgundius.

AD LECTOREM.

Historiam Belgicam hic habes. Si tempora æstimes, prope antiquam: si res gestas, prope novam. Multi hæcenus provinciam illam ingressi sunt: sed non omnes fidem intulere quam debebant. Plerisque ad veritatem affectus obfuit. Alij rectis monumentis destituti, rerum alieno ævo gestarum ignorantia laborant. Ego sanè polliceri possum, nihil me posteritati imponere. Fidelissimis manuscriptis adjutus sum. Quidquid in Belgicis concilijs actum, ex schedis Viglij accepi. quidquid in Hispanicis, ex commentarijs Tissenacqui. Viri illi falli non potuerunt. Vterque enim rebus interfuit. Litteras denique omnes percurri, quas & Rex ad Gubernatricem, & ad Regem transmisit Gubernatrix. Ex quibus multa hausi, quæ temporum ratio & ignorantia absconderant. Quisquis hæc leget, nisi malignus esse velit, bonam fidem æstimabit.

V. C.

NICOLAO BVRGVNDIO
I V R I S C O N S.

Summo, in summâ Flandriæ Curiâ
caussarum Patrono.

Cum à Sereniss. Duce Bavarïæ
evocatus ad lectionem Iuris publicam
in Academiâ suâ Ingolstadiensi
staret in procinctu suæ
profectionis.

S At scio, Amicitia primæva ab origine nostra,
Et voto docti tempore conloqui:
Quod sanxere novem, nostri, sacra Numina, amoris;
Accum prudenti Pallade, justa Themis:
Non male suada tuam penetravit opinio mentem,
Quæ enervet Fidei robora firma mea.
Nam illa, velut scopulus contra maris impetum inanem,
Immoto rumpens navis fragam undam animo:
Mutui in æternum victuri conscia Amoris;
Non per longinqua tadia discidy,
Sit labefactari potis: haut per corporum amantum
Vastitiem, aut præsens quæ mala languor habet.
Atque adeo si quis nigrâ sit sensus in urnâ,
Vivere post mortem hanc experire meam.
Verum etiam ut nostri quædam extera symbola Amoris;
Fidi index animi; sit tibi, sitque alius:
Hoc tibi, BVRGVNDI, huic nostro adposui Monumente
Mnemosunum; æternæ pignus Amicitia.
Nam clueas nostri licet ingens Belgica secli
Laus, ut Pieridum delicia & Charitam:
Nec vix in quoquam tibi se equiparare potissit:
Atque vicissatim me quoque perditæ ames:

*Connitar tamen (heic faveas mihi SANCE, FIDIQUE!)
 Hanc tibi in hoc stadio laurcolam eripere.
 BVRGVNDI (quem Astrea, suo cum Praeside, MVS AE:
 Et Pallas curâ perpoliere pari)
 Mortale est quodcumque vides : Anima sed origo ;
 In cuius penetrali inlatebravit Amor
 Sen ille tui, aeterna est : sic nostri mutua nexus
 Fadera ; ut illius undique pars melior.
 Quare etiam frustra est , nostros tibi ut eloquar ignes.
 Nam qui cera potest parvula eos capere ?
 Cùm penita nequeant vix hoc in corde medulla.
 Tanta meis superat flamma cupidinibus.
 Hinc scio nil Pyladis , nil Thesei fama valeret,
 Vnanimique nihil gloria Peirithoi :
 Illo nos olim si vixissemus in ævo ;
 Omnibus ac noster cognitus esset Amor.
 At tibi sit semper mens sana in corpore sano,
 BVRGVNDI ; ex voto & vita superstes eat.
 Missiculataque scripta volent : perfrigeret æstum
 Ne inrepens sensim torpor Amicitiae.
 Sed potius (meminiens nostri) alternata, requirant
 Sæpe , satini' salva ? Sic tibi , mi'que vale.*

IEREMIAS PIERSSENÆVS

I. V. D.

in eadem Curia Regis Catholici Consiliarius
 & Fisci Patronus

Amico Optimo Maximo
 cum mœrore L. M. Q. P.

ac omnia felicia & beata cum incremento Dignitatis
 suæ EX VOTO adprecor
 in Maximâ Flandror. ipsis Kal. Septembr.

M. DC. C. XXVII.

NICO.

NICOLAI BURGUNDI

HISTORIAE

BELGICAE

LIBER I.

FATO generis humani quemadmodum siderum, ita & rerum vices circumaguntur. Prima potestas in populo multis fuit; quæ citò ad primores flectendo; & ibi fracta discordiis, apud reges demùm fessa confedit: unde iterum ad exordium suum exorsa revertitur. Raro gentibus àm felicia fata sunt, ut in eodem statu tranquillæ perdurent. Vnumquodque sæculum sua calamitas prosequitur simul, atque depōnī. Igitur semper bella nasci, pacem subsequi, quærentem pacem vitia excipere, & hæc ipsa visus ubi processerint in summa, iratum nunquam ad ultionem provocant. Quippe natura multitudine onusta quietis est intolerans. & ob id se velut ipsam accito Marte necessum expurgat: quasiq; renascitur, ut in profundo otio iterum consenescat. Sed vitæ mortalium dux atque moderatrix sapientia est, quæ contra omnes casus virtute instructa, impendentia mala ex alto prospicit, minantemque tempestatem immota exspectat. Secura potissimum,

mum, non ob aliud, quàm quod nihil acerbius accidere videat, quod non aliquando acciderit. Omnis ætas de sæculo suo queritur, & suum quisque infeliciſſimum falſò credit; quia suum: hoc est; quod nulla calamitas altius penetret, quam quæ sentitur. Homines cottidiè mutantur; mores hominum in orbem redeunt. eadem fabula sæpius, iterumque peragitur sub aliis, atque aliis personis. Luxus, fraus, libido, peculatus, & ejusmodi flagitia quæ hodiernos affligunt mores, & olim prona, atque in aperto fuere. Sed non aliter ad posteros, quàm per silentium veniunt. Quocircà reipublicæ interest scriptores existere. Hi sunt qui famam rerum gestarum longius traducunt; eventus, præcepti que salubria docent; iniquitatē denique temporum constantiā, vel consilio occurre. Quippe nemo rectius, quàm exemplis instruitur. Proinde operæpretium duxi, aggredi lumen, quo nullum unquam diuturnius auerbis Belgium habuit, tum conflictu toti orbis Christiani, cū atrocitate præliorum, & nutatione victoriæ, exercitibus hinc pro religione & imperio, illinc pro vindicandā libertate non minore animo concurrentibus. Nam qui hæc leget, facilè discet scenam rerum humanarum. Eadem causa, idem furor, eadem rabies primo Gallias inflammavit, mox in Scotiam deflexit, inde Belgis inoubuit. At mihi
princi-

principium narrandi facturo, pauca explanare convenit de statu reipublicæ. Nam & exteris me scribere memini, qui aliis, atque aliis conditionibus regnantur.

Belgica omnis longè, latèque, per Gallias, Germaniamque diffunditur. Cujus non una gens; sed propriis nationibus, provinciis, nominibusque discreta, in commune Belgæ vocantur, aut inferioris Germaniæ populi. Olim in singulis provinciis imperium fecerant. Imperium dominicum; inde regium, hoc est; legitimum; quoad vim dominationis privilegiis frangendo in formam principatus concessit. Summa imperii penes singulos, quos nascendi fors, & promiscua successio, non aura popularis, vel ambitio rebus præposuit. Licentia principum supra leges. post insanis castigata privilegiis, multorum motuum causam dedit. nunquam satis concordi potentia, quæ ad unum, vel plures, aut omnes tota non pertinet. Insurgentibus enim principibus, populus contra niti cœpit; non passus vim dominorum intendi, quorum jugum jam exuere cœperat. Brevique ostendit, nullum majus esse privilegium, quàm carere omni privilegio, cujus umbrâ publica tranquillitas sæpe illuditur. Sed hæc ipsa Principes ab initio benignius indulserant, ut immunitatis dulcedine animarent multitudinem ad opificia, & exterarum

*Status
Belgici
brevis descriptio.*

gentium commercia elicerent. Nec fefellit. hæc moderatio dominationis magnum quoque incrementum dedit. Quippe ibi populus, & divitiæ, ubi & libertas. in tantum brevi potentia crevit, ut etiam formidolosa haberetur Principibus suis, nec iisdem artibus quibus erat elata, deprimi posset. Post multos deinde per ordinem successionis dominos, universa Belgarum sceptrum in Burgundicam gentem felicitas transtulit, nuptiis, pactis, successionem, & fortunam ad omnia prodigam. tunc cum sub uno spiritu, unoque rectore, ad terrorem Europæ circumferrentur Belgica signa, statim quoque popularis licentia cessit, magnitudine potentiæ debilitata, & timore compulsæ ad reverentiam obsequii. simul ad imaginem regni adunatæ provinciæ, in unum quasi reipublicæ corpus formamque coaluere. Status autem habitusque talis erat. Porro titulo alio, atque alio, omnes tamen unius nuntum intuebantur. Penes eundem pacis, belli que arbitrium, & administratio erat. Militiæ nomina dabant, non lecti, aut iussi: sed voluntarii. Namque populus olim ad pacem mitigatus, stipendiorum collatione vacationem redemerat. Latis Principibus, & augmentum potestatis libenter retinentibus. quippe sordidam adulationem exoluti, nec à libidine, vel ingenio plebis pendentes, vim armorum, hoc est; materiam facemque; seditionum turbidæ multitudi-

ritudinis audaciæ eripuerant. Subsidia & tributa Ordinibus imperabantur, non promiscuo jure veluti in solutis regnis: sed consensu civium, hoc unum ex imagine libertatis retinentium, ut peteretur, quod negari jure non potest necessitatem æstimantibus. Ordines autem constituiebant delegati cujusque provinciae, quos ex ecclesiasticis, nobilitate & civitatibus suffragia elegerant. Ærario principis senatus præerat. Finantiarum nomine designabatur. quem duo præsidēs (vulgo capita nominantur) cum thesaurario & præfectis aliquot constituunt. patrimonium, & domesticas principis opes, simul & ingentia tributa curabat. Judicia magistratibus permitta. Necubi tamen Justitia gemeret, provocatio placuit ad supremas curias provinciarum. Unde ad Mechliniense tribunal a plerisque recutitur. Gentis procures provinciarum præerant, gubernaculis urbium admovebantur, legionibus imperabant, populum in obsequio principis; & subinde principem in metu tenebant benevolentia populi diuturnitate victa. Minorum gentium nobilitas per urbes sparsa, atque diffusa, cum plebe magistratus implere, suæ quisque patriæ operam dare, præsidio esse, incrementum quærere. Populus suis vivebat legibus, pace adultus, commerciis potens, obsequium principi, inter libertatem, & servitutem. Cæterum Carolo Cæsare in lon-

gingua abstracto, tantum imperium à Mariâ
sorore videbatur aptè regi non posse, quàm si
cum multis communicaret consilium. Se-
natum igitur excitat, qui de statu rerum, hoc
est; de bello, pace, fœderibus Principum, præ-
sidiisque & munitionibus deliberaret, & ob
id Concilium Status appellavit. Proceres
gentium ut plurimum citrà numerum assu-
mebantur, proceres, quod commilitio Cæ-
saris assueti, tamen procul illo agente ab ad-
ministratone non exclusi, absentiam & de-
siderium principis per speciem fallerent. gen-
tium verò, ne peregrinorum odia in seditio-
nem erumperent. an quod imperia patien-
tius populus ferat, quæ à suis proficiscuntur?
Huic Concilio Princeps præerat, aut Guber-
nator. Rebus quoque civilibus curiam ape-
ruit. Præsidem ei imposuit. Concilium San-
ctius, aut Privatum nominavit. Privatum e-
nim cum Principe expendit arcana imperii.
Apud Græcos olim apocleti vocabantur. Per
hos provinciarum, urbiumque querelæ, at-
que discordiæ plerumque dirimuntur, diplo-
mata edicta, & rescripta, abolitiones quoque,
& indulgentias, ut & alia quædam Suprema
in Belgio Concilia expediunt, atque omnia
ea quæ supra leges, citrà tamen injuriam prin-
ceps potest. Nece potentium dignitas fuit.
sine respectu generis, sine curâ ambitionis,
duodecim primo assumpti sunt, quos fama,
& vir-

& virtus , legumque studium supra vulgus
evexerat. nunc pro regnantium arbitrio nu-
merus constat. Interjecto Cæsar tempore
provinciarum habenas in filium transtulit,
onustus senectute, ægróque corpore, & fessus
longâ potentiâ. Philippus ergo inter initia
imperii, vim omnem principatus ad se revo-
cavit. salutari more potentiam repetens, quâ
subinde præceres assuetudine imperandi ig-
navis dominis totam eripiunt. Bellum ad-
versus Gallos supererat, assiduos hostes, & ut
ita dicam prope hereditarios. sed quo interim
vacuum foret de pace agere, annorum quin-
que inducias condixit. Quas paullo post
Gallus fregit, & manifestius quàm ut à scele-
re excusari possit. Ingenio velox, pœnitentiâ
mobilis, ad pacem, ad bellum perinde subi-
tus. Et nunquam postea aperto Marte, nisi
infelicitè dimicavit. scires curæ esse Deo ul-
tionem. Sed mutuis vulneribus fatigati, cum
uterque sibi consideret, neuter frangeretur
ad tranquillitatem respexêre; ultimum sem-
per lassis, vel exhaustis refugium. Hinc à
pace mihi initium historiæ. sine amore, sine
odio partium. quibus hætenus vitiis maxi-
mè laboratum est. Multi sterilitate littera-
rum, plerique inscitiâ genii tam regionis,
quam populi & reipublicæ; plures tamen
religionibus vel insensî nimis, vel nimis ob-
noxii. Mihi sacrorum cultus, quem à mayo-
ribus

ribus accepi, non adimet libertatem, quam felicitas temporum promiscuam fecit.

M¹⁵LVIII
Pax cum
Gallis cō-
ponitur.

Gallus ergo præsentium rerum fastidium conceperat. Læto amoribus, venustisque studiis ingenio, & horum loco adversa fortuna armorum statim tædium fecit, & pacem quàm bellum malebat. Similis querulo, quod tam frigide à Paulo Pontifice exceptus fuerat cum Guisio exercitus. Nec eundem videbat in bellum instructum, cuius impulsu causaque, pacem ruperat. Et sine dubio Pontificis cervicibus vires Hispanorum graves erant: at si frangerentur, Gallorum mores suspecti. Proinde (ut fertur) non causæ, non studiis partium; sed nec amoris reipublicæ bellum dederat. contentus inter se commisisse reges, ut utroque lassato, & ad pacem respiciente, Etruriam ipse, tanquam adhuc incertæ possessionis sibi auferret. Et hinc promissa extrahere cœperat; satis gnarus, non bello magis, quàm morâ belli Gallos consumi, qui victoriam omnem in impetu constituunt, cuius statim obliviscuntur, ubi in externos exundant. Proinde Gallis tam ingentes cōatus in Italia frustra expertis, postremæ duæ clades cum inter necione nobilitatis, de supercilio eorum mulrum detraxerant. Sed præcipuus concordie auctor Annas Montmorancius, Magister equitum, seu Franciæ Conestabilis, regii exercitus prætor. Sancto-Quintino prælio in Belgia-

Belgarum manus venerat. dein convento pretio remissus, spem, & fiduciam pacis, quam captivus fecerat, liber non abjecit. Huic uni viro bellum adversus Philippum semper displicuit. solus omnium suaserat, Regi, ne feralem Gallis repeteret Italiam, equites se transiuros Alpes, ut pedites inde reverterentur affirmans. Nec e contra Philippus abhorrebat à concordia. ingenio ad tranquilla promptiore, & alienis magis armis, quam propria voluntate, ad bellum compulsus. Nam & Carolum patrem extinctum accipiens, animum cogitationemque ad Hispaniam appulerat. Et hinc proclivior ad tranquillitatem temporum, cujus ante desiderium conceperat. Sed in pari Regum voto, nemo erat qui prior loqui vellet. Pudebat confessione propria infirmitatis victorem hostem facere. Inerat magnus utrique animus. & accessione Italicarum virium, par jam victori victus exercitus. Cunctantibus ergo publicam calamitatem extinguere privatâ verecundiâ, Christierna Lotharingi vidua concordia mentionem iniecit. Prudens, & virilis animi mulier. Alteri regum sanguine, alteri per conjunctionem filii annexa erat. ac tùm quidem per finitimorum rabiem exposita injuriis, haut ægrè expugnavit, ut consentirent in colloquium. Actumque ut circa Idus Octob. Cericam-

pum convenirent. Cœnobium est Cisterciensis Ordinis, inter terminos vtriusque regni. Cardinalis Lotharingus, Ioannes Morvellerius Aurelianensium episcopus, Annas Montmorantius Conestabilis, Iacobus Albo Sancto-andreæ, tribunus militum sive (ut dicunt) Mareschalus, & Claudius Albaspinaeus Secretarius, ab Henrico rege præmissi. & ut cupidiores pacis viderentur, Philippi caduceatores paullo diutius exspectavêre. A Philippo autem hi succedebant, Antonius Perenottus Granvellanus Atrebatensium episcopus, Ferdinandus Alvares à Toledo, dux Albanus, Guillelmus Nassovius princeps, Ruygomes de Sylvâ Melitæ comes, & Vlricus Viglius ab Ayta Suichemus præses Privati Consilij. Ante omnia caduceatoribus placuit dimitti utrimque exercitus. ne proximus armorum strepitus, tam salutare turbaret commercium. At ne tunc quoque dilationem Gallus fecit. equitibus domum remissis, pedites in præsidia distribuit. curam deducendorum Germanorum Nivernio tradidit. Nam & Philippus jam in Atrebatibus exercitum dissolvebat. Magna pro Sabaudia contentio fuit. Gallus per successionem aviæ ad se trahens, & quod omni iure potentius est, præmio victoriæ retinebat. Multum ex adverso Thomâ Langusco Stropianæ comite, ac Præside Astensi pro Phileberto niti-

tenti-

rentibus ; non armis in hoc contendendum
esse ; sed forum ex more, legesque respice-
rent. Nec displicuit Gallis resumere cogni-
tionem. at longè aliud poscebatur, ut pau-
cis civitatibus pignori relictis, sua Phileber-
to restitueretur possessio. Sed hoc ipsum à
Gallis contumaciter negabatur. Nec aliter
quàm in gratiam Margaretæ sororis Henrici
Regis Philebertus postea obtinuit, quam se
in uxorem ducturum spondit. Tota igi-
tur concordiae moles circa Caletum fuit. ur-
bem in Gallico littore positam, multis ætati-
bus Angli infederant. quæ longa possessio effe-
cit, ut veluti suam constantius vindicarent.
Gliscebant inter partes certamen, & neuter re-
missurus aliquid videbatur de pertinaciâ: cum
Philippus, & ipse de pace desperans, Comitem
Feriæ dimisit in Angliam, ad percunctandam
uxorem Mariam, an mercari pacem vellet, quæ
sine damno ejus componi non posset: si bel-
lum haberet in animo, nuptiis Elisabethæ so-
roris in spem successionis regni sui Sabau-
dum adoptaret, ad quem jam potissimum de-
trimentum omne armorum perveniat. Sed me-
dio tempore Maria decessit. cujus mors collo-
quium fœderis in tempus dissolvit. Elisabetha
verò sceptrum adepta, & semper per dissimu-
lationem dubia, tanquàm alicui nuptura, pri-
mum externis, deinde & domesticis, postea
omnibus imposuit. seque & regnum hac arte
egre-

egregiè tutata, ubi invidiam superatam vidit, nuptiarum æmulos sensim sustulit. tantasque gentes, vix hodie patienter uni viro obedi- entes, femina, quod mirêre, tot annis in pro- fundissima pace continuit. cui nihil dulcius regno unquam fuit. quod ne alteri trade- ret, omne matrimonium despexit. Sunt qui velint ad nuptias ejus intendisse Regem Phi- lippum. Cujus rei certum auctorem non ha- beo. nisi quod Gallos acceperim, sollicitasse summum Pontificem ne gratiam affinitatis Philippo faceret, vel disturbaret consilia ejus. sed inani suspitione correptos existimo. nec enim Reges alio affectu sæpius peccant; qui- bus semper formidolosa est aliena felicitas. Cæterum post Calend. Febr. resumptæ sunt conditiones fœderis. Et jam prona omnia fortuna fecerat. Elisabetha consilii ambigua, sed ad stabiliendum sceptrum recens partum convenire pacem rata, simul metuens offen- sam Philippi, quod sub initia regni liberta- tem religionis vulgasset, cum Henrico ipsa per legatos de Caletto transegit: ut in annos octo Gallis cederet. restituerent deinde; vel quinquaginta aureorum millia penderent. in hoc legitimi obsides traderentur. Resta- bantergo Genuenses, Cosmusque Medi- cæus. involuti & ipsi contagio alieni belli. quia societatem Hispanorum palam indue- rant. alter eorum Senas tanquam suas; illi Corsi-

Corficam repetebant. Nec tam ingentia armorum præmia Gallus ægrius dimisit, quàm ceperat. vna dies, vna hora, vnus calami ictus tot victorias repentè abstulit. adeò vt quidam dicerent, sic pacisci Gallos, quasi nunquam bellum essent habituri. Elisabetham Henrici regis filiam Philippus sibi iuncturus erat. & hoc plerisque satis videbatur ad securitatem. prorsus quasi necessitudo fidem tueretur, quã religio non poterat. vsus certè comprobavit, affinitatem principum ad miserationem erga oppressos satis validam: inter æmulos, & insensos odia non minuere. quippe speciem magis amicitia, quàm vim retinent, pacemque & bellum æstimant ex temporum ac fortunæ ingenio. sed & sanguinis pignora, suorumque matrimonia, & sacramentum pro vtilitate ferè dispensant. In cæteris iustitiam, in regno fidem, aut naturam non agnoscunt. Leges pacis hæ convenere.

Pacta Madriti, & Vallicellis inita, firma, rataque sunt, nisi aliter convenit.

Pax solida, æternaque concordia, bonâ fide inter reges tanquam fratres coito; quam non obtentu Turcici fœderis, non aliter ledere, vel offendere, liceat.

Fidem invicem præstanto Romana religionis curam acturos, daturosque operam, ut œcumenicum concilium celebretur.

Esto utrimque præteritorum oblivio. esto liberum commercium. nulli fraudi sit stetisse in partibus. bona
in eam

in eam causam publicata, vel distracta restituuntor. demtis tamen Neapolitanorum, Siculorum, atque Insubrum exulibus.

Oppida ab hinc octennio capta, vtrunque redduntor. Gallus Theonvillam, Marieburgum, Ivosium, Danvillerium, Montmedium, Valentiam Insubria, ejusque arces, & castella: Philippus verò Sancto-Quintinum, Hanum, & Castelletum.

Eo statu quo nunc est Terouana restituitor. Ivosium manibus nudator, alterutrum munire jus non esto. non arcem, non propugnaculum in proximis mille passibus exstruere.

Ditio Carolatensis, cum Hefdino ad Philippum spectato. Delfinus Gallia in Crepacordij possessionem admittitor; salvo jure Crunij toparcha.

Philippus Elisabetham regis filiam matrimonio adjungito. trecenta aureorum millia dose esto.

Emanueli Phileberto omnis Sabaudia, trans, cisque Alpes redditor. Augusta Taurinorum, Pinarolum, Clerium, Clavassium & Villanova loco pignoris à Gallo retinetor, quoad de jure successionis pronuntiatum fuerit. interim & Vercellæ & Asta Hispanorum praesidiis occupantor.

Dux Sabaudia neutralis maneto. Margaretam Regis sororem in vxorem ducito. trecenta aureorum millia cum vsufructu principatus Bituricensis dos sunt.

Gallorum Rex praesidium Etruriæ educito. patricij Senenses, alijque ad Ilcini-montem profugire restituuntor. si imperio audientes fuerint bona his redduntor.

Gallus

Gallus Corsicam, & qua in Liguriâ occupat Genuensibus restituito. Genuenses econtra ejusdem Regis amicitiam colunto. militiam ejus secutis, & proscriptionis pœnam remittunto.

Arx Bullonia Leodiensium episcopo restitutor. negotium Sedanensè excipitor.

Lusitana dote maternâ securè fruitor.

Quidquid alteruter Monferrati occupat Guillelmo duci Mantuæ restituito. arces & munimenta à se exstructa cuique diruere jus esto.

Maria Borbonia Fano-Pauli securè fruitor, salvis aliorum actionibus.

Gallus intrâ proximum trimestre prior pacta exequitor. Inde Philippus post alterum mensem fidem præstato. obsides interim tradito.

Is demùm annus III. Non. April. Potentissimos validissimósque Reges, veriùs lassavit, bellumque magis, quàm bonâ fide diffidentiam, odiâque sustulit. In Castro Cameracensi conditiones hæ convenerant. & hinc pax Cameracensis vulgò dicitur. quæ Pontificè, Ferrariensem, Mediolanenses, Etruscos, Neapolitanos, Siculos, Genuenses, id est, propè totam Italiam tot annorum bello absolvit. quorum causa, Belgas, simul & Hispanos & Anglos, cû Gallis commiserat. At Senēsibus libertatis infeliciter auspiciatæ finem attulit. quam pleriq; exules etiam tûm à Gallo incassum repentes, sanctitate fœderis repulsi sunt. Cæterùm & Pontifex, & Cæsar, & Electores, tetrarchæ,
civita-

civitatesque imperii; simul Polonus, Danus, Suevus, Anglus, Scotus, Veneti, Helvetii, Rheti, Sabaudus, Lotharingus, Parmensis, Ferrariensis, Mantuanus, Genuenses, ac Lucenses, breviter, tota Europa fœderi adscripta. prorsus ut non cum una gente & pugnatum hactenus, & compositum: sed in unâ gente totus Christianus orbis, & concussus, & sedatus videretur. Paullò post conditiones Galus implevit. Albanum, Auriacum, Egmondanum, & Arschotanium obsides habuit.

MCDLIX.

*Stylo veteri Rex
Philippus
Gubernatrix
Belgio imposuit.*

Hinc conversus ad pacem Philippus, primum omnium paternis manibus ingenti pompâ Bruxellæ parentavit. Mox navigaturus in Hispaniam, provincias ordinat, statumque reipublicæ componit, ac firmat. Sed eum maximè agitabat, quem cum potestate summæ rerum, ac gubernaculo præficeret. Imperator Ferdinandus pro Archiduce filio haut obscurè ambiebat. Auriacus & Egmondanus rumoribus populi maxime destinabantur. neutrum tamen in sermone Rex habuerat. non quod factiones metueret ex æqualium invidiâ, atque inde discrimen: quamvis hoc quoque spectaretur. At quia magnatum potentia, aliàs gravis, & semper nimia, periculum accerferet; ne quod ex alieno sumerent arbitrio, ex suo deponerent. Cuncta scrutanti, optimum visum, paterno exemplo gentis suæ feminam Belgis imponere. Animus huic sexui

qua-

quantum vis impotens; tamen ad res novas videbatur meticulosus, ac mollior. Nec dubitabatur, quin tantæ familiæ splendor, ac majestas, tot illustrissimis Belgarum proceribus venerationem incuteret. Secretò agitaturn de Christiernâ Lotharingi viduâ, & Margaretâ uxore Parmensis. illa quidem amitæ filia, hæc ex concubinâ soror. alioquin virtute animoq; & cætera pares, ac fortunâ prorsus dignâ tanto fastigio. Sed difficiliorem electionem reddebant studia procerum in diversum accensâ. non amore, vel curâ reipublicæ. sua quemque spes, vel ambitio impulerat hanc, vel illam suffragijs destinare imperio. Auriacus Lotharingę fautor aderat. ad strepente vulgi famâ anteferendam esse, utpote Belgis acceptam, morumque similitudine propiorem, cui & pacem se debere meminerant. Ille tamen ad longè aliud intendebat. jam pridem nec minore ambitu filiæ ejus Dorotheæ nuptias sollicitaverat. tunc quidem majorum ornamentis ac stirpe imperatoriâ tumens: mox pretio suffultus tanti certaminis, & veluti jure exacturus si gubernaculi munus beneficij sui fecisset. Nec segnius Granvellanus Atrebatensium episcopus pro Margarita nitebatur, ardore retinendæ potentiæ, quâ hætenus in aulâ prævaluerat. Verumtamen ut consilio suo adjiceret robur, Albanum simul in partes excitulat, promptum suâ sponte, & adversus

Belgas satis obliquum. Erattunc Philippo frequens, seorsim, & quasi aliud agenti sententias exquirere. quod plerosque reges sapienter factitasse legimus; ne qui in commune rogantur, in gratiam potentiorum consilia flectant, aut solita purpuratis adulatione consilia dirigant, quo principem ire vident. Albanus ergo pro more rogatus, in expedito regi suasit, *Securitatis interesse Margaretam eligi. sanctimoniâ vitæ, fideque probatam. cujus filium veluti obsidem, maritum teneret in Italiâ clausum; & alioquin destitutum potentiâ ad occupandum facinus. Lotharingos Belgis finitimos esse, & affinitate Gallorum, veterisque inimicitia recodatione suspectos: Geldriam denique ad se trahere. timere ergo ne fiduciâ virium, & favore populi diuturnitate victo periculum faciant. maxime cum & jam per speciem amicitie proceribus blandiantur. sacrosanctum principatus arcanum esse, neminem aliquem magnum facere, cujus fortunam in potestate non teneas. nimiam credulitatem multos perdere. suspectandum semper dominantibus qui capax habetur, & imperio proximus. Nec Christiernam accusari; quamvis vulgi rumore prodigam, atque alieni aeris famâ laborantem: sed humanum ingenium potentia avidum, ac per fas nefasque præceps ad profundam animi cupidinem.* Ratio tam salubris consilij facile vicit, ut Margareta sine mora evocaretur, tribus subnixa Concilijs

Conciliis rectura provincias. fatali indignatione Auriaci, qui exinde Granvellano adversus, sanctissimam hastenus amicitiae tesseram fregit, atque inexpiabile odium concipiens, venturae calamitatis fundamenta posuit.

Provincias verò inter procures Rex divisit, ut præter summam imperii, Brabantiam quoque Parmensis haberet. Flandriam, Artesiamque Egmondano tradidit, divitiis, armisque validissimas. Hollandia, Zeelandia, Ultrajectum, Auriaco data sunt. nauticus populus, & hanc unam artem eâ tempestate sibi vindicans, cujus nunc commercium unus orbis non capit. Frisia, ac Transislandia Ioanni de Ligne comiti Arenbergio: Geldria, cum Zutphania Carolo de Brimeu comiti Meghemo permissa. Petrus Ernestus comes Mansveldius Luxemburgum sortitus est. In Hannoniam Ioannes Glimæus marchio Bergensis missus, adjunctis Valencenis, atque arce Cameracensi. Namurcum Barlaimontio; Insulæ, Duacum, & Orcinum Ioanni Montmorantio Courrurii domino; Tornacum Florentio Montmorantio Baroni Montignæo evenêre. In Transmosanos Brabantiae terminos, destinatus est Ioannes comes Frisiae Orientalis.

Ordinarias equitum turmas, (vulgo Ordinantiarum) inter magnates quoque distribuit. Hodie nomina tantum, & solatia. olim

Provincias inter Procures distribuit.

Ordinarias equitum turmas

*gnatibus
assignat.*

flos provinciæ, vires, nervusque exercitus. si-
ve numerum spectes, tria equitum millia fece-
rant: siue robur, omnes electi: siue animos,
plerique nobiles habebantur. Bello feroces,
& ad improvisos impetus prompti, validique:
pace verò in suas quisque domos disparati, ac
tributis exempti, ad usum præliorum sine sti-
pendio seponebantur.

*Comitis
Hornani
& Gran-
vellani
dissidium.*

Philippum Montmorantium comitem
Hornanum mari classique Rex præposuit. An-
te illum diem Geldriam sub fiduciâ rexerat, &
eandem provinciam porrò affectabat. Sed
fuere qui in eo suspectarent artes Granvella-
ni; ut ingenium turbidum, & olim sibi discors,
procul amoliretur à republicâ. Ac profectò
ardè, nec sine precibus, Concilio Status ad-
scriptum convenit. seu conscius rei Granvel-
lanus, siue innocens fuerit: tamen suspicioni-
bus odia fovebantur, propemodum deterio-
ra præteritis discordiis. Nam tristissimas inter
se pridem simultates exercuerant; quarum
causa hæc fuit. Simonem Renardum Debre-
montii toparcham Granvellanus detulerat,
non satis integrâ fide insolentes inducias cum
Gallo pepigisse. Et eundem Renardum ob
eam causam in aulâ suspectum, Carolus La-
laignii comes tanquam suum dedecus acce-
pit. Siquidem legationis ejus princeps fue-
rat. Hinc contentio, mox jurgium. Solitâ-
que contagione proximos, & affines indigna-
tio

tio corripuit. Ante alios Hornanus excanduit; naturâ suâ vehemens, & Lalaignio affinis, qui sororẽ illius habebat uxorem. sed postea quoque Granvellanus proprio nomine iram ejus elicuit, asperavitque. Cum enim ab eo Hornanus quæreret, an sibi Geldriæ præfecturam relicturus esset Rex: & quid, (respondit ille) si sciam, an proditulum me putas tibi? Haut dubiè superba vox erat. Sed opinor irato exciderat. Hornanum tamen vehementer offendit. Itaque clam Granvellanum proscindere cœpit, actisque ejus obstrepere, donec in aperta odia erumperent. Contumelia enim in virum non inciderat ut altius absconderetur per dissimulationem, vel constantia virtutis indignationem concoqueret. Nam si discussâ, opinionum caligine verum volumus, aut omninò injuriã in rerum naturâ non existere, aut in faciente esse necesse est: quia sapientis animum non afficit.

Cæterum ad firmandum religionis statum, cõmitia Ordinum Gandavi Rex indixit. Ipse sibi per Mechliniam iter pronuntiat. Nunquam satis de religione securus, quam supremo Concilio volebat commendare. Satis doctus, mutationem status in expedito fore, si noxiâ superstitione caperetur populus pace lasciviens, & ad novandum naturâ propensus: quem magnates armatum occupando, pro suâ quisque vel egestate, vel ambitione, aut

*Philip-
pus Rex
Mechli-
niam præ-
fiscitur.*

vindictâ , pietatis obtentu in principes exstimulant. Proinde magno animo exerceri leges jubet ; pœnasque exigî à sectariis exutâ omni dissimulatione, & misericordia.

*Novos.
episcopa-
tus mo-
litur.*

Et pridem Franciscum Zonnium theologum Lovaniensem, ad Paulum Pontificem legaverat, cum mandatis ejusmodi: Invalescere cottidie hæreticorum vecordiam, atque uti tabem proximas quasque civitates invadere. de cætero verendum, ne flagrantibus usquequaque finitimis, ipsa contagio & Belgas corripiat. Publicâ circa res divinas torpedine, & vilescnte sacrorum majestate per sacerdotum incuriam. Remotiores episcopos, ut officia intendant. latius imperium, quàm ut in ordinem redigant, non genio populi, non commercio linguæ conjunctum. præsentissimum tot malis remedium, singulis provincijs assignari præfules, ac partito onere curam in angustias contrahere. Adjecitque libellum. Magnitudo Belgarum continebatur. quot archiepiscopos, quot episcopos destinaret: sedes, opes, jurisdictionem. in cathedralibus ecclesijs tres omnino theologos, totidemque jurisconsultos ac nobiles requirebat. Archidiaconos, & archipræsbyteros pro magnitudine imperij. quæ cuncta Granvelanus curiose descripserat.

*Concilium
status re-
stituit.*

Post hæc ad pristinam formam revocavit Concilium Status, quod sub initia imperij ad se re-

se retraxerat. Ad hujus ministerij procuratio-
nem Antonius Perenottus Granvellanus epi-
scopus Atrebatensis, Guillelmus Nassovius
princeps Auriacus, Amorallus comes Egmon-
danus, Philippus à Stavele Glaionij dominus,
Carolus baro Barlaimontius, Viglius Ayta
Suichemus assumti sunt. At enim secretis co-
dicillis imperat Gubernatrici, in perplexitate
rerum & reliquos Aurei Velleris equites in
communione adscisceret. Concilium ipsa
cogeret, quoties videretur. ipsa præset, suf-
fragia exquireret, sequeretur, aut statueret,
non quod plures sentirent: sed quod putaret
optimum. nunc cum paucis, aliquando cum
omnibus, sæpe cum multis, semper tamen cū
Granvellano deliberaret, è Finatijs subinde ac
Privato concilio vires advocando. Sic nihil te-
merè, omnia tutò agi. singulos falli posse, ne-
minem omnes decipere. Gomesium quoque
Figueriam Feriæ comitem Concilio Status
adscripterat, & in Belgio relicturus erat. Sed
nescio quo fato mutaverit consilium. Proce-
rum arte factum dicitur; maxime invidiâ eo-
rum penes quos auctoritas, & si deijcerentur
externi, plus potentiæ sperantium. Nam ut
primum Ordines Gandavum convenêre, non
uno prætextu alium ab alio diversos admo-
nebant, *ne sinerent prodi libertatem publicam.*
Pessimo consilio subiugari provincias. Externor-
um dominationem sensim insurgere. adeone

instigan-
tur à pro-
scribis.

effætampatriam, ut reipublicæ Senatum suppedi-
tare nequeat? an provincialium fides periclitatura
esset, nisi in Concilium peregrini veniant? Comitum
Feriæ Senatui Status adscriptum. Quantum ab-
esse, ut omne provinciarum regimen Hispani in se
transcriberent? à patriis honoribus Belgas exclu-
derent? & ad similitudinem victarum gentiū cun-
ctis imperarent? Primas dominandi spes in modico.
Vbi semel processerint paullatim insurrecturos,
atque ad se tracturos omnia. Quid enim illis cum
his provincijs? nisi ut arcana imperij scrutarentur,
ac dominandi licentiam à suâ cupiditate in patien-
tiam Belgarum transferrent? sensimque populum
assuescerent, non tam Regi absenti, quàm genti ser-
vire in quâ Rex degeret? adesse Hispanicæ legio-
nes, & in præsidia distribui, tãquam sua patria Bel-
gis tutò credi non possit. A provincialibus stipendia
expectare. & sic nullum tributorum finẽ fore, ma-
nentibus semper exigendi & conferendi causis. nẽ-
pe ut quod nunc voluntatis, & liberalitatis esset, in
necessitatẽ, dominiumq; verteretur. pudendum sibi,
pudendum populo servitiũ; cum nihil civium oculis
nisi Hispanicum occurret, atq; omnia externa. Me-
minissent ergo missionem exposcere, jampridẽ pro-
missam. Et hoc potissimum Ordinibus convenire.
Pronis auribus hæc accepta. & certatim incli-
natio animorum sequebatur. Inflammantibus
insuper Antverpiensium querelis. Nam & A-
trebatenses adversus insolentiam militum ora-
bant auxiliũ. Cæteris quoque promissam mis-
sionis

sionis spem in suum ludibrium recedisse murmurantibus. Igitur inter se de remedio consultabant. Præsentissima materies ad resolvendam vim principatus, cujus rationem quam singuli non audent, omnes exigunt; & nihil magis unquam dominantibus displicuit, quam ex totâ gente concilium. Fremebant omnes tuendam libertatem. Plerisque addentibus, si promissa missio non procederet, revocanda esse tributa in decem annos indulta. Alii revolvebantur ad privilegia sua, & hoc ipsum acerrimum telum adversus licentiam principum.

Philippus interim Rex magnâ curâ justa *Rex Philippus Gallia Regi parentat.* persolvebat manibus Henrici Galliæ Regis, paullò antè miserabiliter extincti. Inter ludos hastiles cum comite Montgomerio III. Cal. August. concurrens, dextro oculo vulnus acceperat unde statim ex equo collapsus exanimis, sequentibus Nonis exspiravit. Cujus morti Philippus ingemuisse dicitur. Sed & Andream Vesalium, de salute ejus sollicitus, in Galliam dimiserat. Erat enim nobilis medicus; Philippum sequens, natione Belga, qui non solum illius ætatis genium; sed ferè omnes ante se mortales humani corporis peritiâ superavit.

Hinc aurei velleris solemnia Rex celebrat. *Aurei Velleris equites creat.* In cujus Ordinem assumpti sunt Franciscus Rex Galliæ, Guidobaldus à Monfeltre dux Urbini, Marcus Antonius Columna dux Pa-

liani, Philippus Montmorantius dominus Hachicourtius, Balduinus Lanoius dominus Tourcoignii, Guillelmus Croyus marchio Rentei, Florentius Montmorantius baro Mōtignæi, Philippus comes Lignius, Carolus Lanoius Princeps Sulmonensis, Antonius Lalaignius come Hoochstratanus, Ioachimus baro Nicuhausius, Cancellarius Bohemiæ.

*Oratio
Granvelli-
ani ad
Ordines
provin-
ciarum.*

Ingressus inde conventum Ordinum ex more suo pauca locutus est. sed sermonem ejus Granvellanus excipiens, ejusmodi verba fecit. Optandum erat Regi, parta jam pace frui posse, ac vobiscum unà diutius in commune consule-
re. sed nutantia alibi sceptrâ invitum abstrahunt. Hispaniâ novo Cæsaris imperio non sat firmata, si-
ne Rege diutius esse non possunt. Seditionis consi-
lia apertius agitant, quàm aut fallere possint, aut
contemni debeant. Præsentia majestatis haut ul-
lo negotio dissipabit periculum adhuc incipiens, cæ-
teroqui fortè noxium. Vos interim nisi spectatos
haberet, hortaretur ad constantiam. Sed nec ve-
stri mores, nec fiducia ejus patiuntur. Dubitare
nefas, similes adhuc vobis, id est; an Belgæ sitis.
Fidem, & obsequium, nec per metum, hætenus re-
tinuistis. Quam ceteræ nationes in Principe fortu-
nam, vos in fortuna Principem reveremini. Sed hæc laus ita manebit inculpata, si fæda sectariorum
contagio non obliteret. nec id vestro; sed rei vitio,
quæ sine concussione status non invalescit. Reliqua
scelera nocent singulis. hoc unum armatum est in
berni-

perniciem universi. Aliorum exitus vos docere possunt, quàm fragile sit imperium quod religionis turbine quatitur. Remissio legum Germaniam perdidit. Providendum vobis est, ne eadem indulgentia & Belgium corrumpat. ut tolli sectarij possint, puniendi sunt. Bonis nocet qui pepercit malis. remedium erit in ceteros, si unus, atque alter in exemplum veniat. Enimverò Princeps edicto pridem intonuit. sed peccavit, si in hoc leges dedit, ut per silentium, & secordiam judicum populus disceret licentius transgredi. aut exercenda poenae sunt, aut impares eritis flagitiis. Et quidem si satis esse crederet supremis Conciliis hoc ipsum mandasse: hodiè sollicitudinem, fidemq; vestram nequaquam imploraret. sed in magno discrimine non satis prospicitur. Nimiùm firmari non potest cui sceptrum nituntur, & imperia serviunt. De cetero, in omnem ipse partem sic prospexit, ut nisi quod sine illo eritis, abesse non sentietis. Et quoniam Sabauda ad sua regressus est, Margaretam sororẽ in duos annos gubernaculo substituit. Carolum filium daturus vobis erat, si ejus esset aetatis, qua librare posset imperij corpus tot periculis septum. Belgam tamen legit, recturam Belgas. ita ut quoties discrimen impenderit, coram eundem habituri sitis & Principẽ, & imperatorem. Nec antè ab illo, quàm à periculis destituemini. Vos interim cultum, & reverentiam quam debetis Principi, deferre gubernatrici: & quanti illum facitis, in hac ostendite. Reliqui veneratione, & silentio; Syndicus Gandavensis (quippe sic cõvenerat) Ordinum

Ordinum
responsio.

num nomine gratias egit benevolentia Regis. Caterum, inquit, idem animus futurus est tuis qui fuit semper, ad religionem constans, quia pro Principe pertinax. Et tamen Deus avertat nefas. interim si irruperit, paratos habebis ultores. Scimus quidem quod nec id ipsum imperaturus fueras, si in tua esset potestate, sollicitudini, quam voluptatibus, otioque mensuram ponere. Quippe hactenus & religiosi legum custodes, & acerrimi vindices sumus. Veruntamen constantiam nostram paullo ante extulisti supra mortales. Pudori nostro grave præconium: sed ex affectu tuo natum. cuius fiducia audebimus petere à maiestate tuâ, ut alienigenas elimines, qui tanta laudis gratiam inutili morâ infringunt. Quid obsecro ad hanc rem publicam peregrina nomina? nunquid nos ut cetera nationes inconstantia, aut stoliditatis arguant? Ac ne externo quidem opus præsidio in pace sedentibus. fides nostra faciet ut stabile, firmumque sit imperium. Benevolentia populi optimus regni custos. Vanum est in pace alere, propter quod pacem fecimus. sic lenior pace Mars erit. quia tum necessitas patientiam acuit, in tranquillitate calamitatibus succumbimus. An externos credis temperaturos ab injuria, quos præsentia Regis sui in modestiâ non continuit? ecce Antverpienses, Atrebatensesque, & Cameracenses de vi conqueruntur. Theonvilla, ac Marieburgum deserta oppida. Pacem vero fecisti, non ut ibi solitudinem relinqueres, quæ tamē ex magnâ parte manebit, si depopulatores istos non eduxeris,

eduxeris, Belgica praesidia imponens. Forte tamen Gallorum inconstantiam, jam ante prospicis. Recte id quidem. sed fama longe bellum praecurrit. Interim quid attinet magno are peregrinos redimere, in alieno semper rapidos; & tanquam mox abituros, spolia intendentes? supersunt validi Belgarum manipuli. haec sunt praesidia, quorum virtuti Caesar gravissimis temporibus rempub. credidit. cur jam damnetur illorum fides, quam per tot saecula inviolatam praestitere majoribus tuis? tantisper autem bellum protrahet, donec externae gentes sub signa conveniant, aut è proximo concurratur ad auxilium. Fulminatus est Rex improvisa ex postulatione, admiratusque novitatem exempli, irascetur ne haut facile dixerim. Nec dubio, arcana imperij tentari senserat. confestim tamen descendit è folio. Dixisse quidam ferunt, num & se exisse vellent qui Hispanus utique sit. Simul extra curiam se proripuit. Nulla tamen postea iracundiae signa ostendit. Dux Sabaudiae pervicaciam Ordinum verbis castigavit. Nam in illum diem vicarium imperium gesserat. Et mirari se aiebat tam pro-caciter interpellari principem, qui prae-teritis comitijs fidem praestitisset suam. certiora pignora dare non posse, pollicendo sancire Reges. nec eorum aliam esse cautionem. Detur ergo iustum esse quod peterent, interim non frustrari desideria Ordinum. tantum expectarent in alterum vel tertium mensem, saltem donec in Hispaniam venisset Rex,

Rex, ubi stationes & hyberna assignaturus est legionibus, quæ præsens locus ostendit melius. Serò quidem Ordines pœnituit, iracundiam Regis veritos. Sabaudum tamen hortati sunt, ut causam provinciarum ageret.

Rex è Belgio solvit & in Hispaniam navigat.

VII. Calend. Septemb. Vlissingâ Rex solvit. Comitem Feriæ secum unâ reduxit, & nequam querelæ materiam, procul se agente, in provinciâ relinqueret, externorum præsidia post sextum mensem in Italiam revocavit. arcesque & gubernacula civitatum provincialibus tradidit. In comitatu ejus pauci è Belgis fuêre. Hornanus classi præerat. Carolus Tifsinacquijs à consilijs Belgicis futurus Regi: Iodocus Cortévillius à secretis.

Hinc varii sermones per omnem provinciam. plerisque laudantibus Regem, plerisque arguentibus, prout cuique amor, odium, aut ingenium erat. Prudentiores tamen causam abscessus, statumque reipublicæ expendebant. Regem quidem necessitate actum in Hispaniam vélificasse, quæ tot sceptramagnitudine caperet: unde Italiæ commodè prospici, Indiæ contineri, atque ex opposito Barbari compesci possint. Seditiones, verò obtentui sumptas, quò facilius imposeret populo, cuncta rapienti in deterius. Neutiquam tamen res in Belgio tutas esse, turbari facile ac misceri posse, principe in Hispaniis continenter agente, crudoque ad longinqua imperia.

peria. qui non sæculi vitiis, non ingeniis hominum æstimatis, arces, præsidia, civitates, provincias, hoc est; præmiadefectionis optimatibus prodidit. Quid enim sequetur, nisi ut populus in unius Regis sui reverentiam antè intentus, nunc propiore spe, atque utilitate suis præfectis veluti principibus sensim assuescat, ac consurgendi fiduciam, viresque sufficiat? Formidabiles revera quorundam opes. & hos quoque in Concilium Status adscitos, ut intuitæ potentiæ adjicerentur vires publici consilii. Sapienter eos dixisse, qui suassissent Regi, ut suæ gentis Proceres aliquot, quorum fortunam haberet in manu, cum auctoritate in Belgio relinqueret; qui Procerum acta specularentur, & non sibi, sed Regi cogerent administrare rempublicam. Æquum fortè multis videri, ut Belgæ relinquantur legibus suis, sine peregrino magistratu, sine externo exercitu. sed hæc ipsa in provinciarum perniciem quandoque redundatura, otii ebrietate, ac longa pacis segnitie.

Profecto Rege luxuriare cœpit Belgica felicitas, crescentibus sensim divitiis quibus secura pax viam aperuit. Divitias autem suæ excepere vitia; hoc est, superbia, lascivia, luxuria privatorum, & magnificentia principum. Inter Proceres statim gliscebatur æmulatio: quæ præsentia Philippi Regis haut ægrè

MIDLX.
Stylo veteri.

Initium
discordia
inter Proceres.

com-

compressa, eodem absente sine retinaculo erumpebat. Plerique Granvellano infensi, criminabantur potentiam sibi gravem, multis nimiam. Et primo quidem Simon Renardus multo ante discors, veteres inimicitias animose exercebat. Sed non ultra, quam ut actis ejus contradiceret. Tacitis adhuc cæterorum odijs, & manente in speciem concordia; donec Egmondanus atrocius erumperet. nullâ vetere irâ: sed irritatus, quod Helfautij toparcham, ad Hefdini præfecturam Granvellanus extulerat; adhibitis aulæ artibus, quas optimi principes & declinant semper, & incurrunt. Iusserat Rex inter alia imperij decreta, ut ad vacua, & honorata ministeria, à gubernatoribus provinciarum nominarentur tres, è quibus postea judicium sibi, & electionem permitterent. Egmondanus ergo totidem repræsentaturus erat Regi. Quippe Hefdinum Artesiæ oppidum gubernaculo ejus suberat. Sed ut quarto loco, atque extra ordinem Helfautium adscriberet, precibus Granvellani dederat; spondentis quidem, non ob aliud se id velle, quam ut Helfautius splendâ repulsâ Regi notus, ad futura momenta reservaretur. Detecta fraus obliquis animis accepta. sed amicorum adulatio indignationem auxit, inferendo sæpius querelas, & ambiguos de Granvellano sermones. Clientes quoq; maledicendi licentiâ insolentius efferebant;

rebant; ad læta, & tristia Procerum perinde
semper compositi. Nec deerat Auriacus in-
terato odio æstuans : Sororem Ducis Saxo-
niæ acceperat uxorem. & has ei tedas ut in-
faustas reipublicæ, & religionis exitium por-
tendentes Granvellanus exprobraverat. Ad-
hæc Lazarus Swendius homo Germanus,
Auriacum in gratiam cum Egmondano re-
duxit. ut qui ante illum diem inter se discor-
des, conspiratis animis Granvellani potentiâ
destruerent. Nam & ipse Swendius armis in-
clytus, & magnatum amicitia subnixus, remo-
to Granvellano altiore fortunam præsume-
bat animo, hunc unum sibi credens ad fasti-
gium officere.

Tali rerum statu, cum offensi proceres ad
ultionem spectarent, novorum episcoporum
fama adfertur. Res haut dubiè saluberrima, &
à multis retrò principibus frustra agitata, quâ
plerique secordiâ, plures bello retenti, Cæsar
quoque ob consanguinitatem amicitiamque
circumsedentium antistitum extraxerat, Phi-
lippo filio quasi per successionem tradens. In-
dignum ratus alienæ gentis episcopos, lon-
gum & secors in suos exercere imperium. At-
que ea tempestate in Belgio quatuor omnino
episcopatus. Atrebatensis ex olim. Torna-
censem, Ultrajectinum, & Cameracensem di-
versæ principum pactiones adjecerant. sed
tot simul provinciis pares illi esse non poterât.

MISLXX.
Stylo vet.

Novi epi-
scopi in-
stituti.

Externi deinde Archiepiscopi his imminabant, qui salubria illorum delectata turbare aut evertere consueverant. Igitur Pius Quartus Pontifex Maximus, re cum septem Cardinalibus deliberata, in tres archiepiscopatus discrevit provincias. Designatę sedes, Mechlinia, Ultrajectum, Cameracum. E quibus Mechlinia dignitate eminentior, sex complecteretur episcopatus: Antverpiensem, & Silvæducentsem in Brabantia: Gandavensem, Brugesem, & Iprensem in Flandria: Ruremondensem in Geldria: quinque episcopi Ultrajectino submissi, Harlemensis in Hollandia; Middeburgensis in Zeelandia, Leeuwardensis in Frisia: Daventriensis in Transsylvania, & Groeningsensis. reliquę provincię lingua, situque Gallis affines, quatuor episcopatus sub imperio Cameracensis explebant. Atrebatensem, & Audomarensem in Artesia, Tornacensem, & Namureensem. Reliquum erat ut novę dignitates honestis opibus instruerentur. Frequens curia sub Paulo Quarto Romę decreverat, proximorum monasteriorum decimistria aureorum millia detrahi. Deinde repertum, ut expunctis abbatibus, episcopi substituerentur. Ejus consilii auctorem Granvellanum fuisse invidia ostendit. Et sinistra de monachis fama, Pii Pontificis assensum facile attraxit. Præsidentibus enim episcopis, in ordinem redituri credebantur, qui solutis

vetu-

vetustate moribus, sanctissimam majorum disciplinam corruperant. Præpositusq; Granvellanus ei curæ, proxima quæque monasteria corripuit. Forte ea tempestate Affligemum, sanctusque Bernardus & Tongerloa abbates non habebant, & circa eligendi successoris consilium intentos, Mechliniensi, Antverpiensi, & Silvæducensi assignat. Nam & Donfanum Brugensi, & Martinianum Iprensi, & Egmondanum Harlemensi, Margarittanumq; ac Liddanum Leeuwardensi, Bertinianū, sanctumque Gerardum Audomarense atque Namurcensi ita addixit, ut quamdiu supervixisset abbates priorem opulentiam complecterentur, episcopis interim dotem conferrent. Gandavi S. Bavonis Præpositura erat, magnis opibus florēs; nec multò divitiis inferior S.^{ti} Lævini Præpositura Daventriæ pollebat, quas utriusq; urbis episcopus ad se retraxit. Archiepiscopatus Mechliniensis Granvellano cessit. Antverpia Philippo Nigri destinata: Sonnius Silvæducensibus præficitur: Cornelius Jansenius theologus Lovaniensis, Gandavensibus: Petrus Curtius Brugensibus: Martinus Rit hovius theologus Iprensibus: Guillelmus Damasi Lindanus theol. Ruremondensibus: Fredericus Schenc à Tautenbergh, Ultrajectum retinuit. Harlemum Nicolao à Terra-Nova: Daventrium Ægidio de Monte Franciscano: Leeuwerdia Cuncero Petri à Brauwershavē;

Groeninga Ioanni Cnifio Franciscano evenire. Nicolaus à Castro Abbas Præmonstratensium Middelburgensibus imponitur. patrimoniumq; omne cum monachis partitus, abbatiam transtulit in cathedralem ecclesiã. Maximilianus à Bergis Cameraci relictus est: Carolus Croyus Tornaci. Franciscus Richardotus Burgundus Granvellano Atrebatî successit. Namurcum Antonio Havetio Dominicano; Audomarum Gerardo Hamericourtio abbati Bertinienfi contigit.

Hanc mutationem rerum adversus rumor excepit, quem pro diverso animorum motu multi explicabant. Procerum pars Granvellano infensa, & adeptâ materiã ad criminationem vertebatur. Inde & contagionem attraxit nobilitas magnis potissimum domibus annexa. Nam promptissimus quisque adulatione, & obsequio, honoribus colebatur. sed & populus statim exarsit, irritatus acerbo multorum sermone, vagis auctoribus sparso, tanquam in privilegia impingeret Rex, quod sine Ordinum cõsensu ejusmodi novitatem induceret. aliud specie præferri, aliud re agi. Granvellanum hominem arrogantem & Hispanis obnoxium; ac Hispanos dominationem cogitantes, hæc ipsamolari. qui per artem intruderent episcopos, ut atrocitatem Inquisitionis inferrent. Nec dubitabatur, quin confestim res theologi, nobilesque, & totidem jurisconsulti

sulti in cathedralibus ecclesiis ad canonicatus subveherentur. Duo ex his Inquisitioni præfuturi erant. Inquisitores vocarentur. reliqui verò Assesores. quippe ea cuncta Romani Pontificis diploma promiserat. Credulitatem juvêre monachorum querelæ, in deterrius cuncta trahentes. & has passim jactas, temere creditas, inquieta multorum, & fecunda rumoribus ingenia, cottidie in auctius differebant. At profundâ irâ Auriacus Proceres alium ab alio diversos aggrediebatur, novorumque episcoporum consilium arguebat. simul & Granvellanium onerabat ingenti invidiâ. Erat enim ingenio solers, & demerendis hominibus apto. splendore familiæ, juxta opibus potens, quamvis plerumque falsa, & inania ingereret, tamen cum fide audiebatur. Quippe multis opinionem fecerat penetrasse se in arcana Regis, cujus innocentiam modestè criminabatur; fluxam illi fidem, nec Principe dignam. peregrinis consiliis imbutum, & Granvellano obnoxium, in summo imperio, non nisi imperium cogitare. Inde plerique fastidire Regem, cum potissimum jactaretur, abrogationem privilegiorum imminere à Principe Belgis infesto, in quorum exitium Inquisitionem induceret. Multi proinde Granvellani acta propius expendere, amicitiam, congressum, familiaritatem exuere; qui contra nitens, & spernen-

dis rumoribus validus, archiepiscopatum Mechliniensem nihilo segnius auspicatum ibat. Annotavêre curiosi, neminem ex Proceribus extitisse, qui honoris causâ obviam processerit. siue tamen neglexerint, siue aspernati sint officium honestatis, novi sermonis irritamentum fuit.

*Granvelanus in
Ordinem
Cardina-
lium as-
sumitur.*

Sed eum paullo post in Ordinem Cardinalium Pontifex adoptavit. Galerum autem ipse Rex transmisit purpuratorum insigne, ut eminentiâ dignitatis Proceribus æquatim invidiæ subtraheret, quem fastiditum omnibus jam pridem cognoverat. Nec ideo tamen invidiam imminuit. adeo difficile est hominibus conceptû semel odium exuere, cujus nullus est modus, cum semel terminum transierit.

*Sectariis
studia
sua.*

Cæterum antehac nihil adhuc adversus religionem proruperat. metu legum, quas olim inexorabiles, infesta Procerum dissidia resolvebant. Externorum commercia non paucos Belgarum corruperant. & hi episcopos infectandi specie, subinde religioni & cæremoniis illudebant. Jam enim mortalium omnium odia in episcopos se converterant. Execrabatur eos populus, ut Inquisitores; fastidiebant ecclesiastici, ut severissimos morû censores; monachi denique, ut bonorum suorum raptores. idem omnibus questus, ex causis diversis. miscentibus se sectariis, atque animis multitudinis tædium pristinae religionis,
simul

simul & studia sua insimulantibus; propter libidinem talia loquendi impunitam, cujus exemplum Proceres fecerant. nullum enim populo majus momentum ad virtutes aut vitia, quàm inclinatio Principum, ad quorum mores cæteri componuntur. Hinc ad hæresim ne sibi quidem satis notam inclinari cœpit. occultis primùm studiis, & od id nocentioribus. Donec aliis scrutatis, pluribus conscientia obstrictis, & ubi aderant vires, in parte religionis fuit publicare flagitium.

Primus furor Tornaco erupit. circa Calend. Septemb. è secreto & latebris in apertum prodiit. Incolas ejus civitatis jus commercii Gallis potissimùm miscuerat, corruperatque. sed non aliud adhuc quàm psalmos more suo noctu modulabantur. audacia tuti, quam tenebræ absconderant. Accessit deinde ad impetum novitatis Matthæus Launoy, homo ingeniose malus, & præstigiatori similis, prurientibus facem subjiciens. Is apud Calvinum adoleverat à primâ ætate, & in illa schola studiorum suorum rudimenta posuerat. Tornacum inde accitus, multos eloquentiâ seduxit, cui speciem pietatis intexuerat. Emptæ furtim mulierculæ fanaticum morbum mentiebantur; quæ deinde mimicam sanitatem acceptum ei ferebant. His potissimum commentis auctoritatem astruxit. Nam è proximis urbibus, pagisque, &

*Sectarii
insurgere
incipiunt.*

undique effundebantur homines tanquam ad miraculum. Et fuere qui sanctitatis famam ei circumdarent. ne quid deesset mendacio, centones vestium in religione habebantur, quas pro reliquiis ignari colebant, & profana manu contigisse in parte felicitatis reposuerant. Nec deerat ipse cohortari singulos, adire municipia, ubique adesse, Ministri munus exequi; neque jam occulto; sed propalam: nisi quod adhuc concionaretur in silvis, abditisque saltibus audaciam concluderet. Munia quę ipse non poterat, obibant discipuli. qui non minori impostura rudem populum ludificabantur. sed non occultum diu mendacium fuit. Fanaticę illę mulierculę, promissum operę suę pretium exigentes; & cum negaretur, larvam omnem detrahere. Ne quis à nobis ficta hęc esse crederet, ipse Launoï libello vulgavit. quippe postea reditus est Romanę ecclesię; vanęque credulitatis vestigia sustulit. Paulo tristius Valencenę conflagravere, Philippi Maiart, & Simonis Faveau vecordiã accensę. obscuri & ex ultima plebe homines Ministrorum provinciam assumerant. sed flagitii comperti, conduntur in carcerem. agrę id ferebant sectarii. totaque nocte per forum & tenebras lymphantibus similes volitabant, clamoribus turbidi, & psalmodi cantilenis in vernaculum numerum traductis lasci-

scivientes. Sed nec abstinebant minis in
rætozem , cujus aures crebris verberabant
jurijs. simul auxilium afflictis spondebant.
Nec magistratus obviam ibat. plurium vesa-
ria audaciam excusserat. & inconsultâ guber-
natrice, cum periculo seditionis incipere ne-
mo audebat. Parmensis re cognitâ animosê
reges exerceri jubet. Itaque primores civitatis
in curiam coeunt, quam compleverant arma-
tis; ac ne effusa opificum turba seditionem
faceret, primo diluculo reos traducunt ad pub-
licum judiciûm. Ingens multitudo ad rogam
concurrit , quem in foro excitaverat lictor.
Namque eò quoque damnati producebantur;
cùm à plerisque lapidatio urgeri cœpit. dein-
dè ira pervenit in rabiem. impetûque facto
audacissimi quique violentis manibus rogam
dissipant. itum inde ad damnatos, quos lictor
tumultu in carcerem timidus retraxerat. effra-
ctis foribus vincula rumpunt. carnificumque
manibus in præsens noxios eripiunt, ut paullò
post vecordem spiritum digno redderent sup-
plicio. Igitur venêre judices extra ordinem à
gubernatrice. præsidium militare ex proximis
hybernis unâ transmissum. Ferocissimorum
sanguine expiatum est facinus. cæteris autem
mens obtorpuit, jam attonitis, & sibi metuen-
tibus. ut facilè appareret vim populi in multi-
tudine perniciosam : sparsam verò, atque solu-
tam impune contemni.

Hæc impendentium malorum initia , seu portenta erant ; reliquis gentibus fortasse terribilia : Belgis tamen non intelligebantur. Tanta animorum obstinatio fuit. Immemores alienæ calamitatis , sibi que imminentis, turbare religionem malebant , quam non arceret episcopos, quos etiam ultro in remedium expetere debuerant. At illi nihilominus ad destinatas sibi provincias accingebantur. Flandri, & Audomarenses haut ægrè admiscere. Silvæducenses, & Harlemenses parumper commoti sunt. Reliqua Brabantia ut ad jugum inhorruit. Forte Ordinum frequentiam solita tunc comitia Bruxellam contraxerant. Ibi abbates identidem ingerebant ; *majorum mores, & privilegia pollui. episcopos in cœnobîa intrudi ; haut aliâ causâ quam ut primo loco sederent in comitijs , provinciarum vires specularentur , principumque petitionibus mensuram statuerent ex suâ libidine : Denique ut nihil liberum , nihil sincerum amplius esset in Ordinibus.* Quem enim in comitijs liberam vocem exercere , quem recusare aliquid , aut hiscere contra ausurum ? imminentibus supra caput episcopis, cujusque nutum verbaque notantibus ? aut adulandum fore illis hominibus, aut spem honorum in posterum abijciendam ; quando nemo deinceps ad magistratus, quam per episcopos perveniret. Iam rectores illos in aulæ voluptatibus habitos, fractosque, à monasticâ disciplinâ prorsus abhorrere. & hoc nihil aliud esse, quam perturbationem Ordinum, & confusionem sacro-

crorum inducere. Tantum abesse ut religionis incrementum quæreretur ; Inquisitionis præfectos mutato mollius nomine appellari episcopos. Per artem nunc theologos assumi ; vt quemadmodum nova imperia ; ita quoque egregijs virtutibus auctoritatem sanciant. Irrupturos mox aulicos illos. irrupturos alienigenarum heros, nullo patriæ amore retentos. Qui non conscientiam, non integros mores in comitia adferrent : sed auctororum ambitu evecti, ac dominationem cogitantes, alienæ tantum cupiditati inservirent. Neminem principum equis oculis libertatem aspicere. vltimum in principatu semper esse regnum. Nec divitias illas totas suas esse. benignam majorum liberalitatem partim in hospitalitatem, partim in compendium pauperum consulisse. manere adhuc posteros eorum. quo animo latius, parentum suorum beneficia episcoporum fastui, ac pompa tanquam instrumenta luxuriæ accedere ? Omnia se expertos consilia. jurisconsultos toto orbe Christiano quæsiuisse. nec laborare de jure, si leges valerent. Nunc cum imperio ageretur æstimare necessitatem. Si tamen Ordines secum miscerentur, fiduciam ponere in benignitate Regis. qui non suâ voluntate ; sed paucorum ambitione circumventus transisset in hæc consilia. Illum Ordines adirent. omnium nomine affarentur, causasque iustitiam repræsentarent. Hæc & plura hic atque ibi jactata, traxerunt Ordines in sententiam.

Eâ tempestate Geneva urbs antiqua, & studijs nobilis, passim à Belgis frequentabatur. Non tam liberalium artium causa, quæ Lovanii non

nij non minus laudabiliter colebantur : quam quod Gallorum sermonem simul edicerent. Cæterum novitate religionum, qua tunc maxime Genevenſes præter cæteros inſignes habebantur, offenſus Rex, litterarum commercio ejus urbis, Belgis interdixit. Et quo facilius lubricam juvenum ætatem conceſſis ſtudijs retineret, novam Academiam ex conſilio Viſglij, Duaci inſtituit. Neque ea res criminatibus caruit. Lovaniensibus potiſſimum in detrimentum ſui interpretantibus. ſolitudinem urbi redituram, in cujus ſolatium olim Academia ſubvenerat. Brabantia Ordines apud Gubernatricem ſupplices, & ob magnitudinem negotij rejeſti ad Regem, delegatos decernunt in Hiſpaniam, privilegia ſua memoraturos. Quippe ne abbatia in commendas transfunderentur, veterum Principum indulta caverant. Delegati cum aſſenſu auditi ſunt à Rege. ſcribente potiſſimum Gubernatrice, quam periculoſe leges verterentur, quibus publicus ſtatus innititur. Monasteria Abbatibus permiſſa, octingentos quòtannis florenos episcopis conferre jubentur. De Academia nihil mutatum. Antverpienſes ſeorſim legationem ornaverant, civium querelas, & vota laturam. Nam ſi metu Inquiſitionis advenæ tenerentur, moritura commercia referebant. *Scire ſe quidem nihil triſte ab episcopis timendum eſſe, nec alio conſilio inſtitutos, quam ut in custodiam*

MICLXII
Styls veteri.

am religionis vigilarent; sed hoc ipsum suspicacibus
 ternorum animis persuaderi non posse; & plurimum
 bi sua accessurum, si hoc incommodo absolverentur.
 ultitudinem non aliter vanis, & inanibus, quam ve-
 terreri: & malorum hominum deliramentis concus-
 m, stultè omnia in metus trahere. Philippus Rex
 liberaturum se præfatus, libellos recepit.
 éque pensatâ possessionem episcopatus in-
 ventum suum vacuum esse iussit. His audi-
 s, Geldrij, Frisij, Groeningenses, & Daven-
 ienses contumaciores reddebantur. Nam &
 si ab initio adventantes episcopos constan-
 ter repulerant. animati studiis Procerum, in-
 diam Granvellano ex omni parte quæren-
 um.

Medio tempore nuntiatum est discordare
 allias, & ingenti apparatu in civile bellum
 evolvi. Et à Carolo Rege aderant legati, au-
 lium orantes in ultionem sceleris erga se per-
 trati, cujus exemplum communis Regum
 usa postularet. suberat tamè metus, ne com-
 exi dexterarum verterent arma, & infesta signa
 elgis inferrent. Proceres in concilium voca-
 s Gubernatrix perpendere jubet, quid sibi
 gendum, & post triduum referre sententiam.
 gressi curiâ, multi ex his cum Auriaco conce-
 unt ad epulas, quas tum forte solemniore
 struxerat. Ibi de Granvellano plurimus ser-
 o. Iam enim plerisque videbatur elatior
 uàm ferri posset. Quippe sine illius suffraga-
 tione

tione neminem ad magna, & honorata ministeria provehi aspexerant. & si quid in Hispaniam scriberetur, haut aliæ sententiæ Rex accedebat, quam cuius ille auctor fuerat. tantam de se prudentiæ opinionem fecerat. vir sanè præstans, disciplina, & indole erectus ad magna, Regique charissimus, atque illo amicitiae gradu dignus, in quem consilij publici fata hactenus recubuerant. Hinc potissimum dolor, & indignatio, quod homo talis, & quidem externus, occuparet primum gratiæ locum apud Regem, & in secretorum omnium admitteretur consortium. Itaque ut sæpe alias, tunc quoque passim criminabantur, quod solus ille rempublicam regeret. quod ex libidine cunctos extolleret, aut deprimeret. quod sui ratio non haberetur, prævalente semper illius sententia, tanquam plus omnibus sciperet. vnum quidem è senatoribus esse; sed reverà imperij summam habere in manibus. & ob id, suis artibus Gubernatricem ad provinciarum regimen evexisse, non viribus, non experientia validam, ut reipublicæ munia sibi arrogaret, ex arbitrio statum formaret, ceterosque calcaret recentipotentia. Nil se in concilio quam numerum facere, egregie scilicet ornatos, vano, & supervacuo titulo, vno Granvellano in sacra, in profana, & in omnia regimen vsurpante. Non aliâ causâ novos introduxisse episcopos, quam ut invisibilibus hominibus, & sui similibus Ordines impleteret, ne qua pars reipublicæ Granvellanistis careat. mox fratres, mox cognatos & affines Concilio Statim illaturum. qui actiones

es Procerum observent, & apud Regem universos accusent, vt supplantatâ nobilitate ad Hispanorum arbitrium rempublicam instituant. Olim Principes omnia per Magnates egisse. nec pœnitere veteris status. ad stabiliendum imperium maximè pertinere, si ratio a vno, cura cum multis communicetur. Eundem obviam vanitati, & arrogantia hominis. Et hoc in exedito fore, si unanimis fuerint, atque vno semper ore assentientiam prompserint. idem velle, idem nolle, id est; amicos esse debere, qui societate velleris propiore nexu ungerentur. eâque concordia auctoritatem illius consuluros. Et instabat Auriacus, ut privatim nunc statuerent, quid post triduum dicturi essent in curia. Pauci quidem assentiebantur ei. Neque enim usqueadeo corrupti mores erant. plerisque adhuc privatas similitudines ac exercitibus, ut salutis publicæ curam non deponerent. Ab his igitur responsum, tres dies ad deliberandû dados, ut ab eo quod modicè placeret, medio tempore liceret recedere. neque convenire, ut privatim inter se de tanta re decernant, qui coram, & sub oculis Gubernatricis iussi essent ferre suffragium. Condicto autem die, cum super inopia ærarij, Gallorumque postulatis consulerentur, sinceris judicijs decrevere, referendum esse ad Regem. actumque ut Montignæus ea legatione ungeretur.

Inter quæ Hornanus ex Hispaniâ supervenit, Consiliarij Status titulo excultus. vetus odium

odium diuturnitate non exuerat. Statimque se factiosis applicuit. Cæterû Auriacus pluribus artibus nobilitatē juxta, ac plebem sibi devinxerat. comis, liberalis, magnificus, non contemptor, non superbus, commune nobilitatis vitium: solertissimè populo blandus, congressu & sermone familiaris, infimo cuique honorem reddebat, prorsus vulgari auræ commodissimus. totque bonas artes prudentia, calliditate, & solertia miscuerat; vitijs nisi plerisque Principum familiaribus, non corruperat. nihil temere loqui, egregiè dissimulare, aliud lingua præferre, aliud pectore claudere, tutissima quæq; metuere. magnæ sanè virtutes quoties in virum bonum, & civilia patientem inciderint. Ingenium ejus olim notaverat Carolus Cæsar, & reipublicæ quandoque grave, & periculosum fore prædixerat. Regi quoque paullò suspectior erat, quàm volebat videri. & ob id Flandriam ambientem, Hollandiæ præposuerat, eâ tempestate inopi, atque infirmæ provinciæ. Granvellanium quoque custodiæ causa abhibuerat Concilio Status; virum constantem, & obstrepere ausum, quoties à ratione abiretur, & justitia. Quæ res potissimum Granvellani invidiam inexpiablem fecit. Proceribus libertati ejus irascentibus, nec satis patientibus secundo gradu post illum consistere. sed jam furore, & ambitu cuncta compleverant. consilia domi

mi frequenter habere, apud Gubernatricem impotentiam criminari, consiliis ejus officere, nihil pensi habere dum è provinciis amoverentur.

Eò tandem res deducitur, ut Auriacus, Egmondanus, & Hornanus ad Regemerberent in hunc modum. *Ægris oculis Proceres summam reipublica in unum aliquem translatam aspicere. Quæ jam ut maximè incolumis esset, stare tamen non posse, nisi amoto Granvellano, cujus impotentiam omnes fastidire inciperent. se ad id consilio publico urgeri periculo. Malum esse displicere cunctis ut uni placeas. si quæ suaderent, etiam crederet, omnia in melius processura. Placida Parmensis imperia populum continere. Neque hac in ambitionem consili, cujus causas procul haberent. Pro beneficiis accepturos, si expungerentur è Concilio Status, ubi Granvellano præsentem, non indoli, non existimationi, ac ne sacramento quidem suo satisfacerent. Religionis curam diligenter acturos. Et illam hactenus inviolatam steterisse solitudine suâ: quæ dissolutis Granvellani moribus perire sensim inciperet.*

Rerum novitas ingentem Regi sollicitudinem incussit. Mox Debremonitii dominum edire in Burgundiam iubet. quem pridem Granvellano infensum, mutuas similitates exercere perceperat. Proceribus autem in hæc verba rescripsit. *Affectum animi vestri perfectum habeo. cur tamen res in præsens mutari deant, non video. si ex vobis alteruter excurrerit;*

D

cuncta

*Proceres
ad Regem
scribunt
ut Gran-
vellanum
amoveat.*

*Responsa
Regis
Philippi.*

*MISLETT.
Stylus v.*

cuncta ex liquido cognoscam. Regem me esse memini, & inauditum damnare non posse. Ingrata Proceribus epistola fuit. Quippe non obscure repulsi erant. & hoc ipsum in contemptum sui interpretabantur. Inde ad fortiora consilia respexere. & quod præsentissimum remedium rebantur, Generalia Ordinum concilia sollicitare incipiunt. Sed Gubernatrix decretum Regis in contrarium obtendebat. Nam inter plura alia arcana mandata, hoc ipsum diligentissimè iusserat Rex, ne absente se Generalia Ordinum comitia indicerentur. Cùm ergo mentionem eorum gravatè admisisset, plus indignationis factiosis accessit.

*Auria-
cus, Eg-
mondanus
& Horna-
nus è Con-
cilio se
subducunt.* Post aliquot dies, tres illi quos ante nomi-
navi Gubernatricem aggrediuntur libello, in
hanc sententiam. *Proceres saepe inter se miscuisse
sermonem de statu publico. qui ab exitio quantillum
abesset, ex his intelligeret. Novis opinionibus addictum
esse populum. militibus stipendia non dependi, toties
flagitata, atque promissa. blanditiis ultra pacari non
posse. exhaustum esse Regis erarium, & alieno ere-
gravatum. Parum abesse, quin importuna credito-
rum libido negotiatoribus Belgicis manus foris inji-
ciat, & commercia intervertat. Ista tot mala an-
teverti potuisse Generalium ordinum comitiis, usita-
to hætenus in anxiiis rebus remedio. Cùm ei verò di-
splicerent hac consilia, orare ut salutaris aliqua ratione
subveniret. Nam quod ad se attineret, abdicare
Concilium Status, in quo hætenus pro umbrâ ser-
vierint.*

vierint. Simul omnes abstinebant curiâ. nec precibus, nec auctoritate admutandam sententiam compelli poterant.

Deinde ut erant ad omniâ quæ agitaissent pervicacis animi, sumpserunt rursus tabellas, & ejusmodi verba ad Regem exarant. *Laudabile id quidem, quod indicta causa in tuos non statuas. Neque se Granvellanum reum facere. contra bene illi consultum velle; si adimeretur onus, supervacuum forsân; at certè cujus humeri magnitudinem non caperent. Causam si requiris, à malis publicis exigenda est. Ipsæ calamitates erudire possunt, quàm impares lacertos imperio subiciat. In Hispaniam, nisi per rempublicam foret, non unus aliquis nostrum; sed universi veniremus. Armorum strepitus, qui vicinas concutit gentes, ad intensiorem curam nos compellit, & in suas quemque cogit provincias. Attamen si verum scire vis, ex litteris nostris consequi potes. quarum fidei præsentia nostra, nec detrahet aliquid, nec adjiciet. De cætero rogamus, ut in bonam partem consulas, destitutum esse nobis Concilium Status. ubi in tempestivis simultatibus tempus terendo, magis graves, quàm utiles eramus. Difficile est cum eo vivere, qui modum nescit in imperio.*

In his motibus Proceres toti erant. cùm populus, nihil horum ignarus, non merito murmurare cœpit. Multi non tam Granvellano infensi, quàm Proceribus adstantes, maledictis agebant. Proceres enim af-

fectus omnium in se attraxerant. qui per creditas sibi provincias animis civium propius incumbentes ; cum amicos , & adulatores honoribus excolerent , & promptissimus quisque supra ceteros attolleretur , arcanum quoddam in omnes gerebant imperium. Igitur factionem , & contumaciam eorum vulgus laudare , Granvellani famam verbis , famosisque libellis , atque omni prorsus modo proscindere ; avaritiam , ambitionem , libidinem objectare ; crucem , & lapidationem meritum clamare ; utique postquam per multitudinem spargi cœpit , suasisse illum Regi , ut à Summo Pontifice peteret absolutionem sacramenti in auspiciis principatus emissi , quò sua civibus jura , ac privilegia eriperet. Sed longè aliter prudentiores æstimabant civiles artes , rerumque experientiam , & eruditionem atque eloquentiam in viro summam. virtutes amares , vitia non nocebant ; quæ sub umbrâ magnitudinis excusata latebant.

*Falsus
rumor
spargitur
Granvellani
in
capita
Procerum
percuſſo-
res com-
paraſſe.
Idē Pro-
ceres ſe-
dus inveni-*

Inter quæ Bruxellæ vulgatum , destinatos occultè in Procerum capita percussores , & Granvellanum esse , qui licitaſſet. Rumorem illum à magnatibus ultrò ad augendam invdiam compositum , multi intelligebant magis , quàm credulo populo persuadere poterant. Proceres verò simulaverintne metum , fide invicem data , acceptaque sacramento obstrin-

obstringuntur. Legem fœderis nemo meminit. Nihil in Regem; aut religionem meditarum convertit. Initium ab Auriaco cœpit. Egmondanus & Hornanus viva repente odia intulere. Hoochstratanus, Montignæus, & Bréderodius, spontanei sociavere consilia. Bergensem nulla sua injuria adjunxit. Ob æmulationem Granvellano adversus, premendi inimici occasionem arripuit. Plures inierintne fœdus, per scriptores non convenit. Multi enim ut nomina dare, & participes esse vellent, perpelli non poterant. & modestissimus quisque ab ejusmodi factionibus abhorrebat. Constat autem cœnantes apud Gasparum Scetum Regis ærarii, seu Financiarum quæstorem, inter vina, & facetias sortito tesseram quæfuisse. Fortuna eligendi arbitrium in Egmondanum transtulit. Ille signum flagitantibus dedit, ut factiosorum servitia nigro cultu instruerentur, & supra pallii latus, aut eo internitente filo morionis cucullum exprimerent. Postridie lugere omnes diceres. nisi quod eminebat in veste ludibrium, quod non obscure ad Granvellanum referebatur. Ea res multitudini grata, bonorum indignationem contraxit. sed ante alios Gubernatrix offendebar, quod non minus hominis famam, quàm religionis reverentiam ad risum, jocumque traductam aspiceret. Modestè igitur incusati Proceres,

loco cuculli reposuêre fasciculum sagittarum, sinuantibus funiculis in medio astrictum. tanquam invicti, quamdiu concordessent. Granvellanus autem publico ludibrio expositus, Mechliniam turbatus se recepit. Prudentique absentiam furori cedens, negotiis imperii in posterum abstinuit. Nam & nobiles ad solita Brabantiae comitia de more vocati, detrectabant contumaciter officium, affirmantes se presente eo haut unquam ibi vestigium posituros. Paullò post Burgundus quidam, nomine Villeta, in caput illius ferebatur comparasse insidias. Et ille tot simul malis perculsus, ut seque, & religionem infamiam absolveret, circumspectare ab initio cepit. Communicato cum Gubernatrice consilio Armenterius in Hispaniam mittitur. Erat ille ab epistolis Gubernatrici, rectae tunc fidei, quia mundum se avaritia animo ejus insinuaverat. Ad hunc nunciū Rex quid agendum sibi esset paullisper dubitavit. Deinde amicos in consilium adhibuit. quorum varia sententia fuit. Plerique in Belgarum Procerum contumaciam stomachabantur; quòd praescriberent Principi leges. quòd seditionem, bellumque molirentur. quòd inordinatis affectibus indulgentes, ad eandem volenda Regem adigerent, & contra fas imperii libidini eorum morem gerere aequum crederent. Rem esse altiore, quam ut concedi debeat. odium, & invidiam praeferre, ut abducto custode impe-

imperium ipsi invadant, & quod nunc alienum administrare coguntur, suum faciant. ausuros peiora, si prima processerint. Nec dissitas provincias aliter retineri posse, quàm si aliqui extiterint, qui Magnatum cervicibus incumbentes, actiones eorum observent, intra obsequii limites cohibeant, nec in noxias cupiditates evagari patiantur. Hæc quidem Rex favorabiliter audiebat. vicit tamen naturalis bonitas. simul discordiæ privata odia supergressæ timebantur. Haut ignarus quantum sceptri sui interesset gentem illam in pace relinquare. quod unum ipsi Carolus pater ante omnia commendaverat, & inter arcana imperii censi voluerat. Proceribus itaque in concilium redire jussis, tacito mandato Granvellanum evocavit, quæsito prætextu viam instituere jubens, ne id sibi extortum Proceres crederent.

Neque mora, Granvellanus prid. Id. Mart. ter sibi in Burgundiam pronuntiat. Maximianum Morilonum, præpositum Ariensem, archiepiscopalibus officiis substituit, virum virtute insignem, sibi que charissimum, simul & litterarum, atque eloquentiæ nervis instructum. Causam revisendæ matris in prætextum viæ accepit. & ob id Chantenottum, & Champignæum fratres unà proficisci mandavit. sed re verâ animum ad Hispaniam adcerat. struentibus fatis viam fastigio, quod inde ascendit. Quippe illum comitata est

*Granvellanus
provinciis
excedit.*

perpetua, & inconcussa felicitas : cùm eos
ferè ad ultimum fortuna fastidire , & tan-
quam fatigata excutere soleat , quos principi-
bus aliquando charissimos fecit.



NICO-

NICOLAI BURGUNDI
HISTORIAE
BELGICAE

LIBER II.

HACTENUS quidem adhuc privata odia videri poterant, sequens tamen furor anno MDLXIV exordium coepit. fatale saeculum discordijs; quarum initia, causaque in diversa parte terrarum variè struebantur. Nec decant vaticinationum ingenia, cum coeli aspectus nihil mitius promitteret. Superiores tres planetae una cum Sole, & Mercurio in Leone concurrerant. praesaga malorum sydera, ruinam, tragemque portendentia. Quippe eandem aetrorum faciem ante quingentos annos exitiosam populis didicerant. Sed nihil tristius à Belgis expectabatur, sedatiora sperantibus extruso Granvellano: cuius fortuna invidiae edens, liberiora factiosis scelera fecit. Quippe vir acer, summis adornatus virtutibus, & ex omnia fortè nataliū egressus, insigni constantia & auctoritate, consilio & prudentia regionem protexerat. Nec tristis Gubernatrix; sed dominationis paedagogum jam pridem exosa, materiam tranquillitatis avide arripuit.

Anno MDLXIV.
Stylo veteri

Confestim & sine mora Auriacum, Egmondanumque, & Hornanum ad se accitos in senatum redire jubet. Qui primò hærentes specie recusantium; postquam vero flagitarentur, ad pristina officia rediêre. Prima erat cura, necubi desiderium Granvellani esset: aut absentiam ejus sentiret respublica. Proinde summa fide, consilioque cuncta agebantur. nihilque intermissa rerum cura, subinde negotia in intempestam noctem protrahebant. Syncera etiam inter Statusque ac Privatum Concilium, & Finantias concordia; nisi quod viventibus oculis Viglium, & Barlaimontium aspicerent, occultis tamen odijs: *Quæ perinde non extinguuntur ut cœpere: sed sublato duce manent in partibus, & post certamen, metumque durant.* Huc accedebat facilis animus; perinde magnificus: & ex utroque benevolentia populi. Nam delegatos gentium, urbiumque hospitio, & convivij certatim inliciebant, potentia studio, & æmulatione magnitudinis. Haut ignari, Belgarum animos non alia arte facilius capi. Nec frustra fuit tam profusa humanitatis explicatio. Nam subinde à provincialibus nova tributa; & ex magna petitione semper aliquid auferabant. Quibus rebus Gubernatrici grati, sibi graves, cæteris luxuriæ exemplum, afflixere mores sæculi. Et si fateri licet, hoc initium fuit malorum omnium. Tantam enim magnificentiam, & ex
câ

câ inopiam, cupiditas excepit. cum nemo turpe crederet, quod lucrosum quomodo-
cunque auferre; ut succurreret necessitati,
quam luxus hiantem fecerat: pompæque sup-
peditaret instrumenta, prodigis sumptibus,
jam non consistentibus vnde cœperant. *Hæc enim est mortalium conditio, à vitijs degenerare in prava, à pravis in præcipitia, à præcipitijs in turbida, cum semel à virtute desciverint, per pacem temporum; & inde luxuries.* Siquidem adversa, quam prospera feruntur melius. Res secundæ impotentiam generant: adversæ moderationem. Philosophia opus est ad otium: fortitudine, & constantia ad negotium: temperantia, & justitia ad utrumque: sed magis in pace & otio. ex bello calamitas; & inde humilitas: ex pace lascivia; contemptusque numinis ex lascivia nascitur. breviter, in magna fortuna multa opus est justitia, & temperantia, ut conservetur status tranquillitas. Ergo auctoritas Procerum, quam bonis artibus struxerant, cupiditate & avaritia scædata, ad ultimum erupit in exitium publicum. Primo dignitates, & sacerdotia pretio cessere. secutæ mox usuræ, abolitiones, indulgentiæ, privilegia, & judicia; breviter, cuncta prostituta. jura & leges, divina atque humana polluta, quæstuique fuere. Nihil tam inexorabile, quod auri fulgor non flecteret: nihil tam flagitiosum, quod non mol-

molliret : nihil tam sanctum , quod non cor-
rumperet. Quidquid in privato Concilio
severitas expunxerat , in Concilio Status sta-
tim redimebatur. ubi non ex fide , & honesto :
sed ex libidine omnia , & sine metu procede-
bant. ignarâ , aut incredulâ Gubernatrice , &
quoquo modo acta , scrutari altius insolita. In
cujus secreta quo facilius proceres penetra-
rent , Armenterium Hispanum sibi adjun-
gunt , fidemque ejus per speciem familiarita-
tis expugnant. ut vere dicere liceat , nihil
mortalibus suavius quidem ; sed nihil quoque
periculosius amicitia ; in qua raræ felicitatis
est tantiboni metam attingere , indissolubili ,
securoque nexu , & non suspecto commer-
cio. Et Armenterius quidem antea rectus , &
innocens , ubi semel dulcedine munerum cu-
piditates solvit , subito pravus , par , similisque
ceteris , in concupiscenda pecunia , non mo-
dum , non terminum noverat. ut sua tege-
ret , aliena vitia dissimulabat : quorum
licentiæ Proceres fiduciam insuper præfere-
bant. Quippe muliercularum ingenia edo-
cti , assentationum , & adulationum illece-
bris Gubernatricis animum adeò devinxer-
ant sibi ; ut si quid Præses Viglius secreto
suassisset , protinus ipsa referret ad Conci-
lium Status : sine quo nihil agi , nihil ad-
ministrari permetteret. Hinc omnia ad Pro-
ceres vergere preces , & libellos illi excipie-
bant,

bant, magistratus, honores, officia mandabant; Nemo in gubernaculo minus quam Gubernatrix poterat. Neque adhuc tamen aliud, quam conditionis suæ statum venalem, atque insolentem fecerant. Postea id quoque accessit, ut magistratuum officia, hoc est; forum & jus, legum & tribunalium munia ad se revocarent. Iam primum apud illos privatorum negotia tractabantur. Si quis de justitia causæ apud magistratus diffideret, prætextu boni publici evocabat in Concilium Status. Iam vocatis in controversiam Gorcomio, Worcomio Salinisque Burgundicis, per modica, & crebra damna lacerabant patrimonium Regis, & judicia in quaestu habebant. Hinc fluxa magistratuum auctoritas, priscam severitatem, & innocentiam retinentium. & quod est perniciosissimum, jacebat Provincialium Conciliorum pressa, atque contempta reverentia, & sub pedibus sacrosancta potestas. Nobilitas veluti frænis exoluta, ad omnia contumax, nullum in legibus auxilium; cum vi, & armis resisteretur licitoribus, & imperia magistratuum ignava redderentur. Idque Ordines provinciarum egrè toleravêre. & vnde quaque querelæ in aulam confluerât. sed delegati Ordinū ingentibus onusti promissis, & sic remissi domū, tamdiu in spe retenti sunt, donec impetus spatio vaneſceret. Accedentibus insuper mini-

ministorum nequitijs, per quorum vestigia
quærebatur favor Procerum, & tanquam
internuncij responsa gentibus promebant.
Nam & hi muneribus venales, quo plura e-
mungerent, incredibili tædio lassabant pati-
entiam exigentium in aula ultionem. Sic
atrocissima quæque facinora impunè grassa-
bantur. crescentibus semper viriis, dilato se-
mel remedio. Domus rapinis afflictæ, spoli-
ata delubra, expilata monasteria, in omnes
audacia, denique terror urbibus intentaba-
tur. Quæ & ipsa maximè onerabant famam
Procerum tanquam facinus imperantium.
qui fontibus faciles, ad indulgentiam promp-
ti, & ad omnia connivendo, causam suspicio-
nibus dederant. Crebræ nunc querelæ, nunc
calumniæ de sacerdotibus percipiebantur.
alijs divitijs, alijs dissolutionem morum in-
familiencia traducentibus. & sic majestatem
religionis in ministorum sordibus contem-
nebant. Fuêre etiam, qui censerent adimen-
dam gladij potestatem huic Ordini, quem sa-
cerorum integritas à profanis curis secrevisset.
Prorsus immemores, quod eorùm majores
profusa liberalitate extulissent ecclesiam in
tantum fastigium. Forte autem Præpositus
Brugensis vacuum dignitatem per mortem fe-
cerat. Neque accessio Præposituræ quamvis
pridem destinata, Episcopo ante permissa est,
quam Laicæ jurisdictionis insignia ejurasset.
magnâ

magnâ cum indignatione ecclesiastici status, cujus hæc prima injuria noscitabatur. Præses Viglius iratior fremebat, quod inutili novatione majestatem religionis proijcerent. Sed consilia ejus suspecta erant, quasi idem timeret, qui idem esse cœperat, hoc est, Præposituram Bavonianam adeptus fuerat, lato imperio, titulisque amictam.

Itaque in tanta morum vecordia, nihil facilius erat, quam hæresim perrumpere. cum languerent judicia, non lex, non metus conciliabula retineret. Inquisitorum severitas, ante arrogans, atque implacabilis, in fastidium, risumque venerat. doctis reis, spiritum quem supplicio debebant, favore, ambitu, & ad ultimum pecunia redimere. Pro quibus Auriacus, & Hornanus non raro intercedebant. innixus uterque uxorum conscientia; quas in Germania genitas, ac Lutheranis imbutas sacris, patrius ritus non deseruerat. Plerisque mirantibus, & inter arcana imperij numerantibus, ne matrimonijs aliarum gentium, aut rituum, purpurati miscerentur. Quæ in re quoque ab initio adversarium Auriacus Granvellanum habuerat: nempe vaticinantem, quod aliquando potentia affinium, ad impotentiam abuteretur. Henricus Brederodius, & Florentius Pallantius Culenburgi comes subinde etiam damnatis aderant; & si possent, supplicio eximebant. audaces & turbulenti

bulenti homines. ac tunc quidem uxorum auspicijs ad alios ritus transgressi, metuebant legum vindictam. Nam quantum in se liceret, multorum exitus, paupertas, exilia ostenderant. Hinc sermo, & initium cœpit de mītigandis legibus. Quæ res exinde perpetuis contentionibus agitata fuit: donec religioni, & reipublicæ, nec minus diverso tempore, suis quoque auctoribus exitium attulerit. Non deerant qui aperte jam dicerent, haut aliud superesse remedium in corrupto, & ad discordias vergente populo; quam si contagio mollius haberetur, & lentus usus pervicaciam frāgeret, quam ignis, ferrumque debellare non poterat. Sine dubio malitia creverat, ita tamē ut nō & multi supplicijs absumerētur, ac maxime quorum promptitudo flagitij misericordiam excofferat. At hi contumaces adversus tormenta, nulliusque sceleris extra novitatem comperti, tanquam innocentes perire videbantur. unde miseratio in vulgum, quasi non utilitate publica; sed in favitiam legum vlticibus flammis sanguinem profunderent. Antverpiæ verò, & tumultus exortus est. levis, & modicus; qui tamen intra minas non confisteret. Christofferum Smetium ex Carmelitarum ordine ad sectariorum ministeria transgressum, leges ad ignem protraxerant. Fanatica multitudo ad spectāculum collecta, primo ut in turba, licentius fremere; psalmis & blasphem-

phemiis insultare, ferociusque agere. Iamque quod in ejusmodi audacia ultimum esse solet, saxi, fustibusque erumpens, præsentī, metu mortis lictorem exterruit. Ac ille reum rerum capitalium transegit ferro, fugaque se furentibus eripuit. Sed ne tunc vesania stetit, postquam desuisset esse pro quo certaret. irruptione in curiam facta, ultionem quam à lictore non poterat, à judice exegit. Magistratus foropellitur. armati per urbem vagabantur. & egentissimus quisque ex plebe circumspectare direptionis initium. sceleratum prorsus spectaculum: clausæ toto biduo officinæ, formam captæ urbis faciebant. Neque hæc seditio Proceribus displicuit. Leges in fastidium venerant. quas, ut magis invisas populo redderent; Hispanicæ Inquisitionis cognomentum indiderant. Nec minus interim de temperamento frequens inter se consilium habebant. & jam Gubernatricis animum explorare cœperant. Sed privata curia ex adverso nitebatur. hætenus sana, constans, innocentia, & sanctitate morum eximia. Hujus auctoritas in leges plurimum valebat. & proinde hac incolumi sperare Proceres mutationem non poterant. Ludovicus Nassovius suaserat Auriaco fratri, ut homines aliquot suæ factionis Privatæ insereret curiæ, & adversariorum vires accideret. Et eundem Nassovium in Belgio versatum ad concitan-

das discordias, post ipsas discordias demum sensimus. fax, & turbo sui sæculi. sine lare, sine bonis, sine familia, omnem spem, fortunam, consilium in turbidis habebat. Sectariorum partes in Gallia amplexus, bonorum suspicionem in Belgio non evasit: tanquam & hic seditionis semina sereret, ut semper esset, si bellum condicionibus in Gallia poneretur, ubi inter armatos vivere posset.

Eodem tempore Georgius Cassander, & Franciscus Balduinus, magna studiorum fama celebrabantur. Et Cassandrum quidem Hornanus, Ludovicus Nassovius Balduinum in arbitros religionis obtulerant. simul utrumq; excivêre sedibus, sed Cassandrum umbratica vanitas, & rudes aulæ mores, statim unde venerat in Germaniam rejccêre. Balduinus natione Atrebas, in adolescentia hæresis crimine postulatus, & post fugam proscriptus, ad Calvinum decurrit. Eodem usus doctore, quem auctorem novitatis habuerat. cui se celeriter liberalitate ingenii insinuavit. Erat enim formæ veneratione, & eloquentia insignis. sed Sanctorum Patrum lectione crebrò otium insumens, & exinde magistro suo discors, reconciliatus est Romanæ ecclesiæ. Vnde se Iurisprudentiæ studio totum applicuit, liberalium artium mansuetudinem, & consortia admiscens. Vtroque genere

nere disciplinæ ad famam provectus, Heidelbergæ profiteri cœpit. & ibi Ludovico Nassovio imprimis innotuit. Post illustribus Galliæ familijs, eruditionis, geniique beneficio immerfus; ut in Belgium venit, magnam sui exspectationem omnibus fecit. solers animo, obsequendi gratiâ, & civili congressu, nec minus officij comitate, ad ingenia principum vitam instruxerat. Nec enim novorum hominum deliramenta sectabatur, & rursus in religione scrupulum oderat. Humaniusque credebatur, iniquitati temporum cedere, pietatisque integritatem in paucis violare, quam vim adferre turbatis conscientijs, quas in contaminatis hominibus nulla unquam supplicia eluunt. Itaque Auriacus ad se accitum promissis oherat. & ad professionē publicam in Lovaniensi, vel Duacensi Academia destinat. Mox futurum spondens, ut favore proprij nominis, suoque, & magnatum suffragio accerseretur in Privatum Concilium. Rebus sic compositis tanquam brevi rediturum à se dimittens muneribus honoravit. in spem adductus, religionis arbitria suscipi posse, si vir tantus cum Viglio, Masioque, & Hopeno equatâ dignitate componeretur. Nam & Barlaimontium per Gasparum Scetum sollicitabat in societatem consilij; pecuniaria quoque in ipsū officia sua repromittens, si adversus Hispanicę Inquisitionis tristitiā unā consurgeret.

Quippe repulso Granvellano hunc jam titulum factionibus prætexuerant. Cæterum Barlaimontius vir sanctus, & innocens, virtute, & prudentia eximius, Granvellani partibus se junxerat. Ejus abscessu discordiis, odioque relictus, fidem & constantiam nulla tempestate libatas ad ultimum Regi servavit. Ex alia parte Balduinus tempestiva pœnitentia consilium suum damnavit. stultum ratus, pro securis, & præsentibus, incerta & præcipitia eligere. & ut quisque ei amicus, ita & reditum dissuadebat; dedecus, atque discrimen ostentans, si non resolveret leges, in quarum contumaciam duraret Rex Philippus. Non omisit Ludovicus Nassovius crebris cum nuntiis admonere promissi, & imminentium honorum blanditiis allicere: sed ille in Gallia Borboneis, Guiseisque juxta acceptus, & inde majora sibi præmia spondens; laborabat inter dissidentes finire discordiam, gravem paci, graviolem dominantibus, in quorum perniciem haut dubiè eruperat, Ergo Auriacus spe. sua frustratus, consilium mutavit. faciliusque quæ vellet perficere posse credens, si nullis curiarum frænis retineretur; Privatum Concilium cum Financiis expungere statuit, & ad suam curiam utriusque munia transferre. Parva res erat prima specie: sed sub titulo minus atroci reipublicæ vires, petebantur. Proinde ut ad eadem

eadem volenda Proceres impelleret, crebris sermonibus inceslebat; *Consiliarij titulum penes se, penes alios vim & potestatem esse. interim si accideret tristius aliquid, si flagitaret multorum annorum stipendia seditiosus miles, si hereticorum tumultus ingrueret, reddendam sibi rationem; qui non legibus, non ærario præessent: sed in hoc duntaxat haberentur, ut speciosâ dignitatis umbrâ, nova semper tributa extorquerent à populo. Pares nempe se toti reipublicæ. curaque sufficere, quæ frustra in plures spargeretur. Revocanda esse Privata curia, Finantiarumque officia ad Concilium Status, ut unius reipublicæ una tantum esset veluti anima, concordæque sententia. Multis æqua sentire videbatur, quò hæc pertinerent non satis adhuc animadvertentibus. Concilii formam concepit, ut duodecim primorum gentium equites in Senatum sublegerentur; judicia Mechliniam rejicerent; gratiam, abolitiones, & ejusmodi, Præsidium cum assessoribus permitterent; Ærarium ipsi regerent; minores curas delegatis committerent. Sed hæc consilia etiam suis auctoribus ardua videbantur. Nec enim suppetebat, quo pacto persuaderent Regi, inter tot obtrectatores, qui potentiam Procerum antè exosam, timere inciperent. Itaque diu secum expendentes, centuriones clam subornant, qui exposcerent in aulâ stipendium obæratibus militibus; & si differrentur seditio-*

nem in promptu assererent. Fortè & libelli curiæ oblatis, torpedinem justitię, & inde discrimen, in vasta hæreticorum frequentia querebantur. Ergo in tot malorum remedium, Gubernatrix contraxit Proceres in Concilium. Omnes uno ore dixere suffragium? Legatus in Hispaniam decerneretur, qui indicaret hæc Regi, & levamentum peteret. Ignarus adhuc Viglius quid Proceres machinarentur, & melioribus consiliis dirigens fata rei publicæ, loco sententiæ dicebat: *Sectarios latè corripuisse provincias; sed non esse desperatum remedium, neque auctoritatem imperij omninò projectam. Profectò si florent in republica leges; si pro modo flagitij magistratus animadverterent, minori negotio debacchantium illam colluviem tolli posse, quàm surrexerit. nunc verò nullum in magistratibus præsidium; & hinc scelera impunè grassari, & ab uno ad aliud, sine retinaculo transitum facere. sua tantum quisque impleret officia, atque uterentur remedio à majoribus reperto; hanc dubiè supplantaturos partem illam vulgi, & modicam respectu cæterorum, & planè timidam. Non unius quidem anni negotium esse, nec tot flagitia simul posse erui: quemadmodum nec uno gradu istos homines innocentia destituit. tempore opus esse. Virtus publica, ut sensim adulta, ita & sensim corrigenda. ab unitate auspiciandum; ut ad summam venias. neminem inde cœpisse, quò incredibile est pervenisse. esse in procinctu Tridentinum Concilium;*

lium : ne afflicti sacerdotum mores desiderium suum deterrerent. Addebat deinde. Haut aliunde proteri ministros justitiæ , quàm quòd plerique Satrapæ insolentiores , omnem reverentiam , & obsequium erga magistratus exuerent. Unde in ceteros impunitatis spes. liberiùsque vitia gliscere quæ primorum exemplo aluntur. Languentem justitiæ manum ad nervos revocare in expedito esse volentibus. nec ob id accersenda procul regis consilia. si provinciarum rectores præsidium militare lictoribus succenturiarent ; si abolitiones , si indulgentiæ , hæcenus promiscuæ , intra modum legesque coercerentur , mox redituram magistratibus reverentiam suam. Exhausti arary nullam in ministris culpam. Bello Gallico Regis opes attritus. aliter recreari non posse , quàm si vel Hispania , vel provinciæ novis tributis subvenirent. quæ autem hic extorqueat nemo , nisi sub oculis principis. cujus etiam maturam præsentiam tot simul reipublicæ vulnera implorarent. Nescire ergo se quòd pertineret destinare legatos in Hispaniam. quasi verò hæc hodie nova essent , & non pridem audita Regi. Si tamen decernere perseverarent , non adversari se quidem , si in hoc fieret , uti Rex Philippus acceleraret reditum in provincias. Sedit ergo sententia quæ legatum mitteret. Omnium consensu Egmondanus assumptus est. Erat enim propter militarem gloriam Regi acceptus : adhæc insigni corporis habitu , cujus apud principes fe-

re eximia est veneratio. Mandata quæ perferrentur in codicillos Viglius redegit. postero die in curiâ recitavit. Pauca omnino erant. Sectariorum multitudinem, justitiæ contemptum, & ærarij inopiam querebatur magis, quam exprimebat. Denique orandum Regem, ut occursurus tot malis festinaret in provincias. Plerisque probantibus quod facundiæ legati plura reservarentur, Auriacus ad occasionem intentus, meditato impetu in hæc verba detonuit. *Quid adhuc dissimulare convenit? sine ambage nuntiandum est Regi, hoc in statu salvam stare non posse rempublicam. Multitudo ex magnâ parte à religione majorum defecit. nec pares sunt magistratus tanto incendio. proprio vitio provinciæ laborant, propter sacerdotum mores sordibus maculatos, frustra contagio arcetur, cujus causa in visceribus alitur. Quid edictorum severitas hæcenus profecit, nisi ut atrocior succederet Inquisitio? neque hæc ipsa coercendis flagitiis satis valida. mitioribus remedijs seluenda sunt hæc macula. Ostentata tormenta ingenia exasperant. ex unius cineribus mille renascuntur. malè id cogitur ad quod persuadendo pervenire oportet. acrius stimulat qui conscientijs vim adfert. & intempestiva sunt remedia quibus delicta magis accendimus. imitandi sunt periti medici, qui interdum plus quiete, quàm movendo proficiunt. honestè cedit, qui temporì cedit; hoc est, necessitatem æstimat. Nemo mihi priorum sæculo-*

saeculorum innocentiam objiciat. Idem genius hodierna ingenia non conjungit. Neque olim panarii metus, sed sui mores quemque continuere. Ne irritamenta quidem eadem sectis nascentibus; cum adhuc intra paucorum, viliumque conscientiam concluderentur. tota hodie regiones huic disciplina accedunt. non mirum adeo videri non debeat, si plerisque Belgis impetus iste novitatis imposuerit. qui ut frangatur, relinquendus est sibi, in pingui, inertique licentiâ, ne ad insaniora adigatur necessitate. Vidimus quantum turba Valencenis, Tornaci, & Antverpia accenderit. quid futurum si plures simul urbes reverentiam exuant? Incertum est remedium quod pollicetur nobis Tridentinum Concilium. & ut vanum esse credamus, Germani non recipiunt. Exemplo eorum mitius vivendum est cum sectariis; quos ne catholici illic principes cruciatibus asperant. si crederem ad conscientias hominum valere supplicium, suaderem exquisitiorem quamque crudelitatem. sed cum per tot annos igne, ferroque nihil profectum videam; utilius judico detrahere aliquid horrori legum, quâ palam facere impares eas esse flagitijs. Priscorum temporum sectas gladius non delevit. eruditione, & eloquentiâ, vitæque exemplo revocati sunt erronei illi ad ecclesiam. His armis hominum animis vim inferimus. religio imperium despicit. nemo cogi potest, ut credat in vitis. Et hac solidiora pacis sunt consilia; quæ tamen Privata Curia senatores non recipiunt. malunt omnia flagrare

incendio, ut in turbidis undis largius piscentur. Unde enim iustitia ista corruptela, nisi ab ingentibus illorum vitiis, insatiabili aviditate cuncta protituentium? Non superarent tot divitiae istis hominibus è scholastico squallore in Concilium accitis, si muneribus nihil concederent. Scimus quo conducti sint stipendio, nec illud par esse, quod luxum, & pompam, & tam infames sumptus toleret. Vtinam tam modeste peccarent ut negari flagitia possent. Nunc si populo credimus, non aliter rectius quam auro tentantur. nec quidquam tam sanctè indulgent, ut non accipiant. sed ut promiscuè omnes avaritia non in simulem: accusare certamina, invidiam, simultates possum, & privati odij stimulos, quibus adversandi libidine invicem se lacefunt, & miserorum calamitatibus injuriæ suæ litant. Quis probe intempestivam Cancellarij Brabantiajurgandi licentiam, & exerceri solitas cum Masio contentiones? dicerem erupturas in publicam perniciem, nisi quis crederet à me malignius prolata, ad constandam invidiam. Interim scimus quàm turbida sint consilia eorum, quibus affectus officit. Non est igitur quòd in discrimen vocent innocentiam Procerum. quasi scilicet Governatores, ad infamiam cujusque lictoris libidinem centurias militum subministrare debeant. Ponant illi senatores modum animo suo, ne tam proni sint ad indulgentias, quas cum à nobis non impetraverint rei, in ista curia statim redimunt. Hoc est quod rempublicam funditus trahit. Nemo ad remittenda

mittenda scelera facilis esse potest, quin semper aliquid adjiciat malo publico. Nunquam mihi placuit, in tot Concilia curas imperij, & arcana distrahi. Sufficit omnibus Concilium Status. & hoc ipsum Proceres non rarò inter se secreto musitarent: ideoque nunc repeto, ut omnes intelligant, haut aliter tot malorum finem haberi posse, quàm si Privata curia, & Finantiarum officia, in Proceres transferat Rex Philippus: Conciliumque unum, veluti unum corpus, ex omnibus faciat. Postulandum hoc est ab eo disertis verbis, nullum alioqui fructum legatio habitura est. Tum conceptam à se formulam depromens, in intempestam noctem sermonem protraxit. Lassa Gubernatrix & attonita ad cœnam discessit, atque in posterum diem Concilium distulit. Ad hanc orationem Viglius diriguit. In se potissimum jaculatam viderat, & fundamēta imperii quati fenserat. Ergo anxius animo, secreta æstimationeolvebat, quid postridiè responsurus esset calumniis. Inter curam & meditationes insomnem noctem protraxit. Surgente die habitum corporis componens, rotantibus oculis linq̃ui animo cœpit. nervisque in stuporem actis, totum corpus sensus destituit. Exspiranti similem minister invenit. cum nec satis compotem mentis amici renunciarent, in ejus locum ad Concilium Status Ioachimus Hoperus accitus fuit. Vir antiquus, & gravis, sanctitate morum, & eloquen-

eloquentia excellens. Quædam de abroganda Inquisitione, derogandisque legibus, & confusione Curiarum mandatis adjecit; non tam volentē Gubernatrice, quàm non prohibentē. Post Calend. Ianu. digredientem Egmondanum Viglius oravit, ut vacationem sibi à Rege peteret. Ægritudinem animi in contemplatione doloris detenti, & fatigatum laboribus corpus prætendens: re vera apud amicos privatæ vitæ desiderium testabatur; *Pervenisse se ad extremum fastigij. decidere posse, progredi verò non posse. tempus esse subducere cervicem iugo tritam, & eripere se fortunæ fastidio. Rarò potentiam diuturnam, nec eodem statu fortunam consistere; quæ post satietatem, ferè desavit in eos, quos propiore amicitia gradu Principibus admovit. Posse reliquum ætatis sapientiæ concedi: quod in republica per indignationem, & discordias transmittendum sibi foret proceribus in viso; non aliqua sua culpa: sed quia flagitiorum impatiens, suaderet optima. Prospectare imminentes seditio- nes, per nimium magnatum in scelus consensum, per lateratam superstitionibus regionem, legibusque parere nesciam. & ni benignius aliquod astrum adfulserit, undaturam brevi civili sanguine. & hæc omnia privata vita se vitare.*

Interea Egmondanum in Hispania magno honore, donisque Rex coluit. Ea tamen quæ in Belgio agitantur tristior accepit.

Quem cum Alexandro Farnesio Gubernatricis

natricis filio à se dimittens, perferenda mandata dedit in hanc sententiam. *Gratissimis auribus legationem excepi. ex his quæ deferebantur cognosco sollicitudinem tuam. salutem publicam fidei tuæ diligenter commendo. Propter impendentem Turcicorum armorum necessitatem arctius in Hispania detineor. nec referre pedem inde possum, nisi ut fugitivo similis videar, ac desperare de successu victoria. ut proximo anno veniam, summa ope nitemur. Destino interim ad te ingentem vim pecuniæ, ut nominibus meis as alienum exolvās. De remedio justitiæ vos videritis, & integrum ad me negotium referte. Caterum religionis causam perfunctoriam non existimo. multa simul in contemplationem veniunt. quæ hoc amplius curam intendunt meam, quò propiori vinculo obstricta sunt fastigia, cæteris in rebus in eo stant consilia mea ut eligere possim. hujus longè alia est condicio. Rex per leges esse non possum, nisi & catholicus; nec proinde alius quàm catholicis imperare. Equidem spiritum nihil carius habeo ejus tamè naufragium longè vilius religione duco. Imò potius millies moriar (si per naturam liceat) quàm ut in hac re mutationem admittam. Itaque tres episcopos, cum Theologis, ac consiliariis aliquot vocabis in concilium. memèto viros eligas, fama conspicuos, nec deteriores ingenis. Inter eos unum tibi Rethovium præcipio. de cæteris ipsa melius despicies. Quo pacto optima præcipi possint constituere eos jubeo. ne plebeia ingenia inopia doctrinæ, posthac trahantur in errores*

errores animi. contaminati verò sanitatem debeant melioribus disciplinis. Deinde quis ordo servandus in scholis; quâ ratione juventus formanda quàm optimis studiis. Multi enim institutionis vitio degenerant à sensu majorum, & falsas sibi persuasiones induunt. Discutient denique an pristina legum pœna mitigari debeant. Nam ut relictum, sibi scelus, sine metu licentiam exerceat, mihi non est animus. Pœnam aliquam sanciri volo: & quidem validam, ad frenandam istorum hominum amentiam. Nam ut inulti, & securi degant, nec condicio publica tranquillitatis, nec divini cultus ministerium postulat. Quamvis interim ostentata supplicia nec mihi satis videantur conducere rationibus temporum. quia damnatos audio latantium more canentes, atque invicem se adhortantes, ultimam necessitatem excipere. Hæc ergo summâ agentur diligentia, prout magnitudo rerum postulat. ut si nos intentos viderint boni, resumant animum: mali verò despondeant. integra tamen omnia mihi serva.

Proceres,
episcopi &
consilarii
conveni-
unt.

Hæc relationis summa erat. quam III. Non. Maii Gubernatrici exhibuit. pronumque Regis in Proceres affectum, sincerumque gaudium. testabatur quod eâ legatione perceperat. Dein agitata quos ad exequendam Regis voluntatem adhiberent in concilium. Ex episcopis supra Rythovium, in Namurcensem & Audomarensensem consensum est. His adjuncti Iacobus Martins Flandriæ, Hippolitus Persin, Ultrajectensium præfides, Antonius

Antonius Meulenare consiliarius Mechliniensis, Iodocus Tiletanus Theologiæ, Wilmarus Bernarts Canonum, Professores. Viri eruditione illius temporis exculti, ac divini humanique juris scientia præter cæteros insignes. IV. Cal. Iun. in aulam convenêre. sed ne rei quæ ageretur suspicionem populo facerent, quæsitus est color. Concilium Tridentinum retractaturi fingebantur. Primâ die facilis & expedita deliberatio. Quærebatur de rectâ institutione fidei; de excutiendis sacerdotum ingeniis, non irritata vetustate ad ignaviam prolapsis. sed in eam partem Concilium Tridentinum abundè prospexerat. saluberrima ecclesiæ reperta, Christianisque principibus ferè placita, sine scelere verti non posse. dandam operam ut in mores venirent. Et in hanc sententiam facta est discessio. Sequens cognitio longâ contentione, variisque orationibus agitata fuit. Episcopi contumaciter intercedebant pro legibus, quarum utilitatem prioris temporis innocentia sanxerat. Proceres è diverso, quondam placuisse dicebant *acriora remedia, temporibus sic postulantibus. aliâ etatem, alios mores requirere. ut annorum vices, ta & vitiorum esse. Veteres sæculi sui innocentiam: se præsentis avigenum intelligere. in re-publicâ idem semper spectare oportere; non idem semper convenire. legum oportunitates non uno statu*

statu consistere. mutari solere pro temporum moribus, atque utilitatum presentium rationibus inservire. Non esse laudatam in unâ sententiâ perpetuam permansionem. Nautas aliquando non aliter, quam flectendo in portum pervenire. cum homines non possunt, flecti debere leges, quas mortales, & temporibus aptas prudentia condidisset. Eas quidem salubres olim, satisque validas fuisse ut pernitiosa excluderent: vitijs usque adeo non ferventibus; cum malorum initia adhuc in potestate forent: nunc tamen impares esse ad extirpandum virus quod tot simul gentes corripuit. adeo facilius excludi vitia, quam ejici. Sic diffusum est negotium. Auriacus verò postridie iussu Gubernatricis presentis temporis calamitatem exposuit. Nec immerito, inquit, commoveor nomine reipublicæ; quam circum, intraque sectarij laceffunt, & penetralia ejus crebris quatunt motibus. Remedia ista languentis ævi modum excedunt. nisi spòte in Labyrinthum currere placet, unde sera nos pœnitentia sine pudore, & damno non eripiat. si nescitis, atrocissima religionis sunt dissidia. In Gallis præsens habemus exemplum. nunc in se acrius, quam in nos olim incurrerunt. tam vastum regnum ita seditione distractum est, ut videatur aliter componi non posse, quam alterius partis exitio. Quid si sectarij nostri, quod suis nequeunt consequi viribus, excidio patriæ quarant, amulasque gentes specie auxilij accersant in laceratum discordiis imperium? acerrimus mor-

sus est irritata necessitatis. Neque ignoro adferri multa posse, quæ à derogandis legibus nos absterreant. Nam nec ipse leges temerè vertendas judico; si pares erunt flagitiis; si condicio sæculi inutiles non fecit; si tempora aliud non desiderent. Nunc etiam horrorem illarum iudices averfantur, & ad rigorem calculos non porrigunt. Et quid obsecro profectum tam exquisitis suppliciis? Carcerem, laqueos, cruciatus homines isti ridendo excipiunt. adversus terribiles flammarum apparatus rectos oculos tenent. nemo tot vexatus tormentis pœnitentia vestigia exhibuit. Et si verum volumus, cottidianis spectaculis animatur constantia. unus exitium, plurimum est illecebra. Adhuc verendum ne lacescit patientia exeat in furorem, & ad armorum necessitatem desperatio traducatur.

Hæc & similia Auriacus. Sed episcopi in contrarium arguebant: Sæctarios nullâ flecti clementiâ. patientiam nostram contemptim pro imbecillitate accipere. Diversum cæteris mortalibus illud esse genus hominum. reliqua scelera intra conscientiam latere. hoc unum non ante quiescere, quàm regnum occupaverit. ferro opus ut exscindatur tabes, priusquam in plures serpat. nundum eo gradu consistere, unde deijci non possit. sed ne quid damni coërcitio in rempublicam infundat, pœnarum gradus statui posse. Doctioribus, Ministris, relapsis, contumacibus ultima ponantur supplicia. pœnitentiâ flexi, exutis bonis provinciâ cedant. verberibus & exilio plectatur nequitia, quæ non ex alto processit; sed animorum simplicitatem occupavit. In omni denique animadver-

Episcopi
certant
pro legi-
bus.

sione dignitatis, sexus, etatis rationem iudices habeant. Si publicum exemplum non permiserit iracundia temporis, integrum eis sit repetitis calculis condemnatos ad triremes abjicere. Hac secreto mandari iudicibus posse, ut ipsi cognoscant neque gratiæ aliquid concedi, neque inexorabiles pœnas constitui. Cùm ferverent studia partium, his pro legibus, illis contra contumaciter nitentibus, jussi sunt episcopi in codicillos referre sententiam suam. Proceres autem ut subscriberent persuaderi non poterant. Rogati verò torpedini justitiæ remedium quærerent, variis dilationibus relationem frustrati, spatio tandem, languescere passi sunt: ut ferè in republicâ solent fastidita negotia. Odio præsentium, & ne sine causa mutationem legum postulasse crederentur, turbari cuncta malebant. Et nunquam postea de justitiâ quæsitum.

Inter quæ superveniunt à rege epistolæ. Concilii Tridentini publicationem mandantes, cum paucorum Anabaptistarum supplicio; quorum exitium non ausa Gubernatrix, ad Philippum detulerat. Tunc demùm recruduit ira Procerum. Aususque est Auria-
cus Egmondanum insimulare, blanditiis captum, nihil præter inanem promissorum pompam ex Hispania retulisse. Et ille non obscure arguebat inconstantiam Philippi Regis, nec verbis ejus fidem constare. Sed Gubernatrix cuncta in mollius flectebat, &
ad ro-

ad roganda Concilii Tridentini decreta co-
gebat Procerès in curiam.

Tridentum in Venetiarum finibus , inter
montium amplexus , modicâ planitie ad At-
hesim accumbit. Tristis scopulis, & horrida
regio. immitibusque damnata frigoribus, sed
amœna ædificiis civitas , Italicis sicariis quasi
ad asylum seponitur. In hac œcumenicum
Concilium magnâ frequentiâ celebratum,
ex loci vocabulo nomen accepit. Nam cùm
Martinus Lutherus sacerdotum odio ferox,
lacefferet passim tranquillitatem ecclesiæ: Ca-
rolus Cæsar in hoc totus incubuit , ut dissi-
dentes Germanias generali aliquo Concilio
revocaret ad pacem. Leonem tamen, & A-
drianum, & Clementem Pontifices nequic-
quam sollicitavit. Cæterùm gravescentibus
indies malis , desideratas diu curas Paulus
Terlius salutaribus auspiciis aggressus est. ac
primùm Mantuæ, deinde Vicentiæ, ad extre-
mum Tridenti conventum indixit. Huic
rei non alia civitas magis idonea , inter Ger-
manos, Italosque media, ab Hispanis, Gal-
lisque haut procul sejungitur. Sed cum
nunc commissi inter se bello principes Chri-
stiani, nunc aliæ, atque aliæ causæ, & suspicio-
nes, tam sanctum negotium interromperent:
Pius Quartus VII. Cal. Febr. MDLXIII. fi-
nem imposuit, ejusque publicationem Chri-
stianis Principibus passim cōmendavit. Trans-

*Concilium
Tridentinum pro-
mulgari
jubetur.*

missum ergo in Belgium à Philippo Rege, Proceribus examinandum traditur. Nec ea res minori acta est certamine. Duæ sententiæ senatum distrahebant. altera suadebat rogationem, quæ ubi mandaretur à Rege sine scelere differri non posset. altera patriarum legum reverentiam opponebat. Quo enim animo laturum populum, instituta majorum, & privilegia inaudito sibi eripi? scribendum ante ad episcopos; scribendum ad provinciarum rectores, ut iis saltem consentientibus nova illa decreta ferantur. Et hoc ultimum Gubernatrici non displicuit. Statimque misit per provincias. Responsum est ab episcopis, cæterisque Tridentinum Concilium publicari ita posse, ut regalibus, privilegiis, jurisdictionibus, indultis, nominationibus, visitationibus, patronis, pauperumque & ecclesiæ bonis non deroget. Hinc inter Procères magna opinionum circa ipsam promulgationem differentia. alii sub formula; alii sine exceptione faciendam suadebant. Digna res visa de qua consulere-
 tur Rex Philippus. Et ille quidem promulgationem sine exceptione mandavit; cætera se curaturum affirmans. Itaque Gubernatrix
 xi. Cal. Iul. uno exemplo scripsit ad archiepiscopos in hanc sententiam. *Publicationem Concilii Tridentini Rex in se suscepit. Idem mihi injunxit, ut in Belgio quamprimum perficerem. A vobis peto ne tam salutare differatis negotium. Si manu militari*

militari est opus, exigite à rectoribus provinciarum, nisi eligatis à me accipere. sed ne quis privilegiorum, aut constitutorum, vel alio aliquo prætextu excusationem obtendat: voluntas Regis est, sua cuique jura interrim salva, atque inviolata relinquere. Primus omnium archiepiscopus Cameracensis, nec sine contentione vulgavit. Eandem enim regionem necdum contagio latè insederat. Post multum demùm temporis Mechliniensis ægrius obtinuit. Ultrajectino pertinacius contradictum. Canonici insolitam severitatem aspernabantur. spernendi morum, & licentiæ assueti, cum archiepiscopo crebrò intendebant certamen, cujus frugalitatem pro vitiis oderant. Frisiorum civitates misère legatos in curiam. Opponentibus majorum mores, & constituta, responsum fuit, nihil adferri cur morarentur desiderium Regis, quod cæteræ provinciæ tam promptè absolverant. Nec eosdem nunc scrupulos sibi primùm moveri. plures provincias idem agitalle: sed manere jura sua cunctis integra, quoad disquisierit Rex, quid de his fieri placeat. Non movebant hæc Frisios, obstinatos adversus imperium. multisque contradictionibus auctoritatem Gubernatricis destructam, sequens motus languentem extinxit.

Cæterùm Rex Philippus, episcoporum, & theologorum, aliorumque sententiam priorem acceperat. diuque pensatis omnibus, & habito

*Responsū
Regis ad
episcoporum
sententiam.*

habito sæpius consilio, tandem in hunc modum rescripsit Gubernatrici. In quo rerum articulo conflictetur religio, ex te accepi. vim legum remittere non convenit. Quis ignorat quin facturus sim pessimo publico, si crescentibus sceleribus pœnas detrahero? Horum ultione nihil cordi magis habeo. ut iudices admoneas officii, fidei committo tuae. sine publico exitio segnes esse non possunt. Et certè qui tanti mali causam propius quaret, illorum ignavia meritò imputet. Nimum mansueti in fontes fuere. quod illi misericordiam, ego crudelitatem esse censeo. Proinde si qui tibi posthac meticulosi videbuntur, licet ad me scribas. ego vero animosiores substituam. Non deerunt in tam vastâ regione, qui officium colant, numinumque cultum vindicent. Inquisitionem supervacuanam non duco. tolli non potest, nisi ut divina simul, & humana jura violentur. Neque ego jam nova incipio. Casarea majestas quæstionem eam induxit. utor ergo provisus olim remediis. Cui enim non constat, longè tristiora expectanda esse, si securum iter relinquamus flagitiis? occupandi sunt heretici, priusquam ab illis occupemur. Quanto intentius nos agemus, tanto illis animus futurus est infirmior. Supplicii acerbitas bene vivendi disciplina est. Primò statim tempore, volo Anabaptistas in vinculis habitos ultimo tradi supplicio. jamdiu extinctos esse oportuit. Nec Egmondano cum ad me venit fidem dedi, interim eos me sine noxâ habiturum. Referenti quippe sectarios magno gaudio tormenta excipere; videret igitur, respondi, an publicè non conduceret, secretò fontibus eripere spiritum.

tum. De cetero quod ad eam rem attinet, episcoporum
 judicium sequor. Rectè illi censent insanabiles esse mi-
 sericordia hæreticorum animos. ita altè contumaciam
 perbibere, ut nisi cum anima superstitionem exuant.
 Fortius itaque inurendum est aliquid. solida mali-
 tia, solida remedia postulat. In communi periculo op-
 timum misericordia genus est, occidere. Si exempla
 non admittimus, qui consuli poterit ne peccetur? In-
 quisitores præter me intueri neminem volo. Læssant
 scelus securi. satis est mihi, si scandalum declinaverint.
 Ego ira populi me offeram; locumque inveniam despe-
 rata victoria. Codicillos episcoporum una re-
 misit, adjectis ad marginem notis; ut magis
 eluceret, quæ culpanda, quæ probanda credi-
 disset. De curiarum confusione mentionem
 non fecit. Ducem tamen Arschothanum extul-
 lit in concilium Status. tenacem religionis, &
 æmulatione familiæ Nassoviis pridem infe-
 stum noverat; & si pristina recrudescerent o-
 dia, securitatem sibi promittebat ex discordia
 Procerum, rarò noxia principibus, quoties
 ipsi partibus non accesserint. Accepta à Viglio
 ætatis excusatione, Carolum Tiffenacquium
 suffecit; prudentiam, bonasque artes in viro
 secutus. Joachimum Hoperum Tiffenacquo
 substituit.

Vbi hæc fama manavit in publicum, sum-
 ma populi turbatio fuit. Hispanicæ Inquisi-
 tionis auspiciis litteræ Regis mandare fere-
 bantur. Et pridem Inquisitionis nomen in

horrorem cesserat, cui atrocissima quæq; malignitas affinxerat. Criminabantur Proceres Philippum Regem à Granvellano obsessum; inter gentem Belgis æmulam, atque infensam cogitare servitutem provinciarum omnium, & in præludium ejus Inquisitionem præmittere. Quæ cuncta clientes licentius spargebant in populum. Nec crebrior alius sermo per circulos, & convivia, quàm, *velamentum* queri ad perdendam innocentiam. *jurisdictiones, & imperia* hominibus concedi, qui non jure, non legibus agerent: sed per vana, per calumnias, per nebulas suspicionum grassarentur in familias divitum. ademptum jam cuique commercium sermonis, paratis semper delatoribus, qui in foro, in conviviiis, in domibus, & undique uniuscujusque verba, nutumque exciperent. neminem fore insontem, qui inimicum inveniet ausurum accusare. tantam nulli potentiam, in quem superciliosa illa auctoritas non arrogaret imperium. nihil fascibus concedere, nihil sceptris deferre. Carolum Casarem criminationibus notatum, quod cum Lutheranis in Germania mitius vixisset. Parari in Germania exercitus, qui invisum Belgis tribunal per vim stabiliant. Alfonso de Canto, carcerem, vincula, compedes Bruxellis instruere. His rebus iter sibi moliri ad vertenda privilegia; ad extorquendam libertatem, Dominantibus semper invisam. Mera sine dubio insomnia erant. plebs tamen promiscuè credebat, querebaturque; sine veri, aut falsi discrimine; ut quemque metus,

dolor,

dolor, indignatio, conscientia impulerat. Hinc nefariæ voces, & turbulenti sermones, qui intra paucorum conscientiam ante occulti, tunc primum soluto metu vagabantur. Libertatem ejusmodi loquendi protervia Procerum aperuerat.

Fortè eâ tempestate inciderant Montignæi nuptiæ. Multi ex magnatibus ad solemnia convenerant. Incalescentes mero in Inquisitionem, & edicta atrociter perorabant; nec maledictis abstinabant in Regem. ad eò ut quidam obtestarentur sacramento, ni leges flecteret suas, ab invito se libertatem expectituros. Quæ vox ab astantibus excepta, & inde repens in vulgus, nihil modestiæ reliquum fecit. Positi ad valvas Procerum palam libelli; parentes, patroni, protectores novæ religionis appellabantur; & si animus sit pro libertate consurgere, promittebant non de fore populum. Quidam etiam mimographorum, & id genus ludicra carmina in sacerdotes, & episcopos spargebant; simul in Romanum Pontificem exonerabant virus infanientis ingenij. Nec quidquam eorum latebat Gubernatricem: sed de imperio Regis sollicita, à primoribus civitatum secretò quærebat, an supra remedium malitia consisteret. Plerisque omnibus consistere negantibus: Privatum Concilium cum Proceribus in curiam contraxit, rogatura auxilium. Anceps deliberatio

fuit, hinc Inquisitionis invidiam, inde obfirmatum Regis imperium reputantibus. Sententia Viglij litterarum regiarum publicationem differendam esse ferebat; quo in statu respublica esset ostendens. importuniora remedia illa pristinis malis. Monendos potius Inquisitores, ne iudicia, quæ in hæresim habent, ultra solitum intendant, vel ad aliena traducant delicta, & sine duritie potestatem exerceant. Huic mox consilio Auriacum adversarium expertus est. Liquidum Regis imperium sine contumaciæ scelere protrahi non posse. interim rem esse altam, plenamque periculi. quomodo tamen excusaturos, quod tot protelationibus deliberatam ejus voluntatem frustrarentur? Agedum, inquit Viglius, ego totam Regis iram in me suscipio. servata reipublicæ tranquillitas nos absolvet. Et videbatur Gubernatrix inclinatura in hanc sententiam; cum Auriacus irato similis, intonare cœpit; perfectum hætenus, ne quid amplius à se desideraretur. nihil litteris, nihil legationibus profectum. quid ergo expectarent? nisi patere omnino nollent Regi, ut omnem ipsi invidiam in Proceres reijcerent. Incerta consilij Gubernatrix, atque huc, illuc ex cujusque sententiâ fluctuans, accessit tandem tristiora suadentibus. quanquam irati populi insaniam & impendentia pericula satis prospiceret: omnem tamen fiduciam
in

n proceribus reponebat. Sed illi econtra maturabant exitium publicum. ut funestus rerum exitus probaret, consilium quod ipsi tradidissent Regi, fuisse optimum. Lætus ergo Auriacus, atque renidens, proxime sibi assidenti susurravit in aurem, visuros se prope diem ingentem tragœdiam.

Sed locus admonet, ut de initijs, & progressu Inquisitionis pauca disseram; quibusque causis ad hanc legum acerbicatem perventum sit. Hispania à Romanis subacta, frigente jam imperio, Alanis, Vandalisque Galliâ pulsis refugium dedit. Quos cum & illic Got-
Initium Inquisitionis.
 torum arma persequerentur, Genserico, & Gunthario ducibus trajecere in Africam. Got-
 ti vero tanquam non sibi, sed Hispanis ipsis vicissent, pristinis incolis coadunantur, & ex varijs gentibus vnum veluti corpus, & Christianum populum constituunt. Post multum temporis Rodericus Rex nobilissimæ filix stuprum intulit. Julianus comes puellæ pater, in ultionem sceleris Alanos, Vandalosque rursus accersit in Hispaniam. Qui permixtis sibi Iudæis, ac Saracenis, ingentique variarum gentium colluvie, opposita Africæ littorâ populis inundant. Hispanos congregi-
 aulos, varijs cladibus afficiunt. Postremo ad internecionem cæsos, & in Asturiæ compul-
 sos saltus, pro victis relinquunt. Inde Barbari jam securi, & sibi quisque regnum occu-

occupantes, in diversa distrahuntur imperia. sed nec infelicis exercitus reliquiæ in horridis suis montibus diu quievêre. Pelagium quendam regio ortum sanguine, ducem assumunt. Cujus fiducia cum Barbaris conferre manus ausi, & interdum victores, subegêre primum finitimos. deinde alium post alium Regem aggressi, dum cum singulis pugnant, magnorum incrementorum fundamenta collocant. Sed nihil adhuc quam sceptrum victis ademcrant; tributo contenti, quod capitatim pendere solebant barbari. Cæterum Christianis cum Saraceno non satis conveniebat, crebras iras exercentibus discordia religionis. Et barbari fere potentiores erant, quam ut timeri non possent. Itaque Ferdinandus, & Isabella semel & in perpetuum securitati consulere volentes dimittunt per regna præcones qui juberent omnes excedere regno, aut Christiano ritu imbui. Plures Mauri pene octo jam sæculis Hispaniæ incubantes, redditi sunt Africæ suæ. multos tamen natalis soli dulcedo retinuit. Qui ne simulata religione inter Christianos profani viverent, Ferdinandus atrocibus deterruit legibus, & ad eodem persequendos Inquisitores instituit. Sed ut potestatem illam sanctiorem efficeret, Dominicanæ familiæ peculiarem fecit. non habentibus tribunal erexit. leges, & cæremonias in eam rem utiliter reperit, & ad terrorem omnia

omnia instruxit. Dammati tanquam piaculares victimæ ad supplicia protrahuntur. solemni pompa sacerdotes præeunt, sacrum canentes carmen. Pone sacerdotes reus sequitur, croceo amiculo velatus, quod nigrantia geniorum simulacra, circumquaque interstingunt. mitram è papyro capite sustinet, in modum turbinis surgentem; in cuius apice humana eminet species, lambentibus flammis terribilis, quam circumvolantes geniorum figuræ horribiliorem efficiunt. pila ori inserta vocem impedit. Sequuntur hunc Abbates, & canonici pontificali cultu adornati. Post quos præsides, gubernatores, magistratus, & tota nobilitas. Crederes funus ad cremandum efferri. Et hæc est illa Inquisitio, ad cuius nomen Belgæ adeo exhoruerant. Multitudini utcumque formidabilis, cuius animos nihil magis quam rerum umbræ, atque oculis subjecta terribilia penetrant: tamen nihil in se habet, quod prudentiores deterreat. Cæterum vetustissimi Belgarum inter sectas quoque iactati fuisse. adeoque hæresis anno DCCXII furialibus facibus Gandaveses armavit in mutuum exitium. Eam tamen non ferro, non metu legum, aut sanguine: sed morum disciplina extinctam comperio. Exin continua pax, ac durata in Romanam sedem fides, & longa securitas ecclesiæ, cuius tranquillitatem

anno

anno M c c c c x l i v homo plebejus Duaci sollicitare ausus, petitis ab Archiepiscopo iudicibus, violatæ religionis pœnas primus exolvit. Urbanis magistratibus insolitam sibi quæstionem exercere non audentibus. Quippe canonistarum suffragia Pontificio foro peculiarem fecerant. At posteaquam Martinus Lutherus tentare publicam animorum pacem, & in Christianorum exitium crescere cœpit: religionis inclinationem excepere leges & iudicia, ad extinguendam tabem composita. Ac imprimis Leo Decimus Pontifex maximus in contumacem Lutherum atrocissime detonuit. nec contentus censura ecclesiæ; insuper Hieronimum Alexandrum Præpositum S. Ioannis Leodiensis, Protonotarium, ac bibliothecarium apostolicum legavit ad Carolum imperatorem, audaciis insanæ ultionem provocans. Et quidem Cæsar habitis Wormatiæ comitijs imperij, postquam Lutherum publica fide interposita eo accitum, fatentemque palàm scelus, frustra sollicitasset ad palinodiam, illic unde venerat secure redditum, severissimis sanctionibus proscripsit. Legesque has omnium primas postr.

Non. Maij M I c c x x i in sectarios vibravit.

I. *Ne cum Martino Luthero hospitij, vel commercij jura misceto.*

II. *Quisquis cum habuerit in potestate, plectito, aut vinctum Cæsari transmittito.*

III. *Illicitis*

III. *Illicitis ejus commentis ne adhareto; adherentes cum ecclesia in gratiã redeunto, aut legibus plectuntor.*

IV. *Damnatorum bona fisco, judici, delatori, addicuntor pro equalibus partibus.*

V. *Famosos, vetitosque libellos, seu probrosas imagines ne parato, paratos exurito.*

VI. *Typographi quæ ad religionẽ pertinent sine censura Ordinariorum ne exeudunto. in cæteris à Cæsare facultatem postulant.*

Cæterum prævalescente impetu novitatis, successit inquisitio; & ipsa suis armata legibus. quam primus omnium Franciscus Hultius Brabantix Consiliarius anno MDXXXII in Belgio exercuit. Iacobus Laurentius Mechliniensium Præses ei præerat. viri boni, industria validi, moribusque infontes, apud Cæsarem tot virtutibus commendari promeruerant. Cæterum plerisque hanc potestatem Pontificio foro-peculiarem esse contendentibus; Adrianus Sextus diplomate firmavit. theologos tamen aliquot in assessores Hultio attribuit. Ei postea Clemens Pontifex jurisdictionem ademit, Cardinale à Marca episcopo Leodiensi succedere jussit. Nec à Marca tot simul curis par esse poterat. Itaque precibus Cæsaris Pontifex indulgens, anno MDXXVII res quæsitores Belgio assignat. Præpositum anonicorum regularium Asprensium Flanriæ imposuit. Præpositum Scholarium Monsensium Hannoniæ, atque adiacentibus provin-

vin-

vinciis. Iacobus de Montibus Decanus Lovanienſis ſevero atque implacabili ingenio erat eoque accommodatior vitijſ temporum, Brabantia, Hollandia, Zeelandia, Friſia, præfectus eſt. Multis ille vecordiam doctrina excuſſit. plures flagitium ſupplicio finiêre. Poſt ejus mortem, cæteros ut functione illa indignos, amotos accepiſimus. Ergo Paulus Tertius Pontifex anno MDXXXIII Renardum Tapperû theologum atque decanum, Michaëlemque Drachium, I. C. & utrumque profeſſores Lovanienſes ſubſtituit. In quorum locum Pius Pontifex anno MDLX Iodocum Tiletanum Præpoſitum Wallecourtij, necnon Michaelem Bajum canonicum, theologos Louanienſes inſtituit. Quibus Cæſar prid. Cal. Iul. MDL. querendi leges præſcripſit in hanc formulam.

Inquiſitores, & delegati, adſcito tabellione commiſſas ſibi viſitabunt provincias impendio publico. A magiſtratibus, viriſque pijs, & integris diligenter quarent in hæreticos, aut non perfunctoriè ſuſpectos. Qui damnatos habeant libros, qui legant, qui conuenticula in quibus de religione & ſcripturis tractetur, foveant. qui hæreticorum fautores, qui receptatores. Tabelliones, ſcriptis elogia mandent atque cuſtodiant.

Fidem teſtium haut aliter explorent; quam juriſſurandi religione obſtrictam. illos interim ſerio admoneant, ne vel invidia, vel odio, vel alio pravo affectu quemquam inſimulent.

Qui

Qui eâ lege detulerit, ut nomen ejus non inferatur logio; ne admittatur in testimonium.

Ea quæ deferentur occulta maneant. Nomina denuntiatorum, aut testimonia, haut aliter Inquisitores publicent, quàm si adversus reos judicium experti fuerint.

Delatores interim indifferenter audiant. Cum sinceram fuisse delationem constabit ex aliorum testimoniis, delatum vocent in jus, sine respectu nullitatis prioris denuntiationis.

Si quis invidia, vel odio, aut pravo animi affectu falsò deferat; iudicibus & magistratibus, aut supremis curiis plectendus tradatur.

Quisquis ad Inquisitores vocabitur, venire debet; cujuscumque tandem auctoritatis, vel condicionis, sive præfides, sive consiliarii Provinciales, aut magistratus, aut consules, vel senatores. Eosdem ad juramentum compellent, dicturos se ex animi sententia, quæ vel scient, vel rogabuntur; utrum ne cognoscant hæreticorum quempiam, aut vehementer suspectum.

Qui testimonium invitus dixerit, aut omnino perhibere detrectaverit, ab Inquisitoribus admonebitur. Si admonitus non paruerit, tanquam fautor rapietur in judicium; aut arbitraria plectetur pœna.

Et si in pristina contumacia laicus perseveraverit, ex edicto tanquam fautor hæreticorum plectetur, adversus ecclesiasticos jure agetur.

Præfides, consiliarii, iudices, prætores, vasalli, & generaliter quicumque officiales, magistratus & subditi, Inquisitoribus, tabellionibus, aliisque ministris auxi-

lium præstent. tutos eos ab injuria reddant. contumeliam inferre ausos pœnis coërceant. Si quis neglexerit, aut dissimulaverit, ut fautor plectetur.

Hi, quos liquebit esse hæreticos, aut in edicta peccasse, vel qui duorum testimonio, vel alioquin legitime ejusdem criminis convicti fuerint, comprehensi compingentur in carcerem. Iudices & officiales eam in rem præstent operam suam. inviti, & negligentes pœnâ fautorum plectantur.

Inquisitores à Cæsare litteras accipiant ad compellendos iudices, & magistratus in auxilium. Nam & Cæsar supremis, ac Provincialibus Curiis mandaturus est, ut de invitis, & negligentibus pœnam sumant, vel in eos se animadversurum. Ecclesiastici, ab Inquisitoribus comprehensi, condantur in carcerem Concilii Provincialis, aut ordinarii. adversus quos agatur sine strepitu, aut forma judicii. Lite instructâ è Concilio Cæsareo nonnulli adsciscantur ad ferendam sententiam.

Quisquis ab Inquisitoribus in hoc eligitur, de causa cognoscere debet, & ad absolutionem, vel condemnationem rei suffragium promere.

Concilium quoq; Provinciale cognoscere, & pronuntiare cogatur, si ab Inquisitoribus interpellatum fuerit.

Si quis gravabitur, aut omnino detrectaverit conferre operam suam, debent hoc ipsum Inquisitores denunciare Gubernatrici, aut privato Concilio. Si Inquisitores adscito sibi Consiliario aliquo degradandum esse reum pronuntiaverint, laicus iudex sine mora de degradato sumat supplicium.

Si ex

Si ex elogio appareat laicum edicta transgressum esse; Inquisitores negotium conferant cum consiliario Casareo. ex cujus relatione Provinciale Concilium in fontem secundum edictum animadvertet.

Sed ne interim Inquisitores incurrant periculum irregularitatis, veniam expectabunt à sede Apostolicâ.

Interea ad conficiendum elogium, Consiliarium sibi adsciscant. qui, si in edicta peccatum videat, magistratibus regionis, aut Provinciali curia, & procuratori Generali elogium communicare debet, ut adversus fontes litem instituant.

Si laicus ex elogio suspectus appareat, in edicta tamen peccasse non probetur: tunc Inquisitores adscito Consiliario, vel perito aliquo à Provinciali curia delegato, de causa cognoscent.

Similiter si lite coram laico instituta, in edicta peccatum esse non liqueat; reus tamen aut suspectus, aut jure communi plectendus videatur: utique judex reum absolvet ab instantia: ad Inquisitorem tamen transmittet, ut cognoscat ille, an ex integro in jus vocari debeat.

Provincialibus autem curiis mandat Caesar sub poena indignationis, ne Inquisitoribus impedimentum facessant. & si cōtroversia inter eos oriatur Gubernatrici denuntient.

Officiales, & Ordinarii molestiam Inquisitori non exhibeant: alioquin ecclesiasticis censuris deterreat eos Inquisitor, aut Gubernatricis opem impleret. illa vero subsidio erit Inquisitoribus, cavebitque ne tam sanctum differatur negotium.

Sed nec è contra Inquisitor, Officialis, aut Ordinarii jurisdictionem perturbet.

• *Cùm alterius provincia incolæ ad Inquisitorem deferentur; elogium ille transmittet ad Inquisitorem domicilii, ut de crimine cognoscat.*

Inquisitores quoque pastorum mores expendant, an viri boni, & sinceri, an catholici sint. si qui mercenarii deserto monachorum habitu pastoralia subierint officia, submovebit eos Inquisitor; quamvis ecclesiastici judicis consensu rationem vivendi, cultumque mutaverint.

Pastores palam foventes concubinam, aut qui ceteris scandalo fuerint; item indoctos, & inidoneos, episcopi, & Officiales, ex relatione Inquisitorum submoveant, dignioresque substituant. salvo jure colationis, & presentationis. Si episcopi, aut Officiales parere detrectaverint, Inquisitor imploret Gubernatricis auxilium.

• *In ludimagistris famam, & mores observet. simul quid juventuti prælegant. si quid emendandum duxerit, denuntiet iis qui subrogandi jus habent; ut vel ipsi corrigant, vel si videbitur ludimagistrum dimittant. Qui si hoc ipsum facere gravabuntur, Gubernatrici denuntiet. Inquisitor denique in libros inquireret, ne damnati, aut suspecti excudantur vel distrahantur. item in mores, & familiaritates typographorum, & bibliopolarum. si quid corrigendum erit, statim emendet, ex magistratus aut curiæ Provincialis suffragio.*

• *In primis ea adhibenda est cura, ne pium hoc negotium*

tium ex difficili reddatur impossibile; simul ne emungant, aut deglubant populum Inquisitores. Et ante omnia remedium adhibeant his, quæ sine periculo religionis, aut detrimento reipublicæ ferri non possunt, persuasumque omnibus reddant, se non quæ sua; sed quæ Christi sunt querere. in hoc potissimum intenti ut à Belgio contagionem arceant.

Inquisitores eorumque ministri, stipendium à Cæsare accipiant.

Impensas captura & carceris præstabunt iudices, qui manum reo injecerint, quas rationibus Cæsaris imputent.

Philippus Rex III Cal. Decemb. MDLV, sicut antè diximus, imperium adeptus, hæc parentis sui præscripta diplomate corroboravit, & sub titulo nominis sui tulit ad populum. Sed medio tempore alia, atque alia edicta. gliscen-
tibus indies novis sceleribus, quibus sequentes leges obviam ibant. Primæ illæ Anno MDXXVI ultrà multam nihil inflixerant. quas An. MDXXIX transgredi capitale fuit. Mox MDXXXI. MDXXXIII. MDXL. MDXLIV. & MDXLV. variè auctas: dein MDXLVI intensas; atque MDXLIX interpretatas, ad ultimum Cæsar III. Calend. Maji MDL in unum omnes corpus contraxit, & hanc tabulam populo proposuit.

Libros Martini Lutheri, Joannis Oecolampadij, Ulrici Zwinglij, Martini Bucerii, Joannis Calvinii, editionesve ab universitate Lovaniensi proscriptas, ne vulgato, ne distrahit, neve legito. Famo-

fas, & probrosas in religionem imagines ne fingito. fictas ne retineto, ne distrabito. sacras imagines ne violato. secretos cœtus ne agitato. à conciliabulis, & conventiculis abstineto. Extra theologos ab universitate admissos, de scripturarum sensu sermonem, controversiamque nemo misceto. Proferendi, differendi, concionandi illicita jus non esto. Qui secus faxit, perduellis esto. ex die criminis intestabilis esto. alienandi facultatem ne habeto.

Pœnarum gradus sunt. pœnitentia ducti, si viri, gladio plectuntor. fœmina in terram viva defodiuntor. contumaces igne cremantor. bona universorum in fiscum rediguntor.

Domum sciens ne aperito sectariis. victum, & amictum ne administrato. ad Inquisitores vel magistratus deserto. quod si quis earum rerum præscriptum excesserit, noxia par ceteris esto.

Qui imprudens hæresim contraxerit, & innocenter habitam legitimè maledixerit, si de religione sermonem sparserit, relapsus habetor.

Qui suspicionibus diffamatus hæresi maledixerit, aut ex ea causa pœnas dederit; amplexus illicita, etsi in edicta non peccaverit, relapsus habetor. Relapsi ultimo supplicio, cum publicatione bonorum puniuntor. Suspecti vel ad pœnitentiam admissi, ad magistratus, dignitates, officia ne assumuntor.

Peregrini ad incolatum sine testimonio parochi ne admittuntor, suspecti habentor, in jus rapiuntor.

Patroni & magistratus territoriorum, flagitia ad laicum judicem spectantia animosè vindicant. alioquin

quin imperio & jurisdictione privantor; arbitrariam mulctam incurrunt.

Inquisitoribus cum in jus vocant, aut in vincula ducunt subsidio sunt. si ad persequenda ea, quæ ad Inquisitionem spectant, concurrere velint, admittuntor. Procuratores fisci negligentibus, & dissimulantibus dicam scribuntor.

Archiepiscopi, episcopi, archidiaconi, abbates, prelati, capitula, vicarii, Officiales, Pontificii judices, atque Inquisitores in sacerdotes hereticos judicia exercentor.

Ad perpetuos carceres damnati, vel ad palinodiam admissi; si præterea in edicta deliquerint, seditiosus egerint, aliudve turbulentum peccassint, magistratus publicationem bonorum persequuntor.

Hereticum ad Inquisitores, episcopos, vel parochos deserto. transgressorum edictorum ad magistratus. qui celaverit, fautor habetor, pœnâ vindicator.

Delator dimidium bonorum convicti auferto; ita tamen, si ultra centum libras Flandricas in bonis non habuerit. eorum quæ amplius centum in bonis fuerint, dimidium percipito.

Qui conciliabula, & conventicula indicasset, si particeps fuerit, impunitatem ejus rei habeto. si non fuerit, dimidium bonorum centenarii, decimamve eorum, qui centenario majores erunt, auferto.

Judices provinciales de his delictis cognoscuntor. magistratus municipales si prævenerint, judicium exercentor. bona tamen principali fisco addicuntor, deductis impensis. salvo tamē jure XII. Cal. Decemb. MDCXLIX vasallis præscripto.

Pœnas legum arbitrari, vel mitigare fas non esto. qui faxit, dignitate, & officio privator. ad magistratus, & honores inhabilis esto. pœnam arbitrariam incurrito.

Fugitivi, & contumaces pro convictis habentor. qui pro fugitivis Imperatori supplicaverit, ad publica munera, ad honores, ad postulandum indignus esto.

Artem typographicam sine veniâ ne exerceto. nihil sine facultate Ordinarii praelis committito. Qui secus faxit, & illicita imprefferit, pœna sectariorum plectitor: si licita; exilium, & quinquaginta libra pœna sunt. domini pro familia tenentor. famuli extra officinam heri ne imprinunt.

Facultatem imprimendi, nisi boni nominis, nemo impetrato. Qui facultatem impetraverit, juramentum præstato, nihil extra provinciam, citrà censuram excusurum. nomen, & domicilium, simul & compendium diplomatis libellis præfigito.

Ante distractionem librorum, Ordinariis aut vicariis exemplar transmittito. sin secus, arbitraria pœna plectitor. Bibliopola sine facultate ne sunt. librorum non privilegiatorum quæstum ne faciunt. Editiones extra provinciam excusas ante censuram Ordinarii, aut vicarii ne prostituunt. alioquin si illicita distraxerint capitale esto. si licita xx. Caroli pœna sunt.

Boni nominis bibliopola sunt. in hæc leges juranto. extra civitates ne habitant, neve distrahunto. inventarium licitorum, & illicitorum librorum in officina

officina habento, vel centam Carolis mulctantor. Magistratus municipales, cum eruditioribus bis quotannis officinam scrutantor. bibliopola magistratibus officinas aperiunt. præter bibliopolas nemo venundato.

Ludum litterarium sine venia magistratus & parochi, vel eorum quibus hac provincia mandata est, nemo aperito. noxa XII. Caroli sunt. iteranti, pœna dupli, cum exilio. boni nominis professores sunt. libros ab universitate Lovaniensi præscriptos juventuti prælegunt.

Harum legum aterna auctoritas esto. ac ne in oblivionem veniant; singulis trimestribus publicantur. magistratus, si omiserint decem Carolos fisco præstanto. secunda culpa duplo plectitor. tertia pœnis legum tenetor.

Ac ne tum quidem omissum, quin multa, & diversa Antverpienses quererentur. Terrebat illos præcipue quod cum inquinatis hominibus miscere hospitium, & inire commercia vetabantur. Igitur Cæsar VII Cal. Octob. MDCXL. leges suas ad ultimum interpretatus, hæreticos in fraudem legum tantum, alienandi jus non habere edixit; advenasque passim hospitio suscipi posse, si nihil irreligiosius, aut seditiosius dixerint, egerintve. Sic tandem ei rei pacem paravit, quoad sequens temporum malignitas, rursus in edicta conurgeret.

Ergo ut istuc redeam, unde me necessitas paullo longius abduxit; posteaquam litteræ

Regiæ, (quas supra retulimus) à præcone vulgari, & in fontes pœnæ revocari cœptæ; immanè, quantam feralis illa vox excitaverit faciem. non jam solum territa plebes seditiosius fremere: sed & omnis factio nobilium. totaque provincias murmur & insania pervadere, hoc non esse regnum exercere, sed tyrannidem, cum alijs mortem, alijs exilium, omnibus metum prætextu violatæ religionis intentet Rex Philippus; ut singulorum bonis re vera inhiet. non se adeo stolidos, ut ignorent, quæ sint officia principis, quæ populi. debere se obsequium, cætera liberos solutosque. Proinde si pergeret ille tentare, quæ extrema sunt in servitute, inventurum qui armata opponent corpora sua, bello honestius, quam liëtorum manibus perituros. Hæc & ejusmodi per cuneos, ac conventus promiscue jactabantur. Nam plerique re vera credebant Hispanicæ Inquisitionis adferri initium.

Eodem tempore Maria Portugalia Regis filio genita, in Belgium venit. Alexandro Farnesio Gubernatricis filio paullo ante desponsa; & ad eandem accersendam comes Mansveldius unà cum familia in Portugalam concesserat. Nuptiarum dies pro magnitudine fortunæ apparatibus insignis, multos mortales exciverat. Nam & pater Octavius magna Italorum juvenum manu advenerat. ac ne studio magnificentiae Belgæ vincerentur, cultu ad
pom-

pompam exacto, hostiles ludos ad invidiam instruxerant. Mensis November erat. in hoc ultima dies S. Andreae facer, magno honore aurei velleris equitibus colebatur. Quippe patronum eum majorum pietas huic Ordini præscripserat. Cum igitur solita sacrificij solemnia ipsos proceres cum reliqua nobilitate corrogassent in templum; Præses Viglius Ordinis Cancellarius pro concione exponere cœpit; *Splendidissimum hunc Ordinem, haut alia causa cœpisse originem, quam ut religionem & concordiam, maxima regni præsidia, Proceres alerent. Basim, & fundamentum reipublicæ religionem esse. sine illa humanarum rerum, regimen stare non posse. tutelam ejus omnibus incumbere; ac in primis Principibus viris, ad prodendum in vulgus exemplum. Ceteros mortales Regibus subijci. Reges autem Ecclesiæ. nec eam esse aliam quam Romanam; hoc est, Christi Ecclesiam, quæ à temporibus apostolorum continua serie ab nos descendens, Beatum Andreæ huic Ordini patronum dederit. Eundem, sicuti memoria traditur, idolis, sacrificare jussum, Agææ proconsuli intrepide respondisse, se cotidie pretiosissimum corpus, sanguinemque domini nostri Iesu Christi æterno patri in victimam offerre illam esse veterem hereditatem ecclesiæ, ab ipso Christo nobis testamento relictam. multos olim ecclesiæ expertam hæreticos: neminem tamen hætenus inventum esse, qui in sacrificium consurgeret, tantique sacramenti veritatem in quæstionem revocaret. Hanc primum ætatem oppugnasse sanctissimum mysterium. Nec habitura*
fuisse

anno MCCCCXLIV homo plebejus Duaci sollicitare ausus, petitis ab Archiepiscopo iudicibus, violatæ religionis pœnas primus exolvit. Urbanis magistratibus insolitam sibi quæstionem exercere non audentibus. Quippe canonistarum suffragia Pontificio foro peculiarem fecerant. At posteaquam Martinus Lutherus tentare publicam animorum pacem, & in Christianorum exitium crescere cœpit: religionis inclinationem excepere leges & iudicia, ad extinguendam tabem composita. Acimprimis Leo Decimus Pontifex maximus in contumacem Lutherum atrocissime detonuit. nec contentus censura ecclesiæ; insuper Hieronimum Alexandrum Præpositum S. Ioannis Leodiensis, Protonotarium, ac bibliothecarium apostolicum legavit ad Carolum imperatorem, audacis insanæ ultionem provocans. Et quidem Cæsar habitis Wormatiæ comitijs imperij, postquam Lutherum publica fide interposita eo accitum, fatentemque palàm scelus, frustra sollicitasset ad palinodiam, illic unde venerat secure redditum, severissimis sanctionibus proscripsit. Legesque has omnium primas postr.

Non. Maij MDCXXI in sectarios vibravit.

I. *Ne cum Martino Luthero hospitij, vel commercij jura misceto.*

II. *Quisquis eum habuerit in potestate, plectito, aut vinctum Cæsari transmittito.*

III. *Illicitis ejus commentis ne adharreto; adharerentes cum ecclesia in gratiã redeunto, aut legibus plectuntor.*

IV. *Damnatorum bona fisco, judici, delatori, addi-
cuntor pro aqualibus partibus.*

V. *Famosos, vetitosque libellos, seu probrosas imagi-
nes ne parato. paratos exurito.*

VI. *Typographi quæ ad religionẽ pertinent sine cen-
sura Ordinariorum ne exceduntor. in cæteris à Cæ-
sare facultatem postulanto.*

Cæterum prævalescente impetu novitatis, successit inquisitio; & ipsa suis armata legibus. quam primus omnium Franciscus Hultius Brabantia Consiliarius anno MDXXXII in Belgio exercuit. Iacobus Laurentius Mechliniensium Præses ei præerat. viri boni, industria validi, moribusque insones, apud Cæsarem tot virtutibus commendari promeruerant. Cæterum plerisque hanc potestatem Pontificio foro peculiarem esse contendentibus; Adrianus Sextus diplomate firmavit. theologos tamen aliquot in assessores Hultio attribuit. Ei postea Clemens Pontifex jurisdictionem ademit, Cardinale à Marca episcopo Leodiensi succedere jussu. Nec à Marca tot simul curis par esse poterat. Itaque precibus Cæsaris Pontifex indulgens, anno MDXXXVII tres quæsitores Belgio assignat. Præpositum canonicorum regularium Asprensium Flandriae imposuit. Præpositum Scholarium Montensium Hannonia, atque adiacentibus pro-

vinciis. Iacobus de Montibus Decanus Lovanienſis ſevero atque implacabili ingenio erat, eoque accommodatior vitijs temporum, Brabantia, Hollandia, Zeelandia, Friſia, præfectus eſt. Multis ille vecordiam doctrina excuſſit, plures flagitium ſupplicio finiêre. Poſt ejus mortem, cæteros ut functione illa indignos, amotos accepimus. Ergo Paulus Tertius Pontifex anno MDXXXIII Renardum Tapperû theologum atque decanum, Michaëlemque Drachium, I. C. & utrumque profeſſores Lovanienſes ſubſtituit. In quorum locum Pius Pontifex anno MDLX Iodocum Tiletanum Præpoſitum Wallecourtij, necnon Michaelem Bajum canonicum, theologos Louanienſes inſtituit. Quibus Cæſar prid. Cal. Iul. MDL. querendi leges præſcripſit in hanc formulam.

Inquiſitores, & delegati, adſcito tabellione commiſſas ſibi viſitabant provincias impendio publico. A magiſtratibus, viriſque pijs, & integris diligenter quarent in hæreticos, aut non perfunctoriè ſuſpectos. Qui damnatos habeant libros, qui legant, qui conuenticula in quibus de religione & ſcripturis tractetur, ſoveant. qui hæreticorum fautores, qui receptatores. Tabelliones, ſcriptis elogia mandent atque cuſtodiant.

Fidem teſtium haut aliter explorent; quam juriſjurandi religione obſtrictam. illos interim ſerio admoneant, ne vel invidia, vel odio, vel alio pravo affectu quemquam inſimulent.

Qui

Qui eâ lege detulerit, ut nomen ejus non inferatur elogio; ne admittatur in testimonium.

Ea qua deferentur occulta maneant. Nomina denuntiatorum, aut testimonia, haut aliter Inquisitores publicent, quàm si adversus reos judicium experti fuerint.

Delatores interim indifferenter audiant. Cum sinceram fuisse delationem constabit ex aliorum testimoniis, delatum vocent injus, sine respectu nullitatis prioris denuntiationis.

Si quis invidia, vel odio, aut pravo animi affectu falsò deferat; judicibus & magistratibus, aut supremis curiis plectendus tradatur.

Quisquis ad Inquisitores vocabitur, venire debet; cujuscumque tandem auctoritatis, vel condicionis, sive praesides, sive consilarii Provinciales, aut magistratus, aut consules, vel senatores. Eosdem ad juramentum compellent, dicturos se ex animi sententia, qua vel scient, vel rogabuntur; utrum ne cognoscant haereticorum quempiam, aut vehementer suspectum.

Qui testimonium invitus dixerit, aut omnino prohibere detrectaverit, ab Inquisitoribus admonebitur. Si admonitus non paruerit, tanquam fautor rapietur in judicium; aut arbitraria plectetur poena.

Et si in pristina contumacia laicus perseveraverit, ex edicto tanquam fautor haereticorum plectetur, adversus ecclesiasticos jure agetur.

Praesides, consilarii, judices, praetores, vasalli, & generaliter quicumque officiales, magistratus & subditi, Inquisitoribus, tabellionibus, aliisque ministris auxi-

lium præstent. tutos eos ab injuria reddant. contumeliam inferre auctos pœnis coërceant. Si quis neglexerit, aut dissimulaverit, ut fautor plectetur.

Hi, quos liquebit esse hæreticos, aut in edicta peccasse, vel qui duorum testimonio, vel alioquin legitime ejusdem criminis convicti fuerint, comprehensi compingentur in carcerem. Iudices & officiales eam in rem præstent operam suam. inviti, & negligentes pœnâ fautorum plectantur.

Inquisitores à Cæsare litteras accipiant ad compellendos iudices, & magistratus in auxilium. Nam & Cæsar supremis, ac Provincialibus Curiis mandaturus est, ut de invitis, & negligentibus pœnam sumant, vel in eos se animadversurum. Ecclesiastici, ab Inquisitoribus comprehensi, condantur in carcerem Concilii Provincialis, aut ordinarii. adversus quos agatur sine strepitu, aut forma judicii. Lite instructâ è Concilio Cæsareo nonnulli adsciscantur ad ferendam sententiam.

Quisquis ab Inquisitoribus in hoc eligitur, de causa cognoscere debet, & ad absolutionem, vel condemnationem rei suffragium promerere.

Concilium quoq; Provinciale cognoscere, & pronuntiare cogatur, si ab Inquisitoribus interpellatum fuerit.

Si quis gravabitur, aut omnino detrectaverit conferre operam suam, debent hoc ipsum Inquisitores denunciare Gubernatrici, aut privato Concilio. Si Inquisitores adscito sibi Consiliario aliquo degradandum esse reum pronuntiaverint, laicus iudex sine mora de degradato sumat supplicium.

Si ex

Si ex elogio appareat laicum edicta transgressum esse; Inquisitores negotium conferant cum consiliario Casareo. ex cujus relatione Provinciale Concilium in fontem secundum edictum animadvertet.

Sed ne interim Inquisitores incurrant periculum irregularitatis, veniam expectabunt à sede Apostolicâ.

Interea ad conficiendum elogium, Consiliarium sibi adsciscant. qui, si in edicta peccatum videat, magistratibus regionis, aut Provinciali curia, & procuratori Generali elogium communicare debet, ut adversus fontes litem instituant.

Si laicus ex elogio suspectus appareat, in edicta tamen peccasse non probetur: tunc Inquisitores adscito Consiliario, vel perito aliquo à Provinciali curia delegato, de causa cognoscent.

Similiter si lite coram laico instituta, in edicta peccatum esse non liqueat; reus tamen aut suspectus, aut jure communi plectendus videatur: utique judex reum absolvet ab instantia: ad Inquisitorem tamen transmittet, ut cognoscat ille, an ex integro in jus vocari debeat.

Provincialibus autem curiis mandat Caesar sub pœna indignationis, ne Inquisitoribus impedimentum facessant. & si cōtroversia inter eos oriatur Gubernatrici denuntient.

Officiales, & Ordinarii molestiam Inquisitori non exhibeant: alioquin ecclesiasticis censuris deterreat eos Inquisitor, aut Gubernatricis opem implorèt. illa vero subsidio erit Inquisitoribus, cavebitque ne tam sanctum differatur negotium.

Sed nec è contra Inquisitor, Officialis, aut Ordinarii jurisdictionem perturbet.

Cùm alterius provincia incola ad Inquisitorem deferentur; elogium ille transmittet ad Inquisitorem domicilii, ut de crimine cognoscat.

Inquisitores quoque pastorum mores expendant, an viri boni, & sinceri, an catholici sint. si qui mercenarii deserto monachorum habitu pastoralia subierint officia, submovebit eos Inquisitor; quamvis ecclesiastici iudicis consensu rationem vivendi, cultumque mutaverint.

Pastores palam foventes concubinam, aut qui ceteris scandalo fuerint; item indoctos, & inidoneos, episcopi, & Officiales, ex relatione Inquisitorum submoveant, dignioresque substituant. salvo jure colationis, & presentationis. Si episcopi, aut Officiales parere detrectaverint, Inquisitor imploret Gubernatricis auxilium.

In ludimagistris famam, & mores observet. simul quid juventuti prelegant. si quid emendandum duxerit, denuntiet iis qui subrogandi jus habent; ut vel ipsi corrigant, vel si videbitur ludimagistrum dimittant. Qui si hoc ipsum facere gravabuntur, Gubernatrici denuntiet. Inquisitor denique in libros inquiret, ne damnati, aut suspecti excudantur vel distrahantur. item in mores, & familiaritates typographorum, & bibliopolarum. si quid corrigendum erit, statim emendet, ex magistratus aut curia Provincialis suffragio.

In primis ea adhibenda est cura, ne pium hoc negotium

tium ex difficili reddatur impossibile ; simul ne emungant, aut deglubant populum Inquisitores. Et ante omnia remedium adhibeant his, quæ sine periculo religionis, aut detrimento reipublicæ ferri non possunt, persuasumque omnibus reddant, se non quæ sua; sed quæ Christi sunt querere. in hoc potissimum intenti ut à Belgio contagionem arceant.

Inquisitores eorumque ministri, stipendium à Cæsare accipiant.

Impensas captura & carceris præstabunt iudices, qui manum reo injecerint, quas rationibus Cæsaris imputent.

Philippus Rex III Cal. Decemb. MDLV, sicut antè diximus, imperium adeptus, hæc parentis sui præscripta diplomate corroboravit, & sub titulo nominis sui tulit ad populum. Sed medio tempore alia, atque alia edicta. gliscen-
tibus indies novis sceleribus, quibus sequentes leges obviam ibant. Primæ illæ Anno MDXXVI ultrà multam nihil inflixerant. quas An. MDXXIX transgredi capitale fuit. Mox MDXXXI. MDXXXIII. MDXL. MDXLIV. & MDXLV. variè auctas : dein MDXLVI intensas ; atque MDXLIX interpretatas, ad ultimum Cæsar III. Calend. Maji MDL in unum omnes corpus contraxit, & hanc tabulam populo proposuit.

Libros Martini Lutheri, Ioannis Oecolampadij, Ulrici Zwinglij, Martini Bucer, Ioannis Calvin, editionesve ab universitate Lovaniensi proscriptas, ne vulgato, ne distrabito, neve legito. Famo-

fas, & probrosas in religionem imagines ne fingito. fictas ne retineto, ne distrahito. sacras imagines ne violato. secretos cætus ne agitato. à conciliabulis, & conventiculis abstineto. Extra theologos ab universitate admissos, de scripturarum sensu sermonem, controversiamque nemo mīsceto. Proferendi, differendi, concionandi illicita jus non esto. Qui secus faxit, perduellis esto. ex die criminis intestabilis esto. alienandi facultatem ne habeto.

Pœnarum gradus sunt. pœnitentia ducti, si viri, gladio plectuntor. fœmina in terram vivæ defodiuntor. contumaces igne cremantor. bona universorum in fiscum rediguntor.

Domum sciens ne aperito sēctariis. victum, & amictum ne administrato. ad Inquisitores vel magistratus deserto. quod si quis earum rerum præscriptum excesserit, noxia par ceteris esto.

Qui imprudens hæresim contraxerit, & innocenter habitam legitimè maledixerit, si de religione sermonem sparserit, relapsus habetor.

Qui suspicionibus diffamatus hæresi maledixerit, aut ex ea causa pœnas dederit; amplexus illicita, etsi in edicta non peccaverit, relapsus habetor. Relapsi ultimo supplicio, cum publicatione bonorum puniuntor. Suspecti vel ad pœnitentiam admissi, ad magistratus, dignitates, officia ne assumuntor.

Peregrini ad incolatum sine testimonio parochi ne admittuntor, suspecti habentor, in jus rapiuntor.

Patroni & magistratus territoriorum, flagitia ad laicum judicem spectantia animosè vindicanto. alioquin

quin imperio & jurisdictione privantur; arbitrariam mulctam incurrunt.

Inquisitoribus cum in jus vocant, aut in vincula ducunt subsidio sunt. si ad persequenda ea, quæ ad Inquisitionem spectant, concurrere velint, admittuntur. Procuratores fisci negligentibus, & dissimulantibus dicam scribunt.

Archiepiscopi, episcopi, archidiaconi, abbates, prelati, capitula, vicarii, Officiales, Pontificii judices, atque Inquisitores in sacerdotes hereticos judicia exercent.

Ad perpetuos carceres damnati, vel ad palinodiam admissi; si præterea in edicta deliquerint, seditiosus egerint, aliudve turbulentum peccassint, magistratus publicationem bonorum persequunt.

Hereticum ad Inquisitores, episcopos, vel parochos deserto. transgressorum edictorum ad magistratus. qui celaverit, fautor habetur, poenâ vindicator.

Delator dimidium bonorum convicti auferro; ita tamen, si ultra centum libras Flandricas in bonis non habuerit. eorum quæ amplius centum in bonis fuerint, dimidium percipito.

Qui conciliabula, & conventicula indicabit, si particeps fuerit, impunitatem ejus rei habeto. si non fuerit, dimidium bonorum centenarii, decimamve eorum, qui centenario majores erunt, auferto.

Judices provinciales de his delictis cognoscunt. magistratus municipales si prævenerint, judicium exercent. bona tamen principali fisco addicunt, deductis impensis. salvo tamē jure XII. Cal. Decemb. MDCXLIX vassallis præscripto.

Pœnas legum arbitrari, vel mitigare fas non esto. qui faxit, dignitate, & officio privator. ad magistratus, & honores inhabilis esto. pœnam arbitrariam incurrito.

Fugitivi, & contumaces pro convictis habentor. qui pro fugitivis Imperatori supplicaverit, ad publica munera, ad honores, ad postulandum indignus esto.

Artem typographicam sine veniâ ne exerceto. nihil sine facultate Ordinarii pralis committito. Qui secus faxit, & illicita imprefferit, pœna sectariorum plectitor: si licita; exilium, & quinquaginta libra pœna sunt. domini pro familia tenentor. famuli extra officinam heri ne impriuntor.

Facultatem imprimendi, nisi boni nominis, nemo impetrato. Qui facultatem impetraverit, juramentum præstato, nihil extra provinciam, citrà censuram excusurum. nomen, & domicilium, simul & compendium diplomatis libellis præfigito.

Ante distractionem librorum, Ordinariis aut vicariis exemplar transmittito. sin secus, arbitraria pœna plectitor. Bibliopola sine facultate ne sunt. librorum non privilegiatorum quæstum ne faciunt. Editiones extra provinciam excusas ante censuram Ordinarii, aut vicarii ne prostituunt. alioquin si illicita distraxerint capitale esto. si licita xx. Caroli pœna sunt.

Boni nominis bibliopola sunt. in hæc leges jurant. extra civitates ne habitant, neve distrahunto. inventarium licitorum, & illicitorum librorum in officina

officina habento, vel centum Carolis mulctantor. Magistratus municipales, cum eruditioribus bis quotannis officinam scrutantor. bibliopola magistratibus officinas aperiunto. præter bibliopolas nemo venundato.

Ludum litterarium sine venia magistratus & parochi, vel eorum quibus hac provincia mandata est, nemo aperito. noxa XII. Caroli sunt. iteranti, pœna dupli, cum exilio. boni nominis professores sunt. libros ab universitate Lovaniensi præscriptos juventuti prælegunto.

Harum legum aeterna auctoritas esto. ac ne in oblivionem veniant; singulis trimestribus publicantor. magistratus, si omiserint decem Carolos fisco præstanto. secunda culpa duplo plectitor. tertia pœnis legum tenetor.

Ac ne tum quidem omissum, quin multa, & diversa Antverpienses quererentur. Terrebat illos præcipue quod cum inquinatis hominibus miscere hospitium, & inire commercia vetabantur. Igitur Cæsar VII Cal. Octob. MDCXL. leges suas ad ultimum interpretatus, hæreticos in fraudem legum tantum, alienandi jus non habere edixit; advenasque passim hospitio suscipi posse, si nihil irreligiosius, aut seditiosius dixerint, egerintve. Sic tandem ei rei pacem paravit, quoad sequens temporum malignitas, rursus in edicta conurgeret.

Ergo ut istuc redeam, unde me necessitas paullo longius abduxit; posteaquam litteræ

Regiæ, (quas supra retulimus) à præcone vulgari, & in fontes pœnæ revocari cœptæ; immanè, quantam feralis illa vox excitaverit faciem. non jam solum territa plebes seditiosius fremere: sed & omnis factio nobilium. totaque provincias murmur & insania pervadere, hoc non esse regnum exercere, sed tyrannidem, cum alijs mortem, alijs exilium, omnibus metum prætextu violatæ religionis intenter Rex Philippus; ut singulorum bonis re vera inhiet. non se adeo stolidos, ut ignorent, quæ sint officia principis, quæ populi. debere se obsequium, cætera liberos solutosque. Proinde si pergeret ille tentare, quæ extrema sunt in servitute, inventurum qui armata opponent corpora sua, bello honestius, quam liætorum manibus perituros. Hæc & ejusmodi per cuneos, ac conventus promiscue jactabantur. Nam plerique re vera credebant Hispanicæ Inquisitionis adferri initium.

Eodem tempore Maria Portugalia Regis filio genita, in Belgium venit. Alexandro Farnesio Gubernatricis filio paullo ante desponsa; & ad eandem accersendam comes Mansveldius unà cum familia in Portugalam concesserat. Nuptiarum dies pro magnitudine fortunæ apparatibus insignis, multos mortales exciverat. Nam & pater Octavius magna Italorum juvenum manu advenerat. ac ne studio magnificentiae Belgæ vincerentur, cultu ad
pom-

pompam exacto, hostiles ludos ad invidiam instruxerant. Mensis November erat. in hoc ultima dies S. Andreae sacer, magno honore aurei velleris equitibus colebatur. Quippe patronum eum majorum pietas huic Ordini præscripserat. Cum igitur solita sacrificij solemnities ipsos proceres cum reliqua nobilitate corrogassent in templum; Præses Viglius Ordinis Cancellarius pro concione exponere cœpit; Splendidissimum hunc Ordinem, haut alia causa cœpisse originem, quam ut religionem & concordiam, maxima regni præsidia, Proceres alerent. Basim, & fundamentum reipublicæ religionem esse. sine illa humanarum rerum regimen stare non posse. tutelam ejus omnibus incumbere; ac in primis Principibus viris, ad prodendum in vulgus exemplum. Ceteros mortales Regibus subijci. Reges autem Ecclesiæ. nec eam esse aliam quam Romanam; hoc est, Christi Ecclesiam, quæ à temporibus apostolorum continua serie ab nos descendens, Beatum Andreæ huic Ordini patronum dederit. Eundem, sicuti memoria traditur, idolis, sacrificare jussum, Agæ proconsuli intrepide respondisse, se cotidie pretiosissimum corpus, sanguinemque domini nostri Iesu Christi æterno patri in victimam offerre illam esse veterem hereditatem ecclesiæ, ab ipso Christo nobis testamento relictam. multos olim ecclesiæ expertam hereticos: neminem tamen hæcenus inventum esse, qui in sacrificium consurgeret, tantique sacramenti veritatem in quæstionem revocaret. Hanc primum ætatem oppugnasse sanctissimum mysterium. Nec habitura
fuisse

fuisse commenta illa tot sectatores, nisi accessissent studia Principum, privatis respectibus cuncta novantium. Non Reges Angliæ, non Germania principes amore divini cultus professiones illas amplexos esse. alios, ut licentius indulgerent voluptatibus; alios, ut lautis sacerdotum patrimonijs implerent ararium accessisse huic disciplinæ. Gallorum denique Proceres ambitione flagrant, aulaque insensos, quo factioni suæ vires, & in amulos potentiam quærerent, præbuisse se tumultuantibus duces. breviter, si à principibus mutata religionis causam exigas, haut aliam reddituros, quam ut rationibus politicis, ad cujusque affectum, pro larva serviret. Hinc vero tabem illam cepisse incrementum. quæ apud nos eo proclivius erui possit, quod intra obscurissimorum hominum ingenia adhuc absconderetur. Et hanc potissimum sollicitudinem ad Proceres spectare, aurei velleris sacramento obstrictos.

A plerisque effuso risu excepta est oratio; interrogantibus ecquas adhuc haberet aniles fabulas, qui modo de sancto Andreâ vanissima commenta, somniaque recitasset. Quæ ex eo hic inferui, ut corrupti sæculi mores noscitantur. Quippe nobilitas in segnitiam, torporemque resoluta, necut olim intenta ad martem, pascebat animum peregrinationibus. Ac specie studiorum Genevam transiens, dum bonas artes, & civilia investigare crederetur; pravos ritus, turbidos ue mores in patriam referebat. Hinc pristinatorum sacrorum fastidio laboravit. Numen denique
con-

contemnere cœpit. de quo ad ultimum nihil certi habuit.

Circa idem tempus, Svvarthenburgius, Hollius & Westerholtius Bruxellis agebant. Germani principes erant. Sed à sensu majorum abstracti, laceſſebant ſubinde cavillis patientiam Procerum, & ſi in eum modum inceſſerentur, ferro ſe libertatem aſſerebant ulturos. furioſi turbines ad diſcutiendum compoſita, per quorum etiam amicitiam Belgæ fidentius ſcelera audebant. Et mox omnia in turbas vergere. Provinciarum Gubernatores concordī voce denuntiabant Gubernatrici, non velle ſe, & ſi maxime vellent, non poſſe tamen Inquiſitoribus adminiſtrare ſubſidium, aut invidioſiſſimarum legum exercitium admittere. ita induxiſſe in animum, ſi obſtinatius pergeret ipſa mandare, quæ communi officerent libertati, continuo ſe magiſtratu abdicaturos. Brabantia Ordines apud Provinciale Concilium (Cancellariam ipſi nominant) exponebant libello, non eſſe ſas eccleſiaſticis in Brabantia incrementum accipere, aut extra priſtina tribunalia in jus vocare. eaſdem leges ſacramento Regis ſancitas eſſe, proterique, quoties contra ſolitos mores inferretur Inquiſitio. Proinde ut revocaretur mandatum, quo magiſtratus civitatum Inquiſitoribus aſeſſe juebantur, orare. Trepidante conſilij Curia, conſultatio ad Gubernatricē rejicitur. Et illa quidem

quidem attonita, primò, & ante omnia Inquisitorum Lovanienſium ſententiam exploravit. cum illi nescio quid inordinatum promiſſent; Brabanticæ Curiaſe ſenatores, cum Privata Curia, atque una Proceres in conſilium adhibuit. Tres fuere ſententiæ. Prima Cancellariæ, & illa obſcurior. ſingulis non ſatis adhuc audentibus invidiæ ſe offerre. Poſt aperius ſuffragari juſſi, Inquiſitionem hæcenus Brabantis inſolitam pronuntiant. ediſtis, & legibus non inuſitato ejuſmodi remedio compellendos eſſe hæreticos ad officium. Privata Curia cenſebat Brabantos Inquiſitioni obnoxios. Sed Proceres ſtatim Cancellariæ aſſentiebantur: poſteriore ſententiam ut duram rigidamque reprehendentes, alteram illam laudabant, tanquam moderatam, aptamque tempori; & quod equum eſſet credere, cum de interpretatione legum quæretur, leges ipſas tractantibus. Orta ergo eſt & tertia ſententia. Nam cum cæteræ curiæ hoc amplius decernerent, referendum eſſe de toto negotio ad Regem; Proceres econtra vociferabantur, *Non eſſe nunc tempus reſpiciendi ad tam ſerum auxilium. Imo conſeſtim, & ſine mora pronuntiandum pro legibus patrijs, in quarum juſtitiam plurimum ſuffragia conſentirent. nihil enim Ordines arbitratturos, quam negotium extrahi, ut tempore evaneſcat.* Et ſine mora Gubernatrix Proceribus acceſſit, cujus imprudentiã

con-

consilij, sequentium malorum eventus explicuit. Mox quippe cæteræ provinciæ idem postulantes, non expectato Gubernatricis imperio universis Inquisitoribus adimebant jurisdictionis ministerium. Inquisitores vero paullo ante à Gubernatrice ad constantiam severitatis animati, jamque attoniti, incerti-que quid agerent, vanis querimonijs in aula exprobrabant, compelli se ad intensiorem officij, cujus potestas à magistratibus destituta, sine auctoritate, & formidine, imo vana, & ridicula relinqueretur. simul omnes parati Inquisitionis munia deponere; nihil aliud retulere quam verba, & voces, & adulatoria aulicorum fastidia. ambigūa semper Gubernatrice, reliquisque occultè adversis.

Quæres vivendi licentiam palam solvit. populi mores, studiaque labefactavit. At nihil æque publicam acceleravit calamitatē, quam turbulenta colloquia, quibus per multos hosce dies, non solum otiosa, segnisque multitudo maledicis sermonibus traducebat Regem: sed & nobilissimi passim viri. quem ego morbum perniciosissimum judico, quando à capite diffunditur. Ergo ex omni parte seditioris materia quærebat. multis haut obscure frementibus, vindicandam esse ferro libertatem. Atque omnia prorsus audaciæ opportuna dicebant. Nullum in Belgio peregrinum exercitum. veteranos alieno are oppressos, perinde querulos.

quibus

quibus in pace nulla spes reliqua. causam, & initium ad flagitanda per seditionem stipendia circumspectare. nec à Gubernatrice ad expeditionē exciri posse, promissis toties frustratos. Quid tamē si excirentur? nullum ex ijs metum. qui non integram fidem adferrent, plerisq; centurionibus Inquisitionem detestantibus. ceterosque facile consensuros in scelus, cum Proceres, cum tribunos, cū duces in partibus viderint. Tardum esse peregrinos elicere exercitus. sed nec illos sine stipēdio vexilla servaturos.

Exordii
conjurati-
onis no-
bilium.

Hos & ejusmodi sermones pronis auribus plerique accipiebant, expendebantque. nam & opes reipublicæ accifas noverant, vulgatis, passim arcanis imperij. Hinc audacia, atroxque consilium, & fiducia rerum novandarum. jam primum nimia licentia, dein conscientia labentis aulæ, & quod negari non potest, novitatibus oblectatæ; cujus mores, & ingenium omnis fere regio induerat.

Primum conjurationis consilium Bruxellæ fuit. sex nobiles ad cœnam convenerant. interque pocula increpantes ignaviam Procerum, quòd toties de abroganda Inquisitione consultando perdidissent operam; atque inde indignitas animos acueret, tristissimum facinus exorsi sunt. ferendum utcumque erat, etsi non æquo animo, si saltem plebei homines tanto sceleris præbuisent initium. sex aurati equites conjuravere in perniciem publicam, & pacem Belgarum, statumque concussere. nec enim plures in exordio fuisse memoratur.

ut

ut jure miretur posteritas, à tam paucis cœptum, quod tot millium sanguis, nec adhuc factis expavit. temulenti per insolentiam, atque lasciviam suscepere nefanda consilia, ut pari audaciâ jam sobrij, nec minus vecordes exquerentur. Seu compromissum, aut compactum, seu societas (quæ inter malos nulla esse potest) sive potius conjuratio, seu quoquo nomine hoc ipsum quod egerunt, appellandum sit, fide invicem datâ acceptâque, subscripsere certæ formulæ. De nominibus auctorum omnium non convenit. Quædam ætas oblitteravit, atque odium partium. ego quoque consultò nonnullis parco, quorum vestigia per annales dissipata invenio. non quod posterorû magnitudinem in majorum maculis, pudendisque imaginibus, offendere metuam. nam quomodocumque hæc scripsero, scio mihi imminere invidiam. nolo tamen erubescant illi, quos jam fastigijs admotos video. quidam enim hodie eâ laborant intemperie animi, ut majorum sive errorem, sive fatalem vecordiam exprobrare non timeant liberis innocentibus. Inimica res tranquillitati publicæ, multisque gentibus civili sanguine per factiones expiata. Ego virtutes, & vitia temporum tradere constitui: nemini vero ruborem exprimere. Cæterum Philippum Marnixium Sanctæ-aldogundum legem fœderis in hunc sensum dictasse comperio.

Formula
conjurati-
onis.

Satis constat, quosdam perversos, callidosque homines, insatiabili avaritia, intolerabilique ambitioni, & superbia sua inservientes, sub falsâ religionis umbra, sub publica tranquillitatis prætectu, perduxisse eo Regem; ut conatus ille sit, contra bonorum suffragia, contra sacrosanctum Deoque & hominibus dictum sacramentum, pernitiosissimam Inquisitionem per vim inferre. rem gentibus abominandam, divinisque, & humanis legibus contrariam, infandam ejus crudelitatem, nulla infidelium barbaries, nulla tyrannorum sevitia exaquat. nec ob aliud reperta est, quam in contemptum divini nominis, & exitium publicum. Si quidem jurisdictionem omnem Inquisitoribus trāsribit. ceteros in servitutem redigit. civium omnium capita in discrimen adducit. Nemo enim insons futurus est, quisquis vel sacerdotem, vel Hispanum inimicum sibi inveniet, vel scurrâ aliquē in caput suum subornatum. Nam dicenda causa potestas, omnisque defensio reis adimitur. Hac ergo revocamus ad animum. & officij nostri ducimus imminentibus succurrere malis, corporaque & facultates nostras præda eripere: ne prætextu violatæ religionis innocentium sanguine calumnia pascatur. Itaque pulcherrimum facinus contractâ societate aggressi sumus. gravissimisque obsecrationibus obstringimus mutua capita, nullam nos Inquisitionem in Belgio passuros, nec ullam rem quæ eo pertineat, quoquo titulo adumbratam; sive Inquisitio, sive visitatio, aut edictum, seu quocumque

que alio nomine appelletur. sed e contra sublaturus, atque eradicaturus eam funditus, tanquam fontem confusionis, & iniustitia. Obtestamur interim haut alio hac respicere, quam ad honorem gloriamque divini cultus, & amplitudinem Regis, ac salutem publicam. ut salubri aliquâ ratione popularibus discordiis obviare liceat. Proinde Deum in testem accipimus, non commissuros, ut Inquisitio, vel edicta nostrorum quempiam lacerent. ceteroquin corpus, & bona oblaturus in ultionem. sed nec ullus color, aut occasio, nullus titulus, aut causa, ad excusationem proficiet, quo minus ad auxilium quisque confluere debeat, etiamsi rebellionis crimen contractum obtendat. Nec enim rebelles dici possunt, qui gloriam quarunt divini nominis, Regisque majestatem tuentur, & salutem publicam; qui bonorum curam gerunt, uxoremque, & liberos, & familiam vindicant ab injuriâ; in quorum tutelam Deus, & natura universos obstrinxit. Interea ut sancta hac Societas inconcussa semper, & inviolata permaneat, fidem invicem præstamus, ea nos acturos, ratumque habituros, quæ statuentur ex communi consilio, vel ex suffragio illorum quibus ea cura mandata fuerit. Creatorem cæli, & terræ, mentium scrutatorem, in testem accipimus nostrarum actionum; sanctissimumque ejus nomen invocamus, precamurque suppliciter, ne cæpta hæc nostra successus destituat. utque per gratiam S. Spiritus ad honorem sanctissimi nominis sui, publicamque

tranquillitatem, & animarum nostrarum salutem dirigere velit. Amen.

Ipſa ferè retuli verba, ſicut erant incompta, atque acerba, quantum Latino ſermone aſſequi licuit. Primus deinde Marnixius ſubſcripſit; & ſi fallat, iratum Deum, homineſque invocat. Cæteri deinde idem faciunt. Hæc enim erat teſſera conjurationis. Cæterum ut furori pararent vires, itum inde per provincias. amicos, propinquos, neceſſarios, familiares, notos atque ignotos, bonos ac malos, in idem facinus concitant. Multi levis animi vitio eaſdem partes amplexi ſunt: pauci conſilio. catholici, an hæretici, nullo discrimine. Toti dies comeſſationibus tranſigebantur; & ut quemque in contubernium attraxerant, obviam ei ire, preſſare, amplecti, onerare poculis, præire ſacramentum, dextram chartæ ad ſignandum adducere, dubitantibus exprobrare vecordiam, minis cogere. ſic paſſim, latèque nomina data. & à plerique tanta ſecuritate, ut ne ſcirent quidem quid ſubſcriberent, atque interim pigeret exquirere. poſtridiè verò cum animo ſuo reputantibus magnitudinem facinoris, non patebat reſreſſus ad pœnitentiam. Auriacus, Egmondanus, Hornanus, Megemus, Bergeniſis & prætereà multi ejuſdem Ordinis, ut auctores, vel participes conjurationis jaſtabantur, quorum ſigna quoque falſò codicillis imprefe-
ferant.

serant. hac arte centuriones potissimum, & signiferi in scelus obstricti sunt. in quibus tamen plus amentiae, quàm sceleris fuit. Scio quoque Henricum Brederodium, in Ordinariae turmae signiferum strinxisse ferrum, quod sacramentum accipere detrectaret.

Primum colloquium factiosis Bredæ fuit. Sub Id. Mart. non uno prætextu cum Hornano, ad Auriacum diverterant, secretum inituri consilium. Forte autem Swartenburgius, Hollius, & Westerholtius in Germaniam recedebant. Hoochstratanus solemne viaticum abituris instruxerat, in Hoochstrateni prætorio suo, frequentesque conjuratos convivio adhibuit. Egmondanus, & Megemus eòdem veniebant. Cùm multo incalescerent mero, trecentos, & ampliùs nobilissimos viros conjurasse in Inquisitionem & edicta Auriacus memoravit, viresque illorum non immodicè æstimare cœpit. Megemus novitatem consilii admiratus; quid? inquit, tam pauci in perniciem publicam? ita me Deus, ducenta florenorum millia permiserit mihi Rex, scurris ego illis caput imminuam. Ut faciliè appareret abhorreere eum à furiosis consiliis. Sublata jam mensa Auriacus sollicita manu Egmondanum protraxit in secretum, totamque scenam conjurationis aperuit. quicumque tandem mente, Egmondanus inde cum Megemo Bruxellam iter instituit. Promptius

hinc agitatum inter temulentos de summâ conjurationis. Auriacum, & Hornanum arbitros fecerant amentia suâ. magna nomina, & momentum partium. Publicis enim consilijs incumbabant. Quærebatur potissimum inermes, an armati; oratione, an libello sententiam exponerent. vicit mitior ratio, ut inermes, & libello; tanquam jus, forumque respicerent. In dictando libello non unus aliquis consensus. sæpius in aliam atque aliam verterunt formam. Sunt qui Hispanicè conscriptum velint. quos ego falli existimo. De Gallico idiomate plures mecum consentiunt. quod & publica exemplaria! promiscuè præferunt. apud omnes tamen in hanc sententiam fuisse invenio.

Celsitudini Parmensi.

Libellus à conjurationis Gubernatrici oblatus. Belgas venerationi principis sui religiosius semper fuisse deditos, nullus est terrarum angulus qui ignoret. hanc in primis gloriam nobilibus peculiaris rem genius fecit, fortunarum suarum, vitaque prodigis pro salute Principis. Proinde nihil prius nobis fuit, quam ne, majorum vestigijs inhærentes, vinceremur obsequio. Movemur enim causâ reipublicæ. Aliquantillum invidia subire eligimus, quam intempestivo peccare silentio, & ad præsens omittere, quæ ad communem incolumitatem pertinet. Quantum summa rerum collaturi simus, tempus aperiet, nullum majus à nobis obsequium exspe-

expectari potest. Quamvis ergo nemo dubitet, haut perperam fecisse Regem, quod servari jussit leges, quas rectis forte consiliis Caesar edixit: tamen habenda est ratio temporis. ejus condicio, alia atque alia remedia exigit. Eadem illæ leges, ultra priscum rigorem exercitatae, multorum motuum hactenus causa fuere. Quas cum nuperis suis litteris Rex non mitigaverit; sed contra exerceri eas acrius jussit: timemus sanè, ne in gravescentia mala in tumultus exeant. quos funesta terrarum vastatio excipiat. multa cottidiè indicia seditionis erumpunt. Iamdiu expectavimus, ut Proceres, Ordinesve provinciarum hanc in se curam transferrent, atque imminentium calamitatum radicem exscinderent: sed cum hoc illi graventur officium, & in procinctu stet perniciēs, ac ruina publica: unusquisque nostrum muneris sui esse credidit, exolvere se sacramento, atque impendentis tempestatis periculum avertere. Satis quippe confidimus æqui, bonique consulturum Regem hac monita. Maximè enim nostra interest. Quoniam ruri agentes, & populationibus expositi, omnium proximi habemur, in quos tumultuantium rabies feratur. Adhac si rigorem illum semel admittimus, quem deinceps innocentem Rex habiturus est? non deerunt certè, qui improba premij spe invitabuntur ad calumniam: qui pretextu violata religionis, periculum singulis intentent. quippe accusatis nullum relictum est refugium, quàm clementia, & dissimulatio judicis, in cujus misericordiâ omnium

vita opesque sita sunt. Oramus ergo ut obviam
eas: & pro magnitudine causa mittas ocyus ad Re-
gem; ut videat, ne quid detrimenti respublica ac-
cipiat. Salva illa stare non potest, nisi mala hac,
edictorum abrogatione antevertat, & perire leges
malit, quàm rempublicam. Quamvis denique
necessitas temporis edicta non rejiceret; justitia ta-
men, & aequitas abrogari postulant. Hujus consi-
ly rationem reddemus vobis, quotiescumque Rex
à nobis exegerit. Sed ne officia hac nostra inimico-
rum acerbitas in deteriore partem interpretetur;
tanquam contendamus dominantibus præscribere
leges, aut Majestati frænum injicere: Placebit
Regi refringere leges generalium Ordinum con-
sensu, & ultionem flagitiorum sic exigere. Roga-
mus tamen Celsitudinem tuam, ut dum expectas
voluntatem Regis, exercitium interim legum, &
Inquisitionis suspendas. Quod officij fuit nostri, ex-
egimus, impendentium calamitatum indicia non
suppressimus, ne, si quid evenerit tristius, imputari nobis debeat. Proinde Deum, & Regem, &
Celsitudinem tuam, ipsum denique Concilium
Status, propriamque conscientiam in testes acci-
pimus præsentis obsequij. in quo haut alios nos ges-
simus, quàm fidos clientes, & ministros convenit.
Ideoque instamus quàm maxime, ut maturè sub-
venias. Offerendi partes Brederodius popo-
scit. priscis Hollandiæ comitibus stirpis suæ
auctoribus ferox, atque ore tenus facundus,
perinde audax, atque factiosus, & ad flagitium
prom-

promptissimus habebatur. Bruxellæ ad Calendas proximas adesse omnes iussi.

Nihil adhuc de conjuratione in apertum eruperat. Primus Gubernatrici indicium Megemus fecit. ita tamen, ut nec totam aperiret tragœdiæ speciem. Imminere periculum rei publicæ, flagitio trecentorum nobilium, libertatem religionis petentium; quam fœdere inter se per jusjurandum iſto, viribusque externis subnixi, mox armati postulatum venirent. Vnde id accepisset, quamvis rogatus, non adjecit. externum sibi nobilem retulisse simulans, cujus nomine abstineret, sacramento pietatis obstrictus. Quippe Megemus, cætera egregius, & in paucis Gubernatrici postea charus, rigorem legum, atque Inquisitionem juxtà oderat. rarò hominibus tanta virtutum insita constantia, ut meliora semper suadeant exuti affectibus. supra mortales credendus est, qui amicitia, vel odio, animique contumacia aliquando non peccat. optimus tamen ille est, qui minus peccat. Paullò post Egmondanus fœderis exemplar Gubernatrici exhibuit. Nomina conjuratorum, nec omnium prodidit. Secutæ mox sunt ab Auriaco atrociores epistolæ; parari exercitum, duces, & centuriones legionibus assignatos, viginti hominum millia brevi in procinctu fore, colorem quæri discordiis, denique mutationem principis in sermone haberi. Ea se deferre

quæ audierit. quàmvis gravia, & incredibilia, non omnia tamen ex falso constare. Hæc ab illo ficta, & ad simulationem magnarum virium composita dicuntur, ut amoliretur suspicionem conscientiæ, simul & Gubernatrici trepidationem injiceret. Quæ interim attonita, stupentique similis, & jam magis, magisque pavida, reputansque secū quid faceret, quid primum aggrediretur, concilium Procerum quos casus obtulerat, atque eorum quos maximè ducebat idoneos properè contraxit. variantibus sententijs, prope in altercationem res venit. Megemus clamabat; *non esse jam tempus certare otiosis opinionibus, & consultando dies perdere. aut delectum, bellūque habendum esse; aut vulgandam religionis libertatem. Sed cum neutrum horum fieri possit inconsulto Rege, & imminentis periculi magnitudo intervallum non postulet: quod reliquum esset, parendum necessitati; hoc est, Inquisitionem abrogandam, atque aliquid laxamenti dandum legibus, impunitate contracti sceleris factiosis promissa.* Et huic Egmondanus verbo assensus est: fremente Barlaimontio, *vanos esse rumores, & ad terrorem de industria compositos. fieri non posse, ut strepitum tanti exercitus velocitas fama non præveniat: cur metuerent paucorum colluviem, ex seditiosis aliquot pendentem capitibus? momento temporis dissipari posse, cōspirantibus in unum Proceribus.* Et si se audirent, *extem-*

exemplo insignem aliquem ducem obtorto collo arriperent. uno, atque altero percusso, quieturos ceteros. & hoc maximè pertinere ad exemplum. Non placere sibi abolitionem concedi, ubi nec rei, nec crimina proderentur. hoc non esse scelera tollere; sed provocare: non componere seditionem; sed irritare, & spe impunitatis, illecebram peccandi porrigere. Gubernatrix ad frequentius Concilium, quod intrà paucos dies habitura erat, rem ex integro distulit. variisque interim cogitationibus distracta, potens sui non erat. incautus ad credendum pavor, constantiam abstulerat. quidquid in tristiore parte metus suggererat, secretâ æstimatione librabat. colligeret copias? alieno ære demersum ærarium. nervum belli pecuniam esse. sed cui alas, cui centurias, cui legiones, cui denique exercitum crederet, intimis aulæ suspectis? conclamatum fore de religione, silentibus inter arma legibus; & sic bello amissuram, propter quod bellum gereret.

Eruinpens in publicum conjuratio, populum exspectatione eventus detentum, variè affecit. prudentissimus quisque nec probare: nectamen aliud quàm tentationem credere mitigandarum legum, quæ publicè exosæ, multis quoque familiis funestæ, atque exitiosæ timebantur. Longè alius vulgo sensus erat. seditiosissimus quisque increpare pervicaciam

caciam Regis ducebat egregium. extitisse viros, qui assertum irent libertatem; qui jura, & leges tuerentur. irent nunc Inquisitores; citarent armatos; nunc torquerent; nunc urent. victam esse tandem, versamque in furorem patientiam læsam. Cæterum acerrima seditionum materies fuit, quòd Erycius Brunsvicensium dux traderetur composuisse legiones, & easdem à Rege conductas, exstruendarum arcium, & Inquisitionis firmandæ causâ; rectaque iter in Belgium dirigere. Nec de legionibus dubitabatur, quas nulla probabili causa Brunsvvicensis conscripserat. & quorsum tenderent nemo sciebat. Nam & vicinorum Principum securitatem concussit, insidias atque arma metuentium. Quod inter cæteros mortales invidia, id in principibus pro virtute est, suspicio alienæ potentie. Clivia erat, qua Brunsvvicensibus in Belgium venturis transitus erat. Cæterum dux ejusdem regionis profecturus Augustam Vindelicorum ad comitia imperii, omnes eos, qui fide clientelæ, aut obsequio ejus tenebantur, arma, & equos parare, atque ad classicum intentos confidere domi jusserrat. Hinc fama sine auctore exierat, consensisse eum in conjuratorum facinus. Crebris litteris Brunsvvicensem Gubernatrix admonuit, ut ab armis falso Regis titulo sumptis, decederet. & cum proprio nomine impetrare non posset, auctoritatem

ritatem Cæsaris nequicquam imploravit. Nec ideo tamen mitigatus est populus, cui-cumq; famæ credulus. Itaq; varijs criminationibus incessebat Gubernatricem, ut fallacem & callidam, vanis & inanibus promissis, hominibus illudere. sparsa quoque Antverpiæ scedia, seditiosis referta carminibus, incitamenta discordiæ, in urbe fœcundâ rumoribus, quibus plebs totis illis diebus perquàm dedita erat. sed magistratus imprimis ad lectionem inhorruit. confestim igitur, & sine morâ in libellorum auctores quæstionem exercuit, ingentia præmia decernens, si quis indicasset. vigilias quoque diurnas, nocturnasque intensius habuit. stationesque per urbem disponit, nec mortalium cuiquam fidere iussit. Ergo hinc, inde, & undique atroces nuncij deferiebantur in regiam. Antverpienses ut non apertâ consensione; itâ viritim descendisse in conjuratorum facinus, mandatumque multitudini ut imparatam occuparet urbem, & si forte arma moverentur à Gubernatrice, ne pecuniam, vel quid aliud, ad usum belli exportari permitterent. Adhæc Gallos, Anglosque pepegisse, non defuturos se conjuratis, si Gubernatrix ad arma spectare cœperit. Et illa quidem de Gallis omnino secura non erat. Quippe Huguenotti (Gallicis hæreticis hoc nomen fecit sectæ genius) magnis copijs

Caletum

Caletum intraverant. Zeelandicas moliri insulas, & ob hoc ipsum instruere classem ferebantur. sed artem fuisse postea apparuit. Exoneraturus Gallias suas Rex, seditiosissimam hominum faciem in Floridas insulas jure colonorum ignaram traduxit. Saluberrimo more, & ferè usitato magnis imperiis; ut repurgato populo domi tranquillitas, apud victos munimenta pararentur. Relatum est præterea, Auriaco, & Hornano intercedere cum Conjuratis privata consilia. Dies appetebat solemni Procerum conventui indictus. Nec Gubernatrix dubitavit, Auriacum, & Hornanum litteris in senatum perlicere. Nam si per omnia spreti forent, causam offensæ crederentur accepisse. & jam de conjuratione placidiora omnia acceperat. Vterque quoque abesse non sustinuit. Itaque VI. Cal. April. præter eos, in curiam quoque ex optimatum numero convenere Egmondanus, Arscho-
tanus, Bergensis, Megemus, Arenbergius, Hoochstratanus, Lignius, Montignæus, Barlaimontius, & Hachicourtius. Privatæ curiæ senatores, unâ cum Bruxellio pariter adsciti sunt. Multisdiebus assidui in eo fuerunt, quid statuerent de Inquisitione & edictis; in hanc, aut illam partem suffragia variantes. Multi pro legibus stabant. Plures mediam sententiam eligebant. Alii leges omnino detestabantur. E quibus Auriacus ita disseruit. *Vtinam in*
prin-

principio credidisses nobis. suaseramus si morbi savitiam ponere velles, uterêre potius aliis artibus, iisque mitioribus, quàm metu mortis contaminatos in desperationem adduceres. Omnes ut vides ejusdem animi sumus. religionem Catholicam salvam volumus. & si integritas ejus sine ope Inquisitionis retineri non possit; agedum digna hæc est, cui fortunas impendamus, & spiritum. sed ut modò audisti, longè nobis diversa sententia est, tolli ergo debet tot malorum seges atque materia, ut nos periculo liberet. Inquisitionem tamen rectè distinxit, quisquis paullo ante duo ejus genera constituit; Papalem, & Episcopalem. priorem illam quia possumus, habere desinamus: alteram enim omnino non possumus; nisi ut episcopos exterminemus sedibus, quorum esse munus nemo ignorat, in cuiusque mores, & genium, vitiaque inquirere. Et hoc ipsum, quidquid est, Inquisitio est. Neque tamen illa est, quam nefaria voce perstringit populus. Papalis illa, seu Romana, sive Hispanica, seu quovis alio nomine dicta, illa tamen sola in fastidium venit, questusque, & odia hominum prope in tumultum concitat. Quid igitur ea opus est nobis, quam multis gentibus deesse video? Pristinus rerum status, plerisque Gallie, & Germanie populis nihil ad constantiam obsuit. satis erit mea sententia, si pastores curam intendant, si episcopi officium impleant suum. Nam & salva Regis pace, Papalem adimi posse sat conjicio. Ille enim cum ad te scriberet, nihil se ex vetere more mutare velle

velle adjecit. Ante Lutheri ortum Inquisitionem
 Papalem nemo noverat. Imperatoria Majestas
 primus induxit. at cum otia retur Ecclesia, cum
 torperent episcopi, cum sorderent sacerdotum
 mores; breviter, cum tempora exigerent. Nes-
 cio tamen; utriusne Caesar, an periculosus fece-
 rit, quod leges publicas, hoc est; fundamenta rei pu-
 blicae concusserit. Interim alia est hodie imperij
 facies, alius dignitatum aspectus, alius rerum ordo.
 Provincias aspice, tot episcopis, quot opulentis
 fere civitatibus instructas. Ecquid mirum, si ad
 saeculi nostri genium remedia exigimus? Medi-
 ci non nisi agere ad tristiora recurrunt. omnia
 prius experiuntur, antequam ad unctionem veni-
 ant. nondum deplorata res est, & consumpta
 remedia. Periculose status bene constituti leges
 vertuntur. Imitandi sunt periti medici, qui acer-
 biora medicamenta suavi temperant mixtura,
 & stomacho nauseantis accommodant. leni-
 tate, non rigore opus est nobis. videmus fastidi-
 um populi. mitigandum hoc est, ne (quod abomi-
 nor) in seditionem exeat. Quod ad me igitur
 attinet, magnopere censerem, hoc esse tempus;
 quo Inquisitionis exercitium differre oporteat.
 quod sine cujusquam fraude facere licet. Inquisi-
 tores ab hodierno Pontifice diploma non habent.
 sine quo hactenus illorum nemo jurisdictionem ince-
 pit. & ipsi quoque fato Pontificis, mandatum suum
 extingui existimant. hac de Inquisitione, mea, nec
 (ut vides) sola sententia est. De edictis vero quid
 judi-

judicem, jam antè multa audisti, & plura nunc in
contemplationem veniunt. Nihilominus Viglius per-
veniendum putat ad gladios. aliter sectarios, ait, tolli
non posse. Et ut verum fatear, ea sententia olim plu-
rium fuit. sed ego illam conditioni temporum, non
prudentiali imputo. Vsu rerum compertum est, exqui-
sitiorum quamque crudelitatem, magis esse sectarum
illecebram. Nam qui novæ religioni accedunt, ita ple-
rumque affecti sunt, ut à Deo tractam putent fi-
dem suam, atque unam præsentis mortis pervicaciam
anteponant. Proximis annis multi professiones illas
amplexi sunt, haut alio vitio, quàm quod in perituris
constantiam mortis attoniti admirarentur. Rectè
eos credere debere ducebant, qui ob hoc ipsum quod
crederent, corpora sua, (quæ utique non oderant) sup-
pliciis offerrent in pignus, & infanda tormenta lati
exciperent. Hoc in Gallia, hoc in Anglia, hoc a-
pud nos denique crudelitas profecit, ut plures de no-
vo reos faceret. Primi quoque Christiani jactare sole-
bant sanguinem martyrum, semen esse Ecclesiæ.
Proinde Iulianus Imperator, ut eos sibi invisos fundi-
tus erueret, mitius habuit. & sanè plures ille pace, &
otio à fide abstraxit, quàm priores illi ferro, & san-
guine. Non est gladio jus in animum. Iudeorum
pervicaciam nullus unquam Regum excussit. Ani-
mi viribus debellandus est animus. Quàm atrociter
hæresis Græcorum concussit imperium? ferè tamen
Cæsares exilio contenti fuere. Nec Constantinus ab
Ario, Constantius ab Aetio, Theodosius à Ne-

istorio graviora exegit supplicia. & hic tamen tristissimas pœnas legibus sanxerat, ut terreret noxios, quorum interim nemo gladio periit. ubi jam sunt Ariani, quos non unum regnum, non unum imperium, fere dicam, non unus capiebat orbis? securæ segnities, & non irritata vetustas universos extinxit. Omnis hæresis hoc in se habet, ut exorients tollat supercilium: simul vero atque exuta novitas est, sibi relicta, & nullo cogente sponte excidat. Contenti simus pœnis, quibus tanti Imperatores fregere flagitia. nunquam tutius quam per exempla progredimur. Nova & inexperta cum periculo incipiuntur. Carolus Cæsar anno M I C L. sollicitantibus provinciis de rigore legum quadam detraxit. sicut Rex Philippus proximè meditabatur. benignitatem ejus Episcopi deterruere. an rectis consiliis, ipsi viderint. Ego interim leges pro moribus temporum flectendas judico. vincemus scelera, si non vicerint. Nam ut omnino esse desinant, vix equidem fieri posse existimo. Nascituræ semper hæreses Apostolus prædixit. Demus verò leges illas optimas esse: quid jam tamen proficient? In plures contagio serpsit, quam citari possint singulorum nomina. quid si, dum intentos jugulo suo viderint enses, ad insaniora necessitate adigantur? Ex parva scintilla magnum saepe ortum est incendium. Hanc aliis initiis Galli in seditiones secessere; cum quibus conjuratos intelligo sociare consilia. Placandi ergo aliqua ratione sunt nobis, si pacem retinere volumus. Quod impræsenti-

tiarum

tiarum dedi, tutum est consilium. quæ vobis optima videbuntur Deus secundet. Nemini mirum videri debet, tantam in illo principe eluxisse cognitionem philosophiæ. Ex Balduini colloquiis hauserat. His ille artibus rempublicam componere susceperat. Libratis ergo hinc, inde rationibus, media placuit via, hoc est; derogare aliquid legibus, quas nec salva pace retinere poterant, nec salva religione abrogare. Dein conjuratis respondendum esse censebant, quod Inquisitionem non habentibus, nullam inferrent: habentibus, interim exercitium ejus mollirent, quoad de voluntate Regis redderentur certiores. moderationem legum Gubernatrici & Proceribus curæ fore: nec laturos alias, quàm quas consensus Ordinum comprobasset communi suffragio. Nec mora Gubernatrix Privatam curiam, primo quoquo tempore novi edicti formulam componere jussit.

Dum hæc aguntur, rumor curiam penetrat, venisse in urbem conjuratos. Brederodius cum paucis appulerat. cæteri postridie successuri ferebantur. Et hoc nuncians alius supervenit. Rogare gubernatrix cœpit, quid auctores sibi fierent, utrum appropinquanti multitudini occluderet portas urbis, an potius in tutum secedens furentibus se eriperet. Egmondani sententia abhorrebat à fuga, vio-

landisque ijs , qui ad tribunal decurrerent. Quem intuens Barlaimontius , quin imò inquit, compleamus curiam armatis, & universis trucidatis tam effusam vindicemus licentiam. Auriacus negabat se commissurum, ut instar barbaricæ feritatis damnaret, quos nondum constaret esse reos, multos eorum sanguine, vel affinitate sibi permixtos. si supplices venirent, quare non liceret his, quod promiscuè omnibus licet? si inermes, nihil esse quod formidarent. Quidam censebant occultè hortandos conjuratos, ut singuli, & sine turbâ venirent in oppidum, vel provinciarum rectoribus libellos porrigerent.

*Conjurati
in curiam
prodeunt.*

Non intererat Conjuratorum quid decerneretur. cogi ad obsequium non poterant. In urbem recepti, Nonis April. progrediuntur in curiam. bini ac bini longo ordine procedebant. Diceres pompam funebrem ducere. De numero scriptores non consentiunt. trecentos fuisse multi tradidere. plures alii, pauciores nonnulli constituunt. Ego in litteris Gubernatricis ducentos invenio. Egregium agmen splendorum equitum, nec inania nomina præferentium. Eminebant inter illos Ludovicus Nassovius cum Brederodio, syrma claudentes; altisque spiritibus inflati, & non vulgari specie, omnium oculos in se attraxerant. Ingens turba densis ruebat

ruebat agminibus in spectaculum, expectatione suspensa. Pauci ex plebe hoc conspectu movebantur. Ignari adhuc quantum feralis illa vecordia conflaret incendium; cuius calamitas maxima ex parte in se redundaret. Frequens eo die Concilium advocatum erat: admissisque in conspectum conjuratis Bredodius uno genu procumbebat in terram, vultuque elato, post officiosæ dimissionis venerationem hæc verba locutus est: *Domina, Nobiles hi, quorum numerum vides, gravissimis de rebus, & ad salutem publicam pertinentibus, ad te libellum adferunt. plures idem facturi erant. sed suæ cuique ratio adesse non patitur. Providere tibi placeat, quæ putabis in commune conducere; atque æqui bonique hæc consulere.* Dein porrexit libellum, & cæterum, *Domina, inquit, quidam actis nostris obrectare ausi, egere negotium calumniæ. turbas, seditiones, & quod atrocius est, mutationem status moliri nos differunt; fœderaque cum alienigenis contrahere. Indigna prorsus animo nostro cogitatio & sacramento adversa. Rogamus ergo delatores renunties; & ad quos tantum pertineat facinus, ut pervestigato scelere debitas pœnas à noxiis exigas. Gubernatrix accepto libello ad Concilium relaturam se dixit. jussitq; in vespæram opperiri responsum. Dein marginibus libelli ex procerum consilio adscripsit; Legatos se missuram ad regem. in ingenio ac benignitate ejus fiduciam ponerent. se quoque interposituram officii sui*

*Oratio
conjurato-
rum li-
bellum
offerenti-
um.*

ministerium. De mitigandis edictis jam multo ante cum Proceribus egisse: & in promptu esse formulam, quam destinaret Regi. pro certo haberent non displicituram eam provinciis. scire utique & ipsos, quàm in potestate sua non esset, intermittere Inquisitionis, legumque munia, vel provincias ex ea parte exleges relinquere. contentos esse debere, quod de postulatis eorùm ad Regem scriberet. Daturamque operam, dum responsum opperiunt, ut Inquisitores, & magistratus providentius, modestiusque se gerant, nec querela causam cuiquam præbeant. Eos quoque se mores ab illis expectare. Considerent itaque, Inquisitionem se non illaturam his provinciis, quibus hætenus insolita fuerit. & hoc esse, quod Brabantis nuper rescripserit. ad quæ impetranda eo proclivius operam, curamque impenderet suam, quod ab omni mutatione religionis alienos eos intelligeret. Tenebrante vespere conjurati revertuntur in curiam. recepto libello, rescriptum tumultuantibus magnopere displicuit. Et certè expectatione minora consecuti fuerant. Itaque preces repetere statuunt. Et quoniam fatalis quædam amētia pervagabatur provincias, multi cottidiè deficiebant ad illos. & qui prius sociaverant consilia, plures jam aderant. Culenburgius quoq; simul intervenit, magna nobilium juvenum manu stipatus. VII Idu. Apr. eadem pompâ rursus iter in curiam dirigunt. Admissi in conspectum, magnas, inquit Brederodius; debemus tibi gratias, Domina, quod

de his quæ fecimus rectè sentias, nec protelationibus ullis responsum moreris. ceterùm si ambigui voluntatem tuam, nonnihil liquidiores effeceris, nihil est, quod debeamus amplius optare. Nam Inquisitionis, legumque arbitrium, non esse tuæ potestatis, longè ante cognovimus. Interim tamen, dum desideria nostra perferuntur ad Regē, sine cunctatione contedere potes, ne Iudices, vel Inquisitores suppliciis quemquam conficiant. Leges quas ex suffragio Ordinum laturus est Rex, non tantum summa fide custodiemus: sed & omni ope nitemur, ut eadem sanctitate ab aliis colantur. Si quos nostrorum seditionis noxa, contactos existimes, per nos licet supplicia expetas. Hæc coram testari volumus, ne si quid fortè acciderit tristius, nobis imputes. cum fidem non habueris instantis periculi discrimen denuntiantibus. Oramus itaque ut cuncta referas ad rempublicam, pro qua & corpora nostra offerimus, nec recusamus occumbere. Ad ea Gubernatrix, rescripto contentos esse iussit. maiora impræsentiarum præstare non posse. Exaratas esse litteras, quas magistratibus, Inquisitoribusque transmitteret. Has deinde recitari eis curat. monuitque ut litarent modestiæ, nec quemquam ultra in societatem admitterent. Curia egrediens circumfusus rogabat Procères, nunquid sibi irationes viderentur Conjurati. Quid? inquit Barlaimontius, securam ego te efficio. non est, quod Geusios illos extimescas. Quæ vox

ab altantibus excepta, causam nomini fecit, ut dicemus postea. Multi variant in tempore, & ante oblationem libelli vocem illam emissam affirmant. Nec refert quando. de facto non ambigitur. Conjurati autem blandis vocibus castigati, coibant ad epulas, quas Florentius Pallas Culenburgij comes universis instruxerat. Multi se omnis ordinis applicuere convivio. Adulta jam cœna poculis certare incipiunt. strepituque confuso personabat triclinium, & in diversa trahebatur alacritas. Ex his bacchantium nescio quis, & ipse insigniter madidus, Geusios se per amaritudinem cavilli appellatos proclamat. arreptoq; protenus ingenti scypho, Geusis libavit. exhausto eo ad umbilicum perpetuo spiritu, eia vivat Rex, vivant Geusii vociferari cœpit. sed & eadem lege circumferri craterem, & singulos haustus pari clamore prosequi iussit. Omnes incaluerant mero. tam ministri, quàm convivæ in furorem solvebantur. non clamoribus, non poculis temperabant. Ita res in serium versa est. Et inde nominis originem secta invenit, quæ initio sui modica: nunc Regis sui vires, & imperium quassare non timuit. Scurras, & mendicos Belgæ *Geuten* appellant. ductam à Gothis vocem plerique conjiciunt; quorum barbaries latrocinantibus similis, nomen gentis posteris ignominiosum

niosum fecit. Nos hæc curiosis ingeniis scrutanda relinquimus. Igitur in hunc modum bacchantibus, Hoochstratanus supervenit à Gubernatrice. Explorare jussus erat, an in fide se mansuros polliceri vellent. Sed à lymphantibus intrò abripitur. credebat ludicrum agi. verticibus capitis alternatim obversos imponebant galeros, manticam circumstantes quam Brederodius è lacunari suspenderat. perque vicem in sedem tollebantur. ubi inter solemnem aliorum vociferationem exsiccato scypho, per panem, falemque, & manticam, in constantiam fœderis sacramentum præstabant. Postero die ebrietate excussà nihil saniores, abradi mentum jubent. subcineritios cultus sibi induunt, ligneasque scutellas de circulo galeri suspendunt. prorsus, ne quid differrent à mendicis, quorum nomen assumerant, habitumque, & mores imitabantur. Aureum numisma de collo demittunt. duraturi fœderis tessera erat. sine qua suorum quemquam prodire in publicum nefas sanxerant. In uno latere Philippi Regis imago eminebat, vibrantibus oculis animata, crispisque labris, & in tumorem surgentibus, ut Austriacum agnosceres. Extremitates vero percurrebat hæc inscriptio FIDELIS REGI. Alteram faciem duæ asperabant manus, impli-

catis inter se pectinatim digitis porrectæ, tanquam in fœdus concurrerent, exprimentes fidei signum. De pollicibus pera dimittebatur, pendentibus funiculis constricta. in ambitu ejus eminentibus litteris cælatum erat, **VSQVE AD MANTICAM.** Inde duos ex suorum numero, in eum modum excultos, ad Gubernatricem adornant. Necessitatem fœderis excusatum ibant, in quod publico se compendio adaectos, nihil adversus numen, Regemque decretum dicerent. proinde ut aperta professione placere sibi testaretur, instanter petebant. Ad tam perplexæ interrogationis insidias; Ego, respondit Gubernatrix, hujus utique causæ iudex non sum. tempora nos erudient, utrum recte, an perperam feceritis. Satis ostendens, promptam tantæ turbæ lasciviam admodum sibi gravem esse. Et hoc ipsum quoque Conjurati senserant. Duodecim igitur præfectos constituunt. Eos vulgus per cavillum, ex numeri similitudine, Apostolos vocabat. Cæteris domum remissis, soli illi ad sollicitandam promissorum fidem Bruxellis relinquuntur.

Inter quæ privata curia novi edicti tabulam Gubernatrici repræsentavit. illa vero excutiendam tradidit Procerum Concilio. Auriacus cum suis, ita legibus illis assensus est, si

est, si extemplo ferrentur. Privata curia in contrarium incubuit, & Gubernatricem traxit in sententiam suam, auctoritate Regis opus esse dictitantem. Hinc inter eos orta contentio est. Et Auriacus ingentē iram concipiens animo; intelligo, inquit, suspecta esse concilia mea. Neque Regi opus est amisis, quorum damnat fidem: neque mihi gloriosum pro fastidiente principe certare obsequio. Ego me deinceps reipublicæ subtraham. Nec diversa ab his Hornanus dixit. Egmondanus vero, ex medicorum præscripto Bajas se Aquisgranenses petere jussum obtendens, paucorum mensium rogabat inducias. Hanc rem Gubernatrix graviter tulit. inter tot pericula, querebatur se destitui. Precibus deinde Auriacum aggressa, & si nec meo, inquit, nec reipublicæ nomine movearis; saltem ne suspicionem conscientiae vulgo facias. Ludovicus Nassovius ac Brederodius foverūt apud te jura hospitij. & hoc palam, atque in ore est omni populo. Quid igitur existimabit cum te quoque hinc præceptum, & contumacius abstinere curia viderit? nonne ut princeps conjurationis habearis, aut particeps? Ad ultimum abire perseverantes verbis terret, culpæ eos substituens, si quid detrimenti infunderetur reipublicæ. deinde iterum ad preces conversa ut manerent expressit. Post hæc Bergen-

lem,

sem, & Montignæum in Hispaniam decernit. Acceptum utrumque conjuratis noverat, Inquisitioni, legibusque juxtà infensum. sed ne vacua rectoribus gubernacula relinquerent. Inlocum Bergensis, Philippum à Sancto-aldegonda Noircarmij dominum Hannoniæ Valencenisque ad tempus suffecit. Eadem lege Joanni Casteleto Mailbasij domino Tornacum attribuit. Novi quoque edicti exempla distribuit rectoribus provinciarum, tradenda Ordinibus. Ejus forma talis erat. *Religionem, quam catholicam ne doceto. functionem Ministerij nemo exerceto. noxios libros ne conscribito. domum conventiculis ne aperito: turbas ne concitato. catholicos ne offendito. Qui horum quid faxit, & pœnitens fuerit, gladio plectitor; si contumax, laqueo exstinguitor. bona damnatorum eatenus publicantor, quatenus per leges municipales licet.*

Qui hæresim contraxerit, & horum nihil fecerit, si coram episcopo renuntiaverit, fraudi ei non esto. si non renuntiaverit, relegator. bonis interim fruitor, alienandi, aut testandi facultatem ne habeto. catholici intestatis succedunto. Si proscriptus publicam vel religionis tranquillitatem turbarit, bona amittito.

Anabaptista pœnitentes, & alterius noxæ non cōmpti, arbitrio judicis, citra mortem puniuntor. contumaces exilio bonisque amissis coërcentor.

Relapsi

Relapsi qui non maledixerint, publicatis bonis provincijs cedunt. qui maledixerint, ultimo afficiuntur supplicio. Anabaptistæ relapsi sine discrimine damnantur ad laqueos.

Qui dolo malo seditiosos, aut contaminatos libellos sapius excuderit, pœna Ministrorum tenetur. si rarius, exilio plectitur, & arbitrio judicis. Qui duntaxat lucri causa fecerit, extra ordinem coercetur.

Disputationem seductionis causa frequentius instituere capitale est. Rarius, animique gratia, arbitraria pœna.

Qui vetitos legerit libros; qui legendos alteri exhibuerit; qui vetitas imagines pinxerit; statuas sinxerit; aut horum aliquid habuerit; qui interfuerit sectariorum conventiculis, pro conditione criminis, & persona plectitur, judicis arbitrio.

Qui illicita conventicula prodiderit, si particeps fuerit, impunitatem habet: si non fuerit, dimidium bonorum, quoties non excefferint sexcentos florenos, auferto: quoties excefferint, quartam partem percipito.

Peregrini in urbes vicosque, sine pastoris, aut Magistratus testimonio ne admittuntur. hæc lex tamen peregrinos mercatores non teneat, si modeste se, ac sine cujusquam offensa gesserint.

Regij judices, inferioresve magistratus, & vasalli in reos animadvertunt. sin secus; honoribus, muneribus, feudo privantur.

Magistratibus, & territoriorum patronis, revocandi domum jus non est.

Si cui noxa indulta fuerit; ad honores, & magistratus inhabilis esto.

Qui suspecti pronuntiati erunt, restitutionemque impetraverint, ad munera & honores admittuntur.

Quamvis extra territorium relegare non liceat, quisquis tamen ob hæresim proscriptus fuerit, universis provincijs cedito.

In typographos, bibliopolas & ludimagistros haut diversa à superioribus legibus statuebantur. Vnus mensis deliberandi causa datus est magistratibus. post illum sententiam remittere jubebantur. Prolixiusque spatium Gubernatrix indulserat; quod interim aut scripturum putabat Regem, an ratas haberet leges, aut quoquo modo factiosorum vecordiam repressurum.

Hinc de ipsa conjuratione in circulis, & cœtibus plurimus sermo. tristis, aut lætus, prout cuique fides, aut ingenium erat. Fuisse qui ad portentum, omenque referrent, quod Conjuratos in curiam prodeuntes claudus duxerit. Alij initia, causasque Gallici motus expendentes, præsentibus rebus conferebant. Edicta, & quæstiones sub Carolo Imperatore, ac Philippo. ejus filio, juxta ac sub Francisco, atque Henrico Galliarum regibus exitiosas multis, in quorum corpus,

pus, bonaque, ignis & hasta sævierat. Ne-
riquam tamen fregisse flagitium, quod intra
paucorum conscientiam nihilominus cohi-
buere. Nec ut impares radicem exscindere: sed
mutuis cladibus intenti, subtraxerant curam
legibus, inter arma invalidis; quibus etiam
temporibus, utpote turbulentis, fœda om-
nia adfluxerant. Nulla tamen adhuc formi-
do ex sectarijs. Donec inde excessu Henri-
ci; hinc Philippo in Hispaniam abtracto, in-
ter Optimates utrobique superveniret ambi-
tio, vetus aulæ malum. Ambitionem Pro-
cerum invidia excepit, & factionum atroci-
tas. Flagrantibus in Gallia odijs adversus
Cardinalem Lotharingum, in Belgio adver-
sus Cardinalem Granvellanum. quorum al-
ter sub Catharina, & Francisco filio, alter sub
Margareta Gubernatrice rerum potiebantur,
atque omnia poterant. Postquam Cardina-
libus utrobique adempta est potestas, manse-
re tamen odia partium. multaque sectarijs
indulta fuere, fœdâ edictorum inconstantiâ.
dum per alterius Regis continuam pueritiam;
alterius contumacem absentiam, sana con-
silia exscindendæ contagionis, tanquam à
Cardinalibus profecta, factiosorum invidia
cluduntur; hoc ipsum indignantium ali-
quos esse qui vellent corrigere. Ad ultimum
aucto morbo, Admirallium, & Brederodium,
hunc

hunc Gubernatricis , illum Regis sui genibus advolutum , & utrumque favore Procerum , studiisque nobilitatis subnixum , postulasse libertatem religionis. Nec in Gallia prius quievissent tumultuantium ingenia , turbulentissimo sectæ genjo accensa , quàm signa attollerentur in Regem , & in uno regno alium, atque alium populum facerent. Nihil ergo mitius expectandum in Belgis , agitatæ eodem illo pestilentissimo sydere. Leni ad omnia Gubernatrice , & incautâ ad imbuendum consilia , quæ velut non ex arte fallax quorundam familiaritas insinuat. Cum contra Catharina , gravis regno mater, Italicis artibus cuncta corrumperet.



NICOLAI BURGUNDI
HISTORIÆ
BELGICÆ
LIBER III.

PRINCIPIO anni nihil prius quàm de legibus actum. ingrata res conjuratis, qui generalia Ordinum comitia optaverant. haud dubiè ut leges, quas detrectaverant accipere, Principi ponerent. Cæterùm Gubernatrix à singulis provinciis singula suffragia requirebat. Sufficere rata quoquo modo auctoritas Ordinum accederet. Generalia utique comitia, ut pernitiōsa dominantibus, aspernaturum esse Regem, & si forte indicerentur, sententiam singulorum prænoverat. Sed nec eadem mens provinciis, nec rescribendi cura omnibus fuit. Luxemburgenses, & Namurcenses sine scrupulo consensiebant in leges. Artesiæ Ordines id modò cautum volebant, ut pœnâ talionis calumniatores obstringeret Hannones. hoc amplius exegerant, ut publicationi bonorum surrogaretur arbitraria pœna. Obstinati in patriarum consuetudinum reverentiam, vindicabant pristinos mores, qui confi-

Anno
MDCXLV
Stylo v
teri.

scationi hæcenus locum non fecerant. Flan-
dri ita legibus sunt assensu, si ecclesiasticorum
quæstionibus profani non tenerentur. revo-
candi domum jus esset. munia Inquisitionis
cessarent. coram Pastore, & magistratu fas es-
set hæresi maledicere. Brabantie Ordines Bru-
xellam evocati, postquam ea quæ de edictis
proponerentur acceperant, relaturos se ad po-
pulum responderant. Iudicium populi Gu-
bernatrici suspectum erat. primoresque maxi-
mè monere cœpit, *ne tam periculosam rem sub-
jicerent suffragio plebis, isdem vitis contacta, quæ
pararent ulcisci. pro comperto se habere, seditiosis-
simum quemque intercessurum decreto; quod fru-
straritamen non debeant, nisi patriæ exitiosi esse
vellent, ipsam denique Majestatem offendi concu-
perent. Memorésque esse debere, cuncta ad popu-
lum vocando, auctoritatem primorum resolveri.*
Facile persuasum est Ordinibus. Cæterum hi
multitudini imponere non poterant, adimi si-
bi privilegia mustitanti. si Ordines rogaren-
tur, cur plebem excluderent? sine calculo
ejus consensum Ordinum solemnem non ef-
se. tertium in civitatibus membrum multitu-
dinem constituere. Ut nemo adhuc aliquis
apertè; ita multi privatim Gubernatricem
criminabantur. fixisque palàm scediis consen-
sum Ordinum invidiosè proscribebant, tan-
quàm minus legitimum. res sanè ad accen-
dendas seditiones temporibus nostris & usita-
ta sem-

ta semper, & semper vetita, nunquam satis punita. Vnde præcipuè indignatio, seditiosa-
que voces, & turbulenta colloquia, in discordibus animis, & ob remissa legum fræna promiscuam licentiam usurpantibus. Cæteræ igitur provinciæ in recensendis legibus marcebant. Neque interim legatio diutius differri poterat. Montignæus, & Bergensis formulam edicti, simul & supradictarum provinciarum censuram accipiunt, ac primo quoquo tempore in Hispaniam deferre jubentur. In mandatis insuper hæc habebant. De Inquisitione, & edictis sententiam promere festinaret Rex Philippus. Concilium Status revocaret in eum modum, quem præteritâ legatione Egmondanus proposuerat. Præteritarum rerum oblivionem concederet, & hoc pacto diffidentia occurreret, quæ aliâ ratione ablui non posset ex animis fœderatorum, peccasse timentium.

Interquæ ab episcopo Leodiensi superveniunt legati, ademptum sibi territorium repentes. Diu erat, quod hoc ipsum apud summum Pontificem contenderat frequentibus libellis. In comitiis quoque Augustanis multa nequicquam quæstus fuerat. Tunc verò, cum hic omnia nutarent discordiis, facilior spes promittebatur. Et ne non tempore uteretur, jurisdictionem in Campiniâ exercere vi coepit, intempestivisque tribunalibus religio-

niilludere. Eâ tempestate episcopatum Silvæducensem obtinebat Sonnius, de quo ante habita mentio est. In hunc sibi resistantem ecclesiasticis censuris intemperanter Leodiensis invehitur, minacesque libellos portis civitatis, templorumque affigit, ut in omnium oculis proscriptus Sonnius excuteretur è cathedra. Iustânè ira Leodiensem impulerit longum esset inquirere. Non habuit sanè rationem temporum. Alienam dignitatem proscribendo, seque pariter, & auctoritatem suam destruebat, intempestivis discordijs.

Exinde civitates Culenburgo obnoxias, studia novitatis apertâ professione induisse nunciatur Gubernatrici. Super hæc Egmondanus, & Rassegemius majore terrore sollicitudinem ejus perculerant. Gallos dissimulato habitu misceri passim Belgis, munitissimæque oppida ignotos lustrare. Nec ex ficto omnia erant. Nam etsi è Galliâ quæta cuncta adferrentur, suspecta tamen erat gentilis levitas. paventibusque sollicitudo subiecerat, nihil nefas esse regibus, omnem rationem augendi regnum, honestam. nulli tantas opes, ut cupiditatem expleant. non decesse speciem æquitatis bellum concupiscentibus, majorum jurgijs nunquam satis fidâ pace sopitis. At non idem consultioribus videbatur, molliora augurantibus de illo rege, Optimatum factionibus

bus colliso; neque externa arma laceffituro, quæ domi timeat. Satis tamen constabat machinas illas admoveri à magnatibus Gallicis, pari discordiâ Belgas inter se committere molientibus, ut si à Rege suo ipsi premerentur, hic haberent unde accerferent auxilium. Gubernatrix interea improvise territa malo, in diversas cogitationes abripitur. Neque enim à domesticis turbis secura erat. Præfidiarii propriâ indigentia, & super hæc, ejusdem anni caritate annonæ pressi, passim destituebant vexilla. alij in monasteria, villasque petulanti licentia ferebantur. ibi quisque pro libidine sumebat hospitium. Hinc ergo metus, ne militares animi desperatione accensi, apertâ consensione ad conjuratos deficerent. Quippe conjurati, non satis bonâ fide pacati abscefferant. Manebat plerosque conscientia sceleris. & quasi aliorum scelere absolverentur, multitudinem provocare adorsi sunt ad libertatem religionis, ut reipublicæ libello confusisse crederentur, & per confusione in Status, ea quæ volebant exprimerent.

Itaque jam Ministri, jam fœda cuncta, tanquam in sentinam in provincias confluebant. Boni malis, dubij integris permixti, invicem corrumpebant, corrumpebanturque. seditiosissimi quique supercilium attollere; mox crescente licentiâ, novarum rerum studia proferre; adçòque procaciter, ut quidâ Al-

denardæ sacrificanti sacerdoti hostiam subtraheret, Ille quidem atrocitatem audaciæ flammis expiavit. Sed ad eum modum cætera corrigi non poterant. Prætori Flandriæ nocturnis cœtibus comprimendis, octoginta satellites statuuntur, Parem numerum Brabantia prætor conscripsit. & quasi parvus hic numerus esset, ducenti equites utrique adduntur. Impar adhuc manus vecordia multitudinis, quæ armorum præsidio concionandi jura sibi asserebat, contumaciam suam prætorum viribus conferens. In civitatibus, ut multi boni, integrique, ita dubii, metuentesque, quisnam exitus foret, contrarias partes fovisse noluerant. Egentissimus quisque ex plebe conjuratis adhærebat, si forte casus daretur, ad spoliū accursurus. Sparsaque in agris nobilitas, ubi pro Inquisitione, & edictis stare crederetur, ædes suas exponebat injuriæ. Sic ergo, ubi nihil usquam sincerum, aut tutum, frequentari liberè conventicula cœpère. Inquisitionem & edicta usus rejecerat. non tam volente Gubernatrice, quàm quòd crederetur voluisse. Supremis provinciarum conciliis, atque rectoribus in eam sententiam scripserat; *Dari operam volo, ut Inquisitores, judicesque prudentius se, modestiusque gerant, nec querelæ cuiquam locum faciant. Si quos seditionis, aut scandali crimine judicetis contactos, causam eorum ad me remittite.* Hæc sectarii haut aliter accipie-

accipiebant, quàm si legum fræna resolvisset. Quædam Procurator Generalis Flandriæ, quædam Audenburghenses conventicula dissipavêre, & trecentorum aureorum præmio excolti sunt. Sed ad plectendum vires deerant, auctoritate Gubernatricis in risum versâ. quæ inter contumaces, metûque solutos, omne decus majestatis amiserat. Ne tamen ipsa conni vere videretur flagitiis, atroci edictò in conciones detonuit. Ministris, receptatoribusque mortem indixit. inermes auditores arbitrariâ pœnâ: armatos autem exilio plecti jussit. Ministrum comprehendentibus trecentorum aureorum mercedem constituit. Sed nunquam magis patuit quàm sit vanum sine viribus imperium. Miserabilis reipublicæ, miserabilior facies. Vrbes, pagos, tantûmque non totas provincias sectarii infederant. Novisque legibus nihil ampliùs profectum, quàm ut constaret impares eas esse flagitiis.

Dux sententiæ Gubernatricem destinebant. Alii conscribendum censebant exercitum. Temperandum pluribus videbatur. Nam si moderatio legum maturè succederet, cuncta ad pacem sponte reditura. Igitur legati stimulantur ad iter. Sed fortuna in omnibus maligna remoram iniecit. Bergensis in areâ curiæ inter ludentes obambulans, palmulæ ictu in crure percussus est. Quorum-

dam superstitio hoc ipsum in deterius omen accepit. Ille interim nihil deterritus, vulnere tamen retardabatur. Et Montignæus ut sine comite præcederet, exorari vix poterat. Interim Prætori Flandriæ trecenti quinquaginta pedites rursus adjecti. In quatuor agmina dividere copias, atque in diversa jubetur contendere. Sed nullum jam præsidium sat firmum videbatur adversus furentem multitudinem. Plerisque etiam fortunam tentantibus, haut prosperè cesserat. Ergo undique atroces nuncii; Zeelandos, Aldenardenſes, Valencenenses, Tornacenses, & Antverpienses illicitis cœtibus amplius resistere non posse. Gubernatrix tot simul malis confusa, adhibitis in consilium Proceribus rursus quærebat, an efferatæ audaciæ opponeret armatos. Auriacus, Hornanus, & qui præterea ejusdem factionis erant, nihil dum movendum censebant. nisi amaret classicum dare, ad cujus strepitum insani, urbes, pagos, & monasteria diriperent, atque inde deficerent ad Gallos; accersitisque in provincias peregrinis exercitibus, excidio patriæ efficerent, quod viribus suis nequirent consequi. Roganti, quid igitur facto opus? vox eorum fuit, postulatis legatorum assentiretur Rex Philippus, exarmaturos ipsos protenus licentiam populi, pacemque reddituros provincijs. cæteroqui pro Inquisitione, & edictis arma non sumpturos.

Viglius

Viglius facilè quid vellent intellexit. stimulisque iræ senlim concedens; *Videre se dixit, scienter, nolenterque rempublicam destitui. quid enim de Inquisitione, & editis tantoperè ipsi sollicitarentur? permitterent hoc Regi, & suum quisque impleret officium. Vellent ne ergo Principi dare leges? vel per immodestiam extorquere, ut vel invitus concedat in eorum libidinem? Meminisse debere, totam hanc tragœdiam, ab intempestivâ principalium litterarum publicatione initium, causamque ducere. cuius rei Proceres reluctantibus sibi auctores fuerint. Si gladio asseri serenitas possit, uterentur occasione. Reddendam sibi rationem prætermissi officij, ni præcipitata consilia maturè corrigerent. quod in illorum esse potestate, etiam ex propriâ confessione se accipere. Quos enim iustus arma opposituros, quam qui provincijs præpositi, mandatum Gubernatricis acciperent? Multa quæ pertimescerent in melius cessura. Populum mobili impetu ferri. Terrorem circumfusi exercitus statim tela excussurum è manibus. Seditionis principia formidolosiora esse, quam remedia. Gallorum auxilia nullos jactantius spondere, quam quorum interesset ea venire. Quis autem promittet non aliquando deinde successura, ad turbandum statum, quaquâ ratione compositum; si Belgas contra ignavos aspexerint? Arma armis retunderent. Levia adhuc esse, & vana fortasse indicia, quæ de Gallorû machinis spargerentur. Nec se præterea quidquam de*

apparatu audivisse. An Inquisitionem, & edicta extremum putarent, quod postulaturi essent sectarij? Nihil minus quieturum populum sibi relictum; priusquam libertatem religionis adeptus fuerit. ad quem scopum distantat collinearet tanta licentia. His auditis Proceres pejus accensu sunt. Non temperavit iræ Hornanus, cujus satis potens non erat. Flagrantique eum intuens vultu; Nos ergo, inquit, Vigli tibi videmur, qui irati populi insaniam in tumultus avertimus? quid ista sibi vult oratio? Litteras Regias publicari suasimus; quia princeps iusserat. Mandatis ejus morem gerere officij nostri fuit, cujus tu tam intemperanter rationem exigis. Si non paruissemus, tunc merito sceleris nos arguere poteras. nunc quia paruimus, cur nobis invidiam facis? Quare eâdem operâ non culpâs Regem quod litteras miserit? ille, si dicere licet, hujus culpa auctor fuit. Si intelligere vellet, multum nobis deberet. Ex eo enim scire inciperet, quam stolidè Hispanorum consiliis totus adhæreat. Hæc tibi gens Vigli, ante omnes culpanda fuerat. Nemo alius litteras composuit. Ego totam culpam transfero in illos homines, qui haut aliter Belgis, quam Mediolanensibus, Siculisque, & Neapolitanis dominari præsumunt, Satis video, quod vestrorum ingratis hîc sumus. Ut nempe Granuellista secure occupetis rem publicam, & Hispanis possidendam per manus tradatis. Plura dicturus erat, & fortasse atrociora præteritis. Sed ex
omni

omni parte oriebatur fremitus, ardentibus Procerum animis, passimque Vigilium contumelijs, & invidiâ onerantibus. Nihil ergo in commune consulebatur. cum Gubernatrix ad tot clamores perplexa, curiâ excessit, senatum dimittens, mollique sermone adhortans ad concordiam.

Dicant alij quidquid volent, mihi semper tumultuum horum causa fuisse videtur, ambitio, & invidia Procerum, per tot trophæa pro nobilitate suâ magnos spiritus gerentium. Primò quidem Granvellanium provincijs extrusere, tanquam principalibus illudentem curis, Procereſque calcantem recenti potentiâ. Cujus abscessu gubernaculi viribus ad illos translatis; cum nec Rex in omnibus libidini eorum morem gereret, & hi econtra deterreri illum potissimum arbitrarentur Hispanorum consilio: hoc ipsum maximè indignabantur, aliquos esse, qui possent contradicere. Hinc ad omnia principi discordes, irati, & contumaces. atque ut optimum videretur consilium quod attulissent ipsi; durabant in exitium rei publicæ; & hanc perire malebant, quam mutare sententiam. Meherculè verò, nihil ego populari invidiæ non attribuo. Novistamē episcopatibus, & Inquisitioni, & edictis, quibus tū maxime irascebantur, cuncta non imputo. Altiores causę stimulabant Procereſ in facinus.

Furor,

Furor, & ambitus cæcos obsederat. De cætero Inquisitionis, edictorumque larvas palam assumpserant, ut sub honesto titulo litarent invidiæ suæ, & publicæ utilitatis speciem æmulationi præferrent. Quis non videt, repentem tumultuantium insaniam potuisse comprimi ferro, si extitisset qui gladium educeret? Nullo postea negotio sectarii concessere victoriam. Vnius civitatis deditioe cervices subdidere. Proceribus itaque non constabat fides. Hæc est causa sequentium malorum. & ut propius radicem attingam, profunda pax luxuriam pepererat; quam superbia, contemptusque numinis excepit. Hæc inquam vitia perdidere rempublicam. & super omnia divina providentia; quæ ubi scelera nostra ulcisci, fortunamque mutare constituit, prudentiam adimit, ac consilia corrumpit.

Cæterum nihil eorum quæ in Belgio agitantur Rex ignorabat sed in adventum legatorum remedium distulerat. Cunctabundus ingenio, & semper exequi differens consilium, quod tardè sumpserat. cum interim ubi principiis non occurreret, publica mala progredierentur in pejus, & tunc post res consilia adferrentur.

Regionem omnem tres distraxerant sectæ. In Flandria, proximisque Galliæ Calvinistæ præcellebant. vicina Germanis invaserant Lutherani, Hollandiam, & Zeelandiam Anabapti-

baptistæ. Vniuersæ facies Antverpiam inse-
derant. Inter Flandros verò, finitimosque
Gallis, Aldenardenses, Poperingenses, Tor-
nacenses, & Valencenenses eminebant. Reli-
quæ civitates, quamvis & ipsæ superstitioni-
bus contactæ: tamen consensu bonorum su-
perabantur. In his verò malorum numerus
excreverat.

Aldenarda popularibus ingeniis urbs est
procax. Theatralis licentia sacræ Scripturæ le-
ctionem ciuibus promiscuè indulserat. Qui-
bus se opinionum novitas haut ægrè insinua-
vit; naturâ suâ blanda, & pallax animorum
nullo litterarum studio mitigatorum. Totam
mox plebem, positâsque circum gentes, velut
incendium quoddam ea pestis corripuit. Tor-
pentibus per iniquitatem temporum legibus,
& Ministris ad imponendum acribus, per spe-
cies virtutibus similes. Hactenus professio-
nem suam tenebris absconderant. Vbi verò
conjuratorum factio domuisse crederetur sce-
leris ultionem: audacia modestiæ impatiens,
pedetentim erigere supercilium cœpit. Donec
ad ultimum Cal. Iul. in apertum prorumperet.

Iter est ad Gandavum, in vicum Rodium
ducens. Haut procul portâ in patentissimam
planitiem extenditur. Huc Ioannes Winge-
ne, turbulenti vir ingenii à conjuratis inflam-
matus, infandam multitudinem Rotnac, Al-
denardâque deduxerat. Habebat in comitatu

*Sectis
palam cō-
cionari in-
cipiunt.*

Mini-

Ministrum, Hermannum Strickerium, haut absurdum corporis habitu, ingenio vanum, & tumidum, vultu arroganti, facundiâ præcipuum, auræque popularis captatorem; dignum planè qui non degeneraret à majorum cæremonijs, nisi egregias naturæ dotes turbidissimis moribus corrupisset, ut postea dicemus. Fuit hic Swollæ in Transilvania genitus, parentibus ultimæ sortis. Inde autem legibus pulsus, famam quam per modestiam professionis (fuit enim monachus) consequi non poterat, sacrorum novitatibus Aldenardæ sollicitare cœpit. Primusque omnium ad publicas conciones multitudinem provocavit. Insolita res erat. Ruebatque ex proximis civitatibus, atque vicis, & undique populus, cognoscendi avidus, & tum maximè, quia prohibebatur. Nec solum quibus corrupta fides erat; sed plerosque etiam innoxios curiositas attraxerat. Numerum referre vix ausim. Septem millia interfuisse traduntur. Sed in tam confusâ multitudine, justum calculum iniri nō potuisse crediderim potius, quam temerè asseveraverim. Iudicium scriptorum sequor, quando aliter de veritate non constat. Ergo omnes ad sermonē erexerant aures. Quidquid fere spatij septis claudebatur, multitudo impleverat. Cornelius Croësenius Gentbruggēsis prætor non dubitavit, quin primo impetu cōcio pro-
teri

teri posset. Itaque rem ausus ingentem, contemptim in eos concitat equum, alterâ manu strictum tenens gladium, alterâ sclopo armatus. Per cuneos populi receptus, ad comprehendendum Ministrum deferebatur. Sed hic tumultu audito in proximam se proripuerat silvam. satis gnarus unum se potissimum peti. Multitudini ferè arma dederant, & statim furor invenit. Denso saxorum nimbo aërem condidit. Croësenium eminùs, cominùs petebant tot jactus. & ille ad omnes ictus expositus, plurajam vulnera capite exceperat. Cum non furibundus ut ante; sed supplex, ac fugam circumspectans, projecit arma, & præsentî morti non perfunctoriè castigatus, se subtraxit. Hinc sectarijs fiducia crevit. & quia auspicia prosperè cesserant, alacriori animo X. Calend. August. solemnia repetunt. Ingens compitum, sive pascuum erat. haut procul Gandavo Persellinâ expositum portâ. Alostum S. Petri vulgo dicitur. Ibi vehiculis inter se junctis, castrorum speciem fecerant. Aditus omnes, vigiles insederât. alij hastam, alij securim, multi sclopum habebant. In principijs stabant bibliopolæ, illicitos libellos accepto pretio distribuentes intrantibus. Dispositi per viam, qui ignaros deducerent. & ut quemque casus obtulerat, invitabant ad sacrû. Sublimē in medio compiti excitaverant suggestû, subitarijs asseribus instar scenæ

scenæ curruî impositis. In hunc sublatus Minister Hermannus, quæ ad superstitionem pertinerent elatâ voce docebat. Ingens agmen stipaverat latera. Quos nullo jam metu suam quemque libido attraxerat. Concione peractâ, virorum fæminarumque cantus oritur, suo more identidem carmen sonantium. Post quæ peluisquam inferunt, quam è proximo hauserant flumine, & oblatum infantem, non ritibus, non cæremonijs majorum adhibitis; sed ut erat in profanâ veste Minister baptizat. Magna pars civium Gandavensium excesserat portis, quos fere omnes postea Albanus conquisitos, aut morte aut exilio mulctavit. Biduum ibi superstitionibus datum. Inde verò Deinsam movere, tertio fere lapide recedentem à compito. Post Eeckloam, & in Brugarum confinia; hinc aliò, atque aliò transeuntes, totam Flandriam orientalem concionabundi peragrabantur.

Iisdem diebus Magister Petrus Dathenus Poperingenses in regione Flandriæ occidentali majori furore compleverat. Fuerat ille ejusdem civitatis quondam monachus. Rejectoque cucullo defecerat ad Palatinum. quò ferè eâ tempestate perfugere consueverant delira ingenia, & fœda omnia. Mox factionum atrocitate tranquillitatem provinciarum libante, Poperingam redijt, & inter sectarios principatum facile obtinuit, facundiâ pollens, quam

quam longo usu exercuerat. Quindecim milia ad concionem pertraxit, quam tunc primum publicè erat habiturus. Quantò major multitudo, tantò violentior. Nec enim pari quàm Aldenardenses modestia, novitatem suam licentiæ consecravit. Duo Anabaptistæ Armentarii tenebantur in vinculis, quorum supplicium idoneis temporibus reservabatur. Protenus ergo sectarii magistratui denunciari jubet, resolveret captivos, & si differret, armis se repetituros. Nec segnius quàm minati fuerant, fecerunt. Nemo venientes prohibere sustinuit, audacia multitudinis in merum crescente. Fractæ sunt carceris fores. captivi ex custodia educti. patratoque facinore dimissi domum sectarii, paullisper quievère.

Valencenenses vetus malum stupore morientium legum licentius aluerant. Primores civitatis externus timor maximè intentos habebat. Cæterum concionandi libidini pares esse non poterant. Viam licentiæ Conjurati aperuerant. Accedebat & metus, ne si intempestivis quæstionibus asperaretur populus, desperatione adactus ad Gallos respiceret. Hinc sectarii ad infaniora progressi sunt. Promiscuam religionis libertatem, oblato magistratibus libello superbè flagitare cœpere. Anxii Primores tantis malis, Gubernatricem ex templo certiolem faciunt, quid de his fieri vellet.

veller. Illa quidem attonita , nihil amplius
quàm leges exerceri jussit. Vanum prorsus si-
ne viribus solatium. Potentior legibus vis e-
rat. Sine metu seditionis supplicia exerceri
non poterant. Igitur cùm in tanta licentia in-
tutum videretur iram multitudinis quæstio-
nibus provocare : sectarii quod nequierant
precibus , per vim occupare constituunt. A
Conjuratis denique secreto adhortabantur.
Nec cessabant Ministri fatigare clamoribus;
*Maecte animo , jam tempus appetere, quo euangelium
proferrent in publicum. Quid ultra suppliciorum me-
tu retinerentur ? Vanam esse iram magistratuum , in
consensu multitudinis. Inania dignitatum nomina
ne pavescerent, quarum tota potestas consisteret in obe-
dientia parentum. Increpare fœderatos illorum igna-
viam. Vires suas periclitaturis promittere. Flandros
nuper eadem ausos ; & impune cessisse. Turpe sibi esse,
quod à reliquis nationibus ardore vincerentur. Ant-
verpienses , & Tornacenses idem velle : sed initium e-
rumpendi circumspicere.* Non erat opus tanta
facundia. Is habitus animorum fuit , ut faci-
nus omnes vellent , nemo tamen auderet in-
cipere. Mittunt igitur ad Antverpienses &
Tornacenses , qui communicarent consilia.
Quippe tres hæ civitates communi fere con-
sensu regebantur. Plebs utrobique ab Opti-
matibus dissentiebat. Primores obsequium
fidemque colebant. Multitudo fere novita-
tibus accesserat.

Secta-

Sectarios Tornacenses continenter agita-
bat Ambrosius Willius, homo Gallus, & de-
lata sibi Ministerii prærogativa ferox. Sena-
tus enim quosdam sectariorum in custodia re-
tinebat. Ad eos vi armisque eximendos non
semel Willius multitudinis aures incassum
verberaverat. Sed cum clamore & questu ni-
hil proficeret, conscripsit tabellas in hanc
summam: *Captivos ex templo dimitterent, ac desine-
rent terrere edictis, quos scirent armatâ manu ultio-
nem petituros.* Hos ille codicillos projecit in
concionem, plenusque irarum ad senatum
protinus deferri jussit. Audax protervia
Primores exterruit. Ac nemini dubium
erat, quin gravioris sceleris fiduciam præ-
ferret. Itaque præcipuos plebis in curiam
vocatos, hortantur ad tuendam armis rem-
publicam. Milites præterea quinquagin-
ta paullò ante conscripserant publico ære
merituros. Eos quoque ad signum inten-
tos esse jubent. Sed nec hi persuaderi pote-
rant, ut in parentes & propinquos arma
stringerent. & plurima plebs novitati-
bus gaudebat. Optimates igitur altiora me-
tuentes, intempesta nocte captivos in arcem
traducunt. Præerat arci Joannes Castele-
tus Molbaisii Dominus, fiduciariâ præfe-
cturâ Montignæo suffectus, fidus Guberna-
trici, nec religione deterior. Senatus ei mili-
tem omnem ad custodiam arcis attribuit.

Galli erant qui potissimum timebantur. Nam proditioni arcis imminere incertus rumor attulerat. Willium denique sæpe palam jactasse constabat, religionem suam in anxio semper fore, nisi gubernacula reipublicæ à patribus transferrēt ad populum, traditurū deinde Gallis civitatis imperiū. Sed ne urbs sine custodia relinqueretur, Senatus à Gubernatrice præsidium militare petere constituit. Huic mox decreto irā multitudinis se opposuit. Nicolaus Taffinus vir plebeius, opibus potens, juxta factiosus, plebis animos ad seditionem erexerat. Magna verborum contentione certatum est inter patres & plebem. Misericordia enim temporis, etiam humillimis in magistratus licentiam fecerat. Dicebant patres, decretum revocari non posse, nisi ab externis hostibus, seditionibus, & concionibus tutam vellent præstare urbem, & in hoc idonei fidejussores traderentur. Sectarii contra publicum sibi templum in civitate dari petebant. Eoque negato, Valencenensibus junguntur, & in publicas conciones prorumpere constituunt.

Vtrisque populis dicta est dies. viii. Id. Jul. in suburbiis suæ quisque civitatis solemniorum auspicia incipere statuit. Destinata luce appetente, non ex civitatibus modò, sed ex vicis, pagisque, omnis generis mortales accurrebant ad sacrum. Viri armati ibant, foemi-

foeminae parvos trahebant liberos. Non alias unquam major turba in unum confluxerat. Circiter quinque millia Valencenis numerata sunt. Ampliorem paullo numerum Tornacenses expleverant. Hic quoque turbidus ille Willius insanè furebat; armis se persecutorum injuriam vociferans, si Insulenses non abstinerent à probris, civibusque conscientia sibi obstrictis, infesti esse non desinerent.

Siquidem Insulenses novitatibus ut plurimum adversi, quoscumque ex agrariis conditionibus redire conspexerant, petulantibus verberabant contumeliis, & in publico ludibrio habebant. Non aliam magis urbem, procellis temporum expositam, reverentia Majestatis in fide continuit. Adjuvantibus rectorum ingeniis, pro majorum pietate constantibus. cum e contra Montignæus, & Bergensis nimia dissimulatione, Valencenensibus, atque Tornacensibus plus æquo indulgissent. Ad primum sectariorum motum Gilbertus D'Oignii Tornacensis episcopus, huc se recepit. Quò pridem ea quæ ad sacra pertinerent, captatis temporibus convexerat. Fidissimi civium in præsidio erant, à magistratibus nuper in sacramentum accepti; quibus præerat Gislenus Hayninus Brencii dominus. Maximilianus Vilainius Rassegemii dominus, arcem insedebat, non contemnendo præsidio. Quippe mortuo Courririi domino,

fiduciarium Insulensium præfecturam acceperat. in paucis Gubernatrici charus, & qui per hæc bella incorruptam semper fidem Regis servavit. Comes Reusius cum Ordinariorum equitum turma in proximis excubabat vicis, laturus opem periclitantibus. Namque Gubernatrix pervagante jam provincias incendio, Arschothanum, & Reusium, simul comitem Bossium, atque Barlaimontium, Ordinarias, quibus præerant turmas, adornare jusserat. Horum fides minimè timebatur. Cum turbulentis consilia non miscuerant. In hoc quidem turbine, multi Insulensium novitatibus capiebantur. Nemo tamen civitatis conspectum concionibus fœdare sustinuit. Numinibus operaturi plerumque secedebant in Saillium pagum, primo lapide distantem ab oppido. Ingentem secum habebant agricolarum manum, & ipsam quidem armatam; sed vecordia ferociorem. Pro fide se morituros, sacramentum invicem dederant. Cognitaque pervicacia nemo eos laceßere sustinuit. Sciebat quippe Raslegemius in eo stare victoriam, si tutam à flagitiis præstaret urbem, quando aliter insanix occurrere non poterat.

Antverpia non solum Belgicarum urbium domina; sed cum præcipuis orbis terrarum civitatibus certare ausa, ea certè tempestate commerciis parem non noverat. Com-

mune

mune Christianorum emporium Mercurius
 fecerat. In ripa Scaldis posita, procumbit
 in planitie; sed in longum porrecta, non re-
 cedit à flumine laborante suas undas miscere
 Oceano. Nihil ergo portu commodius, ne-
 que enim ita recedit à mari, ut continuo ve-
 lo benignitatem ejus totam non admittat:
 neque ita proximus, ut refluentis æstus fœto-
 rem percipiat. Plurimum naturæ debet;
 non minora tamen industriæ, omnium quæ
 in Belgio sunt civitatum, quæ sit decore pul-
 cherrima. Altitudo ædificiorum, & ornamen-
 ta, prioris sæculi simplicitatem proscribunt.
 Nunc civilibus desolata bellis, sibi que longè
 dissimilis, spirat adhuc tamen ad æmularum
 invidiam, & priscam magnitudinem in reli-
 quis ostentat. documento futura, magnas ur-
 bes, & vasta imperia, mortalia esse, & suo quæ-
 que tempore nasci, florere, senescere, ac tan-
 dem occidere. Haut adeò nuper Brugæ, Flan-
 drorum civitas, de culmine tantæ felicitatis
 exciderat. Cujus occasu Antverpia crevit.
 Sed de causis ejus mihi pauca dicere est ani-
 mus. Brugarum enim magnitudinem ne-
 mo meminisset, nisi historiæ ostenderent
 caduca vestigia. Diu est, quòd hæc urbs
 cum fortuna luctatur. Sed magnæ civita-
 tes difficilè resurgunt, cum semel de fastigio
 decidierint. fatiscentibus per senectutem le-
 gibus, sensimque degenerantibus à suo

principio : potentiam deinde ad interitum trahentibus, non iisdem amplius fundamentis subnixam. Priscis temporibus vigeabant in Flandria bonæ artes, nullique ad eam rem acriores habebantur. iuvantibus potissimum legibus, ignaviæ infestis, otiumq; severissimè mulctantibus. Cotidiano quæstu civesalebantur. Sed ne secordiæ amore de industria aliquid remitterent; annuamque prædiorum pensionem otiosi expectare, quàm suis laboribus vivere mallent; vulgo fas non erat extra pomœria fundos acquirere. Juri quoque civitatis renuntiare nemo poterat, nisi decimam facultatum suarum partem reipublicæ relinqueret. Adhæc diligentissimè cautum erat, ut defunctorum facultates pro æquali portione ad hæredes transirent. Quibus maximè rebus effectum est, ut liberi paternis artibus instituti, ad industriam, virtutis fœcundissimam matrem, acuerentur. Hinc artificum vis ingens, & frugalis opulentia, nullo luxu, aut mollitiæ fracta. Lanaria, linteariaque opificia ut plurimum colebant. easdemque merces toto spargebant orbe, ad usum mortalium, hoc tunc cultu maximè gaudentium. Orientem, occidentem & quidquid terrarum mari, quidquid insularum, urbiumque oceano alluitur, classibus lustrabant. Namque antehac Hollandi, & Zeelandi civilibus discordiis dediti, urbestantum suas, portusq; noverant.

Lon-

Longinqua maria dissitasque Oceano regiones, magis auribus, quam experimento perceperant. Gloriam navalem Flandris concedebant: appellantibus ad eos Italīs, Hispanis, Anglis, Germanis & quantum regionum pelago prætenditur. His disciplinis populus ille surrexit in summa. Donec mutatis per diversissimas leges animorum affectibus, sensim fortuna se remitteret. Accessit deinde pestilens sydus civilium armorum, magnis imperijs præsentissima perniciēs. Res tamen Brugenſium Maximilianus princeps ante omnes maxime afflixit. Mortua enim uxore Maria, ille se avelli non sustinebat à filio in fortunam principatus genito; quem Gandavenſes tenebant in potestate, Ordinibus Flandriæ tutelam ejus ad se trahentibus. Et hinc princeps populo discors, crebrisque expeditionibus non satis domito pacem dedit. Cujus fiducia Brugis existens, captivus à suis efficitur. Nec multo post dimissus, atque indignitate accensus, ad ultionē majestatis surrexit, multarum provinciarum accursu, & viribus. Pater quoque Fredericus Imperator ad auxilium venit. Qui ut facilius rebellium contumaciam frangeret; Teutonicis civitatibus Flandtorum commercio interdixit. Et hoc est, quod fatiscentem jam Brugenſium fortunam ad interitum traxit. Nam portu Slusano à Cliviensi infesso, obstructoque ne qua navis posset ap-

pellere ; vexatus crebris motibus mercator
Antverpiam divertit. Fluminisque opportu-
nitate non indelectatus , nescio quo fastidio
etiam in pace Brugarum portum destituit ;
agre jam transmittentem graviora navigia.
Quibus rebus Antverpia divitijs crevit,urbis
genium in eam magnitudinem efferentibus,
quam ut hodie intelligamus, ab Amsterdamo
exigere debemus. Illuc enim fortunam Mer-
curius transtulit. Cujus quoque vices, ex fato-
rum dispendio, aliæ atque aliæ urbes, haut im-
merito expectant. Talis tamen pridem Ant-
verpia fuit. In qua nihil proclivius erat quam
religionem corrumpi, per affluentiam popu-
lorum, novitatem omnem inferentium. Flagi-
tium vigentibus legibus non satis supplantat-
um, ijs sepultis coërceri non poterat. Secta-
rij studia sua diutius non premebant. Supra
imperij reverentiam excreverant, cottidiano
scelere audaciores. Quam inulte magistratus
contemni posset, experti fuerant. Cujus au-
ctoritatem adeo despexerant , ut nefarium
obtruderent libellum, in quo Reformatæ reli-
gionis titulum sibi adscripserant. Petebant
autem templum ad sacra : vel si id minus pla-
ceret , ut extra urbem saltem facientibus sibi
satellites ad custodiam statuerentur. Ferrum
alioqui & extrema experturos , cum civium
perniciæ. Preces erant ; sed quibus nemo au-
debat contradicere. Magistratus, sumpto
deli-

deliberandi spatio, fortunas urbis apud Gubernatricem deflere cœpit, nullum alium vecordiae finem fore dictitans, quam si vel ipsa ad eos descenderet, habitura ibi domicilium, vel Procerum aliquē cum imperio transmitteret. Illa quidem tot curis obruta, & quid faceret incerta, eos cum quibus consulere solita erat in consilium adhibuit. Hi certatim transitionem dissuadebant. Indignum facturam, si peteret civitatem, in qua non leges, non imperium valerent: ubi non auditura modo, sed & visura esset abominanda flagitia. caput denique suum furentibus non credituram sine nota stultitiæ. Secundum hæc, magistratui renuntiari iussit; sine militari præsidio venire se non posse. Hoc si præsto foret intranti, protinus adfuturum.

Interim Brederodius Antverpiam appulit. Cujus interventu accensa improbitas, modum excessit. Nihilque jam dissimulata audacia VIII. Cal. Iulias in concionem prorupit; quam Burgerhauti, in campo Lario, haut procul mœnibus, Ministri indixerant. Eandem diem Tornacenses, Valencenensesque pari insania feralem fecerant. prorsus ne quis dubitaret ex composito egisse. Permixtæ viris feminae ad sexdecim fere millia excessere portis. Armati deducebāt Ministros, homines infimæ sortis, nullisq; litterarū studijs imbutos. Alter eorum sartor, flammearius alter erat. Quibus

vix diurno quæstu famem propulsantibus, rudis facundia, & inepta vanitas, fastusque in scripturas, prærogativam sacrorum detulerat. Patientia campi junctis vehiculis inter se committebant. Post quæ latebant armati, propulsaturi Brabantia prætorē, in vicinia agentem cum militibus, ut incautos exciperet. reliqua multitudo in duos cuneos collecta sermonibus vacabat, Ministris vocem intendentibus ut ab omnibus possent audiri. Ab hoc sacro rediverunt in urbem. Percussis cæterorum civium animis, sponteque furori cedentibus. Senatus consilij inops nequicquā reluctabatur. cui præter sanam plebis mentem nihil deerat. Fortè tum Megemus in urbe agebat, paucorum dierum moram trahens, speculaturus Brederodij consilia. Hinc suspicionem vulgo fecit, de inducendis præsidiarijs cum primoribus consultare. Verane ea fuerint, an incerto rumore conficta parum affirmatur. Magnus certe motus exortus est. Tantoque discrimine nutavit civitas, ut mercatorum præcipui atrocius aliquid metuentes, de fuga cogitarent, resque suas convasare inciperent; donec senatus edicto intercessit, præsentiam Gubernatricis rursus implorans. Illa tum nihil cunctandum rata, Auriacum Antverpiam destinavit. Vicecomes urbis erat, nec ingratum civibus fore cognoverat. Megemum vero, cum Brederodio movere inde jussit. Neque moram

ram Megemus fecit. Brederodius ad omnia contumax, sext. Idib. Iul. Auriaco Antverpiam propinquantem quasi per honorem obviam processit. Ingens quoque multitudo sequebatur. Erecta omnium studia erant ad novum Gubernatorem. Alij extra portas, alij in muris consistebant. Eoque conspecto qui primi occurrerant, attolluntur in clamorem plaudentibus similem, & incondita vociferatione. *Vivant Geusij*, ingeminare incipiunt. Eadem vox ab his qui extremi venerant excepta, in auctius reddebatur. Nec minore clamore in urbe excipitur. Adeo ut modico risu diductus, subinde proximis diceret, viderent ne mox poenitentiam agerent intempestivæ lætitiæ. Magistratus ea vespera publicas epulas instruxit, quibus Brederodius quoque adhibitus est. Multum indignante Gubernatrice, quod qui Megemum exturbare sustinuerant, solempni convivio Brederodium excolerent. Interim Auriacus valetudinem urbis curare adorsus, deteriorem reddidit. Quippe sectarijs, extra muros suo ritu inermes operari permisit, quoad Generalium Ordinum decretum succederet. Præsidiariorum metum paventibus ademit, & inordinatam lasciviam aliquamdiu in pace continuit. Inde ad S. Trudonis fanum Brederodius se recepit.

Urbem hanc in regione Leodiensium sitam, habendo conventui Conjurati definierant.

Conjurati ad S. Trudonem conveniunt.

rant. Miserat paullo ante ad eos epistolas Gubernatrix, quibus ad illicita religionis studia reprimenda, ex proluxa promissorum fide admonebantur. Et hoc prætextu concilium suorum indixerant. Cæterum altiores suberant causæ. Quippe cum per tot menses nihil læti ex Hispania acciperent, inexcusabile suum crimen, & abominandum regibus exemplum timere cœperant; sub specie silentij securiori se vindictæ servari credentes. Sciebant enim quam multum peccassent. Neque in animum dimittere poterant, præteritarum rerum insolentiam oblivioni daturum esse Regem, vel Generalia inducturum comitia, nisi novis tumultibus extorquerent invito. Itaque ad Sanctum-Trudonem non conjuratos modo, sed & ministros, & Sectariorum præcipuos tempestas compulit. Non pauciores duobus equitum millibus convenisse traduntur. Quærebant autem, qua potissimum ratione saluti consulerent suæ. denique quid ultra facturi essent de libello. quid de sectarijs promiscuam religionis libertatem ibidem postulantes. Aliquot dies per discordiam absumpti sunt. Multi enim non suo; sed temporum, levisque animi vitio conjurationi adheferant. & hi præcipue abhorrebant ab omni mutatione sacrorum: prolixè censentes, expectandum esse promissorum eventum, ne tumultibus serviisse crederentur, & necessitatem temporum ob-

tendisse

tendisse facinori. Alijs econtra placebat miscere cuncta seditionibus, & aliorum scelere scelus suum absolvere. Libertate opus esse clamabant. Maximam populi partem consensisse sectarijs. In eo stare victoriam suam, si & plebs secum insanire inciperet. Tunc enim primum ex publico dedecore accepturum Regem, quantis malis libello laborassent occurrere. Fervebat itaque certamen pro cuiusque studio. Iurgioque inter eos procedente, vicit malitia ratione potentior. Quibusdam adeo indignantibus, cum aliud ex alio captari aspicerent, ut non erubescenda pœnitentia clementiam Gubernatricis experirentur redituri ad officium. Interea ingens pavor curiam obsederat, incertam adhuc quo tanta vis erumperet. Gubernatrix animo ægra, & ne in furiosum exitum rebelles spectarent sollicita, suorum præcipuos rogavit, ecquid haberent consilij. Nihil superesse videbatur, quam ut iratos utcumque conciliatos, quamprimum resolveret. Protinus igitur Auriacus, & Egmondanus Conjuratis non injucundi, ad hoc destinantur officium. Mandatum his fuit, si quid rebelles vellent, remissa domum multitudine, certos delegatos Arscho-tum mitterent. Nescio qua causa Arscho-tum Conjuratis non placuit. Dufflam tamen (vicus est haut procul Mechlinia) venturos se constituunt. Quidam volunt ex communi

co nsilio

consilio conceptos fuisse libellos ad Imperatorem, ut Belgicæ libertatis patrociniū apud Regem susciperet. De quibus mihi parum constat. Ceterum xiv. Cal. soluto cœtu, Ludovicus Nassovius, Brederodius, & Culenburgius cum novem alijs conjuratis Dufflam veniunt. Proceres quoque moram non fecere. Mandata quę deferrent, hæc acceperant, in codicillos contracta sub nomine Gubernatricis. *Auriacum, & Egmondanum ad vos destino, interrogaturos quid, malum, hac sibi velit tumultuaria secessio. Neque enim satis scio quid imprudens peccaverim, aut in quo offenderim nupera satisfactione dimissos. Quid ergo est quod ultra petitis? quid vobis vultis? legatos petentibus, in Hispaniam decrevi. Inquisitionem, & edicta rigoris insinulastis; mitigavi. Generalia Ordinum comitia desiderastis; quia in potestate mea non erant, ad Regem scripsi. An ex illo tempore quo libellus oblatus est, aliquid novi commenta sum? An, quod magis puto, desperatis de clementia Regis, ne iratus vobis placari non possit? Nemo subditorum unquam sevitiem ejus expertus est. Nunquam in suos ira, quàm clementia consuluit. Bonum animum habere vos jubeo, & hoc nomine esse securos. Saltem daturus est precibus meis oblivionem præteritorum, cui ea de re favorabiliter toties scripsi. Hocine illud est quod promiseratis, ne quem tumultum moveretis in populo? ubi sunt magnifica illa verba; quibus mortuos vovebatis vos pro obsequio principis? quibus repressuros concionũ licentiã pollicebamini? quibus ante*

pedes

pedesmeos non recusastis occumbere ? Ego nunc fidem à vobis exigo. Quam præstare non potestis, nisi libidinem fragnetis popularis vecordia. Iam turbas, jam seditiones, & exitium reipublicæ sectarij moliuntur. in quorum subsidium externæ etiam gentes, veteresque Belgarum hostes conveniunt. His si connivetis, conscientiam sceleris confitemini. Interea rumor publicus omnem in vos invidiam transfert, criminique substituit; turbarum capita, atque auctores demonstrat. Quid hoc aliud est, quàm ad motus civiles commodare operam, & contra morem obsequij licentiæ concionum libello consulere, publicæ tranquillitatis larvâ adumbrato ? Quæ si vera non sunt, re ipsâ refelitte. Ex iracundiâ vestrâ intelligam, postulata illa reipublicæ utilitatem, obsequiumque respicere.

Percussit conjuratos invidiosa expostulatio. Prolixâque oratione objectum crimen diluere adorsi, à Proceribus monentur, defensionem suam scripto committere. Capto deliberandi spatio, sex delecti III. Cal. August. Bruxellam veniunt, laturi responsum: Petebantque intromitti ad Gubernatricem. Sed illa præsentiam eorum averfata: quare, inquit, Auriacum, & Egmondanum non conveniunt? jussitque hoc ipsum renunciari expectantibus. Hi se ad Gubernatricem missos dicebant, significantes esse, quod nisi uni illi promere jussi fuissent in foederatorum

concilio. quod postulante Gubernatrice solutum, rursus evocandum foret, si perseveraret ipsos excludere. His relatis, ad memoriam concilii Gubernatrix exhortuit. Proceribusque advocatis in curiam, tres ex fœderatorum numero introduci iussit. E quibus unus, quæ res poscebat locutus, tabellas obtulit in hanc sententiam; *Domina, Gratiam benevolentia tua dignam referre non possumus, quòd legatos in Hispaniam dixeris. Ex his qua tradentur, facile confidimus iustitiam causa nostra absoluturum Regem. Pro cuius ministerio ne jam quoque sanguinem dubitamus prodigere. Credimus denique ex quo libellus oblatus est, nihil à te novatum esse. Verum enim verò cum videamus alios religionis causâ in ius rapi, alios ad supplicia servari carceribus; persuademus certè nobis, magistratus non gessisse morem tuo imperio. Atenim promissorum fidem à nobis requiris. Quasi in coërcendis concionibus non omnem locaverimus industriam? Quod ad nos pertinet, conciones jacent. Iracundia populi cohiberi non potuit. Multa simul queritur. Quòd Rex libello nostro respondere differat. Duos menses datos esse. inter illos nihil succedere. Insolita quoque comitiorum forma, non paucis displicuit. Ecclesiasticorum denique malignitas protervâ linguâ terrere cuncta complentium, multos in rabiem efferauit. Hæ causæ illis ingenis fecere prorumpendi audaciam. Nisi antevertissemus mala ista oblatione libelli,*

libelli, jam diu est, quod prodenda conscientia consilium inierant. Si externi rebus se immisceant nostris, primi surgemus in ultionem. Ferrum tamen in cives stringere, non est animus. Sed nec ministerium Regis id ipsum postulat. Gladiopremendi non sunt, qui ad jus provocant, & Generalium Ordinum decretum expectant. Nisi crudeles esse volumus in communem perniciem. At herculè fama publicareos nos facit. Nemo magis fallitur, quàm qui rumoribus se permisit. Quàm saepe fama mentitur? Quis ergo plebem concitavit? quis ad concionandum persuasit? quis ad ferociam impulit? Cum res exiret in tumultus, passi sumus lascivire eos, qui in officio contineri non poterant. Hoc ipsum purgare Celsitudini tuæ parati sumus. Non inficiamur quidem, plerisque fœderatorum iisdem ritibus imbutos, non aversari promiscuam sacrorum licentiam. Nemo tamen eorum adhuc inventus est excessisse terminos officij sui, aut obsequium exuisse erga Principem. Animi sui vota modestia compensant. Quoties plebem precibus aggressi sunt, ut abstraherent à furioso exitu? Abominamur certè tam protervam licentiam. Proinde si quid habes, quo pervicaciæ obviam ire potes, edissere Domina, tibi omnem pollicemur operam. Caterum non adeò perversam rationem sollicitudo nostra instituit, ut disfidere Regi oporteat. Iustitia & benignitas ejus meliora spondent. Nam si hic sit (quod in votis omnium diu fuit) videres cuncta in Ordinem cor-

cedere. Perperam itaq; de præteritarum rerum oblivione securos nosse jubes. Quid enim fecimus, ut veniâ opus sit? Venturis malis libello cavimus. Et ut scires vera fuisse, magnam calamitarum partem experti sumus. Restat ergo ut reipublica videamur consuluisse, non seditionibus, aut privatis affectibus. Quod tam favorabiliter de nobis scripseris ad Regem, gratiam debemus Celsitudini tuæ. Vis tamen verum hic accipere? Indulge libertati sermonis, propitias aures tuas non fraudabimus arcanis rationibus, quibus adacti sumus ad intensiorem vitæ curam. Multa iracundia tuæ indicia erupere. Quid igitur mirum, si diffidentia nobis suspicionem feceris? Auriacus & Egmondanus illum heri scrupulum eximere conati sunt. Scimus interim multos Procerum nobis infestos, & nescio quibus verbis innocentiam nostram proscribere. Rebelles, & turbulentos proclamant. Brevi Regem ad ultionem venturum. Se quoque quamprimum mandatum acceperint, facturos, ne in illum impune peccemus. His sermonibus simplices populi aures cottidie imbuuntur. Longius quoque quam oportuit silentio transmissimus. Ad ultimum patientia diuturnitati succubuit. Clandestina consilia quibus illos male cogitare constat, extorsere remedium, quod à præsentī necessitate accepimus. Amicitias enim cum peregrinis contraximus. Illorum bonâ operâ usuri, si adversus nos, aut vasallos, aut subditos experta vim fueris. Hanc nobis necessitatem

sitatem dissidentia tua imposuit. Quis autem
damnare potest, quod vita fortunisque praesidium
quasiverimus, quarum amore etiam fera adulti-
ma compelluntur? Nam si tutiori remedio con-
sulere potes desperatis, non dubitamus admittere.
Securitatem duntaxat circumspicimus. adver-
sus malevolentiam Procerum & iracundiam
tuam. Ne aut vi, aut alio genere prosequaris,
nemini denique libellum fraudi efficias. Auriacus,
Egmondanius, & Hornanus rerum nostrarum
statum ante omnes intelligunt. Cum illis nobis
frequens sermo intercessit. Operae pretium feceris, si
tuo jussu susceperint patrocinium foederis amplif-
simisque mandatis instructi, consilia nobiscum con-
ferant. Credibile est tantam indolem non peccatu-
ram in fidem. Nihil denique suasuram contra fas
officij, & compendium publicum. Virtutem, quã
hactenus claruerunt, vadem, praedemque habes.
Quamquam hoc ipsum praestare nisi pro tempore nã
potes; postulare tamen a Rege potes, ut decreto tuo
placitum adjiciat in Generalium Ordinem concili-
um. Caterũ, Domina, celare te non decet Sancto-
Trudoni agentibus oblatũ nobis esse libellũ à multi-
tudine. Copiam ejus hic adjuviximus. Arma quæ
provocati acceperint, posituros se profitebantur, re-
ligionisque negotium submissuros Generalibus co-
mitis, si interpositã fide nostrã redderemus securos.
Non expediebat nobis tantæ invidiæ condicio-
nem subire. Sed prævaluit fortuna publica. Igitur,
miserorum causam suscepimus, patronosque nos

diximus adversus injuriam. Proinde si tranquillitatem amas, distribuendi sumus per oppida, arma populo erepturi. ne forte ille sibi relictus, peregrinis accedat, amulosque Gallos accersat in auxilium. Hoc tibi imprimis denuntiandum volumus, ut presenti prospicias necessitati. ne si atrocius quid acciderit taciturnitatem nostram accuses. Quod reliquum est, Majestati rursus obsequium vovemus, & spiritum. Gubernatrix nihil quietum suspicata: tamē ad simulationem cōmparaverat vultum, contumaces irritare verita duriori supercilio. Ab Egmondano, Afficourtio, & Affonvillio jussit expectare responsum. Prædie Auriacum Antverpiam dimiserat, sedandis motibus, quibus rursus studere videbatur populus ille, in tantā licentiā nunquam tranquillus. Scripserat ad eam senatus, Prætorē Brabantiae in proximis visum cum equitibus, & hinc formidinem incessisse sectarijs, sacra sua contra fas turbare criminantibus. Vereri itaque, ne aut locum concionibus occuparent in urbe, aut ferrum, quod deposuissent, reciperent. Prætor ergo movere inde jussus. Egmondano imperatum, ut codicillos deferret ad Conjuratos, in hæc verba. Nescire Gubernatricem quid in officium imprudens peccaverit, aut quid sibi velit tam confusa rescriptio; cujus platiorem interpretationem desideraret. Sectarios in vinculis detineri, vel quā de causā, nondum ad eam relatum esse. Perperam igitur contumacia
in si-

insimulari. Quae promissi ejus fuerint, abundè servata esse. Sed e contra illos non exprimere operam, quam in coërcendis concionibus attulerint. Si candidè agerent, nominarent vasallos, & subditos, pro quibus tantoperè sollicitarentur. Nam securitatis pignus, vadesque quos flagitarent ipsi, vicissim se exigere. Conjurati contra in hunc modum rescribunt. Multa à nobis, Domina, de industriâ prætermissa sunt, quorum ratio, & consilium ad te pertinent. Nunc verò quia ita jubes, non erit grave in copiam impingere, quam nuper in scribendo effugimus, ne superfluo sermone aures oneraremus tuas. Captivos si placet accipere, rectius à Tornacensibus, Insulensibus, Montensibus, Ariensibus, Bethuniensibus, & Athenensibus accipies. Brugenses denique, & Gandavenses non paucos in custodia habent. Diligentiam verò nostram in tranquillanda plebe, sola si ignoras, quamprimum dimitte per provincias, qui consistoria, & Ministros interrogent. In ordinatorum comitiorum rationem frustra requiris à nobis. Ejus tibi causa exigenda est à populo. Queritur ille vocatos in comitia, quibus jus suffragii non erat, ceteros, aut omnino non vocatos, aut exacto comitiorum die adesse iussos. Adhuc quòd delectis civitatum exemplar edicti petentibus non indulseris. Quòd spacium, dum ad collegia referrent, non dederis. Quòd publica domo inclusi, jussi sint consilium capere, nec prius inde exire passi quàm re-

ſponſum dediffent pro tuo arbitrio. Interroga conſcientiam tuam, an non violaveris libertatem publicam, quæ modò Gubernatorum ſententias promiſſu emeris, modò litteris ſollicitaveris delectorum ſuffragia. Populus ergo jure de te quaritur: nos de Proceribus, quorum multos nobis infeſtos videas. Congreſſus, & occuſus noſtros vitant præter conſuetudinem. Tanquam rebelles aut læſæ majeſtatis piaculo contaminatos faſtidiunt. Conſanguineos quoque ſuos, atque amicos deterrent imagine periculi, à noſtro commercio. Spem gratiæ plerique oſtentant, ſi à nobis conſilia ſegregaverint. Multorum quoque auribus haut obſcurè inſinuant, ubi Rex in Belgium venerit, aut Regem non fore, aut nefario ſanguine parentaturum injuriæ ſuæ, noxiſque daturum ſupplicia. Hi apud te ſunt, Cortidiè tecum conſulunt. Regis aures imbuunt ſecretioribus conſiliis, & bonitatem illius in triſtiora exſtimulant. Tot Veredarios jam remiſit Hiſpânia: nullus tamen poſtulatorum noſtrorum mentionem attulit. Sed Philippum Regem accipimus iter ſibi, & legionibus per Gallias ſollicitare. Ab eadem gente ſubſidia in nos exigere. Ducem Sabaudia auxilia iuſtruere. Proceres tanquam contagionem metuentes, ſecuritati noſtræ timent accedere. Hæ cauſæ compulſere nos ad externas amicitias. Quas cum Gallis tamen nullas contraximus. Si Vaſallos, & ſubditos ſcire vis pro quibus merito ſollicitamur; Belgæ ſunt. Hi nempe qui cauſa noſtræ ſe junxere. Sed nec illos, nec cæteros
fæderatos

fæderatos securos reddere possumus, nisi Celsitudo tua, & tres isti Proceres fidem interponant suam. Hos veluti medios inter te Regemque, & nos constitue, nihil utique acturos, nisi ex tuo arbitrio. Ita tamen, ut non militem conscribas, non aliundè adsciscas, quàm sub illorum auspiciis. Hi duces, hi centuriones, & chiliarchas dicant. Scimus id multis provinciarum rectoribus grave fore. Commodius tamen nobis cavere non potes. Prasentem reipublicæ statum invidia postferimus. Atque ut mentem nostram propius accipias, ad tempus duntaxat exigimus fidem vestram. Despiciet interim Rex rescindere velit, an admittere. Quem si recusare contigerit; æquum est, spatium aliquot concedi iisdem promissis subnixum: ut interim securitati nostræ consulamus. Tres septimanae in id suffecerint. Cautionem quam vicissim postulas, supervacuum ducimus. Quia nihil acturi sumus sine Auriaci, Egmondani, & Hornani consilio. Hæc est nostra cautio. Vires namque quas foris contraximus, offerimus ad obsequium Majestatis. exequi parati, quidquid ex suffragio Ordinum ille jusserit.

Hæc mutuo metu, & simulatione retenti, invicem scribebant. Horrebant tamen prudentiores ad sceleris novitatem, auribus Regum insolitam: quæ non conveniret cum nomine Principis summoque imperio, nec sine pestilenti exemplo proferretur in populum. Cæterùm Gubernatrix non solum terrore plena; sed ad tantam negotiorum vim sollicita,

Proceres cum quibus conferret, ferè non habebat. Auriacus Antverpiæ hærebat. Mansveldius, Arenbergius, & Megemus suas curabant provincias. Arschotanus Montibus Hannoniæ retentum se simulabat infirmâ uxoris valetudine. Haftenus enim nullo publico munere excultus, tragœdiæ speciem eminus aspexerat. Hornanus injuriâ faucius, curiâ abstinebat; prætextu ægritudinis leviri sui absentiam excusans. Præter Egmondanum, & Barlaimontium nemo aderat. Vtrumque ergò cum Privatae curiæ secretariis ad se accersitos, interrogabat, quid sibi agendum in tam perplexo rerum articulo. *At ego, inquit Egmondanus, de Inquisitione, & edictis, & abolitione non querendum amplius censeo. Quorum jam nullus est usus, singulis à libidine suâ modum flagitij exigentibus. Nihil enim valent leges; nihil judicia, nihil imperia, ubi vis, & audacia regnant, ubi mali, atque scelesti, carceribus eripiuntur ab insanâ multitudine. Id nunc agitur, bellum, an pacem velimus, alterutrum nobis fœderatis promittentibus. Nisi ergo admittimus Generalia Ordinum comitia, flagrabunt omnia civili discordiâ, armaque propediem præforibus strepentina audiemus. Ista vero utcumque periculosa sint consilia, neque utilia publicè; tamen ut necessaria suadeo; ut apparatus armorum fœderati destituant, secretarij vero remittant supercilium. Multum quoque fiducia decedet*

exter-

externis, destitutos se sentientibus conspiratione nobilium; quos econtra pro Rege suo obstinatos, abominari seditiones viderint. In summâ ex duobus malis, eligendum est minimum. Omnes quidem laudabant Egmondani sententiam. Viglius tamen non placere sibi dicebât tam periculosâ remedia, neque tantum se tribuere comitijs, ut ab his expectari possit religionis incolumitas. Demus, ait, Ordines majorum religioni, ac venerationi Regis sui deditos, novitatibus non oblectari: pollicerit tamen nemo potest, nihil utique illos antevertendis calamitatibus concessuros libellis, quos sectarij ex omni parte uno animo impetuque obtrudent. Haut frustra olim placitum principibus, ne absentibus ipsis Ordines haberentur. Cum vel presentes cohibere vix possint, ne vel jura sua augeat populus, vel sceptrorû libertatem astringat. Hoc enim periculi in se habent ista comitia; ubi quod singuli non auderent, universi consentiunt, infesta semper, & nunquam sat suspecta dominantibus. Nam ne Regem quidem velle existimo. Scit enim quam procaciter sibi nuper illuserint. Populo cum Principibus nunquam convenit. Dominari illi volunt, hic liber esse. Quæres igitur, quid censeam, quando nec recusare comitia, nec admittere sine periculo possumus? Mea ferret sententia cavendum esse Conjuratis, & per aqua, per iniqua conciliandos rei publicæ. Comitiorum vero negotium deferendum ad Regem, ut ipse statuât quod potissimum res exegerint. Huic sententiæ Gubernatrix

trix accessit. Nam cæteri quoque non dubitabant quin optimè Viglius dixisset. Secundùm hæc statuitur, respondendum esse Conjuratis, de postulatis eorum Gubernatrici curæ fore. Paucorum dierum inducias petere. intra quos mitteret ad Regem, Procuresque contraheret in curiam, quos in XV. Cal. proximas adesse omnes jussisset. Prædes quos exigent absentes esse. Inuitos autem vadari non posse. Ad hoc decretum Conjuratis deferendum Egmondanus deligitur. Datum illi præterea in mandatis, ut quoquo modo pacaret contumaces, hortareturque dissolvere fœderis nexum, sub cujus fiduciâ sectarii tam flagitiosa peccarent.

Gubernatrix postridiè ad Regem scripsit. Materiâque consternationis subtrahendam rata, omne positum esse edocuit in celeritate remedium. Rempublicam in extremo sitam, & citò perituram ni festinaret occurrere. Siquidem Rex propriâ indole ad consilia tardus, etiam cum tot tumultuum admone-retur, post VIII. Cal. Apr. nihil rescripserat. Id præcipuum alimentum malorum fuit. Cum suspensa Gubernatrix, & quid actura esset à Rege semper exspectans, protraheret cottidiè remedia, quæ in tempore adhibere debuerat.

Iam Gandavenses, jam Silvæducenses, & in Zeelandiâ Middelburgenses, majorum sacra fastidire

fastidire cœperant. Harlemum, Lugdunum, Ultrajectum, Neomagum, Trajectum, Ziri-
xæa, Tornhaultum, & proxima quæque con-
cionibus fœdabantur. Amsterdameses semel
iterumque portas civitatis occluserant secta-
riis, ad conciones prorumpentibus. Prævaluit
tandem ira multitudinis; quamvis etiam tum
Magistratui ab optimo quoque pareretur. Nā
nec corrigi contumaces poterant, nec sisti fu-
rentes. Infirmirate retinentium magis accen-
debantur. Non Ipras, non cætera Flandriæ
primorum constantia in fide retinuit. Instar
morbi scelus, & amentia urbes, municipia, vi-
cos pervagabantur. Vna Brugarum civitas
erat, quam tempestas illa non libaverat. Hanc
sectarij per epistolas alliciebant in consorti-
um, & si resisteret magistratus, vim, & ultio-
nem minabantur. Momentoque temporis
quatuor armatorum millia Brugas conten-
dunt, templumque Sæctæ-Crucis in ipsis sub-
urbiis concionibus inestant. Neque civium
hoc crimen erat; sed eorum maximè, qui nu-
per Gandavum juxta insani, facem audaciæ
prætulerant. Ducentos tamen Brugensium
interfuisse comperio. Quorum pervicaciam
magistratus timens, Gubernatricem invoca-
vit. Missusque eò Egmōdanus, trecentos civiū
adlegit in stipendium. Et sic haut egrè suppres-
sum est scelus, in cujus etiam odium genius
urbis duraverat. Insignis est tempestate Han-
nonum.

nonum constantia fuit. A Valencenensibus sollicitabantur crebris epistolis. Et haut procul Montibus concionem edixerant. Ad discutiendos eos Latrunculator Hannoniæ egressus, idoneâ manu in ipso conatu furentes oppressit. Montensem Urbem Arschotanus obsequio sibi demeruerat, & si cætera nutassent, Gubernatrici servabat ad receptaculum. Luxemburgum discreta spatiis regio, vitiis aliarum non miscebatur. Nec alia sanè provincia per civiles hos motus modestius egit. Eadem prope Namurci quies fuit. In Artesiâ denique integritas prævaluit. Flandrorum tamen & Valencenensium contactus, finitimos aliquot vicos, quasi agitantibus ventis, contagione infecerant. Proditumque memoriæ est, ex tot satrapis, quibus ea regio abundat, haut amplius septem conjuratis accessisse. Regebat tum Atrebatum Vice-comes Gandavenfis, vir nulli aut fide secundus, aut obsequio. de cujus virtutibus trademus postea. Nusquam fides in reliquis provinciis, quas fatalis tabes usque ad desperationem corripuerat. Geldria, Frisiâque crebris quatiebantur motibus, Gubernatoribus frustra obnitentibus, quorum constantia in contemptum venerat. Scires omnia ad seditiones vergere. Libidinem concionum multo armatorum præsidio Sectarii tutabantur. Equites in turmas componebant. Vt quisque
opibus

opibus validus, tela, equos, pecunias conferebat. Expilationes monasteriorum, raptus, & sacrilegia hauserant animo. Denique fiducia Conjuratorum inflatos, superstitione, ac lasciviâ discordes, non lex, non magistratus, non pudor, aut metus cohibebat. Provincialium curiarum projecta auctoritas, vano conatu jura exequabatur. Imperium viribus destitutum, decreta supplicia expetere non poterat. A sectariis vi agebatur. Fortè advocatum quendam Gandavi sceleris compertum, Procurator Generalis in judicium traxerat; cùm sex armati repente in Præsidem Flandriæ domi invehuntur. Minister quoque simul venerat, superbeque poscebat, absolvi captivum, ac in posterum concionum libertati desineret officere. Cæterùm ille ad hoc fulmen haut quaquam territus, paucis respondit. *Regis se Ministrum esse. Imperio ejus morem gerere. Scire etiam ipsos novas leges ex communi Procerum consilio nuper sancitas in illicita conventicula. Quas cùm perferre jussus esset, exercitium earum remittere non posse sine crimine. Nulloque metu adduci posse, ut officium destituat. Quem contractâ fronte intuens Minister; ecquid intelligis, inquit, Verbum Dei nullis astringi legibus? in summa, denuncio tibi, ut malo caveas. Et in hæc verba excedebant è limine. Signoque sibilis dato, plures statim armati prosiliunt, qui in insidiis constiterant. Stri-*
ctof-

ctosque gladios vibrantes, ultra minas tamen non sæviere. Longè atrociori viâ in Brabantia grassatum est. Trecenti ibi sectarij ad facinora collecti, quæcumque audebant. Famulus quidam Minister Vilvordia in vinculis detinebatur. Ad quem eripiendum cum munimenta arcis frustra tentassent, injecturos se faces tectis oppidi atrociter minabantur. Iubebantque id ipsum denuntiari Prætori. Consumptaque urbs incendio foret, ni libertas Ministri ruinam prævenisset. Mechliniam inde digressi sunt ad paria facinora. Sed pavidæ civis obiectis portis venientes excluderant. Igitur in rabiem versi, proxima quæque exterrant. Nec procul Bruxella aberant; jactabantque propediem admoturos se urbi multitudinem. Quibus auditis Gubernatrix non mediocriter expalluit. Tot simul flagitijs obviâ ire non poterat, apparatu belli destituta, armisque, & milite; ac si hæc suppeterent, pecunia tamen deerat. Ordinariâs turmas instrui jussit. Sed illæ apertè inclamabant non facturâ Gubernatricem ut sine stipendio militarent. Igitur ad conquirendas pecunias intendit animum. Vsitatum hætenus fuerat in extraordinario discriminis articulo, sub honestâ mutui specie tributum aliquod ecclesiasticis imperare. Tunc quoque rogari placuit. Quippe eò proclivius collaturi videbantur, quod hac pensione incolumitatem suam cogitarent
redi-

redimere. Conferendrexemplum Hannones
præbuere. Idem factum in cæteris provincijs.
Sed benigna illa liberalitas præteritorum an-
norum stipendia exonerare non poterat. Ad
ea igitur dissolvenda consilium iniit, fastigio
quidem indignum, sed quod terror & necessi-
tas facile excusat. Quæstum enim ex sorte
(Lotharias vulgo dicimus) facere instituit; sù-
blevatura ærarij angustias sine cujusquam in-
commodo. Vrbes interim in finibus positas,
supplemento militum firmavit. munimen-
tum adversus finitimos, & si necessitas postu-
laret, contractura inde auxilium in civili di-
scordia. Gubernatores, & Provincialia conci-
lia prætores quoque, & magistratus admonuit,
diligenter caverent, ne externis hostibus, civi-
tatum munimenta aperiret proditio. Deni-
que ut cum saniore civium parte inirent ratio-
nem, qua illicitos cœtus discuterent, ur-
besque, & populos continerent in ob-
sequio. Et quoniam non sine Dei ira mala ista
accidere videbantur, publicas preces. & sup-
plicationes indixit. Hæc in præsens suppe-
rebant remedia: sed vana atque infirma in tam
vasto incendio. Plebs varie pèssum ierat, cupi-
da rerum novarum, simul agitata pestilenti sy-
dere illius sæculi.

Dum hæc in Belgio aguntur, Rex in Hi-
spania sollicitus, insumebat operam consulta-
tionibus, adulta jam malitia nihil profutu-

ris. Montignæus enim eodem pervenerat cursorij sequis. Et quid de mandatis suis fieri placeret ad Regem retulerat. Ille vero suos in Concilium contraxit, & quod optimum ducerent ad se referri iussit. Hi tum maxime Concilium instituebant; Dux Albanus, Gomezus de Figueroa Feriæ comes, Antonius de Toletomagnus prior Ordinis sancti Ioannis Leonensis, Ioannes Mauricius de Lara, Archieconomus Reginæ, Reynerus Gomezus Princeps d'Ovolý & Comes de Melito, Ludovicus Quixada Archippocomus, five magnus Scutarius principis, Tiffinacquiús, & Hopperus, & Cortevillius. Rex autem non intererat. ne forte studio suo suffragandi libertatem adimeret contraria suadere timentibus. Et quia plerisq; semina morbi ignota adhuc erant; ita instituere consilia ut prius de genere mali, deinde in remedia inquireret. Concilio Belgico Figueroa præerat. Verba ejus in hunc modum traduntur. *Nunquam mihi dubium fuit, haut alio spectare Belgicorum Procerum consilia, quam ut in turbidis rebus, & per religionis licentiam quassatis, summam imperij ad se traherent. Primo enim quibus non machinis Granvellanum amoliti sunt? quare tamen irascerentur illi non habebant. Hoc de illo quoque inimici confessi sunt. Quid est igitur quod causabantur? Non expedire rei publicæ unum aliquem in eo fortunæ gradu summam imperij habere in manibus. Majorum mores ob-*

stare.

stare. Eam prerogativam deberi Proceribus. Hoc prae-textu exturbavere periclitantem Cardinalem sub omnium invidia. Sed re vera constantiam ejus ode-rant, quam libidini suae credebant officere. Deinde legatio Egmondani supervenit, de Inquisitione, & edictis querelam ferens, & curiarum omnium vires Proceribus vindicatura. Ab hac spe dejectis, li-bellus Conjuratorum successit. Qui sunt illi Con-jurati? fratres, cognati, affines, domestici, amici, & familiares Procerum? Quid igitur flagitant? Inquisitionem tolli, mitigari edicta, Generalia Or-dinum comitia contrahi. Nempe ut in comitijs rem-publicam ex suo formarent arbitrio; Inquisitione vero, legibusque sublatis, promiscuam sacrorum licentiam inducerent. Ut vel inde nemine profitente satis intelli-gas, non alienos esse Procere à Conjuratorum consilijs. facinusque inter se partiri, quos in unum omnes cogit eadem factio. Ne id quidem Procere dissimulant; qui ad ultimum suasere Regi, ut Inquisitionem abrogaret, edicta leniret, prae-teritorum gratiam concederet, officia trium curiarum in unam confunderet. Hac sunt quae modo Montigneus attulit. De adventu Regis parum aut nihil adiecit. Cujus praesentiam Procere non desiderant. In summa, duae in Belgio sunt factiones, una Procerum altera Conjuratorum. Altera alterius instrumentum est. Et in id utra-que collineat, ut dominationem Proceribus transcri-bat, quo deinde illi vel in Regem potentiam exerceant. Post hunc sermonem, fuere qui censerent, prudenter facturum Regem, si vel ipse, vel

præfectorum aliquis ad opprimendum malum in provincias transiret cum exercitu. Sed eam sententiam plures abhorrendo; Non paucos in Belgio fontes esse testabantur. Multos tamen ex his non propria indole abstractos; sed levis animi vitio alienæ stultitiæ accessisse. Bonorum interim numerum præpollere cæteris. Abominandum ergo remediij genus fore, pari supplicio cunctos afficere. Quippe bellum geri non posse citra bonorum injuriam. Longe aliam esse voluntatem Regis, qui mitem, & pacatum animum præstare cupit subditis; & cum illis haut aliter agere, quam tractare liberos solent offensi patres familias. Hi justitiam pietati admiscunt. Domestica flagitia sic curant, ut liberorum salutem, non ultionem videantur exigere. Regem enim corrigere velle, non evèrtere; sanare, non extinguere. Cum his & ejusmodi argumentis pro se quisque vicissim certaret; in hanc tandem sententiam concessum est, ut referendum Regi dicerent: Duo omnino suppetere remedia. Alterum verum, & solidum. Alterum medium quidem; sed necessarium. Solidum remedium in celeritate positum esse; si primo quoquo tempore in provincias festinauerit Rex, in ipso apparatu deprehensurus sectariorum consilia. Religionem adhuc in potestate esse. Auctoritatem refractariorum caducam, atque infirmam. Si proximam hyemem otiosus extraxerit, non religionem, non fidem, non obedientiam inventurum. Precipitatum insaniam non postulare lenta remedia. Neque etiam expectandum, donec mali junctis sibi externis
(super-

supercilium tollant, & nihil amplius sincerum sit in provincijs. Componi adhuc res posse sine ferro, & sanguine. Sed glissentem seditionem in ipsis cunis opprimendam esse. Mox enim nihil proficient succinctæ legiones, vel certe non nisi inhonestis conditionibus ferociam discutient. Ipsum Regem hanc sibi expeditionem sumere debere. Nihil profuturam, si alteri permiserit, quantumvis egregio. In eo enim non elucebit reverentia Majestatis, non eminebit auctoritas. Quin imo atrociorum secessionum causas daturum partibus, utrimque armatis, & ministerium Regis utrimque praferentibus. Sicut nuper in Gallia accidisset. Hac ergo incommoda praevire debet Rex praesentia sua. Boni enim auspicia ejus sequentur. Dubij conspectu Majestatis perculsi, ad eundem respicient. Mali non habebunt in quo fiduciam reponant. quorum cervicibus exercitus incumbens, societates ac factiones dissolvat, libratisque conatibus rebelles in leges subiciet. Tum demum religionis negotia secure componet, instructus legionibus, quas turbulentis objiciat. Si quid in Ecclesiastica labaverit disciplina, revocabit ad Concilij Tridentini severitatem. A sectariis vero exiget ultionem flagitij. De edictis, quod videbitur, constituet. Si quid in Concilio Status, vel Finantiis, aut secreta curia mutandum duxerit, rectius ibi perficiet. Deesse nobis hic acta. deesse decreta majorum, unde praeteriti temporis formam, moresque liceret colligere. Controversias quoque inter easdem curias exortas, dissolvat. jubebitque singulas contentas esse mandatorum suorum finibus. Operam denique dabit, ne indulgentia, & abolitiones, ne munera, & honores,

in quibus potissimū tranquillitas, salusque publica consistit, ad indignos perveniant. Hæc sunt solidiora remedia. Quæ si mature applicari possint vulneribus, frustra jam in cætera inquirimus. Cæterum dum instruitur exercitus, dum aulæ moles per se gravis movetur, hyems est, & intempestiva aura navigantibus. Quippe non aliter Rex in Belgium transportari potest, quam Oceano. Temere crediturus salutem suam externis hominibus. Proinde ad inedia remedia necessitate compellitur. hoc est; de Inquisitione, & edictis, ac præteritorum delictorum venia, quid agendum sibi, consideret. Flagitiosum olim in præsentium scelerum remedia, & securitatem suam, futurorum præ sagax Ecclesia instituit. Nihil enim sperandum, erepto zelo quo integritatem ulciscitur suam, quam ut religio exponatur injurijs. Nec sine periculo edicta resolvi in ancipiti republica. Malos pœnis affici debere. Quid enim futurum si nihil præter scandala, & conciones, ac conventicula leges corripiant? nec id quidem idoneo supplicio; sed sub prætextu turbata pacis, aut læsæ tranquillitatis? scilicet ut fas cuique fiat, intra domesticos parietes contaminatæ conscientie morem gerere. Itaque si tempora admitterent, suauros se fuisse majorum morem retineret, nec supplicia irrogaret mitiora præteritis. Nunc vero magnopere censere, sceleratis hominibus ignoscat, & præteritorum criminum gratiam faciat. unos tamen Ministros, & concionatores excipiat. Inquisitionis quoque Papalis potestatem exarmet, ita tamen ut Episcopalis in usum veniat. Edicta vero in adventum suum differat. & si

ne hæc

ne hac quidem moram ferant, Belgas ipsos jubeat formulam concipere, transmittendam in Hispaniam, ut de hac quod videbitur Rex constituat.

Hac relatione audita, Rex ad Gubernatricem litteras dedit, quibus sententiam suam, in hunc modum commisit. *Domina bona soror mea; Haut alia mihi unquam mens fuit, quam ut clementiam cum meis communicarem. Pristino affectui absens non detraho. Nihil equidem negare constitui, quatenus inviolatus numinis cultus patietur, & conscientia mea. Quod ex litteris hisce satis intelliges. Neque id necessitati tribuo, quam repressas; sed nature mea. Malo me gratiae, quam vindictae poeniteat. At enim Inquisitionem aboleri desideras. Scio quantum momenti postulatis illis subsit. Hac sunt arma, quae ex olim in rebelles Ecclesia instruxit. Quibus haecenus dignitatem suam tutata est à sectarijs. Majorum consilia damnare non possum. Neque tamen institutis eorum ita me addixi, ut ab illorum prudentia recedere nefas existimem. Ad praesentis saeculi genium cogitationem direxi. Imperator pater meus Inquisitionem accepit, quia frangenda malitia Episcopi deerant. Cum sub incuria eorum, qui jurisdictioni praerant torperet Ecclesia, ad hac auxilia recurrere coactus est. Nunc inter tot Episcopos eadem tempora non videntur. Facile itaque persuaderi mihi patiar, Papalem Inquisitionem expungi; modo Episcopalis robur accipiat. Edicti formulam, quam concepistis, plane inutilem esse video. quia sectarii haut alio spectant, quam ad libertatem religionis. Quod ex fa-*

mosis libellis facile est intelligere. Fœderati vero à Generalium Ordinum concilio edictum expectant. Sed obsecro, quid bonorum interest, hæc, an illa rogentur leges? Quippe suoapte ingenio ad licita, & honesta feruntur, nec contra majorum morem quidquam attentant. In malos autem nulla satis atrocia statuuntur supplicia. Veruntamen ut tranquillitatem civium, beneficium meum faciam; recudi leges non recuso. Nec tam diu pressissem consilium meum, si provinciarum omnium accepissem suffragia. Absque his nihil novi statuere oportuit. Quippe in leges municipales, aut privilegia impingere non est animus. Nam si rogandi morem omittimus, bonorum offensa præsto est. Quia nec priora edicta sancita sunt inauditis provinciis. Et male leges sciuntur, quas usus postea rejiciat. Imo ad exemplum pertinet, semel latas perpetuo custodiri. Caterum si constare robur legibus volumus, quadam à juris communis præscripto exigenda sunt. nempe ut contumaces, anabaptistas, & relapsos ignis compescat. bona vero eorum publicentur, quos gladius extinxerit. Quis enim probare poterit, exules ipsos fortunarum suarum retinere arbitrium? Usufructus, antenuptialia lucra, hereditates, & legata ad eos pervenire, quos flagitio suo patria expulsos, civili beneficio indignos lex fecit; ius commune has perduellibus pœnas liquido imposuit. Quarum mentionem in formula moderaminis vestri nullam invenio. Dubium consilio, an errore. Sed delatores pœna aut præmio ad prodicionem sceleris sollicitari non video. Quasi futuri sint, qui sponte

qui sponte volent accusare ? nemo gratis subiturus est delatoris invidiam. Hac velim eo candore admittas, quo ipse exigo. Nam quod ad me attinet, augendo aerario non studeo. Sed quia publica utilitati conducere arbitror, & ita fieri debere jus commune demonstrat. Edictum anni MDXLIX. idem constituit, nihil tum detrectantibus Ordinibus. Neque interim ad rem pertinere puto, quo pacto obstinata mentes frangantur. Potestatem vobis facio, concipiendi formulam; ita tamen, ut religionem mihi, & Majestatem illibatam servetis. Quodcumque autem videbitur, quamprimum ad me trans mitte. Præteritorum veniam quam requiris, quantillum profecturam existimem ex hoc conjicio, quod Fœderatos spe sua frustratos videam. Quanquam nec satis accipiam, utrum ipsos duntaxat Fœderatos, an & Ministros, & sectarios gratia quoque dignos judices. Nolo tamen legibus constringi clementiam meam. De his quod videbitur ipsa constitue, & præteriti furoris veniam fac, pro tua prudentia, & arbitrio. Vnos tamen condemnatos excipio. Fœderati vero vinculum resolvant, & ad conciones, cœtusq; illicitos dissipandos omnem tibi industriam conferant. Hac demum lege gratiam ratam efficiam. Quò minus ipse iter in Belgium instituam, per imminentem hyemem non licet, deprehensuram me sine dubio in mediis fluctibus. Primo tamen vere appellere statui. Interim si conciones, & conventicula non cessaverint, Ordinarias turmas, & præsidarios objicias. In Fœderatos easdem partes amplexos, conscribere exercitum. Præfecturas delectis attribue. Horum virtus se-

*curum me efficiet. Nam & civitates ferè in obsequio
stant. Et quo fidem illibatam retineant, prætore, &
magistratus ad colendum officium litteris exstimulo,
quas sine mora destinandas trades veredariis. Vale. ex
Silva Sigovia Prid. Calend. August.*

Hanc utique epistolam in longum tran-
scripsi, non ut moli voluminis aut copiae con-
sulerem, quod unum semper vitium maximè
declino: sed ut boni Regis famam calumniis
exonerem. Nemo scriptorum est aliarum par-
tium, qui nocentem non pronuntiet. Servitu-
tem, & regnum cogitasse mentiuntur. Et quò
magis exosum populo faciant, plura innocen-
tiae ejus maledicta affingunt, præteritis virtu-
tibus, quas mitissimi Rex ingenii, supra beni-
gnitatem candidissimas exercuit. In sacra ma-
jorum (nec immeritò) pervicacior fuit. Hæc
si adsint, cætera facile populo condonaverit.
Sed ab æquo lectore, sincerisque judiciis, sa-
niores sententiam expecto. Fata erant, quæ
Belgas urgebant. Ad quorum iram averten-
dam publica vota & supplicationes Rex in
Hispania suscipi jussit. Eadem in Belgio fieri
mandavit. Litteras quoque ad Proceres de-
dit, blanditiis plenas. Tempus appetisse mo-
nens, quo constantiam suam fidemque
probarent. Idem quoque magistratibus per-
scripsit.

Missis his epistolis, alii, atque alii tabel-
larii in Hispaniam perveniunt, nunciaturi
tristio-

tristiora præteritis, & afflictæ statum provincie. quo in discrimine religio esset, qua in perplexitate rerum Gubernatrix. Denique cuncta fervere discordiis, sub infanda sectarum audacia.

Ad hos nuncios indignari Rex cæpit, quod sibi populus tam procaciter illuderet. Succinctisque legionibus ad omnem fortunam opus esse ratus, tria equitum, decem peditum millia in Germania conducijussit. Gens armis strenua, suaque indole in martem propensa, plura Cæsari, deinde & Philippo Regi stipendia generose, fortiterque fecerat, in venali fortitudine ignara perfidiæ. Sed nec recens adacta in Sacramentum vexilla destituit, quod tyrones Belgæ inter flagitia non numerant. Et cum hodierna prudentia statum robur in peregrinis constituat, inter eos Germani, nihil cæteris virtute, nihil affectu concedunt in principem, cujus ære militant. Turmas equitum in hunc modum distribuit. Erycio Brunswicensi tradita sunt tria millia; totidem Ernesto Brunswicensi. Philippus frater quingentos accepit. Joanni Bavaro centum quinquaginta; parem numerum Joanni Willaertio attribuit. Pedites vero in triginta tres manipulos cōtraxit. Ex his decem cohortes Joannes Nassovius, totidem comes Everstenius legerent. Gompenbergium octo præfecit. Waldensingerus quinque
jussus

jussus est conscribere. Hos sibi Principes mercenarios pridem effecerat. Paucorum annorum debitam pensionem exigentibus persolveri jubet, missis in Belgium trecentis aureorum millibus. quantam summam necessitas requireret, & præsens fortuna permetteret. Ex eadem pecunia sexaginta duo millia præsidariis, turmisque Belgicis in sex mensium stipendia numerari præcepit. Cæterum ne Germaniæ dynastæ ad tanti exercitus famam, in suspicionem raperentur; necessitatem armorum Cæsari excusavit. Gubernatricem præterea quæ moliretur secretis litteris edocuit, Generalia Ordinum comitia differri præcipiens.

Jamque epistola quam ante transcripsimus, in manus venerat. Nemini dubium erat, Conjuratos malè sibi conscios, nisi ex Generalium Ordinum comitiis edicta non passuros. Nec mitius aliquid sperabat Gubernatrix. Itaque Viglium, Bruxellium, & Assonvillium ad se accersit ex Privatâ Curiâ, Barlaumontium, & Hachicourtiû adesse unâ jubet. Soli enim ex Proceribus aulam instruxerant. Deliberare eos jubet, quid sibi statuendum de voluntate Regis; infirmo, ut videbatur, in præsens remedio. Illi commodius de his relaturam dicebant xv. Cal. proximas, in communi Procerum concilio. Absentibus iis de tanta re statui nihil debere. Nam si infelicem exitum haberent litteræ, omnem invidiæ molein

molem in se undaturam. Probata sententia, epistola magis non publicatur, quam supprimitur. Jam quoque ea quæ scripta erant ad aures Conjuratorum pervenerant ; præcipue indignantium, quod nullam comitiorum mentionem epistola præferret, quæ tam profunde imbiberant. Credebant enim absque his tuto sibi caveri non posse. Et pro repulsa interpretabantur, quod Rex non scripserat. Itaque novis tumultibus visum est opus, & atrociori scelere extorquere, quæ Rex sine scelere indulgere non poterat. Interceptæ sunt à Gubernatrice Tornacensium epistolæ, quibus significabant Conjuratis, ut illico ad se mitterent, quid postremis eorum postularis respondisset Rex Philippus, alioquin quæ destinassent strenue effecturos. Vnde facile est conjicere, ex Conjuratorum instinctu transactum esse sequens facinus, qui sectariis tanquam instrumentis ad flagitia abutebantur.

Ergo postrid. Idu. Aug. proruptum est in apertum sacrilegium. Compositionem sceleris referre non possum. Nemo enim in tanto consensu auctores meminit. Sunt qui auspicia Tornacensibus imputent; & ab his submissos, qui perditissimorum audaciam pecunia conducerent. Ego vero ut non unum aliquem populum, ita injuriam temporum accusare non desino, mutationem rerum por-

*Initium
Iconoma-
chia.*

ten-

tendentium. Trecenti circiter numerati sunt, qui sacrilegiorum licentiæ viam aperuêre. Obscura fax, & vappa populi. & inde in audaciam pronior, quia occulta. Quorum unum, etsi maximè nefas, ne nominare quidem possum. Homines sine tribu, sine nomine, finibus Audomarensium egressi, mortalium omnium notitiam amiserant. Sed Monasteriorum opibus avidissimè inhiantes, primùm omnium abbatiam Wulverghemiam, haut procul Curtraco sitam, hostiliter diripiunt. Clausæ erant in ea virgines sacræ. Ipsa solitudo loci, sexusque naturalis imbecillitas, Iconomachorum audaciam erexerat. Hoc sceleris auspiciū fuit. Imbutæque semel sacrilegio manus, nihil furori postea reliquum fecêre. Calcare sacra, aras evertere, insultare imaginibus, ornamenta absumere flammis, violare sepulchra, ossibus defunctorum illudere. Mira prorsus & abominanda crudelitas. Quasi parum facinoris in superos admitterent, etiam manes laceßere sustinebant. Nunc demum intelligimus, quanto posteritatis damno eraserint litteras, Majorumque insignia marmoribus insculpta, quorum nunc vestigia aberranti sæpe conjectura multorum ingenia curiosè persequuntur, aut à famâ memoriam requirunt, nullo certo auctore subnixam. Neque hunc furorem catholici tantum detestantur : sed

etiam

etiam quisquis aliarum partium liberalibus artibus ingenium excoluit. Iconomachorum tamen non intererat quid posteritas amitteret. Per omnem illam oram grassati sunt in templa. cæterisque ad eadem audenda exemplum præbuere, faciliè sequentibus; quod timebant incipere. Diceres ergo incendium per rura discurrere. Ita confestim, & sine mora obscuriores aliquot pagos, pari audacia in Castellana regione, pertentant Sæctarii & Ministri in partibus. Inde statim Bellam corripunt. Cæterum Bellæ monasterium erat, quod ex Prioratu Carolus Cæsar in Abbatiam extulerat, translatis eò monachis D. Joannis Teruaniensis Benedictini Ordinis. In hoc Divus Antonius peculiari religione colebatur à populo. Vota quoque pendebant de pariete, sanctitatem loci testantia, quam multorum annorum donaria celebriorem effecerant. Argenti ingens modus altaria instruebat, cultisque ad magnificentiam sacrorum exacti. Hæc sæctarii religionis odio, seu prædæ cupidine, scelerata pietate furiis consecrant. Non sacro, non profano manus abstinent. Sedi- bus suis Monachos exturbant. Nihil intactum, nihil integrum relinquunt. Ornamentis sacrorum abutuntur ad ludibrium, calicibus ad temulentiam. Et ne catholicæ religionis memoriam relinquerent; bibliothecam flammis absumunt, multorum annorum labore,

labore, atque impendio instructam; & in hac multa clarissimorum ingeniorum monumenta, quibus adhuc typi lucem negaverant. Omnia prorsus vestigia prioris sæculi abolere decreverant, ut novitatem suam imputarent antiquitati, aptatoque mendacio, fabulose origini apud posteritatem illuderent. Nihil ab infesto Christianorum hoste immanius expectes. Plane ut jam non sit, unde succensere Barbaris jure debeant. Igitur omnia quæ reperiébantur, aut rapta, aut consumpta erant. Avaritiam tamen sariare non poterant. Sparsas per agros locupletum domos prædabundi irruebant, cultum ecclesiarum abscondi simulantes. Quæ res multorum iram, rixasque provocavit. Adeò ut quidem exprobrarent Ministris, nihil aliud ipsos, quàm latrocinandi licentiam sub larvâ pietatis aperire fuerentibus. Et certè non aberraverât à vero. Et Ministri pudore victi, ad declinandam invidiam, aurum omne, & argentum templorum ædituiis jubebant restitui sub inventario; cæteroquin ut in furem se animadversuros. Fuere tamen qui abstruderent, & in crucem sublatis exemplum fecere. Ea res avaritiam cohibuit. At ne simili licentia in posterum grassarentur; non dispersi, & palantes ut antea; sed conferti, ac composito ordine iter instituunt. Primi ibant Iconomachi cum bipennibus,

cate-

cæterisque instrumentis, obvia quæque sana invadere, & si resistèretur, fores dolabris per-rumpere jussi. Ministri duo proximè succede-bant, homines nullo studio exercitati. In eam provinciam ex sutrinâ vel tetrinâ surrexe-rant. Populari tamen facundiâ & miscendis seditionibus validi apud multitudinem, cre-bris contumelijs in imagines debacchabantur. Post illos veniebant Diaconi, & Seniores; quos immensa sequebatur multitudo armis excul-ta. Hoc modo Stegram perventum est. quos Gallicus ibi Minister magno gaudio excepit. Inde Wervicū, & Menimā, & Wastenum, & circumjecta populati; ecce Messenensem ab-batiam, miserabili vastatione diripiunt. Nec Flandriâ contenti, prætereunt Lysam flumen, & Insulensium aliquot vicos sacrilegio fœ-dant. Donec omnem iram effunderent in Marquettense monasterium. Hinc Seclinium versi, ab accolis excipiuntur, qui ex finitimis undique pagis ad tutandam templi religio-nem armati convenerant. Multi Iconoma-chorum ferro cæsi, alij præcipitati in paludes, obscœnum spiritum in cœno evomuere. Ad Raslegemium quoque fama delabebatur. qui mox supervenit, cum militibus: Sed adven-tum ejus subitâ fugâ sectarij prævenerant. Er-sic ibi aliquando rabies stetit: ut in Flandriâ rursus atrocius insurgeret, quam non satis ha-buerant miserrimè semel afflixisse. Vix Nor-manno-

mannorum olim tanta fuit vastatio. Quadringenta & amplius templa triduanus furor absumpsit. Nec adhuc tamen oppida pertentaverat. Hoc unum deerat publicis malis. Manebat ibi adhuc aliqua magistratuum reverentia: cum e contra in municipiis, vicisque, & pagis sine metu licentia grassaretur. Donec & oppida ad ultimum cessere.

Cæterum Egmondanus ad primum Iconomachorum tumultum Ipras processit, ut auctoritate nominis sui cives contineret in pace. Habebat in comitatu Flandrorum præcipuos. His auctoribus edictum promulgat, quo externi in civitatem recipi prohibebantur. Salutaris haut dubiè lex: sed absque armis exerceri non poterat. Et interrogantibus Egmondanum magistratibus, num templatentantibus vim inferrent; contraxit humeros in cervicem, mandatum sibi non esse respondens. Mox inde se Bruxellam recepit ad concilium. Plerisque multum iridentibus, quod adversus rebelles, & vim publicam molientes, custos & moderator provinciæ mandatum requireret. Expectandum illi mandatum fuisse, cum Gravelingam juxta, temerè pugnam ciens, propè in discrimen attulit fortunam publicam. Bonos ergo desperatio cepit. Multi enim haut immeritò suspicabantur ea quæ acciderent sponte, vel fraude Procerum evenire. Malis autem aucta est alacritas. Et ex

alia parte gaudebant flagitiis Iconomachi. Nec tam Ministros, quàm prædam sectantes, proximam quamque civitatem rapinæ destinant. Plures furentibus cotidie aggregabantur. Corrupta enim erat latius regio, & superstitionis suæ vindex unusquisque videri volebat. Raptim igitur Abbatiam Bellopratensem, haut procul Ipris, inopino tumultu corripunt. Inde à sectariis ex compacto acciti sunt in civitatem nemini clausam. Vi & licentiæ leges cesserant. Obstupuere magistratus ad hanc turbam, & quid actura esset expectantes, alienam stultitiam immoti contemplantur. Parum videbatur in plebe opis esse. Major pars occultis studiis favebat Iconomachis. Quibus se obscurissimus quisque statim applicuit. Itaque cum nemo obstatet, funestæ pietatis crudelitatem licenter exercent. Ordinem sceleris non invenio. Totus tamen dies per sacrilegia consumptus est. Nec in delubris amplius restabat, quod polluerent: cum desertum episcopi palatium, canonicorumque domos vi percurrunt, & tanquam in capta urbe, bonis insultant. Inde tandem digressi, totam illam regionem impunè peragrantes, proximos Franconatus pagos pari audacia funestant. Vtlerius progredi metus prohibuit.

Auriacus hætenus Antverpienses tenuerat in tranquillitate, lætissimis auribus accipientes, quæ in Flandria acciderant. Quorum suc-

cessu ad paria scelera animati, sordidissimorum hominum audaciam pretio sollicitant. Et inventi sunt, qui in diurnum solidorum decem stipendium locarent operas suas ad flagitium. Encœniorum tempus erat, decimo octavo mensis Augusti. Tradito à majoribus more, totum hunc diem impendere lætitiæ publicæ. Populus ad hilaritatem effusus, vel temulentia marcet, vel spectaculis oblectat ingenium. Multi quoque mortales ex proximis urbibus, pagisque ad solemnia confluunt. Magnâ pompâ supplicatio instruitur, quam longa personarum series, in historiam circumducta, exornat. Cives armati procedunt, cultu ad magnificentiam exacto. Post eos geminus sacerdotum ordo, in candidâ veste, & dalmaticis. quos B. Mariæ simulâchrum sequitur, suppositis sacrificorum humeris sublatum. Peractâ pompâ, non statim cellæ suæ imago redditur. Sed collocatur in testudine templi, & in octavum diem pietatem populi expectat. Istum sacrorum ordo fuit. Civibus ergo ad spectaculum intentis, fuere qui prætereuntem statuam scurrili cavillo exciperent, clarâ voce obstrepentes, Mariola Fabri (ita enim appellabant à B. Iosepho, qui faber fuerat) hunc honorem tibi inter supremos numera. Quibus auditis mussabant inter se catholici. Sed ante alios sacerdotes excandescere. Iamque quod evenit, præsagientes animo,

mo, sacrosanctam statuat vesperscente die cellæ includunt. Forte juvenes a sectariis conducti ludebant in templo. Notantesque sibi simulachrum è testudine subductum: unus aliquis scurrilem captans voluptatem vociferari cœpit, num timeret sibi Mariola, quod tam tempestivè concessisset in cellam. Per fidem, inquit, si *Vivant Gensij* exclamaverit, ut omnes exaudiant, spondeo innocentem in sede mansuram. Cæterum pro latere templi ligneæ cellula erat, in quâ sedebat anus libitina, cerceolos vendens, quos supplex mulierularum pietas serrato candelabro in donarium compresso pollice affigere consueverat. ollam præterea habebat, & in eâ absconditum cineribus ignem, extinctis faculis promittentem lumen. Dum ergo juvenes petulantius rident, cultumque divorum infamant contumeliis, quidam ex illis anum accessit; & rogo, inquit, mater, ilicet hinc i, rerum tuarum commercium interit. Secundum hanc vocem irata anus, præteritisque verberata contumeliis, in loquentis os ollam excussit. quam effusissimus omnium risus sequebatur. Nec procul ab exitu stabant furiosa consilia; cum in proximo obambulans Prætor, ad rixantium clamorem cum stipatoribus processit in templum, cunctisque excedere jussis, minacibus verbis ultus est suum supercilium. Irati juvenes majorem nautarum colluviem accersunt,

rursusque in templum armati perveniunt. Psalmos more suo cantare exorſi, iisque peractis, *Vivant Geuſij* vociferari incipiunt. Ad quem ſonum veluti Berecynthiâ tibiâ in furorem vertuntur. Principio quidem lâpadem dejiciunt, quæ de tholo ſuſpenſa, noctes diesque vigilabat cum lumine. Aras deinde, & imagines proſternunt, & tot ſæculorum ornamenta. Horret animus ad memoriam. Multæ antehac hæreſes libaverunt pacem Eccleſiæ. Sed animorum poſſeſſione contentæ, picturis, cælaturisque pepercere. Hæc una exoriens, omnium ante ſe ferociſſima, ingenuarum artium monumenta ſuſtulit, ipſiſque ingeniis bellum fecit: Centum non amplius erant, qui tantum facinus adorti ſunt. Duarum horarum ſpatium furori indultum. Mox calentes iras ad monaſteria transferunt, prælucentibus faculis, quas impiis manibus eccleſiis ſubtraxerant. Franciſcanos reſiſtere auſos, pluribus vulneratis in fugam conjiciunt. Et nemo poſtea inſanos ſuſſlaminavit. Per omnia templa liberè vagabantur, impetum feſtinantes, ut ante auroram ſacrilegium perficerent. Quidam hæc XIII. Cal. acta tradidère. quibus ego quoque accedo. Siquidem Auriaco abſente contigiffè conſtat. At ille quidem cum uxore, & Ludovico fratre publicam pompam ſpectâvit, eademque vespèra frequentavit convivium. Sed in tanta ſcriptorum varietate, exacta temporum

rum ratio haberi non potest. Parum refert quando actum. Omnes consentiunt in historia. Cæterum Iconomachi scelere audaciores, expertique quàm inultè peccassent, primâ statim luce feruntur ad abbatiam S. Bernardi, secundò ferè ab urbe lapide. Nemo adhuc ex civibus audebat arma opponere, subitæ audaciæ torpore correptis. Consensum urbis latius metuebant. Tantum stabant attoniti in liminibus suis, alter alterum quærentes ecquid vidissent. Provectior dies, nocturnæ tragædiæ calamitatem aperuit. lacebant undique imaginum fragmenta, & majorem, quàm pro damno speciem fecerant. Erant qui majorum donaria, erant qui sua agnoscerent. Metus deinde invalescere cœpit, ne locupletissimorum ædes Iconomachi corripere. Sed illi S. Bernardo reversi, rursus se recipiebant in templum B. Mariæ, funditus everfuri, quidquid præteritus furor intactum reliquerat. Itaque ingentem detrahunt crucem, & in ea pendentem Christi statuam, ad humani mensuram fastigii figuratam. Antonii Helmontii opus erat. cujus nobilissimam artem etiam in reliquiis colimus, atque infra pecuniam voluptas taxavit. Quippe harum rerum pretia, non ex emētium commodo, sed pro cujusque voluptate, aut curiositate extenduntur. Sed in eo scelere occupatis, Prætor supervenit; adjutus bonorū studio, quos indignitas sceleris in ultionem

O. 4 acuerat.

acuerat. Nihilque tale expectantes conjecit in vincula, ac paullo post in crucem sustulit. Senatus jus suum expertus, palam edixit, templorum spolia deferrentur in publicum. Idem quoque Ministri jubebant. Qui agraria licentia jam non contenti, concionum novitatem in urbem traduxerant. Eminebat inter eos turbulentus ille Hermannus, è Flandria accitus ad concitandos torpentium animos, eam tempestate facundia uberrimus. Et ille statim Cathedralem Ecclesiam B. Mariæ concionaturus arripuit, suis eam deberi contendens. ambitione Calvinistarum, numero & furore præstantium, & nunquam satis patientium in secundis consistere. Accidit quidem parva res, memoria tamen non indigna. Fortè Ministrorum quidam monasterium S. Claræ concionaturus intravit. Claudebantur in eo virgines, quæ ex severissimâ disciplinâ sanctissimis moribus vitam instruxerant. Ad conspectum Ministri, omnes quasi fulmine ictæ procidebant in terram, prônique perseverabant jacere capitibus. cum ille attonitus, seu propria conscientia, seu novitatem facti stupens, vocem non invenit. & ab astantibus dicere iussus, cum semel, iterumque frustra tentasset, pudore correptus monasterium destituit. Sed non cæteri Ministri tam segniter agebant. Vacuam templorum possessionem tanquam suam prædam rapièntes, catholicæ religionis exercitium.

citium undique excluſerant. Indignum id magiſtratibus viſum. Propoſitoque edicto, ſectarios abſtinere templis, ſuamque catholicis poſſeſſionem reſtituere jubent. Permoti his Miniſtri, & quanquam ſuorum pervicaciæ viribusque confiderent, non audebant tamen palam contradicere. Videbant ſe potiffimum vapulare ſub Iconomachorum invidiâ, & præteriti ſcleris ſuſpicionem urgeri. Senatum itaque adire placuit. In curiam admiſſi templum ſibi concedi poſtulant ad divinum officium. Nihil ſua culpa factum ab Iconomachis, teſtabantur. Stimulis religionis actos eſſe, nec in poteſtate ſua fuiſſe pietatis zelum comprimere. ſi catholici temperarent ab injuria, in poteſtate ſe magiſtratus futuros. Senatus in hoc rerum articulo diſſimulandum ſibi ratus, benignè reſpondit. Non eſſe in poteſtate ſua de tanta re ſtatuerè Auriacò abſente. gratiam futuram quam ille dixiſſet. Poſt pauculos dies reditum promittere. Æquum interim eſſe, priſtino cultui delubra reſtitui. Hac ſpe dejecti, omnem tamen fiduciam in Auriaco reponabant. Exceſſurosque ſe templis denunciant. Sed non ideo reliquæ urbes quietem fovere. Silvæducenſes eodem tempore haut abſimiliter in templa ſævierunt. Inde latè, & paſſim per omnem Campiniam, nec per vices, ſed ſimul & uno quaſi impetu diſfuſum eſt incendium. Brædæ, & Bergæ-ad-Zomam ad laſſitudinem

tudinem spoliata sunt templa. Lirani ad Iconomachorum propinquantium famam, subductis imaginibus, in vacua delubra furētes admisere.

Aldenarda ut prima inter Orientalis Flandriæ, civitates concionandi licentiam in publicum extulerat, ita quoque prima nefarias manus sacrilegio polluit. Novem Iconomachi intraverant urbem, à Bacquerelio quodam mercatore conducti. Tantillus hic numerus sceleratę pietatis ducatum præbuit, populumque traduxit in partes. Cujus rabies non ante finem accepit, quam deesset in templis quod profanarent.

Gandavenses ex aliâ parte, alieni furoris successum speculabantur. Satisque constabat, non quieturam multitudinem, si vel propius se admovisset Iconomachorum agmen, vel imparatam urbem sectarij aspicerent. Multa furoris indicia eruperant. Magistratus, ut par erat, anxius, ex adverso struebat consilia. Optimates omnes cum tribunis plebis vocat in curiam, sciscitaturus, quâ potissimum ratione Iconomachorum furias à se averterent. Non vanâ se conjecturâ augurari, mox in procinctu futuros. Militare præsidium accersendum esse, aut si sua ipsi tueri mallent, solemni sacramento obstringendam esse civitatē in Iconomachorū perniciem. Optimates professi sunt futuros se in potestate magistratus. Idem factum à tribunis. Nā & hi ex Optimatū numero eligi cōsueverāt, ex quo Carolus

lus Cæsar rempublicam à populo ad primores
 transtulerat. Dato igitur Sacramento, jussi
 sunt tribuni legem jurisiurandi deferre ad
 multitudinem. Sed hic animi in diversa trahe-
 bantur. Inclamantibus passim & vndique se-
 ctarijs, salvâ pietate sacramentum dari non
 posse. Existimare se Iconomachos jure facere.
 Neque unquam effecturum magistratum
 ut vim inferant pietatem colentibus. Sum-
 ma itaque turbatio fuit, neutris invicem
 cedentibus, & quibus pristinæ religionis af-
 fectus inerat, & quibus odium. Pavidinter-
 rim sacerdotes ornamenta templorum, &
 quidquid sacrum sanctumque transferebant
 in arcem. Privatis quoque gentilia donaria ef-
 ferre permissum. Silebant tristi justitio fora &
 leges. Silebant ceremoniæ & sacrificia. Ne
 provinciale quidem Concilium solita munia
 usurpabat. Captam esse urbem diceres. Pavi-
 dis cæteris, & quo tandem res evasura esset
 expectantibus, Sectarij quod pravâ mente cõ-
 ceperant, perficere constituunt. Nec ultra me-
 tus aut contatio; quia timeri se conspexerant.
 Itaq; XI. Cal. Septēb. sordidissima multitudo
 in globū collecta, Ioannem & Levinū Ongena-
 cum Claudio Goetghebure dimittit ad præto-
 rē, denunciare jussos, mādaturū sibi à Proceri-
 bus imaginum excidium, cæterarum urbium
 exemplo: si nemo obliteret sine noxâ fore: sin
 arma opponerentur viacturos. Proinde si trā-
 quilli-

quillitati publicæ consultum vellet, lictores fibi aliquot statueret in custodiam. Obtorpuit ille ad hanc vocem, iramque multitudinis irritare veritus, satellites præsidio ire iussit, sub publicâ auctoritate licentius grassaturis. Propter Templariorum sanctorum ingens stabat manus, facinori parata, & responsum opperiens. Claves templi exigentibus, visis lictoribus ædituus fores apervit. Quadringenti omnino erant, qui mercenario opere destituto ex omni parte affluerant. fæx & purgamentum civitatis, in hanc amentiam à sectarijs subornatum, ne quid sacrum oculis occurreret.

Ex his triginta in aras, imaginesque sæviabant; cæteri cum iustis armis ad defensionem confederant. Inde ad Augustinianos, ad Carmelitas, postea Dominicanos calentes iras transferunt. Augescente licentiâ, egentissimus quisque ex plebe ad prædâ confluebat, nulloque obsistente irrumpebat monasteria. Sacerdotes, & religiosi secesserant in tutum. Penum ac cætera prædæ exposuerant. Magistratus torpore pavidus, finem malorum opperiebatur. Et dum boni timent, pessimus quisque impune furebat. Iam non uno agmine: sed in partes distracti, alij Nigrarum monialium, alij Agnetensium, plures sancti Michaëlis fana devastant. Quippe Sanctæ Pharaildis delubrum in transitu contaminaverant.

rant. Post hæc rursus in unum conveniunt; junctoque agmine Carthusianos aggrediuntur. Quippe eâ tempestate extra muros civitatis in vico Royghemio domicilium constituerant. Hinc regressi Beginas, Xenodochium, Ackerghemium, Deinsam, Bylocam, Gallilæam; Groenenbrillam corripiunt. Actum demum in cathedralem ecclesiam Sancti Bavonis, feruentes sacrilegio manus intemperanter inferunt. Intempesta nox erat, & restabat adhuc quod polluerent. Corruptis igitur faculis, ad sancti Nicolai, sanctique Iacobi templa decurrunt. & inde mox in sancti Petri abbatiam, monachorum fuga destitutam. Multa ibi nefanda fecerant: Franciscani tamen ut omnium ultimi, ita extrema rabie afflicti fuere. Quibus rebus senatus permotus, postridie rursus Optimates, cum tribunis plebis ad se accersit. Quippe civitatem à violentia diutius tueri non poterat inermi consilio. & atrociora sectarij minabantur, afflicturos se divitum domos, iustitiam & tribunalia everfuros. Prætor quantum militum subitis delectibus posset, iussus est conscribere, fora quoque & vicos vigilijs insidere, tutisque præfidijs firmare monasteria. Quatuor duces manipulis præpositi, Franciscus Wychuyse, Antonius Stoppelare, Franciscus Pascharis, & Arnoldus Boefius. Edictum extraneis urbe cederent.

Cru-

Cruces in foro ad terrorem eriguntur, denuntiata morte sanctitatem templorum violare audentibus. Sed jam Iconomachi portis excesserant. Per pagos vicosque liberrime vagabantur. Non enim habebant qui furori eorum auderet intercedere. Nec jam dubitabant oppidis quoque vim inferre, multitudinis conscientia freti. Sed magistratibus ad providendum tempus dederant. Alofti, Teneramonde, Contraci à custodibus excluduntur. Clausas quoque portas Brugis inveniunt. Multi quidem in ea civitate novitatibus capiebantur: bonorum tamen numerus prævaluit. Et miles nuper conscriptus, obsequium fidemque colebat.

IX. Cal. Septem. Valēcenenses pervertuntur. aliquanto serius, quam pro civium ingenijs. Noircarmius, uti diximus, huic urbi præfectus erat, egregiâ in regem fide & obsequio clarissimus. Ad primam erumpentium concionum famam Valencenas properavit. Sed cum sine armorum metu, cives in officio continere non posset, Bruxellam festinat ad corroganda auxilia. Interim Ministri superciliosâ auctoritate plebem exstimulant in Iconomachiam. Turpe sibi credentes facinus differre, cujus ipsi alijs auctores fuerant. Licentia à paucis orta, plures attraxit. Nullo Optimatum obstiteret auso, fore templi B. Mariæ hortantibus Ministris vi perfringunt. Inde Beginasium, & S.

Gauge-

Gaugerici, ac cætera fana pari furore corripiunt.

Eâdem die Tornacenses ex composito paria incipiunt. Initium cœpit ab obscurissimis hominibus, quos ex agricolis Ministri promisso stipendio ad piaculum conduxerant. Ea enim tum maxime ars placébat. quia semel, iterumque feliciter cesserat. Miscellanea plebs mirâ densitate conjungitur intransibus. alios stimulabat cupido prædæ, plures conscientia sua & religionis odium, omnes tamen pari animo in furorem surgebant. Milites aliquot in statione locati erant, qui sacramentum Regis acceperant. Eos prætor civitatis ingressis Iconomachis volebat obijcere. Sed ad stringendum ferrum compelli non poterant; haut aliâ lege conscriptos se causantes, quàm ut civitatem à populatione, tuerentur. Sed à sectarijs pecuniâ corrupti erant in patratu facinoris. Vnde enim Iconomachis tanta fiducia, ut manipulis ipsis inspectantibus tam licenter sævirent in templa? & non vindices timerent, quos in se potissimum conscriptos cognoverant? Delubrum B. Mariæ primus grassantiū impetus contaminavit. Rapta & fracta sunt omnia, quibus avaritia, & vis pares esse poterant. Tum denique viscera terræ scurari incipiūt. Quippe canonici impendentē tempestatem prospicientes, aurum omne, atq; argentum, & opulentâ signa, cum pretiosissimo cultu

cultu humi defoderant. Et hoc ipsum, nescio quo prodente ad sectariorum aures allapsum erat. Forte accidit, ut Adolphi Geldriæ ducis sepulchrum perfringerent, eruentes è conditorio cadaver, quod per tot annos in hunc diem illibatum servaverat unguentorum suavitas. Itaque tanquam non satis pœnarum vivus pependisset, reliquijs ejus per ludibrium insultant; indignum humo clamantes, qui violare eum sustinuisset, per quem in humum venerat. Ille quidem per summum nefas sceleratas olim manus patri injecerat. egeratque se auctorem facinoris, cujus ipse in alios vindex esse debuerat. tantoque immanius facinus visum, quod nullâ aliâ causâ exstimularetur, quàm ut sceptrum, quod exspectare debebat, seni eriperet. Ergo ut insignia majestatis viventi extorqueret, prope parricida extiterat. Invalidum quippe senem, & vix firmantem vestigia, per aliquot milliaria, nudis pedibus in carcere protraxerat. Posthæc ab eodem exhæredatus, cum succedere tentasset, Carolus Burgundiæ dux pari supplicio juvenem affecit, multosque annos, diris vindictam exigentibus, in custodiâ habuit. Cæterum Carolo sublato, à tumultuantibus Gandavensibus dux constitutus, acieque victus, ac cæsus Tornacensibus humanus traditus fuerat. Daturus exemplum posteritati, nunquam satis idoneo supplicio expiari parricidia. Interea

Tornacensibus humandus traditus fuerat. Daturus exemplum posteritati, nunquam satis idoneo supplicio expiari parricidia. Inter ea Tornacenses diebus aliquot per scelus exactis Valencenensibus sociantur; junctoque agmine circumjectos pagos pari immanitate vastant. Urbs Orciacum in proximo erat. Adoriri hanc constituunt improvise facinore. Sed Rassegemius, inductis in eam agricolis, tutam reddiderat. Oppugnare non ausi, iter flectunt, & S. Amandi, Marchiani, & Hasnonii abbatias corripunt. Vicognii præterea speciosam bibliothecam flammis consumunt, quam multis sæculis cumulaverant monachi, & ut in illa ætate memorabilem fecerant. Et sic ibant ulterius, Aquicinctensem abbatiam vastaturi. Sed ibi eos Robertus Longevallius Dominus de Tour, & Fridericus Guyonius territorii prætor armati expectant. Ingentem circa se habebant agricolarum manum, ex proximis vicis pagisque collectam. Multa cum strage in sectarios inveci, diversis itineribus dissipatos interficiunt.

Nec cessatum est in Hollandia. Sed piget curiosius inquirere in tot facinora. Brederodius turbulentiâ ingenii apud plebem validus, Amsterdameses, & Viannenses facile concitavit. Quorum audaciam Ultrajectini statim, & Lugdunenses imitati sunt. Provincialis concilii reverentia Hagheneses aliquam-

diu in modestia continuit Iconomachis ad extremum vulgantibus, mandatum sibi à Proceribus templorum excidium, permissi sunt insanix suæ; quia reprimi amplius non poterant. Delfenses sacro cultu, & imaginibus subductis, nuda altaria furentibus exposuere. Industria consulum Dordracenses & Goudanos à furore cohibuit. Harlemum, Rotterdam, & Gorcomium nescio sanè qua felicitate, fatalem illam stragem evasere.

Nutantem Frisiam Arenbergius acerrimè cohibebat. Sectarii tamen contineri non poterant; arte & impulsu Conjuratorum, res novas undique molientium. LeeWARDæ igitur, & Groeningæ ira multitudinis in sacra incubuit.

Geldria penè tota pro religione stetit, Megemi sollicitudine. Nec deerat Culenburgius, mobilissimum quemque Neomagi tentando. Cæterum magistratus conatibus ejus prudenter occurrit, urbem excubiis firmans, & exulare jussis, quoscumque novitatibus deditos perceperat.

At Zeelandi haut tardè descivere, initio à Vlissingensibus, & Campverensibus orto. Cum Optimates cum episcopo haut segniter Middelburgi resisterent, valentiorum impetu ad ultimum succubuerunt.

In reliquis provinciis nihil irarum. Bonorum numerus malitiam supplantaverat. Cameraci

meraci quidam Joannes Clericus ad confessionem Augustanam provocare ausus multitudinem, stultissimam vecordiam capite expiavit.

Horum omnium ignara adhuc fere Gubernatrix, securè contrahabat Proceres in concilium, quod fortè tunc solemne condixerat. Venere ergo in Curiam Auriacus, Egmondanus, Mansveldius, Hornanus, Arenbergius, Hoochstratanus, Barlaimontius Hachicourtius, Noircarmius, Viglius, Bruxellius, & Afsonvillius. Recitatæ sunt sedentibus epistolæ, Prid. Calend. præteritas à Rege missæ. Adduntur his mandata, quæ Bergësis & Montignæus in Hispaniam detulerant. Crebrior sententia fuit; *Transactum esse utcumque de conditionibus, quas exegissent Conjurati. Inquisitionem quippe sublatam esse. Quid de legibus Rex censeat, ex eo satis intelligi; quod ad examen Concilii Status revocari jussit. Arbitrium ejus expectari de Generalium Ordinum comitiis. Hæc priori libello dequestos esse Conjuratos. Posterioribus codicillis cautionem securitatis postulasse. Nec ea in re difficilem se prabuisse Regem, nisi quod intra paucas condiciones esse voluerit, quæ nihil pertinerent ad Conjuratos. Eos itaque primo quoquo tempore securos reddi oportere, ut resolvant sædus, sub cuius fiducia populus tam pernitiōsa inciperet. Cæterum de formula cautionis aliquantisper variatum in senatu. Quidam enim diploma abolitionis tradendum*

censebant. Sed paucorum assensu audita est hæc sententia. Abolitionem enim non concedi peccasse se negantibus. Gubernatrix quoque suffragium his adjecit, jussitque Auriacum, Egmondanum, Hornanum, & Assonvillium in quem putarent modum, cautionis tabulas concipere. A Proceribus deinde remedium quærere cœpit in præsentium turbarum incendia. Tum quidam ex his diutius non pressere studia sua. *Sectariis aliquid indulgendum*, dicebant. *inclinatam rem aliter sisti non posse. Validissimas civitates novitatibus accessisse. E tranquillitate futurum, si sacrorum suorum cultum his permitteret.* Gubernatrix tantum se facinus negabat facturam. Quis deinde, inquit, *in officio mansurus est, si hanc semel licentiam aperuero? An non alia statim civitates eruptura sunt in eandem insaniam?* Ad hæc renidens Auriacus, facies, ait, *Domina, quod placebit. Aptiorem tamen medicinam non invenies. Hæc nobis remedia majorum prudentia descripsit. Atque ut optima esse credamus, præteritorum seculorum tranquillitas experta est. Hac arte Græci pacem tutati sunt, inter tot religionum discrimina. Hi mores Turcas continent, Germanos, Polonosque tranquillunt. Nisi forte mavis inter se collidi provincias, funditusque everti quidquid præteritus furor reliquum fecit. Vides quantis viribus sectarii succincti sint. Ducenta armatorum millia in nos promittunt. Quorum numerum, ut de industria augeant multi, magnam tamen vel ex mendacio esse*

conjicio. Tutius igitur est exarmatos illos relinquere insaniæ suæ; quàm ut contumacia accensi, atque omnia polluentes, dissensione populi abutantur ad tumultus, ac mutandi status occasionem arripiant, tradituri se regendos externis principibus. Dirigit Gubernatrix ad has voces. Ingentique suspirio pectus concutiens, dimisit vultus in terram cogitabundæ similis; receptoq; animo, quomodo, ait, tantum admittam piaculum? Egon' hisce oculis irreligionem aspiciam, contempto Regis mei imperio? Si fatis ita videbitur, extinguere malo in innocentia mea, & innoxium cælo transcribere spiritum, quàm tanto dedecore famam polluere. Simul his, iratæ similis, recepit se in cubiculum. Erat fanè magnanima mulier, & in contubernio amitæ Margaretæ Hongariæ reginæ, ad principales curas nutrita, virili constantia vitia sexus prorsus exuerat. Proceribus invicem se intuentibus, concilium dissolvitur.

Horum omnium Conjurati non ignari, insaniora præteritis agitare incipiunt. Mittunt igitur ad Iconomachos, qui juberent eos accepto signo splendidissima quæque pervertere Monasteria, ac deinde simul ex omni parte in regiam versus iter dirigere. Interim Gandavensium, Tornacensium, & Valencensium, aliorumque facinora crebri nuncii in aulam detulerant. Et in illo rerum articulo perplexæ Gubernatrici, Iconomachi tan-

dem appropinquare traduntur. Hoc fulmine non mediocriter percussa, cogitationem altius mittere cœpit, quò evasura tandem esset tempestas, ex omni parte in caput suum promissa. Ingens vis hominum erat, ex diversis regionibus ad se tendentium. Flandri Affelghemiensem, Silvæduceses Tongerloensem abbatias quieti circumsedebant, expectantes irrumpendi signum, quod ni libertas religionis indulgeretur, daturos se Conjurati promiserant. Cum Antverpienses e contrâ, dispersi per monasteria & pagos, fœdis rapinis, incendiisque grassarentur. Prima luce Mechliniam ex improvviso adorti, mixta sibi oppidanorum colluvie, Franciscanos & Carmelitas exspoliant. peractoque scelere, Vilvordiam se proripiunt. Adventus tumultuantium latè terrorem dedit. Passim enim jactabant, postridie se Bruxellam, atque in ipsam adeò regiam agmen moturos, ad paria facinora. Inops consilii Gubernatrix, jamque magis magisque malorum undique urgentium imagine concussa, cum alii super alios nuncii vera falsis miscentes, & tristiora omnia referrent: Vigiliam ad se accersit. Consuetudinem illius jampridem intermiserat, offendere Proceres verita, quibus ille fastiditus erat, ob virtutem & constantiam improbitati inimicam. Metus suos strictim adveniēti exposuit, & quid ad hæc sibi faciendum,

ne differret expromere. *Plus*, reponit *Viglius*, duo anni sunt, ex quo scire potuisti, quo furiosa & occulta quorundam Procerum consilia vergerent. Sub quorum invidiâ potissimum vapulavi. quia liberius quàm expediebat mihi locutus sum, quæ pertinere credebam ad obsequium Regis, ad integritatem religionis, & salutem publicam. Sed aures tuæ malignis insidiis assuetæ, uni mihi ita semper clausæ fuere, ut nihil nisi læsurum admitterent. Illa quidem peccasse se fatebatur, amicitia specie deceptam; in eo tamen articulo stare res suas, ut quærendum potius esset, non quid facere debuerit, sed quid facere debeat. Tum *Viglius*, an mandata Regis exequi haberet in animo, interrogat. Cùm paratam se respondisset. *Vade ergo*, inquit, & eandem legem propone Proceribus, à quibus exiges fidelitatis Sacramentum. His qui obsequium contumaciæ præponunt, protinus te adjuuge. scriptoque milite, custodiam corporis tui delectis attribue. Multi in partes tuas haut dubiè abscedent; ubi te obstinatam viderint. Satis virium in his tibi. Contumaces tamen ita non devovebis, ut contumeliosè haberi se putent. Arte nempe est opus. Et potissimum dominantium arcum, dissimulationem usurpa. Blanditiis verborum excultos sic fove, tanquam aliquando redituri sint ad officium. Nam si pati non potes ut suspectos se non sentiant, despectam dignitatem aperies injuriis. Non dubitavit Gubernatrix confestim exequi virile consilium. habitoque senatu

eandem condicionem Proceribus proponit. Mansveldius, Arenbergius, Barlaimontius, & Noircarmius, sine cunctatione sacramentum accipiunt. Egmondanus paullisper dubitavit. Auriacus, & Hornanus pertinaciter abnuere. Supervacuum dictitantes iuramentum dicere, quod in Gubernaculorum auspiciis, & sæpe antea advocassent. Suos quemque mores continere. nulla religione constringi perfidiam. De cætero præfecturam civitatis Bruxellensis Mansveldius accepit, mille octingentos pedites legere iussus. Oppidani mercedem in mille promiserant. Trecenti ecclesiasticorum stipendio merituri erant. Reliquis sufficebat ærarium publicum. Præfecturæ militares distributæ sunt in promptissimos. Inter quos Philippum Launojum Beauvosi dominum, Balduinum Gavrium Inchii dominum, & D. Estanburgium comitis Lignii fratrem eminuisse comperio.

Forte per eos dies Arschotanus Bruxellam venit. In itinere B. Mariæ Hallensi votum exolvit. Sed ut ostenderet, quanta fiducia sperneret sectarios, ministrorum omnium capitis tegmen B. Mariæ imagunculis instruxit; atque in eo habitu spectandum se Bruxellensibus exhibuit. Cæterum is Gubernatrici magnopere suadebat, ut desertâ Bruxellâ, Hannoniâ peteret, caput suum subductura periculis; quoad subsidisset tempestas furoris popularis,

ac propitiora fata regressum promitterent. Sed hoc consilium Gubernatrici magis, quam Viglio placuit. Cumque audivisset de fuga eam cogitare, obnixe rogare cœpit; ne rebellibus regiam proderet. Quis enim, inquit, deinde pro aris arma sūpturus est, si fugere ipsa perseveraveris, tuo metu ceteros præmonitura, quid metuendum sit à sectarijs, haut dubie erecturis altius supercilium? Dignitatis tuæ præsentia hic est opus. Aliter civitas contineri non potest. Quid enim times? Nemo Procerum, nemo nobilium, ex saniori populi parte nemo, ubi periclitari te aspexerit, auxilium non expediet, salutemque suam tuæ non præponet; quos omnes pari metu fugitiva percelles, & ad resistendum ignavos efficies. Tanto in bellis momento est præsens majestas, pro qua gloriosum sibi quisque ducit occumbere. Iterum atque iterum cogita, quam magnum Regionum ministrorū numerum desertura sis, quorū nemo sequetur fugitivam. Vt cumq; igitur ipsa evadas incolumis, ex maxima tuorū parte perire hic incipies. tot fidelissimos viros tractura in ruinam, opperiri paratos quidquid fortuna decreverit. Haut segniter has voces accepit Gubernatrix. Vice-rat pudor contemplationem periculi. Iamque prorsus damnaverat abeundi consilia: cum Auriacus denunciat ei, Iconomachos admovisse propius agmen, omnesque omnino monachos & sacerdotes, cum ministris Regijs statuisse conficere. Idem mox Egmondanus, & Hornanus diversi alius ab alio, detulere in regiam. Seu vera hæcerant, seu ad concitan-

dum terrorem efficta, non dubitavit tamen Gubernatrix pro compertis accipere. Itaque consilium fugæ, quod paullo ante constantissime abjecerat, rursus revocavit, ingenti consternatione perculsa. Purpuratos quoque in sequentem diem adesse jubet, discedenti sibi præsidium. Præparatisque omnibus, ad soporem momentaneum processit in conclave. Sed nec somnum capere, nec quietem pati poterat, tot simul cogitationibus obversantibus animo. Luce prima Viglius supervenit; & quo tam subito properaret, interrogat. Tum Gubernatrix præsentis metus effata, & quæ manentibus instarent pericula; prudenter quoque facturum, dixit, si fugam simul adornaret in Hannoniam, depulsurus à jugulo certissimam perniciem. Parum se distare à captivitate. Nihil mitius sperandum à furentibus, quam insignem aliquam contumeliam, aut mortem. Non esse opus caput ruinae offerre, cum Hannonia pateat, exceptura ipsos, tutissimo hospitio. Viglius convenientem præsentis rei sententiam orsus, longa oratione detertere rursus eam capit ab intempestiva fuga; hortando, monendo, refutando rumores, castigando formidinem. Et ob id prolixiori sermoni indulgebat, quia interim adfuturos sperabat Proceres, quos eandem opinionem fovere didicerat. Nec mora, Mansveldius, & Noircarmius supervenerunt. Quorum tum operâ potissimum utebatur

tur Gubernatrix, suspectis ijs, quos novitatus oblectari cognoverat. Illi bonum animum habere eam jubebant, identidem commemorantes; ne *fidissimos*, & de Rege optime meritos Ministros desereret. Fortioribus consilijs obfirmaret animum. Superesse vires adversus inconditum vulgus, nullo duce, nulla disciplina ad bellum, tanquam ad prædam ruens. Ausuros se tentaturosque extrema pro salute illius. Fortunam & Deum adfore conatibus, meliorem causam tutantibus. Nec ausuros hæc fuisse, si crederent, caput ejus oblectari discrimini, aut victoriam in lubrico consistere. Dum hi loquuntur interim Viglio spatium fuit, quo dimitteret ad magistratus, qui egressu civitatis aulicis interdicerent. Quorum imperio statim clausæ sunt portæ, firmatæque vigilijs. Multum dici processerat, Procereque passim coibant in curiam solemni officio. Sed impedimenta quæ præcesserant ante portas cohibebantur. Et hoc ipsum præfecti mulionum renuntiaturi accesserant. Tum Viglius, *vides, inquit, impositam tibi manendi necessitatem? Necdum intelligis quantum in te una momenti civibus sit?* His Viglij verbis, magistratus (nam & ipsos simul in conspectum admiserat) adiungunt, spondere se milites quos promiserant, mox in promptu fore. Civitatem quoque Regijs partibus se applicituram. Egregiam sane gloriam eo die Viglius tulit servatæ reipublicæ; laxante paulatim animum Gubernatrice fortiori-

tioribus consilijs, quæ ex omni parte congerebant purpuratorum fidiſſimi. Et vergens ad meridiem dies itineri non ſufficiebat. Proceres itaque à prandio in concilium venire juſſit. Actum ibi de pace; cum ijdem illi fugæ auctores, libertate opus eſſe rurfus clamabant. Non quod conſtaret profuturam in ſincera remedia; ſed quia pro tempore aptiora non ſuccurrerent. Optimis quibuſque jam non adverſantibus, & Auriaco potiffimum urgente; ne perſequeretur obſtinata religionis deſenſione religionem perdere. Multos dum pondere, quo gravantur, ſecti nolunt, frangi. Temporaria aliqua indulgentia opus eſſe, ad avertendam malignitatem fortuna, quando aliter mitigari non poſſet. Neque ipſum Regem, ſi inermis hic fiet, alia medendi ratione uſurum. Quacumque tandem condicione perniciem publicam honeſte redimi. Per æqua, per iniqua cedendum eſſe neceſſitati, quæ ſtaret ante rationem, cui prudentia ſuccumberet, & conſilia omnia obſequerentur. Cum eadem Hornanus, & ſimilia cæteri confuſis vocibus jactarent; victa conſenſu Gubernatrix, multumque obteſtans; ite ergo, inquit, quandoquidem ſic videtur, nunciate Conjuratis, ſi poſuerint arma ſectarij, eos qui inermes, ſine confuſione, & ſcandalo, illo ubi nunc agitantur, ad conciones procederent, non me vi armata, aut via facti perſequendos curaturam; quoad Rex aliter ſtatuſerit ex Generalium Ordinum conſilio. Hac tamen lege, ne moleſti ſint Romanam religionem exercentibus, uſumque templorum Catholicis reſtituant.

Per-

Perplexa haut dubie oratio erat, nec dantis, nec negantis libertatem; non mansuram tamen, quia salvo principatu concedi non poterat. Facile Conjurati quid vellet, intellexerunt. Sed verba ejus in alium sensum detorquendo, sacrorum se licentiam adeptos imponere credulo populo. Confestim igitur Affligemium, Vilvordiam, & Tongerloam dimitunt, qui juberent inde movere Iconomachos, atque suas quemque domos sine noxa recedere. Post hæc Proceres illi, quos ante ad hoc officium destinatos dixi, in colloquium veniunt cum Conjuratis, tabulasque à Gubernatrice obtulere in hæc verba.

Cum supplices nobiles XIII. Cal. Septemb. ad Gubernatricem redire jussi fuerint, libello responsa daturam: commodum ex Hispania nuncius appulit cum codicillis, rata omnia facientibus quæ exegerat. Quippe Rex inquisitionem abrogari, atque edicta refingi non recusat. Generalium Ordinum conventum tantummodo distulit. Ad quem maturandum omnem ipsa operam datura sit. Supplicibus interea cavere non detrectat. quia nihil unquam antiquius habuit, quam scrupulum & diffidentiam eximere ingenijs eorum, qui tristioribus consilijs imbutum esse Regem existimant. Causam & occasionem malorum omnium. Ex eo quod hinc ille recessit, nullum pratermisit benevolentiae signum erga subditos. Ab ingenita clementia, animique bonitate non degeneravit. cum nihil ab animo ejus sit alienius quam iracundia. Itaque præteritarum re-

rum gratiam lubens fecit, & in hanc rem consignandum tabularum Gubernatrici plenum dedit arbitrium. Cum itaque hoc ipsum exequi ipsa in animo habeat: à supplicibus vicissim pomissorum fidem postulat; nempe ut solemni sanciant sacramento, non facturos se dolo malo, neque etiam machinatuos, quod Majestati Regiæ, quod statui publico, quod provincijs, aut subditis adversetur. Officium fastigijs debitum se culturos. Manumque commodatuos, ut tumultus sedentur; ut intra frænum cohibeatur insurgentis populi licentia; ut multitudo deinceps extra leges nõ exeret; ut cesset templorum monasteriorumque vastatio, & sacrilegia; ut tam abominandi sceleris auctores merita ultione plectantur; ne vis fiat ecclesiasticis, justitiæ ministris, aut nobilibus, aut subditis; arma confestim ponantur; ab insolitis regionibus conciones arceantur; atque hæ, sicubi jam sint, aut factæ fuerint, ut inermes, sine turbis, & scandalo frequententur; ut externos hostes & seditiones excludant; ut hi denique, quos hodierni sæculi novitas turbavit, patienter leges accipiant, quas ex consilio Generalium Ordinum decreturus est Rex. Actum Bruxellæ x. Cal. Septemb. signatum. Margareta.

Lectis condicionibus nihil eorum displicuit. Conjuratis, nisi quod catholicâ religionē profiteri juberentur. Nam hoc ipsum quoq; legibus adscriptum fuerat. Et pleriq; eorum novi dogmatis disciplinam imbiberant. Dato itaq; solemni sacramēto, Assonvillius diploma cautionis exigentibus, porrexit, in hunc modum.

Margareta, divinâ gratiâ, dux Parmæ, & Placentiæ,

tia, Gubernatrix Belgarum, hæc litteras inspecturus,
 S.D. Cum Nonis Aprilis præteritis, libellus nobis oblatu
 sit à non paucis nobilibus, Inquisitionem & edicta ab
 rogari, & secundum Generalium Ordinum conciliu m
 novas leges constitui postulantibus; digna res visa, quam
 transmitteremus ad Regem: sed ne supplices interim sini
 stris suspicionibus urgerentur, eundem libellum, & com
 pactum, & quæ deinde secuta, in peiorem partem accipi
 unde timeri poterant graviora præteritis: consultis Pro
 ceribus, transcripsimus Regi, ut cavere vellet supplicibus.
 quidquid ante huc diem factum esset, fraudi non fore.
 Sed cum in illo mora non fuerit; Nos de pace, & tran
 quillitate sollicitæ, nihil prius duximus, quam eosdem
 supplices obsequio reddere, cui ex natura, & sacramento
 obstricti sunt. Pro auctoritate, & mandato quod à Rege
 accepimus, pro dignitate, quæ gerimus, rogatis Procerum
 sententijs, cautionis tabellas, manu nostra signatas indul
 simus in hanc sententiam. Formula deinde quam
 paullo ante transcripsimus inserta erat. Seque
 bantur autem hæc verba. Sciri volumus, nos pro fa
 cultate à Rege accepta polliceri, libellum & compactum,
 & quidquid in hunc diem factum est, nemini eorum fraudi
 fore, secundum sacramentum nobis dictum, ad præscrip
 tam formulam. Mandamus itaque Gubernatoribus, equi
 ribus Velleris, Consiliariis Status, Præsidique ac Concilio
 Privata curiæ, cunctisque in officio constitutis, uti hanc
 eis cautionem inviolatam servant, nec quid in contra
 rium fieri curent, patianturque. Quippe ita Regi pla
 cet. Bruxellæ VIII. Calend. Septemb. MDCLXVI.

Post hæc conjurati quoque solemnibus
 bulis

bulis testabantur , pactis se .conventis staturos ; intercessurosque ne contra fieret. fœdus denique ratum fore , quamdiu fidem datam Rex servaverit. Sic ergo utcumque conciliati sunt animi. Multum irridentibus prudentioribus , quod sponſionem à principe ſubditi exigerent. Quasi vero defuturi ſint prætextus Regibus , injuriæ ſuæ parentare volentibus ? Bonos cives obedientia commendat. malos nulla cautio, nullum Sacramentum ſecuros facit. Regnandi lex jugum omne excutit , quod cum ſummi imperij nomine non convenit. Conventiones & pacta privatos obligant. Nullum tantum eſt ſacramentum, cui ſalus publica aſtringitur. Poſt hæc Conjurati in curiam veniunt. Nec inſeſto Gubernatricis vultu excepti ſunt. Promiſſorum fidem iterantes, neceſſitatem cautionis excuſabant. Illa quidē memoriā omnem præteritorum delere eos juſſit, cancellariſque tabulas fœderis. Sed hoc ultimum non impetravit. Proceres itaque dimiſit per provincias ad publicandā pacem , motuſque ſedandos, & ſubigendos eos qui averſarentur imperium. Denique ut terrorem ſeditioſis incuteret, extemplo edicit ; *ne conciones frequentarentur ab armatis. Ut viſ fieret templa vaſtantiſus. Qui occideret eos, jure facturum, præmiūque accepturum, tanquam publicæ tranquillitatis ultorē. Qui non prohibuiſſet, aut reſtituiſſet injuriæ, cum facere poſſet,*

eum se pro hoste habituram. privilegia adempturā civitatibus in facinora consentientibus.

Tunc sectarij paullo ante sævi, subito metu obtorpuêre. Nullâ ferè spe reliquâ in Conjuratis, quos pro defensione catholicæ religionis execrationibus videbant obstrictos. Quippe Conjurati, Inquisitionis edictorumque abolitione contenti, sacrorum licentiam communi consensu non exegerant. Multi ex his bona fide redibant ad officium. Singuli aut plures in contumacissimas quasque civitates delegabantur, qui continerent populum in pace, & promissorum fidem exolverent. E quibus Ioannes Casenbrootius Backerselij Dominus, Martinum vander Moten, & Ioannem Winghene, alterum Rotnaci, hunc Aldenardæ cuncta turbantes, animo se compescuit. Oeconomus is erat Egmondani, vir cæteroqui rectus, sed infelicitate temporum ad conjuratos abstractus, fidem postea Gubernatrici sincerè exhibuit, & Iconomachorū res primus afflixit. Paullo enim post quadraginta circiter sacrilegi Rotnacensium finibus egressi, ad solitas furias accingebantur. Egmondanus ad persequendos eos Backerselium dimisit cum turma equitū, agricolis aliquot armatis sequi iussis. Sed Iconomachi extra Flandriam processerant. Angiā Hannoniæ oppidum adorti, adulterato Gubernatricis diplomate ab ignaris intra mœnia recipiebantur. Tē-

plisque miserrimè afflicti ad par flagitium Gerardimontes transeunt. Obvium ibi Backerselium habuère. Non præviderant ejus adventum, nec si prævidissent, satis virium ad resistendum erat. Fit igitur cædes, non prælium. Duodecim ex Iconomachis primo impetu absumptis, reliqui terrore consternati in potestatem venère. Quorum alios Backerselius in patibulum sustulit, alios virgis cæsos, mutare solum exilio jussit. Tantumque metum ea clades provinciis intulit, ut ex illo die nemo amplius auderet in sacra peccare. Igitur optimus quisque resumebat animos. Conjuratorum autem præcipuis metus incessit, si turbata cuncta componerentur, ad ultimum se daturus supplicia. Ludovicus Nassovius misit ad Egmondanum sub Conjuratorum nomine, qui absterret eum ab ejusmodi cœptis, & si perseveraret Iconomachis injurius esse, Conjuratos ultionem expetituros. Cæterùm Egmondanus hactenus medius, dubiusque, & quasi temporibus insidiatus, huc atque illuc consilia flexerat. Tum demùm victus à fortuna publica, sectariorum conatibus auctoritatem objecit, nihilque tali denuntiatione absterritus, fluentem statum severitate restituit, quem paullò ante nimia indulgentia in præceps deduxerat. Adeo barbarum remedia fortiora sunt, quam initia. Sed ante omnia Gandavum præsidia induxit. Iconomachos passim com-

comprehendi, meritóque supplicio affici iussit. Videres tunc aliam urbem, alios hominum vultus peccasse timentium. Nemo tunc applaudebat Iconomachis. Nemo faustis clamoribus, *Vivant Genſij*, tollebat in cœlum. Mæstitia & pavor fontes obsederat, tacitè expectantes, quid de se quoque judicia statuerent. Nemo fecisse facinus, cuius ante promptissimus quisque videri voluerat. Ea est natura multitudinis, ut non ante vereatur fastigia, quàm timeri meruerint. Idem hic populus, non alios olim principes magis suspexit, quàm qui lascivientem bello, atrocissimè afflixerant. Sua igitur quies urbi rediit, quia timere mali cœperant. Calend. Septemb. magistratus templa aperiri præcepit. Sacerdotes qui in profana veste hætenus latuerant, pristino decori restituuntur, & sacrorum solemnia ex more repetunt. Consiliarii Flandriæ intermissa dudum munia resumunt. Egmondanus peregrinis edixit, cederent provincia. Sectariis denique has condiciones posuit: *Ne intra muros concionarentur. Contenti essent loco, quem præscriberet. Nemini quàm Calvinistis concionandi ius fore. Magistratui morem gererent. In templa furentibus se opposerent. Operamque commo- darent ad expetenda supplicia ab Iconomachis. Ducenti ex sectariorum præcipuis tabula subscriberent.* Deinde locum haut procul à Carthusianorum monasterio petentibus assignavit.

Ibi ædiculam postea construxere. primusque in ea Nicasius Scurius Minister, concionem habuit. post hunc Iacobus Carpentarius; & ad ultimum Magister Petrus Dathenus, qui à Poperingensibus illuc transierat. Rebus in eum modum Gandavi compositis, Egmondanus Aldenardam concessit. Ibi quoq; sectarios intra leges cohibuit. Inde in regione Flandriæ Occidentalis, alias ipse civitates ad tranquillitatem perduxit, alias præfectis curandas tradidit.

Ioannes Sceyffius Brabantiae Cancellarius, & Baro Petersemius ad Silvæducenses mittuntur. Hi multitudini magnopere suadebant, ut novæ religionis exercitium extra muros transferrent, legesque acciperent quas cæteræ civitates non dubitassent admittere. Sed quo mox ludibrio conflictati sint, dicemus post paullò.

Iisdem diebus sermonibus hominum agitaricæpit, militares copias à Rege in Germaniâ conscriptas, brevi iter in Belgium habituras. Ea res concussit Conjuratorum animos. Videbant se peccasse in majestatem. Neque Regem bona fide veniam prætorum dedisse, persuadere sibi poterant. Dissimulationem ejus suspectam habebant. Nullos tam sanctos principes, qui cum rebellibus bona fide in gratiam redeant. Plerique etiam credebant, nihil ejusmodi à Rege indultum esse: sed hæc ipsa à Gubernatrice ad tempus conficta, ut præ-

præsenti serviret necessitati, & insigni impostura ingruentium malorum discrimen redimeret. Neque ex alia parte Gubernatrix securior erat. De populi rumore anxia, multiplici cogitatione quatiebatur. Generalium Ordinum spem fecerat. quæ si non succederent, novas turbas, bellumque metuebat ab istis spiritibus, quorum conjuratio magis differebatur, quàm desierat. Interdum quoque timebat, ne desperatione veniæ in rabiem efferrati, ad opprimendam se venirent cum subito exercitu. Igitur his contemplationibus intentata, quod unum licebat, Ordinarias turmas instrui jubet, distribuendas in idonea præsidia. Fiduciam postea ei adjecit Bruxellensium civium pro religione votum, & animus. Qui non satis habebant pomœriis suis conciones excludere: sed contrariorum studiorum cives, Vilvordiam ad divina concedere solitos, tunc quoque præpediebant. Eam rem Ludovicus Nassovius graviter accepit. Neque mora, ad Gubernatricem admissus, expostulare cœpit, *an Bruxellenses plus, minusve liberi essent, quàm ceteri cives. Meminisset fidei data. Nullo se pietatis vinculo obstringi, si prior ipsa pactum frangeret.* Adhæc illa, *nihil se mutari velle*, respondit, & *si conciones ibi ante diem fœderis habita fuissent, quo minus & jam haberentur per se non stare.* Cum hoc responso dimissus crexit sectariorum animos. Sed primores civitatis à Gu-

bernatrice clam admoniti, opificum collegia in concilium accersunt. edictumque ex communi suffragio, *ne cui fas esset ad aliena sacra urbe excedere. Et si quis intra pomœria conciones tentaret, laqueo se ulturos.* Adhęc frequentes armatos in portis constituunt, & quidem diligentissimè observant. Marcentibus sectariis inopiâ virium.

Haut aliis artibus Lovanienses religionem tutabantur. Nec ea civitas adeo corrupta erat, ut optimo cuique non plus liceret, quàm multitudini.

Præsentia Hoochstratani Mechlinienses continuit. Leges, quæ in rem videbantur, sapienter constituit.

Antverpiam vero Auriacus processit. Cui primâ luce statim assistebant Ministri cum libello, & questu; *quod sub Iconomachorum invidia vapulantes, turbarum, & prostratarum imaginum auctores incusarentur.* Proculid à modestia sua. Nuper quidem per consuetudinem officij, semetipsos monuisse, ne quis profanæ encœniorû pompæ, aut procedentium sigillorum spectaculo oculos crederet. Sed hoc quidquid esset, si crimen esset, ad Iconomachiam tamen non pertinere. Nihil trîstius sibi impingi posse, quàm quòd differrentur amare licentiam seditionum, catholicæ religioni perniciem struere, in tributa, in portoria, in magistratum criminationibus invehî, de surrogandis ad eadem ministeria

nisteria genij sui hominibus habuisse colloquium. Hac si vera essent, exercerent leges. Non deprecari se de noxiis supplicia. Sin autem alia sibi mens semper fuisset, ne ad infamiam civitatis innocentiam suam traduci paterentur. De qua si dubitarent, provocare se ad Deum, hominesque conscientia sua conscios. Illicet mitterent, qui concionantium verba exciperent. Eidem se Regi, utpote principi, Auriaco tanquam vicecomiti, atq; ipsis patribus dare paratos. Neque interim æquum videri, cœmeteria, & templa unis duntaxat catholicis cedere, & hac officia ex plentibus eripi sibi publicarum rerum cōmercium. Cives omnes esse. Sub uno principe, intra eadē mania, iisdem legibus vivere. Quod ergo attineret quasi contaminatos, & piaculum meritos arceri à publico usu, quem lex cōmunem omnibus statuerit? Mulcebat eos verbis Auriacus libellumque in se recipiens, jussit propediem opperiri responsum. Interim tamen cœmeteriorum usum iis indulxit. Sequenti die magistratum accersit, & è singulis nationibus (ut ipsi vocant.) delectos aliquot. E Teutonicis quatuor adveniunt, Marcus Peres, Hermanus Meerius, Cornelius, & Carolus Bombergius. Totidem è Gallis erant, Franciscus Godinus, Ioannes Carlierius, Nicolaus Viverius, & Nicolaus Sellinus. Actum cum his de concordia civitatis. Legesque communi suffragio dixere sectariis, quarum sententia hæc fuit. Officia, conciones, & exercitia Romana reli-

gionis ne turbanto. In sanis, aut monasterijs alifve locis Deo dicatis, nova professionis exercitia ne habento. Contenti sunt tribus in urbe regionibus. Nempe pradio Antony Gevartij in foro equino, pradio D. Liekerky, prato Xenodochij. Hæc si comparari pecunia non possint, tunc alia æquè commoda acquirunt consensu Auriaci. Interim in regione nova urbis, quemadmodum hætenus, religionis officia instituunt. Intra hos limites una eademque hora concionari fas est diebus Dominicis, & festivis. Cateri dies nefasti sunt. Si tamen festus dies in septimana non inciderit, Mercurij die concionari licet. Duos, si videbitur, Ministros, nec plures, in singulis regionibus admittunt. Ministri Belga sunt, aut præcipua alicujus civitatis jure donati. Iuramentum præstent parituros se Auriaco, & senatui in re politica. Cum telo illicito conciones nemo adito. Teli illiciti nomine gladius, aut pugio non continetur. In civilibus magistratui, & superioribus parento. Onera, & portoria ex aquo ferunt. Salutem, & tranquillitatem publicam juxta custodiunt. Cujuscumque religionis sacerdotes, Ministri & professores à seditiosis sermonibus, injuriisque abstineto. Seditiosum tamen non habebitur, quidquid ad doctrinam pertinet, vel in corruptos mores prometur. In electionibus, & conventibus Ministrorum, Seniorum, & Diaconorum, unum aliquem è magistratu, admittunt, qui Auriaco, & collegio relaturus sit, quid actum fuerit. Cujuscumque religionis homi-
nes

nes à contumelijs vique & injurijs abstineto. Si contumelia aut vis, aut injuria facta fuerit, indiscriminatim ulciscuntor. Quò minus adversus Iconomachos, noxiósque jure agatur, pœnaque expectantur, ne faciunt. Nemini palam extra designatos limites psalmos concinere jus esto. Auriacus & magistratus, cives & incolae in tutelam accipiunt, sine religionis discrimine. Ministri, & sacerdotes cujuscunque religionis, has leges publicant, & ad custodiam earum auditores hortantur. Firma rataque sunt, quoad ex Generalium Ordinum suffragio aliter à Rege statuatur. ita tamen si quid comitjs illis decretum fuerit, quod salva religione, vel conscientia admitti non possit, liberum cuique sit patria cedere cum fortunis & familia. Ministri, Seniores, Diaconi, & novarum religionum præcipui, harum legum inviolatam custodiam in se recipiunt. præsentisque tabulas signant in duraturi fœderis constantiam. His in eum modum compositis, consignatisque, dimissus ab Auriaco est præco, qui publicaret libertatem religionis, civesque à mutua vi abstinere juberet, nec alterutrius iram laceßere contumeliis; præsentem mortem, bonorumque publicationem contumacibus indicens.

Auriacus inde in Hollandiam concessit, crebris Primorum litteris sollicitatus. Brederodius sibi in eadem provincia substitui petierat. Sed is Gubernatrici suspectus admodum erat, satis gnare quam gravis immineret

Q

reipu-

reipublicæ. Caput se Conjuratis præbuerat. Post hæc Viannæ, Hollandiæ oppido, quod jure clientelæ tenebat, aras omnes imagineſque exciderat, Culenburgii exemplo. Armatorúmque catervas circa ſe habebat. Ethinc ſuſpicionem multis fecerat occupandæ provinciæ. Nec vanitas homini deerat, ſæpe obliquos injiciens de principatu ſermones. Proſtabátque palam ejus imago, laminis inſculpta inter hos verſus :

*Sum Brederodus ego, Batava non infima gentis
Gloria, virtutem non unica pagina claudis.*

Libellus denique vulgatus erat ſub iſto titulo; HERES ET SVCCESOR COMITATVS HOLLANDIÆ, qui non obliquè ad Brederodium referebatur. Proinde in ſubvehendo eo non immeritò Gubernatrix quatiebatur imagine periculi. Hoochſtratanum ergo Antverpiæ ſubſtituit mitis animi virum. Factionibus Procerum aggregatus, in fidem tamen non commiferat. Confiliarius Aſſonvillius ei adjunctus, quærebat in præterita facinora, quorum ultio mitioribus fatis reſervabatur. Cæterum Auriaci interventus Hollandos compeſcuit. Leges verò Amſterdamenſibus conſtituit, prope eaſdem, quas Antverpienſibus dederat. niſi quod ſectarios contentos eſſe voluit Franciſcanorum monaſterio. Inde Ultrajectũ, & ad alias civitates progreſſus, pari omnes cõditione ſedavit. Poſt hæc litteras ad Gubernatricem

cem dedit. Ea quæ egisset breviter recensuit. Monebat illam denique; Gallos videret & conterminos populos, quibus nō essent averfati principes idempetentibus. Plus indulgentia & pace, quam severitate profici, in tantâ novarum religionum dulcedine. Si vesaniam latè ferocientem vi premere cogitaret, nihil aliud profecturam, quam ut vastatione, & incendijs provincias desolet. Nam ne Regem quidem totius imperij sui viribus succinctum, adversantium furores sine periculo, & labore, sumptuque excisurum. Hæc omnia vitari posse promiscuâ religionum libertate, vel Augustanæ professionis indulgentiâ, aut si intra suam cuiq; conscientiam sacrorum licentiam permetteret. Sinceram pacem condicionibus emi, non bello. Maximam populi partem favere novitatibus. Vincis sectarios posse, debellari non posse. Nec amicos fore crederet, si semel vicerit; acrius pro ultione, quam pro libertate certaturos. Tranquillitatem civium beneficium suum faceret sine sanguine. Non primos esse Belgas qui hoc ipsum necessitati dedissent. Prope totum Christianum orbem conspire in hæc consilia. Compositis rebus, melius religioni consulturum Regem; cum detumuerit ipsa novitas, cum sectarii patientur mitius se haberi. qui nunc jugulo suo metuentes, in fasciculum coeunt. Hæc quidem tanquam ea quæ egisset excusaturus, scribebat. cæterum haut perplexe petebat religionis libertatem, cui per tot ambages semper studuerat.

Longè

Longè alia mens Megemo fuit. Contra spem omnium, non invidiam, non odium pavens, gratiæ nihil concessit. Ministros omnes Geldriæ eiecit. Sectariorum præcipuos exilio multavit. Prorsus ut appareret, factorum culpam esse, quæ reliquis Proceribus animum ademerant. Quibus rebus Culenburgius & Brederodius permoti, scripserunt ad Neomagenses Conjuratorum nomine; ac ni exules reciperent, ultionem minabantur. Quorum iras Megemus generosè despexit, totamque Geldriam studio partium in fide continuit.

Arenbergium eadem in Frisia tentantem fortuna destituit. Plerisque urbibus pervicaciam induentibus, fraude præfectorum, quorum multi Conjuratis accesserant.

Majoris operis erat Tornacenses componere. Molbaisius arcis præfectus recenti Iconomachorum facinore irritatus, magno terrore civitatem percellebat. Et tanquam semper erupturus cum militari præsidio, trepidam plebem cōficiēbat vigilijs. Cæterum fœdere cum Gubernatrice icto, duo è conjuratis illò adveniunt. Populūque velut arbitri civilis discordiæ, invitabant ad pacem. Sed cū hoc unum potissimū urgerēt, ut promiscua libertas intrā mænia fieret, adversarium sibi magistratum habuere. Durabat enim apud Optimates reverentia obsequii, quam diuturna contumacia in plebe deleverat. Gubernatrix
eorum,

eorum, quæ agerentur certior facta, Horna-
 num proficisci eò jubet. Sciebat enim non
 ingratum sectarijs, tantisque incommodis ci-
 vitem auctoritate sua liberare posse. Urbem
 appropinquanti, multitudo obviam effusa,
Vivant Geusj certatim inclamavit. In pri-
 mis autem civibus imperavit, *adempta templa*
catholicis redderent. Extra mania quo placeret le-
co, sectarij concionarentur. Ministri Belgæ essent.
Nec plures duobus admitterent. Sed adversus
 has leges Ministri fremebant; *ades sacras in usû*
populi structas esse. Populum ibi intelligi, non ubi
patres, aut catholici; sed qua major pars consis-
ret. Reliquam se multitudinem numero superare.
Neque interim cadere condicionum; modo ad eri-
genda sibi templa tributum omnibus senatus in-
diceret. Id sæpe antea à majoribus factum. Publi-
ca adificia omnium ære lui debere. Contra magi-
stratus, templa in nullius esse dominio, dixerunt.
Patere cunctis, eo sacrario ad preces uti volenti-
bus. In alios vero usus transferri non posse sine in-
juria civium, priscam religionem colentium. Pa-
rum ad rem attinere, sectarij numero præstarent.
Forte haud pauciores pro catholicis, at meliores cer-
te consistere. Imaginem ibi populi, hic senatum esse;
ut sciamus illâ parte factiones, hac stare rempu-
blicam. Struerent itaq; templa suo impendio. Nihil
in hoc se adversari. Male enim cū catholicis agere-
tur, si tot injuriis damnisq; affecti, ad onus præterea
astingerentur pensitādæ pecunia, quā rectius tem-
 plorum

plorum suorum ornamentis, tam fæde spoliatis, impenderint. His utrimque auditis Hornanus ratas esse voluit leges. Sectarios protenus cedere templis iussit. Stipem quantam quisq; ultro conferret permittens accipere. Sed non ideo sectarij parebant. Concionibus acrius intenti, forum & templa muniebant excubijs. Dissimulante primum Hornano vetandi pudore, an metu; & mox quod palam abnuerat indulgente, fædâ inconstantia. Cujus turbidum, ac mutabile ingenium Conjurati obsederant, flectebantque. Molbaisius turbari leges ægre passus, iræ stimulos vix cohibebat. Ita ut interdum cogitaret in inconditum & confusum vulgus militem immittere. Deterrebat tamen eum facti atrocitas, ne eadē ruina bonos pariter malosque obrueret. Conjuratos interim extēplo cedere urbe iussit. Gubernatrici quoque scripsit quid placeret fieri. At illa de civitatis discrimine anxia, quæsito prætextu Hornanum accersivit in curiam, secretario Torrio in locum ejus missō. Major inde tumultus in populo exarsit. Sectarij cū supercilio Torrium audebant despicere. Nec lāguidius pro libertate cernebāt, quā ille pro legibus ab Hornano descriptis. Turbante cuncta Taffino isto, de quo ante habita mētio est. Nec finis certaminū apparebat: cum Molbaisius misit ad Ministros, qui juberet eos protenus leges admittere, vel tergiversationē se pro defectione accep-

accepturum. Tristi hac denuntiatione lenita est sectarijs utcumque ferocitas. Præfecto igitur referri jubent; si catholici abstinerent à violentis consilijs; si concionibus, psalmorum concentibus, sacramentis, matrimonijs, ægrorum visitationibus, sepulturis, conventibus, consistorijs, colloquiis, synodisque suis non vim non turbas dederint: si catechizandi, scholas aperiendi, scripturasque legendi promiscuam licentiam fecerint, & in hæc idonea cautio traderetur; in se moram non fore consentiendi in leges, quas aliâ condicione detrectarent accipere. Gravia hæc magistratibus visa. Itaque Ministros alium ab alio seorsim aggressi, orabant, paterentur se esse in potestate. Imminere gravem civitati Molbaesium, eruptionem militum utcumque sustinere possint, tamen non sine clade experturos. Surrexerant Ministrorum aures ad saniora consilia. Torrius infectis rebus Bruxellam rediit. Molbaesius autem quanquam justâ irâ accensus ultionem tamen distulit; intentius cavens ne quid moveretur à sectarijs, magna libertate jus in plebem exercentibus, quod malignitas temporum seditiosissimo cuique indulserat.

Non minori cōtumacia Valencenenses agitabātur. ad eos quoq; duo è Conjuratis diverterāt. Quos Noircarmius statim oppido eiecit, paci studens, civesque provocans ad condiciones, quarum summa hæc est. *Pactis fæde-*

ratorum stanto. *Templa catholicis restituuntor. Ministri Belgæ sunt. Intra mania ne concionanto. Semel in septimanâ extra muros civitatis fas esto.* Erat in urbe Minister quidam nomine Grangius, linguâ admodû procax, qui per turbulentiam ingenij cæterorum insaniam supergressus, mirabili consensu plebem devinxerat. Unus ille pacta, in sui maximè necesse conscripta, non probavit. Erat enim oriundus è Galliâ. Et hinc suspecti or esse cœperat, ne rem publicâ (quod facillimum factu erat) ad peregrinos traheret. Crebris itaque concionibus detonare cœpit in leges; quæ sitis que suspicionum causis in pejus omnia attollere. Traditò tunc more, quemadmodum in omni populari regimine, ut actionibus magistratuum, legibus, & reipublice, sacrificuli isti, sub pietatis specie, seditiosa aut venali lingua, passim illudant. Soli enim loquuntur ad populum, quem honesto nomine atrociter exagitant in suâ libidinē; prave æstimantes quidquid illis non allubescit. Inde non pauci ad Grangium respicere, actoque in suffragia populo haut aliter consētiebāt in leges, quā si duo sibi templa cum Ministris relinquerentur. Quibus auditis Noircarmius excāduit, & Valēcenensiū delegatos Cameracū ad se accersit. Venēre ex Optimatibus Antonius Pojurius Roselij dominus, Nicolaus Vivienus, Frāsciscus Oultremānus; è sectarijs Vincētius Restaldius, homo audax, perinde factiosus. Noircarmius

carnius paucis insimulatos, monere cœpit, ut leges quas Antverpienses, quas Gandavenſes receperant, & ipſi admitterent; locum ſe assignaturum extra mœnia, ubi ſuo ritu facere poſſent ſine cujuſpiam injuria, quoad Generalium Ordinum comitia ſuccederent. Eſſecturum denique, ut alterum in ſeptimana diem Gubernatrix concionaturis adijciat. Hæc oppidanis renuntiari jubebat, & ſi placerent, ocius ad ſe reverti. Res itaque deſertur ad multitudinem. Cæterum Grangius, acerbiffimis quæſtibus cuncta permiscuit. Quamlibet potius fortunam ſubiturum ſe proclamans, quam has leges pateretur imponi. Et ſi armis agendum eſſet, Galliarum ſocietatem oſtendebat. Dèlegati ergo re infecta ad Noircarmium perveniunt. Cumque de Miniſtrorum genio graviter quererentur, quod populi mentem avertiſſent in tumultus; *Videte*, inquit ille; *etiam atq; etiam cives, quid faciatis. Sciatis licet, aut recepturos vos leges meas, aut pro hoſtibus me habiturum.* Ingemuerunt Optimates ad hanc vocem. Vocatoque rursus populo in concilium, potentiffimum quemque ex plebe orare cœpere, miſerarentur civitatis cito perituræ unius amentia. Ne tantum concederent Miniſtro, ut in gratiam ejus patriæ excidium quærerent. Scire enim, ex uno illo capite pendere momenta præſentis concordix. Cum hæc pluribus & ſingulis diverſi inculcarent,

perpulere tandem multitudinem ad' condicio-
nes. Sectarios deinde pœnitentia cœpit.
Noircarmio enim locum templi designaturo,
nemo eorum adesse sustinuit. Qua contumelia irritatus, indignatione exarsit. Verbis-
que quæ suggerebat ira, insanientium vecor-
diam accusans, conterminarum urbium præ-
sidia contrahit. Subitis quoque delectibus ali-
quot militum effecit, qui divexarent oppida-
nos, agrosque ex omni parte popularentur.

*Rex in
Hispania
de reme-
dio con-
sultat.*

Dum hæc in Belgio geruntur, inter rim Rex
Philippus crebris litteris à Gubernatrice con-
ficiebatur. Occultis curis gravem, febris ex-
cepit. Neque ideo negotium, quo tunc maxi-
me angebatur, destituit. Itaque suorum præci-
puos in curiam vocans, tradidit eis Gubernā-
triciis codicillos, & quid auctores sibi forent
despicere iussit. Quidam ex illis altius exorsit;
Hæc tot mala, dicebant, non adeo Iconomachorum,
quam sectariorum; neque Conjuratorum magis, quam
Procerum culpa accidere. Quatuor esse genera homi-
num libertati studentium. Inter eos primos Iconoma-
chos, sectariorum satellites, ad nefanda illa scelera præ-
tio conductos. Quippe sectarios occulta malignitate ab
his secretos, in secundis consistere. Inde succedere Conju-
ratos, quorum fiducia sectarij iniêre consilia in publi-
cam pacem. Qui vero hi sint, aut unde processerint, fa-
cile sciet, quisquis privatis necessitudinibus Proceribus
annexos intelliget. Etenim quarto gradu Proceres cen-
sendos esse, qui Conjuratis statim adfuere, privatis pub-
licisque

liciſque affectibus. Prorſus, ne quis ambigeret, totam hanc procellam ex illis nubibus erupisse. Proinde recte aestimantibus, habendos esse caput, & causam malorum omnium. Ne id quidem Iconomachos dissimulasse. palam jactantes, hanc se licentiam, hac facinora usurpasse illis consentientibus. Nam & publicatos esse codicillos sub nomine Procerum, Generalium Ordinum comitia Conjuratis addicentium. Ad hac accedere, quod cum pridie Augusti referarentur litteræ Regis, quibus ille comitia in adventum suum differri præceperat: postridie Idus sacrilegia, & incendia passim, & undique erupisse. Imo ipso die quo mane Antverpiam Auriacus destituerat, vespere in monasteria, & templa impetum factum. Nec inter tot nefanda facinora repertum esse, qui ferrum stringeret. Sed e contra quoties Rex scripsisset de rebus ad religionem pertinentibus, si quid in his libertati conducere, id ipsum Procereſ statim amplexos esse; cætera vero ad incolumitatem sacrorum spectantia solerti ratione fastidiſſe, tanquam minus apta temporibus, & intuta reipublicæ. Sic ergo à malo in pejus cotidie tranſeundo, postremo libertatem, quam tantopere optaverant, fœderibus, & pactis indulſiſſe populo. Sed non ignari, voluntati Regis licentiam illam adversari, corroborare velle Generalium Ordinũ comitijs. Hac esse vulnera reipublicæ, in qua querendũ sibi eſſet remediũ. Tum vero itum eſt in ſuffragia. Tiffenacquijs, & Hoperus, properandũ Regi in Belgium cenſebãt. Necdum adeo ſeditiones invaluiſſe. Sed ſi moram hic otioſus traxerit, conſeſſuras in partes civitates, cõeſſuras provincias. apud quas prævaſceret Procerum amor, ſi

duces se monstraverint. Seditiosa consilia perniciosos exitus sequi ; ni in tempore adhibeatur remedium. Cum adversus hæc alij instantem hyemem, & iniquitatem maris causarentur ; Nos tamen inquit Tissenacquijs, fieri non posse credimus, ut civilis illa tempestas aliter decumescat, quam si adventu suo Rex occupaverit. Hanc alia ratione Carolus Cæsar seditiones sedavit. Ejus placita nobis vice legis servanda sunt. Ille ad unius civitatis Gandavensis motum etiam hereditarijs hostibus in caput suum potestatem fecit. Per Gallias, quas toties concusserat, festinare non timuit. Tumultus ejus eventus docuit, alios esse populi animos absente Principe , alios præsentem. Gandavenses hæcenus feroces, ne portas quidem civitatis venienti clausere. Nulloque momento subacti sunt, qui forte patientia & dissimulatione Cæsaris, in nexum egre solvendum coituri fuerant. Sed illum aliena stultitia, aut sua fortuna magis, quam prudentia protexit. In hæc ego pericula Regem non accerso, ut per Galliam iter instituat. Profecturo patet Italia, ne cogatur externis dubiisque gentibus, aut instantiæ Oceani credere salutem suam. Majora profecto nos sollicitant, quam ut unius civitatis curemus insaniam. Iam Gandavum, Antverpia, Tornacum, breviter jam totæ gentes & provincia intumultus feruntur. Quid igitur adhuc moramur ? An donec etiam sana & integra omnia contagio corripiat ? atque in confusionem provincia veniant ? Nam Gubernatrix quoque proximis suis litteris Regi denuntiat, hanc ultra, quam in

Calend.

*Calend. Octob. rempublicam in tranquillitate retine-
ri posse. Videtis quantum absumus ab exitio, nisi ac-
cidimus in tempore malum, cunctatione Regis prope
adultum. Obstandum est principijs, ne morbus diuturni-
tate valentior, omnem postea medicinam reformidet.
Tissenacquijs omnibus videbatur optime
dixisse. Sed dum profectio tempus præsti-
tuerent, quid interim respondendum esset
Gubernatrici, consultant. Nam hoc ipsum
tunc potissimū Rex quærere videbatur. Om-
nibus visum, permulcendam Gubernatricem
epistolis, nullam Conjuratorū Sectariorumve
mentionē præferentibus. Nam quæ peccassēt,
probari non posse: sed nec palā damnari, nisi
in maiora detrimenta infunderetur reipubli-
cæ: Comitia Generalium Ordinū jam sæpe an-
tea satis improbasse. Vni tamen Gubernatrici
aperiendū esse, quid de his re vera Rex sentiat.*

*Postquam hæc relata sunt ad Regem, (nam
absente eo concilium fuerat) duas statim ex-
aravit epistolas ad Gubernatricem, alteras pu-
blicas, & lectione promiscuas; alteras secre-
tiores, quas nisi uni illi liceret percurrere.
Publicarum litterarum summa hæc erat;
Enixam esse Reginā. Eo partu prid. Id. Aug. provenisse
sibi filiam, appellarique Isabellam, Claram, Eugeniam.
Iter se in Belgium adornare. Et è Silva Sigovia, quam-
vis ægrum, & reliquias morbi trahentem, Madritum
concedere, ut maturius ibi de tota itineris ratione con-
stituatur. De Generalium Ordinum comitijs, & ante se-*

pe, & nunc rursus serio habuisse consilium. Nec in mentem inducere posse, quid absente se allatura sint ad reprimendam insaniam istorum hominum. Illud unum affirmare, magnum inde propendere periculum, ne in libertatem & confusionem religio erumpat. Conscientia sua grave fore, nec minus indecorum majestati, sensum rectum, & confirmatum deponere ex subditorum libidine. Nihil concedendum esse vecordia. Semperque homines, quantamcunque libertatē adepti sint, aspirare tamē ad maiore. Nullā ut cessuri, si semel aditum fecerint. Conterminorum Regum exemplo, ab ejusmodi consilio deterreri. Saniora videri remedia, si ferro emitteretur, & vi armata vim reprimeret. Quantū ad sanitatē animorum id conducat, illarum provinciarum exemplo admoneri, quæ hac potissimum arte nequitiam supplantant. Pecuniam & arma in expedito esse. Nec de Magnatum fide dubitare, quorum multos sciret fidos sibi, & religioni addictos conjunctis viribus vindicatuos publicam pacem, suasque ulturos injurias. Secretioribus autem litteris Gubernatricem monebat, ne quo pacto auctoritatem adijceret comitijs Ordinum. Et si forte invitā eā indicerentur, tanquam minus legitima excuteret, quæ sine consensu principum contrahi non possent.

Iisdem diebus litteræ ab Imperatore allatæ sunt Regi. Magnopere autem suadebat; ne vindictam præcipitaret. Vi agendo, civile bellum incipi. Religionem Catholicam multis in Germania principibus exosam esse, cum quibus necessitudines, affinitatesque Proceribus Belgarum intercederent. Valida inde
auxilia

auxilia exciri posse à desperatis, nihil segnius dimicaturis pro salute, quam ipse pro religione, atque imperio. Crudele bellum cum civibus sumi. Victo sibi periculosum, victori funestum. Nec semper pro meliori causa stare fortunam. Quocumque tandem inclinaret victoria, ingenti calamitate deformaturam provincias. Benvignus facilisque civibus esset, maloque caveret mitioribus consilijs. Suam in hac operam se promittere.

Hæc in eum modum scribebantur; cum in Belgio magis apertum bellum non erat, quam tranquillitas. Velut exercitatum ventis mare, non confestim & subito; sed per gradus mitescit. Et quamvis remittatur ira tempestatis, ardere tamen non desinunt spumarum attritus, & securitatem navigantium interrompere. Vt adhuc nemo aliquis publicis auspicijs arma corripere; ita multi turbare civitatum pacem. Auctâ per impunitatem licentiâ, genioque sectæ in discordias natæ, denique multorum animis ad seditionem propendentibus. Honscotanus quidam Minister, in conspectu vrbis Alostenis concionari ausus, & ab oppidanis comprehensus, ad aliorum terrorem à Backerselio in patibulum mittitur. Quippe per leges fœderis concionari ibi fas non erat. Quia in illum diem licentiam factorum nemo usurpaverat. Ex alia parte magistratus Axellanus in Flandria, paucos Iconomachos in atroci cogitatione occupatos corripuit. Quos raptis propere telis multitudo

R 4 exemit.

exemit. Sed Backerselius junctis sibi centum equitibus, tumultuantes ante oppressit, quam venisse senserant. Legibusque actum in fontes. Siquidem Backerselius, non in speciem, ut Conjuratorum multi; sed quomodo optimus quisque tranquillitati studuit. Axelensem motum Furnensis excepit. Nam & ibi aliquot Jconomachi, manifesti sceleris comperti, servabantur ad supplicia. Nescio quis procurator, dum subvenire eis studet, audacissimum facinus aggressus est. Mille circiter sortis suæ homines ad auxilium inflammavit. Hac multitudine fretus, urbem vi invadere constituit, Catholicosque omnes cum sacerdotibus interficere, ut ex captivis postea rescitum est. Instructos ordines intempesta nocte oppido admovit. Iamque in mœnia evadere cœperant: cum plebs urbana frementium tumultu excitata, & tela corripiens, armata corpora obiecit scandentibus. Nullo militari ordine ruentes facile proturbavit. Nam plures undique cives statim affluerant, densisque agminibus complebant mœnia. Territi igitur Sectarii, dedere receptui signum. Quo evaserint, qui essent, aut unde venissent sciri non potuit. adeo postridie ex tanta multitudine nemo apparuit; præter unum, alterumve captivum, accepto vulnere retardatum sequi. Viginti ex sectarijs cecidêre. Iisdem diebus Delfenses in
Hol-

Hollandia muliebri veste occultati, Franciscanos trucidavêre. Cartusiani ab Amsterdamsibus eodem furto petiti sunt. Per idem tempus, quidam Barlaimontius, genere spurcius, Antverpiæ rursus Iconomachos conduxit ad sacrilegium. Quinquaginta omnino erant. & jam in templum B. Virginis nefarias manus immittere cæperant: cùm à prætereuntibus occlusæ sunt fores. Retentisque intus captivis mox Hoochstratanus supervenit cum satellitibus. Primo impetu quatuor confecit. Reliqui ad genua ejus provoluti, inditisque vinculis, postridie omnes una cum egregio illo redemptore mittuntur in crucem. Hinc sectarios quisque criminari cæpit; tanquam quietis impatientes, parta jam libertate ad novorum scelerum occasionem abuterentur. Manifestius flagitium erat sub certo auctore, quàm ut purgari posset. Nec Ministros utique latebat, potissimum se vapulare sub unius invidia. Componunt itaque codicillos ad Hoochstratanum; quorum forma talis erat. *Egregia tua virtus conscientia nostra fiduciam tribuit. Defensionem non paramus hesterni facinoris. Neminem hic excusaturi venimus. Pacis interversores non merentur patrocinium. Rogamus tantum, ne malevolorum iudiciis plus æquo tribuas, vel patrati sceleris infamiam in innoxios inclines. Unius peccatum, imò unius potius amentia fuit. Quasi vero ad stabiliendam re-*

ligionem nostram opus fuerit ad nefarias artes confu-
gere. Fides est donum Dei ; quam nulla vis unquam
persuaserit hominibus. Proinde si consulere velis saluti
publica , promiscuam libertatem indulge civibus , uni
Principi, uni magistratui obnoxiiis , onera denique ci-
vitatibus ex aequo tolerantibus. Quam multis hodie
Principibus ad tranquillitatem profuerit vanum est
describere. Neq₃ ad rem attinet, quid alii fecerint. Ne-
cessarium hoc remedium ducimus , quando solida pax
aliter haberi non potest. Quamobrem si nobis hoc be-
neficium prastiteris, ter centena aureorum millia pen-
demus arario , mercedem tantæ benevolentia. Va-
nam hanc arrogantiam , viriumque sua-
rum jactationem , non sine risu Hoochstra-
tanus percurrit, transmisitque legendam Gu-
bernatrici.

Ea tum forte pietati intentior , procurabat
publica vota pro partu Reginae , quæ in æde
D. Gudulæ solemnī pompâ persolvebat. Sta-
bant ad fores armati in præsidium. Simul ab
aditu geminum ordinem satellites in lon-
gum porrexerant , ne quis armatus ingrede-
retur viam definientes intrantibus. Magna
quoque lætitiæ signa populus ostendit, festi-
vis ignibus noctem illustrans. Quasi ex tunc
publicis gaudiis fortunam Belgarum destinā-
tibus Eugeniæ. & verè Eugeniæ, hoc est ; in
ipsis barbarum initiis natæ, ut aliquando esset,
quæ pietate , vitæque exemplo, labentem re-
stitueret religionem , vulneraque refove-
ret

ret reipublicæ , tot millium sanguine inunda-
data.

Inter quæ Valencenenses in aulam delectos miserant , questuros de injuria militum. Domi tamen ut hostes bellum instruebant. Palantes per agros milites alios capiunt , plures obtruncant. Imminentes urbi domos evertunt, tormenta mænibus admovent, aggresque erigunt, & quidquid validissimis uribus repertum est tolerando obsidio. Adhæc Carthusianorum monasterium in proximis destruunt, odio, ira, simul & metu, ne eodem præsidio Noircarmiani receptarentur. Quorum rerum fama Gubernatrix commota, prope edicit , ne quis militem scriberet privatis auspiciis. Veredarios extra unum præfectum, per stathmos & mansiones nemo disponderet. Peregrini Ministri Belgio excederent. Adhæc codicillis Noircarmium edocuit, quaquaratione Valencenis inferret præsidium militare. Ille moram non fecit imperio. Delectis magistratum ad se vocatis , decretum Domina aperuit; alterutrum accipiendum esse dicens, aut præsidium, aut bellum. Intra paucos milites præsidium fore. Quatuor equitum, sex peditem cohortes statuisse inducere. Eam rem nemini fraudi futuram. Filium suum obsidem offerre. Renuntiarent hæc civibus , & cras ad se redirent. Suadere interim , ut voluntate sua facerent, quod mox coacti facturi essent.

Hæc

Hæc vox audita est non sine omnium gemitu. Quomodo enim tantam rem persuaderent superbo & obstinato populo, cuius necessaria erat auctoritas? Namque ex magistratu, & Optimatibus & plebe civitas ea constat. Sed tota vis in plebe erat. Hac dissentiente, cæteri Ordines nihil poterant. Periculosa sub regno reipublicæ forma, nec immerito suspecta fastigiis. Plebs non ratione, sed impetu fertur, ea tantum probans quæ libidini suæ conducere senserit, sine respectu utilitatis publicæ. Melius cum eo statu agi experimenta docent, ubi tota plebs sub uno suffragio, cæterorum Ordinum calculo superatur. Sed frustra desideramus bonas leges in ægra atque rebeli civitate, nimiaque licentia in furorem accensa; ubi cuncta agebantur ex sordidissimorum hominum libidine, quos non tenebat reverentia principum, non magistratuum: sed unis Ministris instar Regum dominantibus obnoxii parebant. Igitur Magistratus & optimates inter se deliberatione habita, recipienda esse præsidia censebant. Deinde Ministros ad se accersitos hortari capere, ne impedimento essent, quominus idem plebs statueret. Si quid ipsi sibi metuerent, sine fraude urbe cedere posse. Eam in rem fidem se interposituros. Grangius natura turbidus, regnoque populari superbior, ad hæc respondit. *Supervacuam*
sui

sui sollicitudinem deponerent. Esse numinibus cura salutem suam. Fidem colentibus Deum adesse. Nec in animo sibi esse studia civium destituere. Proinde obmutescere malle, quàm tam perniciosi consilii auctor plebi fieri. Sub hanc vocem curia egressus, multo acrius quàm dixerat, tumultuosa oratione populum concitavit. Quibus auditis Noircarmius iræ non temperavit. Adferri protinus catenas, & delegatos ad se missos in vincula duci jussit. Quos post decimum demum diem libertati restituit. Majores deinde copias ex Hannonia, & Cameraco accersit. Abbatiae S. Amandi, Condato cæterisque in proximo civitatibus præsidia imposuit; ostentaturus bellum, priusquam inferret, ut pœnitentię spatium daret turbatis. Quia crebris populationibus vexati, obsidionisque metu perculsi tutiora consilia inituri credebantur.

Interea Gubernatrix adventum Regis fabulantium rumoribus exposuit. Quippe emanari in populum, & ab omnibus sciri tranquillitatis intererat. Inde bonis fiducia crescere: malis vero nutare conscientia cœpit. Differente simul fama, decrevisse Regem iræ suæ parentare paucorum capitibus. Et ille quidem, re verà, ingentem dolorem conceperat animo. Hoc ipsum quoque Montignæus perscripserat. Qui cum Bergensi Hispania excedere prohibitus, tanquam captivus retinebatur. Nemo tunc ferè ex magnatibus gratiam

tiam ejus epistolis non præoccupavit. Mansveldius, Arenbergius, Megemus, Barlaimontius, Noircarmius, Rassegemius, Vicecomes Gandavenfis, Vniversitas denique Lovanienfis, reddebant Regi rationem officii, quod pro republica, & religione impenderant. Egmondanus præterea ad Tiffenacquium litteras dedit. Sive Regem verè sibi iratum credens, si-
ve augurio augente suspicionem animi, haut perplexe querebatur ; *Sinistris rumoribus se urgeri, tanquam peccasset in officium. Si quid à se peractum Rex vellet, voluntatem suam exprimeret. Estimaturum fidem suam ex successu. Credere se tamen, prudentius facturum, si damnato armorum consilio, cum subditis de tranquillitate transigat. Solidam pacem parari posse conditione, non bello.* Eadem prope modum Auriacus scribebat.

Benignè magnatum litteras excepit Rex. Sed non sine dolore codicillos percurrit, quibus mandauerat Gubernatrix, cuncta in pejus procedere. Nulla tamen sermone, aut vultu tristitię signa prodidit. Affectus enim in potestate semper habuit. Et profectò in illo Rege magnæ eminuere virtutes. Multorum tamen censuram impegit, quod gravis animus, & ad consilia tardus, nimia lentitudine prætervolantem quamque occasionem, tanquam mansuram, prætermitteret. Sed hæc naturæ vitia erant, non morum. gentibusque illis unà cum ipso cælo passim hauriuntur : scilicet atrabile

bile (qua potissimum urgentur) rapidos animorum motus retinente; cui Galenus medicus constantiam attribuit. Itaque in Belgium proficisci certus, amicos secedere jubet, delibetatu-
 ros de ratione itineris. In eo concilio iidem illi fuere quos ante nominavimus; Dux Albanus, Comes Feriæ, Magnus Prior Ordinis S. Ioannis, Archieconomus Reginae, Comes de Melito, Archipocomus Principis. Hi omnino ex Concilio Status. Tiffenacqui-
 us, Hoperus, & Cortevillius è Concilio Belgico. Viri omnes consilio, & auctoritate præstantes, atque ea tempestate Optimatum præcipui. Confidentibus iis lectæ sunt Cæsaris littere, simul quas è Belgio Gubernatrix, magnatesque transmiserant. Tum de toto negotio disceptando; plerique non probari sibi dicebant, Regem cum subditis condicione transigere. De religione, & obedientia hic agi; id est, de præcipuis nervis reipublicæ. Iustitiâ & constantiâ imperium retineri; iniustitia & pusillanimitate dissolvi. Proceres cum multitudine peccasse in Regem. Vulneris hoc curandum esse alterutrius sanguine. Clementiam in utrosque perniciosam iuxta, ac in utrosque severitatem. Satius fore, cum multitudine mitius agere. Ferocissimos ex plebe Rex occideret. Eos qui tumultuantibus accessissent, provinciis ejiceret. Cateros impune haberet, ut sint quibus mitem & pacatum animum præstare possit; ne ultionem quasisse videatur, non remedium. Crudele fore tot millia togatorum conficere.

Intutum ablegare in exilium, civile bellum daturus. Aliquot Proceribus cervices præcideret. Illos turbines afflixisse rempublicam. illos passos esse lascivire plebem. Illos facem subjecisse tumultuantibus. Horum exemplo admonendos esse reliquos, quid Rex possit. Ne impune discant illudere principi, & in publicam pacem consilia inire. Assuescantque vereri hos motus, tam magnis expiatis capitibus. Claritudinem exempli supplicium nobilitare. Nullum inde paci periculum. quando poena ad paucos, indignatio ad infirmos pertingeret. Vulgus enim nullâ sevitiâ irritatum, timidum & secors, crediturum Proceres meruisse hoc ipsum quod paterentur. Cum e contra, pari ultione utrumque Ordinem provocando, nobilitas populum inventura sit quem ducat in Regem; populus vero duces, quos in bellum sequatur. Si tamen Cæsar pro noxiis enixe oraverit, hætenus precibus ejus deferendum esse, ut poenitentia flexi, accepisse veniam se, non meruisse intelligant. Quamquam satis constaret illas Cæsaris epistolas, non ab ingenio ejus profectas; sed calliditate studioque Procerum extortas esse. Saxoniam ducem proxima affinitate Auriacum attingere. Vxor ejus avunculum esse. Nec in animo Cæsaris quemquam Saxone validiorem. Nullam notio rem esse, quàm istorum Procerum, per fas, per nefas ad libertatem religionis tendentium. Quod etiam spectarent ipsorum litteræ ad Regem missæ, postulatis Cæsaris ferè congruentes. Iam quosdam eorum, indignatione Regis percussos, intempestivo fungi officio, & si quid ab illo mandaretur, executuros se denuntiare. Sed quidquid scriberent,

haut

*haut aliò collineare, quam ut ad indulgentiam flectant iratum Principem, summamque imperii retineant in manibus, ab usuri deinde in religionis perniciem. Cum hæc, & plura in eam rem disse-
 ruissent: tandem ad ea quæ deliberare jussi
 erant consilium dirigunt. Duo omnino hæc
 erant: quo comitatu, & quo tempore conce-
 dendum esset Regi in provincias. Albanus,
 & Feria, nec aliàs sat concordēs, tunc & æmuli,
 in duas sententias concilium distrahebant.
 Bello alter, sed alter pace longe præstantissi-
 mus. Si armatus proficisceretur Rex, omnis
 vis & gloria penes Albanum; si inermis penes
 Feriam erat. Proinde id consilium uterque in
 altero damnabat, quo potentia, vel imperium
 in æmulum recideret. Primus Feria, modicum
 agmen traducendum, censebat; non socijs per quos
 transeundum esset, non provinciis grave: speciem
 magis fortunæ principalis, quam exercitus. Non
 adeo desperatas in Belgio res esse, ut tantis viribus
 sit opus. Incipientem adhuc, & nondum adultam
 seditionem compesci posse in ipsis cunabulis. Percul-
 sis tumultuantibus præsentia Majestatis, reditu-
 ram in animos formidinem, rediturum obsequium.
 Quod rebellantibus Gandavensibus olim accide-
 rat. In quos Carolus Cæsar nullum hinc traduxit
 exercitum. Remedium omne in celeritate posuisse.
 Regem vero eadem vestigia ingredi volentem, tot
 armatorum apparatus haut dubie retardaturos.
 Multis Proceribus fidem constare. Atque ubi
 S ille vim*

ille vim fortunamque principatus ostentaverit, neminem contra hiscere ausurum. Sin armis provocaretur, esse conscriptas in Germaniâ, esse veteranas in Belgio legiones. Adhac ingentem stipatorum numerum, quos ad custodiam sui hinc educturus est. Majoresque copias evocari posse rebus exigentibus. Nihil adversus hac tentaturum inconditum vulgus, implendis campis duntaxat idoneum. Sin autem nemo obsisteret, quid attineret tantos sumptus, quibus alendo exercitui esset opus, inutiliter profundere? Non ad hostes ire sed ad cives. non ad imponendum jugum, sed ad emendandam disciplinam proficisci; cui rei tot millia non conducere; at bonæ artes, quæ satis superque Regi suppeterent. Extrema remedia nisi desperatis rebus tentanda non esse. Neminem non videre, ad tot adventantium millium famam armaturos se rebelles, qui tantum exercitum instrui intelligent in suam perniciem. Ita bellum oriturum, ubi non sit bellum. Pacemque futuram bello tristiores, tot legionibus provincias onerantibus, bonosque pariter ac malos eadem calamitate involventibus. Equum non esse paucorum amentiam omnes luere. Suo quemque insanire periculo. Bonos principes non punire, qui nihil deliquerint; armatos non facere, quod inermes præstare possunt. Castigationem paucis necessariam, feralem omnibus fieri non debere. Vulgus enim quamprimum novitatem suam pervicacissimorum ultione damnatam aspexerit, rediturum ad na-

ad naturam; cuius furor perinde cum fortuna mutatur, ac religio-cum principe. Adea Albanus accerrimus armorum instigator disseruit. Quod si in compositam regionem, & securâ pace fruenter concederet Rex, nescio an suasurus adhuc fuerim, ne ullum omnino armatum traduceret. Sine cuius fulgore, non externi, non ciues majestatem agnoscunt; pace & bello tutissimum presidium. Nunc vero prævalida & adulta vitia, nunc animi seditionibus elati, levioribus remedijs coercendi non sunt, quam magnitudo morbi postulat. Repetamus memoria, quoties à rebellibus illis jactatum sit, centena millia obiecturos se vim audentibus. Ego tot millia furentibus non opponam: sed egregium justumque exercitum, ex veteranis, expertisque conflatum, qui sciat servare ordines, obsequi duci, hostem ferire, non expavescere. Ut hoc terrore perculsi rebelles, confestim arma excutiant. Cum vires suas, non disciplinâ, non virtute, ac ne copijs quidem pares, aestimare incipient. Cum se tyrones intelligent, nec ullis magis quam hospitibus metuendos milites in aciem producere. Primis statim auspicijs debellandi sunt, ut opprimi malum cum dignitate possit. Hoc ad gloriam Regis maxime pertinet; insita mortalibus natura, famam belli ex initijs metiri. Nam si in unam, atque alteram astatem bellum Rex extraxerit, quis non videt accessuram hosti disciplinam, & robur; & tunc non sine difficultate, nec absque periculo

subjici posse? At enim nullum adhuc in Belgio ardet bellum. Quis tamen pacem esse dixerit? Quis nobis pollicebitur in eodem statures mansuras, quas ipsa quoque Gubernatrix perscribit cottidiè in pectus vergere. Quid si externorum auxilia à seditiosis sollicitentur, quod toties minati sunt se facturos? Tunc scilicet in tempore accersemus militem, cum instructi exercitus nostris imminebunt capitibus. Tunc nempe salutem suam crediturus est Rex veteranis in Belgio legionibus, pari scelere contaminatis. Quibus ex mea quidem sententia, quamprimum appulerit in provincias, cingulum adimendum est. Transeunda sunt denique externa nationes, religionis odio imbutæ, & à sectarijs Belgicis forsitan exstimulatæ in exitium Regis, quem sibi imminere extimescent. Illa copiae quacumque perrexerit, securum eum efficient. In omnem sanè casum, seu restauranda pietati, seu exequendis statutis & suppliciis, seu supplantandis, vel antevertendis furoribus commodissima. Scilicet egregia cura timemus vastitatem terrarum, & incommoda exercitus. Nemo mihi communem calamitatem objiciat, in communi omnium flagitio. Quam mali suo merito passuri sunt; Boni verò quia malorum conatibus arma non opposuere. Imputare sibi debent si quid detrimenti ab armatis acceperint. An idcorebelles sibi relinquendi sunt, in cervices Regis sui sublatis, quia bonorum conditio futura sit acerbior? Nemo unquam discordias armatus sedavit sine plurimum incommodo. Hæc est condi-

cioexercitus. Bella aliter non constant. Quantâvis gravissima calamitate redimendum est exitium reipublicæ. Intelligent Belgæ nunquam impune contemni fastigia. Hæc oratio, simul & dicentis auctoritas, inveteratâque prudentiæ fama, magnam Procerum partem permovit. Quidam etiam addebant, metuendum esse, ne idem eveniret Regi, quod Gubernatrici acciderat, quæ exequi leges non potuerit armatorum inopiâ. Nam quòd Albanum, aulae artibus æmulos suos pervertisse Connestagius tradidit, apertum est mendacium, & in odium ejus adumbratum. Cujus moribus multa in deterius posteritas adfinxit. Nullam ego hac de re mentionem apud Tissenacquiū invenio, è cujus commentario hæc transumptimus. Nam nec Iacobus Spinosa Inquisitor Generalis, nec Bernardus Fresne da Regiâ Confessionibus Concilio intervenere. Tantum abest, ut alter eorum infestis orationibus cum altero certaverit, quod idem auctor memoriæ prodidit. Quæsitum inde quo tempore Rex proficisceretur. Alii velocitatem urgebant per Oceanum cum paucis navigiis. Sed hoc consilium minùs Hispanis, quàm Belgis placebat, Oceanum hodie intutum, dicentibus, Belgicorum sectariorum metu, portus omnes insidentium, quos occlusuri essent armatis in exitium sui appulsuris. Securissimum per Italiam pergere. Sed Italiam perpetuo prærupta-

rum alpium iugo clausam, non nisi duobus aditibus exercitum transmittere. Quorum uno per Tridentinas angustias Germania intranda sit. At Germaniam ex maxima parte corruptam, ac suspicionibus obnoxiam, securitati Regis non conducere. Eundem ergo esse per Sabaudiam. Illam verò asperorum montium scabredine impeditam, hybernisque nivibus obsessam, ante veris initium iter non promittere. Proinde utcumque festinare Rex velit, Februarium mensem habendum esse. Neque etiam citius impedimenta ad tantum iter necessaria expediri posse. In Calend. Decemb. convocatos esse Castillæ Ordines. A quibus abesse Regem non oporteat. Præterea agendos militum delectus, petendas triremes ex Italia. Dum componuntur, reficiunturque sublapse vetustate naves, aliquot mensium spacium esse. Vernum denique cælum clementiores fluctus promissurum navigantibus.

Hæc igitur in eum modum decreta, X. Cal. Octob. referuntur ad Regem. Qui natura reconditus, & multa cum animo reputans, tunc quidem nihil respondit. Paullò post Albanum exercitui præfecit. Erat hic nobilissimo Hispaniæ loco genitus, virtute militari nobilior. Acer consilio, manu strenuus, experimentisque clarus, & suorum temporum nulli secundus. Quod de illo quoque inimici confessi sunt. Multa sub Cæsare, & Philippo filio prosperè gesserat, magnis præpositus exercitibus. Fortunam nunquam temerè in discrimen vocavit.

vocavit. Cauta cum ratione consilia, secundis eventu præferebat, disciplinæ militaris diligentissimus custos. Bello, quàm pace melior. Vincere magis, quàm victoriam regere. Fredericum deinde Albani filium magistrum equitum Rex dedit. Hispanorum præsidia ex regno Neapolitano, Siciliae, & Sardiniae Genuam accersit. Quatuordecim cohortes in Hispania legi jubet, in veteranorum locum ituras. Alias prætereas tres cohortes, quas secum abduceret. Alberico Lodronio assignata est Germanorum legio, quam in comitatu Tirolensi instrueret. Lupo Satapacentum velites Italicos, totidem Sancio Davila Ticini præfecto; Petro autem Montagnes Novarię gubernatori cætum cataphractos Hispanos attribuit. Trecentos hastatos, cum centum cataphractis in Burgundia componi curat. His Baronem de Vergii provinciæ Vicegubernatorem, Baronem de Cherau, dominum de Cleraux, & dominum de Momertin præposuit. Italicis ducibus præceptum, veteranorum velitum, longâ pace imminutorum, supplementum conscribere. Ioanni Andreae principi Doriæ, quantas posset triremes comparare iussit, atque ocius compellere in Bercelonix littora. Epistolâ deinde ad Gubernatricem dedit in hanc sūmam.

Primo vere me exspecta cum exercitu. Non ut solitudinem provinciis, aut jugum inferam, quod plerosque criminari intelligo: sed ut patrocinium meo-

rum armatus suscipiam. Inermis enim venire non possum, nisi ut externorum injuriis dignitatem aperi- am. Si tranquillitatem alere, non bellum volumus, terrore aliquo rebelles percellendi sunt, infirmitatem suam conferentes meis viribus. Hæc mihi ratio fuit instruendi exercitus. Re ipsa docebo, non ad ultionem me consurgere: sed ut clementiam cum subditis communicem, haut aliter quam principem, & parentem decet. Gratiam eam facturus, quam publica pax, atque securitas patientur. Hæc te confestum volo mittere in populum, bona & mala magis ex rumoribus, quam ex vero æstimare solitum. Cujus aures seditiosissimorum voces falso terrore præoccupant. Gubernatricem præterea monebat, ut quanta posset cautione, nobilitatem interim cum multitudine contineret in officio. Et si videretur, legionem unam in Germania mercede conduceret, quam Megemo, & Arenbergio traderet, spargendam in idonea præsidia. Pecuniam quoque adjecit in stipendium. Dein fluctuare animo cœpit, an & Auriaco militem crederet. Siquidem popularibus acceptum, & vicinorum principum affinitate, atque amicitia subnixum, turbandis rebus idoneum noverat. Adhæc multa imprudenti excidisse, quibus obliqua ejus in Regem consilia deprehenderentur, & averſi animi indicia. Sciebat denique peccasse in majestatem. Suspectum tamen videri nolebat. Sed cum Megemo, & Aren-

Arenbergio copias militares committeret, Auriacum præterire non poterat, nisi ut videretur de ingenio illius diffidere. Nam Hollandiam, Zeelandiamque juxta armis contineri, ac Geldriam, Frisiâque pacis intererat. Habitò itaque amicorum consilio Gubernatrici mandavit, nihil consultius, quàm quinque cohortes Auriaco submittere, quibus chiliarchus Walderfingerus præesset, refractarius & contumax futurus ad illius imperia. His consiliis Walderfingerum secretò imbueret. Dicta factâque Auriaci specularetur, & ab omni metu suspicionem ejus averteret. Iisdem artibus Egmondanum placaret. Præfectos Ordinariorum militum rogaret, an sine exceptione ad arbitrium ejus militare, & eosdem hostes habere vellent, quos ipsa jussisset. Si quis eorum conditionem detrectaret, ademptam huic præfecturam, alteri conferret, ne stipendia pervenirent ad indignos publicum ærarium lassantia. Adhæc magnatibus illis à quibus litteras acceperat, adventum suum nunciavit, missis ad singulos codicillis. Auriacum denique & Egmondanum benevolè hortatus est ad officium. Tissenacuius simul Egmondano rescripsit: *Malignitatem famæ rebus ipsis rectius confutaturum. Compararet se ad voluntatem Regis, nec imperio ejus dubitaret accedere. A quo planius mandatum expectare non deberet. Alia esse principum, alia*

clientum officia. Illos providere & regere. Clientum gloriam in obsequio consistere. Habere sibi reges suam rationem. In quam subditis nefas esset inquire. Si in consilio publico aliquando contraria dixisset, integrum fuisse Regi à sententia ejus recedere; quo se prudentiorem nemo habere debeat. Apud illum electio est & imperium; ceteris consilium & obedientiam convenire. Misceri hæc officia non posse, nisi ut pereunte imperio, obsequium intercidat, atque ima summis confundantur. Ne famam quidem dissimulare, sectariorum audaciam potuisse præverti, si vel ipse, vel Auriacus explevissent officium. Sed & nunc in illorum esse potestate, furentium licentiam aut omnino frangere, aut saltem in adventum Regis comprimere.

In his consiliis occupato Regi, transitumque Alpium paranti, aliæ atque aliæ itineris difficultates cottidie suggeriebantur. Movebat plerosque angustiarum asperitas, præruptis altissimisque rupibus abscessa. In quarum vertices evadendum esset cum exercitu, per arduos præcipitesque vallium anfractus, qui paucos admodum caperent armatos, & cumulatam hyeme nivem transitoris promitterent. Deleri posse totum exercitum, si quis fatigatis atque incompositis, & nihil hostile metuentibus vim inferret. Nec deesse circum nationes Regi infestas, & sectariorum causæ astrictas. Alii sterilitatem, & inopiam regionis, alii frigus, & multorum dierum lassitudinem causabantur.

tur. Quibus difficultatibus Rex permotus, sibi atque exercitui transitum à Gallis petere constituit. Expeditum esse iter appulsuro in Provinciam, haut procul Tolonia, qua Caroli Cæsaris exercitus quondam trajecerat; quod per regionem Lugdunensem brevi compendio in Burgundiam deducit. Igitur Franciscus D'Alava Ordinarius in Gallia legatus, Philippo mandante hac de re cum Gallo egit. Responsum est ei: si quid Philippus Rex vellet, licere illi cum modico præsidio Galliam trajicere. Iter autem exercitui patere non posse. Frequentes in ea regione sectarios esse. Magnitudine exercitus perterritos, & molestiis hospitii affectos, multitudinem concitatuos ad arma. Quæ sine magno incommodo ipse postea non excuteret.

Hæc in speciem. Cæterum Reges inter se æmuli, nec unquam satis amici, alterutrius exercitum intra fines securè non recipiunt. Desperato per Gallias itinere, Philippus Rex ad Sabaudiam rursus intendit, Ioanne de Aragna Vela ad Emanuele ducem misso. Haut ægrè ab illo impetratum quod petebatur. ea tamen lege, ut centum equites, bis mille pedites Philippi Regis ære meritori scriberentur, in regionis suæ custodiam, ne quid incommodi ab exercitu incolæ acciperent. Antonius Mèdoca à Carolo Lotharingiæ duce trāsitum sine exceptione obtinuit. Franciscus d'Yverra annonæ præfe-

præfectus ad dispensanda itinera præmissus, dispositas stationes commeatu instruxit. Rhodanum Dainfiumque navali ponte jungere instituit, quo in Burgundiam transportari posset exercitus.

Interea Belgæ longe aliis cogitationibus inquietabantur, atrocitate fame pulsati. Ferebatur enim cædes imminere à principe Proceribus infesto. In Auriacum, Egmondanum & Hornanum gladio animadversurum, cæteris iudices daturum, & supplicia. Auriaco pleraque nota, & suspecta omnia erant. Itaque ut hac de re certior fieret, disponit in Gallia custodes, qui veredarios ex Hispaniâ remeantes, ereptis litterarum fasciculis occiderent. Consiliū ejus fortuna sic gubernavit, ut Francisci D' Alava legati Regi epistolas interciperet, ad Gubernatricem datas in hæc verba. *Ex his quæ scripsisti opinionem meam confirmari cognosco. Ego enim tumultuum omnium invidiam in Proceres transfero, ut cumque nunc tam egregie dissimulent. Horum machinis inquieti populi genius in audaciam sublatus est. Quos proinde accusare non desino. Sed ex commendatione tuâ primum invenient. Primi omnium futuri, in quos feretur ira Regis, ut supplicia expetat. Memento interim cum his dissimules. Præbe te facilem credulis, & de benevolentia Regis securos efficias, ut fidei tuæ concedere non dubitent. Sic enim quæ destinasti, efficies. Ita à me habe; si tibi supplicia eorum sint in animo,*

eo ma-

comagis Regi curæ fore, quo hancille injuriam profundius imbibit. Epistolâ perlectâ, Auriacus novitatem facti stupens, Ludovico fratri atque Hoochstratano communicat. Vnicum adversus impendens fatum remedium videbatur, matura defectio. Cui rei conducebat Egmondanum in societatem attrahere. Eundem strenuum militiâ, Flandriæque viribus instructum, partibus suis commodissimum noverrant. Auriacus ergo Egmondano significat, esse sibi ad communem salutem pertinentia, quæ nisi præsentî promere non posset. Diem & locum colloquio condiceret. Bruxellam solum excipere. Vbi Ludovico fratri esse non liceret, à Gubernatrice jussu in Germaniam secedere. Igitur vi Non. Octob. Teneramundæ Flandriæ oppido, in unum convenere Auriacus, Egmondanus, Hornanus, Hoochstratanus, & conjuratorum præcipui. Quibus Auriacus, quid in Hispania pararetur, aperuit. Strui sibi certissimam perniciem. devotis omnium cervicibus, qui arma in sectarios vibrare distulerint. Itaque ut verbis fidem adderet, primum litteras Montignæi perlegit audientibus, Regis iram memorantes. Deinde epistolam D' Alavæ recitavit, non sine affectu, & atrociori interpretatione ad singulas periodos. Eam postea singulis relegendam exhibuit, Sic esse scriptam, dicens, ut liquido appareret distineri se à Gubernatrice verbo-

rum

rum blanditiis, quò simulatione benevolentia delin-
niti, securè opprimi possint. Constituisse se quidem
prudenti absentia furori cedere, donec statuisset,
quid potissimum rebus suis conducere. Sed profectò
si se audirent, à necessitate consilium sumerent. Ni-
hilitutius, quàm unam aliquam provinciam vali-
lidissimis occupare praesidiis, atque ex adverso con-
silia frueri. Non defutura auxilia vexillum ex-
plicantibus. Neminem principum hodie tam ami-
cum Regi, qui magnitudinem illius non optaret pre-
mi, potentiamque Europæ formidabilem, civili bel-
lo collidi. Sectariorum igitur insolentia subministra-
rent alimenta. Quos deinde in eadem secum cau-
sa, spe gratia destitutos, & extrema audentes, exer-
citui Regis ad desperationem objiciant, dum finiti-
marum gentium subsidia ornentur. Affluxuros st a-
tim Gallos, atque Germanos, nihil veteranis Re-
gis virtute concedentes. Ludovicus Nassovius
subjecit; spondere se Germanorum equitum
quatuor millia, peditum verò quadraginta co-
hortes, quos corrasis undique pecuniis in Bel-
gium properè adduceret. Sollicitaturum de-
nique copias Augusti Saxoniae ducis, Cæsareo
auspicio Gotham obsidentès. Ne cæteri quo-
que dubitabant, indormiendum non esse in ma-
nifestâ pernicie; neque expectandum donec vali-
dissimas urbes praesidiis invaserit Rex, & sopitis si-
bi manus injiciat. Decora consilia, quæ tuta. Po-
tentiam quidem Regis formidolosam, acriorem ta-
men necessitatem esse, & incertos belli exitus.

Neque

Neque semper ad potentiores inclinare victoriam. Gallos non usque adeò infelicitè delibasse Regis sui vires. Opimiorè conditionem extorsisse armis, quàm obsequio. Dandum Regi pœnitentiæ tempus. Impetum ejus quantò vehementiorem, tantò & infirmiorem esse, quem inopia pecuniæ statim consumeret. Denique multos nobiles sibi accessuros, cùm indignius forte habiti, erubescerent certare adversus libertatè publicam, pro invidioso Hispanorum imperio. Urbes, provincias sibi ut rectoribus obstrictas. Incumbere se affectui civium servitutem abominantium. Ad ultimum sic cadere necesse esset, honestius acie perituros, quàm sub certo lictoris ictu velatis capitibus, ad posterorum infamiam. Invidiosum Regi, decorum ipsis pro spiritu certare, quod nihil mortalibus charius est, quem etiam feræ antequam debellatæ non exuerent. Hæc quidem promiscuè dicebantur. Vnus tamen Egmondanus segni animo accepit. Vir haut dubiè, spectatæ fidei; sed ingeniij facilitate in partes abstractus, si dicere licet, nimiam bonitatè hætenus peccaverat. Ordinis sui factiosis consilijs, quia speciem præferebant publicæ libertatis pertiniacius adhæserat, pudore adversandi; ne multitudinis gratiam benevolentiamque amitteret. Tunc palam constantiam patefecit: ita formatum se à majoribus, dictitans, ut nihil pulchrius atque honestius duceret, quàm pro Principe vitam exponere, nihil econtra turpius aut
scele-

ſceleſtius, quam fidem exuere. Contumaces autem eſſe, aut ſectariorum licentia alimentum ſubminiſtrare non poſſe, ſine nota perfidia. Quanto plus ſpei rebellando oſtenderent, tanto illuſtriorem fidem ſuam fore. Quin potius irati Regis gratiam praeuenirent premendis tumultibus. Pleroque nobiles idem tentare. A quibus obſequio vinci non deberent. Vt deinde Rex aſtimet, qui glorioſius officia coluerint. Ut cum queres caſura eſſet, meliorem fortunam tranquillando, quam rebellando habituros, quando vincere, aut vinci non poſſent ſine exitio rei publicae. Cateri quae vellent ratione, incolumitati conſulerent ſua. Propoſitum ſibi eſſe exſpectare potius, quam movere fortunam, & in benignitate principis ſpem ponere, benevolentiam eius toties experto. Neque de ingenio Gubernatricis dubitare. Nullis ſe urgeri conſcientiae ſtimulis. Quo denique fugam intenderet, à chariſſima conſuge, à tot liberis diuulſus? Totam ſuam fortunam pendere ab uno Rege: quem perſtinacibus armis irritando, implacabilem ſibi ſuiſque relinqueret. Erraturum ſe exulem, atque extorrem, recipientibus oneri, externiſque Principibus viſiſſimum mancipium. An tam immitis animi Regem fore, ut pro tot meritis hanc ſibi gratiam rependeret, & in chariſſimi antea capitis duraret exitium? Quocumque tandem eſſet animo, clementiam eius meruiſſe victoriis. Vanitati D'Alava tantum non deferre, ut apud ſe fidem inueniret. An ſolus ille explorafſet mentem

Regis,

*Regis, & in secretiora illius penetrasset consilia ? Nul-
lius alterius indicium proferri. Ex Montignao qui-
dem iratum esse Regem satis se intelligere. Neque im-
merito. Nemo tamen ideo dixerit Proceribus infestū,
quos tanta humanitate admonuisset officii. Si quid cer-
tè statuisset atrocius, id ipsum uni Gubernatrici editu-
rum fuisse sine intertuntio. Hæc quidem Egmon-
danus. Cæteri tamen non dubitabant, quin
certissima proferrentur indicia. Auriacus quo-
que, *Suspectam sibi altissimam Regis dissimulatio-
nem*, ajebat. *Neminem Principum tam placabili esse
ingenio, ut bona fide in gratiam redeat cum subditis,
quos semel timuerit. Facerent alii quod placeret. Ne-
mini se potestatem in caput suum facturum. Nunquam
magis blandiri fastigia, quam cum seivire decreverint.
Securius se absentem quàm in vinculis causam dictu-
rum.* Hunc finem habuisse conventum illum
invenio, Egmondano fatalem. De quo pleri-
que postea ab Albano torti, atrociora confessi
sunt. Atque anceps quidem est conjectura.
Quia hoc se mendacio liberaſſe cruciatu, mo-
rientes testabantur. Nos aliorum judiciis ve-
ritatem relinquimus. De cætero propè omnes
scriptores mecum consentiunt. Auriacus &
Hoochstratanus Antverpiam reveſti sunt.
Neuter Bruxellam venire sustinuit, quamvis
crebris litteris evocarentur in Concilium. Eg-
mondanus intrepidè ad Gubernatricem de-
latus, quæ de illius consiliis traducerentur, ex
epistola cognoscere jussit. Simul enim contu-*

lerat exemplar. Illa veluti turbata, nullas conscientiae notas vultu prodidit. Dolentisque speciem ostentans, falsum esse rumorem sanctissimè confirmavit. *Quasi verò, inquit, mihi, aut D' Alava crediturus fuerit Rex tam periculosum secretum? Quomodo tamen D' Alava epistola intercepta est, cum non veredarium, non fasciculum ipsa desiderem? An qui D' Alava epistolas interceptas, Regias non caperet, quae ab eodem tabellario deferebantur? Laxa animum molesta sollicitudine. nec inanes species anxiam mente figura. Confer te ad componendam rempublicam, ut si quam forte sinistram suspicionem conceperit Rex, ex animo deleat sine cicatrice.*

Egmondanum verbis mitigatum, percunctari coepit de his qui Teneramundae convenissent, & quid actum in isto consilio. Ille nihil aliud referebat, quàm non perfunctoriè queri Auriacum de malevolentia Regis, & quòd Ludovicum fratrem ablegare iussus esset in Germaniam.

Dimissus à colloquio, in Flandriam se recepit. Quadraginta aureorum millia ab Ecclesiasticis impetravit, in stipendium mille & quingentorum militum. Quos per idonea praesidia disposuit. Extra Gandavenses, Iprenses, & Aldenardenses concionandi potestatem nemini fecit. Hulstenses concionari auctos militari manu coërcuit. Totamq; provinciam quietiorem expertus, Iconomachorum facinus rigidissimè viudicavit. Sectarios vero
sub

sub legibus continuit. Gandavenſes concionaturis Miniſtris ſuggeſtum ſtruere auſos, accenſis in foro rogis ad dedecus, & infamiam exurere juſſit. Parva quidem res. Sed in minimis quoque exemplum eminet. Neque in his quiſquam vindicem manum remittere poteſt, niſi ut ad majora ſcelera audaciam inſtruat. Quidquid ad diſſolutionem ſtatus pertinet plectendum eſt. in cæteris clementiam excuſo. Apud omnes conſtat, ſi ab initio tam ſevere egiſſet, nunquam perventum fuiſſe ad tantum nequitia. Sed cuncta primùm per diſſimulationem corruptit: mox ignavia ac præpoſtero obſequio. dum invidiam Conjuratorum procerumque evitare ſtudet, majeſtatis crimen meruit. At perperam uni illi imputaverim culpam, quæ temporum fuit.

Inter quæ non omittebat Noircarmius crebris litteris condiciones offerre Valencenſibus, ſi poſitâ pervicaciâ præſidium reciperent. Ad ultimum nobilem quendam è Conjuratis ad eoſdem delegavit. Sed cum obſtinatæ civium mentes ſanioribus conſiliis aures obſtruerent, Gubernatrix hoſtes eſſe pronuntiat. D'Alavam deinde temeritatis increpuit, quod tantam rem credidiſſet veredariis. Si quid ejuſmodi denunciare vellet, debuiſſe fidum aliquem tabellarium ad ſe deſtinare. Ad hæc Philippum comitē Everſteinium, & Bernardum Schoonbergium in Germaniam

niam proficisci curat, traducendis in Belgium duabus legionibus, quas in comitatu Feretrio conscripserat. Provinciales quoque copias ampliori delectu adornatura, Carolum Mansveldium, Ægidium Barlaimontiū Hierges dominum, Joannemque Croyum Reussii comitem, tria peditum millia legere jussit. Megemum verò, & Arenbergium supplementum conscribere. Ergo undique tubæ & tympana cogeant milites, ad obsidionem Valencensem ituros.

Quibus apparatibus Gallus regio more ad suspicionem versus, & ipse delectum agere instituit. Sex millia Helvetiorum mercede conduxit. Statariâ pugnâ gens egregia, per multorum regum seriẽ venales vires Gallis exposuit; ex quo à Carolo Burgundiæ duce ad fortitudinem coacta, virtutis suæ experimentum dedit. Majori metu Genevenses distinebantur. Ex hac fere officina hæresiarchæ omnes eruperant, aut in illam recipiebantur. Et hinc urbis suæ exitium, publicæ paci devotum conjecerant. Cujus possessioni Sabaudus haut obscure imminebat. Itaque delectu habito, milites distribuunt, qui intra mænia, qui in finibus consisterent. Partem quoque Helvetiorum atque Rhætorum, ad auxilium ex fœdere obstrictam, excivere sedibus. Ea cum nunciarentur Philippo Regi vehementer expalluit. Timebat enim ne tot simul gen-

tes arma sibi opponerent, angustiisque Alpi-
um inclusum ex improvise adorirentur. Et
jam primores eum incitare cœperant, ne te-
meritati fortunæ Majestatem exponeret. Præ-
mitteret Albanum terrestri itinere cum exer-
citu; primo statim adventu validissimis præ-
sidiis infessurum ostia maris Zeelandicasque
insulas, unde ipse Oceano succedens in por-
tus tutò recipi posset. Re deliberata, Albanum
cum copiis præire jussit, tanquam mox succes-
surus ipse. Quod initium fuit malorum om-
nium. Neque tamen damnari consilium po-
terat, si Rex præstitisset sequi. Sed tædio bel-
li, & averfantibus ministris in Hispania reten-
tus, omnia per duces facilia credidit, quæ
nisi præsens componere non poterat. Sunt
qui Gomezii de Silva artes suspectent. Erat
ille in aula graciosus, Regique charissimus in
paucis: sed per æmulationem Albano adver-
sus. Ut potentiam omnem ad se traheret, re-
movisse æmulum credebatur, publicæ utili-
tatis speciem odio prætexens. Nam Albanus
impudicitiam uxoris ei objectaverat, tan-
quam matrimonio illius Philippus illuderet.
Nobis ea res parum comperta est. Quidquid
sit, non ante patuit imprudentia consilii,
quàm pervicaci Rex absentia cunctos frustra-
tus est. Cæterùm in regionem Luxenburgen-
sem, quâ Albano intrandum erat, Ernestum
Mansveldium procedere jussit. Militem,

quantum opus esset, legeret. Præfecturam Germanorum equitum, quam Gallico bello habuerat, eidem attribuit. Bruxellæ, dum ille abesset, Arschothanum, aut Boslutium præfesse voluit. Megemum verò tormentis præfecit, quam Glaionius dignitatem, per mortem vacuum fecerat. Magistri artiliaræ apud Belgas vocantur. Cujus munus idem esse, quod apud Romanos olim præfecti fabrorum plerique existimant. Absente Megemo, Arenbergium Geldriam regere iussit. Barlaimontium verò præposuit annonæ militari. Idem munus bello Gallico cum summa laude administraverat. Adhæc ducenta aureorum millia transmisit ex Hispania, è quibus centum & quinquaginta in stipendium cederent, cætera in apparatum belli impenderentur.

At Valencenenses hostes judicati, fortiter obsidionem ferre decreverant, munimentis civitatis confisi. Igitur nihil segnius parare bellum. Affatim commeatum in urbem invehere, arma cunctis, qui ferre possent distribuere, recensitos opifices (quorū magna copia erat) in cohortes distribuere, ferocissimum quemq; his imponere. Optimates rempublicam destituerant. Cæterorum tamen amentiam sequebantur, quia adversari non poterant. Michael Helinus, & quidam magister Cornelius regnum obtinebant in multitudine. Helinus auctoritate & opibus eminebat: Cornelius vani-

vanitate & ferocia. Obscurissimo loco genitus, ex fabro ferrario in Ministerium surrexerat. Agrestes novis rebus addictos conscribere jussus, in finibus Insulensium delectum fecit. Eam rem præsidarii civitatis ægrè passi, cottidianum cum his prælium, & ferè prosperum habuere. Tot incommodis Cornelius attritus, promovit ad ignobilem pagum Kesenetum nomine, omnibus qui sacramentum ejus acceperant sequi jussis. Quadringentos ex his Rassegemius obviam habuit, solutis euntes ordinibus. Impressione facta compulsi sunt in fugam, proximumque Waterlooï templum occupant. Hinc sine damno ejici non poterant. Rassegemius igne tectis injecto universos concremavit.

Cornelium inde persequi cœpit. Cæterùm ille comperto Rassegemii adventu, castrisque diffusus, ad Tornacenses flexit. Nam & hi non minore cura, quodam Joanne Sorao duce militem scribebant in suis finibus; nullo quidem publico consilio: sed studiis partium, Valencenenses premi non ferentium. Huc majorem hominum vim insania compulerat. Copiisque junctis, proxima quæque monasteria, & prætoria vastant. Nihil crudelitati, autavaritiæ reliquum faciunt. Raptis omnibus quæ ferri poterant, flammam deinde tectis injiciebant. Sed Noircarmius, & Rassegemius à tergo strenuè sequebantur. Mille du-

centos pedites Noircarmius habebat , cum trecentis equitibus. Raslegemius equites centum , pedites non amplius quàm trecentos. Præter eos tamen magnam agricolarum manum contraxerat. Prior Noircarmius haut procul Lanojo hosti occurrit. Equitibus à tergo circumfusus , pedites à fronte incubuere. Vtrique vis improvisa fuit. Primo statim impetu centurio ex Noircarmianis cecidit, in fronte copiarum collocatus. Mil-le , & quingenti hostium cæsi , reliqui in fugam versi. Quorum magna pars proximam occupavit silvam densis arborum truncis impeditam. Major pars in Raslegemium incidit , infesta signa inferentem fugientibus. Prælium tamen acriter sectarii exceperunt. Eò enim perventum erat, unde sine perniciè nisi victores evadere non possent. Itaque aut cadere aut vincere obstinati , loco non cedebant ; donec ad Raslegemios inclinavit victoria. Soraus non tam ducis , quam militis fungebatur officio. Sed cùm unum illum omnes peterent , multis quidem acceptis vulneribus , & in equum impositus , cum paucis Tornacum evasit. Ibi vero non minus trepidatum est. Philippus Lalaignius Beauvossii dominus quadringentos milites , jussu Gubernatricis in arcem traduxerat. Centum in his equites erant. Noircarmius quoque cum sua manu eòdem venit. Urbique pavidæ, & servi-

servitio paratæ signa intulit. Nemine contra procedere auso. Quippe ex superiore prælio profugi, formidine cuncta compleverant. Neque tot simul copijs sine certissima pernicie resistere poterant. Civibus statim arma adempta sunt. De principibus seditionum sumptum supplicium, Cæteris venia data, prudenti moderamine, ut in civili victoria, cujus sæpe fructum nimia severitas corrumpit. Comes Reusius civitatem gubernare jussus, legionem quam conscripserat, dispersit in hospitia futuram præsidio.

Noircarmius Hiergicam & Mansveldicam legiones opperiens, ijsque junctis, Valencensium mænibus admovit exercitum. Ex omni parte obsidenti affluebant auxilia. Ab Arschootano ducenti quinquaginta equites, totidem à Reusio veniebant. Maximilianus Bossutij comes ducentos adduxit. Terlonius centum, nec minorem numerum Bommius impleverat. Marchionis Bergensis turma ducentos admodū, Montignæi centum & quinquaginta explere dicebantur. Ordinariæ turmæ omnes erant, quas Gubernatrix haut multo ante armari præceperat. Pedites veterani ex Hannonia noningenti veniebant. Paullo minus Balduinum Gavrium Inchij dominum ex Arthesia sequebantur. Reusius trecentos ex suis transmisit. Post quos viginti & unum tormenta trahebantur. Jacobus Cresslonerij,

dominus Gravelingæ Gubernator ijs præerat. Vrbs vallo circumdata est, & idoneis locis tormenta disposita. Noircarmius tamen asperam fore obsidionem ratus, priusquam fortunam experiretur, misit rursus ad oppidanos, qui suaderent, dederent urbem, dato terrore consternatam existimans. Sed non exaudiebant Ministri saniora consilia, nutantibus civibus spondentes, mox venturum oppressis auxiliū. Nam plerosque Conjuratorum acceperant bellum instruere,

Siquidem Auriacus turbandis rebus intentus, & ut tectius falleret simulato obsequio malignitatem regens, cum Regem haut segnem videret, ex adverso consilia struebat. Tholousij dominum, & Brederodium clam hortabatur ad legendos milites. In eam rem consistoria stipendium capitatim conferebant. Hollandiam Zeelandiamque adoriri statuerant. Et si destinata provenissent, duces se dicerent sectariorum causæ, & armato Regi undarum obices pro vallo objicerent, cum non mediocri præsidio. Supervenire debebat Ludovicus Nassovius cum Germanorum manu, ab obsidione civitatum aversurus Hispanorum exercitus, aut si vis fieret, fortunam tentaturus. Tres è Conjuratis in Zeelandiam destinabantur, qui factionis suæ homines sollicitarent ad defectionem. Quippe pleraque urbes descituras crediderant, fraude magistra-

gistratum, quorum multos Auriacus subvexerat. Ahæc Gallica auxilia occultis nuncijs pellexerant. Quibus mandatum, ut Dolam atque Vefontionem in Burgundia tentarent infidijs, atque Albano adventanti iter occluderent. Missus Antverpiam à Montmorantio Galliæ Mareschalo quidam nobilis, multa cū Hornano secreto transegit. In quam rem Carolus Slufanus mercator Antverpiensis, quinquaginta aureorum millia Montmorantio addixit.

Inter quæ studia, Proceres à Gubernatrice advocabantur ad novandum sacramentum. Hoochstratanus multa cunctatione; Auriacus, Hornanus, & Brederodius aperte detrectabant. Et Auriacum quidem Gubernatrix humanitate litterarum sæpius interpellavit. Ad Brederodium vero, Quarebbius Lovaniensium prætor, & Secretarius Torrius missi sunt cum mandatis, & questu: ut sacramentum quod Egmondanus, Arschotanus, Mansveldius, Mege-mus, Barlaimontius, dedissent, non dubitaret accipere. Unum ipsum esse, in quem potissimum sceleris sui invidiam inclinarent Sectarij. Debere hanc à se amoliri infamiam. Tantundem populum credere, quantum re ipsa ostenderet. Inquisitionem & edicta sublata esse. Solidam tranquillitatem Gubernatricem sperasse. Quæ per sectarios haberi non posset. Ab ipso officij in Regem prodendum esse exemplum: ne oblatione libelli, seditianis causam quassisse, videretur. Gravioribus quam antea tumult-

tumultibus agitari rempublicam. Viannam ab eo militibus insideri. Vallo manibusque claudi. Seditiosos aliquot libellos auspiciis ejus excusos. Ne Regem sibi irasci cogeret, populares hos furores audientem non satis aequo animo. Ad ea Brederodius respondit. Nihil evenisse cur de fide sua dubitare Gubernatrix debeat. Imo vero Bruxellam iturum, ut propius acciperet diffidentiae causas. Rata enim pacta esse, quae cum Gubernatrice suscepit. Quod malignis rumoribus oneretur, id sibi fraudi esse non debere. Linguas hominum franare non posse. Neque nunc primum calumnijs peti. Quarum sibi non sit reddenda ratio. Male autem condicionem sacramenti sibi praeferrere, quod Egmondanus, Arschotanus, aliique recepissent. Illos publicis muneribus excultos: se vero privatam & olim juratum. Quid ergo opus novo sacramento, si jurato non credatur? Frustra ab eo fidem expectari, qui sanctitatem religionis semel polluerit. Nullo sacramento mitigari perfidiam. Viannam latrocinijs expositam vallo cingere. In cujus etiam tutelam militarem globulum conscripserit, ut integram civitatem servaret Regi, ne quis prado illo munimento receptaretur. Quod ad seditiosos pertineret libellos, nihil se scire. Duos omnino typographos Viannae esse. Imprimendi facultatem dedisse petentibus. Si quid dolo malo deliquissent, mox cogniturum, poenasque irrogaturum comperto flagitio.

Cum hoc responso reversi, gravem sollicitudinem incussere Gubernatrici. Quippe jam Brederodium timere coeperat. De pervicacia illius dubitare non poterat. Simul maesta omnia

nia in aulam referebantur. A Ludovico Nassovio Germanicos ad Gotham exercitus sollicitari in auxilium. Fredericum Saxonem, & Lantgravium Hesium memores injuriæ à Carolo Cæsare acceptæ, ultionem meditari. Cameracenses episcopum præsidij nudatum, oppido eiecisse. Præter hæc Silvæducenses hostiles animos aperte induerant. Brabantix Cancellarius, ac Petersemius, uti diximus, in urbe agebant. Multitudinisque pervicaciam in accipiendis legibus experti, Primoribus auctores fuerant, ut præsidium militare in civitatem reciperent. Megemus quoque Legionem propius admoverat. Ea res Auriaco suspecta admodum fuit. Occulto igitur mandato Antonium Bombergium Silvæducis procedere jussit. Erat is homo plebeius ingenio moribusque ferox, juxta turbidus, & religioni infestus. Nec minorem favorem Silvæducis invenit, quam Antverpiæ habuerat, ubi inter sectarios principatum gesserat. Igitur captivitatem urbis strui questus, plebem in senatum armavit. Cancellarium & Petersemium prodicionis insimulatos in custodiam tradidit. Neque senatus, quanquam adversus, imperijs illius audebat intercedere. Munia magistratus in se retraxerat, & privati juris sui rempublicam fecerat. Tantum apud vulgares animos prædiariorum metus valuerat, ut alienigenam, nulla magis re quam turbulentia insignem,

non

non dubitarent in ducem assumere.

Megemus autem intrandæ urbis spe deiectus, in Hollandiam contendit ad subigendos eos qui averfarentur imperium. Ultrajectum appropinquans, nemine resistente intra mœnia recipitur. Igitur quæ turbata erant componere adorsus, Ministros omnes egredi iussit. suaque catholicis sacra restituit. Brederodius adventum ejus exspectare non ausus, Viannâ destituit, & in catharactis, quibus Rheno Leca conjungitur, castra firmavit. Mox inde pulsus, Amsterdamum processit. Munimenta ab eo cœpta Megemus destruxit.

Per eosdem dies Hermannus Antverpiensium Minister Trajectenses ad Mosam in Iconomachiam concitavit. Quorum mox rabiem Maseicenses, & Hasletenses eodem auctore imitabantur. Cæterum Gerardus Groesbeekius Leodiensium episcopus id ægre passus, ad ultionem surrexit. Tria peditum millia, ac trecentos equites subitario delectu effecit. His copijs Hasletum contendens, effusum incondite populum obvium habuit. Eoque levi prælio intra munimenta compulso, civitatem circumfedit, crebrisq; tormentorum ictibus verberatam, his tandē legibus in deditiōē redegit. *Catholico ritu viverent. Sēctarios civitate eijcerēt. Puplica pecunia exornarent templa. Ministros, seditio- nisq; auctores traderent. Sumptum belli restituerent. Muros deijcerent, quorum fiducia obsidiōē pertulerāt.*

Masei-

Maseicenses desperata urbis tutela, delegatos misere, veniam petituros. Qua impetrata, Hermannus habitu Franciscani assumpto, opportuna fuga se subduxit. Hinc Trajectum aggredi placuit. Urbem non civium multitudine solum, sed etiam opere munitam. Mœnia enim Mosâ interfuit. Sed cum pervicacibus ad defensionem civium animis, nulla spes potiundi oppidi offerretur, Episcopus obsidionem destituit.

Interea Gubernatrix accessione mali turbata, ex omni parte quærebat remedia. Tot simul urbes nequibant armis redigi in potestatem. Nec Valencenæ omitti poterant, nisi ut frustrato impetu augeretur defectio. Simul in rem famamque videbatur, validissimum oppidum armis subigi, cætera exemplo suo tracturum ad deditionem. Pudebat deinde Cancellarium & Petersemium captivos relinquere. Ergo inter ruborem metumque destituta, epistolas misit ad Silvæducenses, jus gentium pollutum incusans Bombergius modo in Auriacum, modo in Brederodium perpetratæ rei culpam, & in neutrum falso conferebat. Quippe & Brederodius Bombergio scripserat; quamvis uterque manifesta inficiatione declinaret invidiam. Gubernatrix ergo consilij incerta, apparitorem ad legatos recuperandos Silvamducis destinat. Fecialis quoque sequi jussus, denuntiaturus bellum contumacibus.

Appa-

Apparitor in senatum deductus, multa expos-
tulavit, atque intra horas viginti & quatuor
legatos dimittere, aut bellum opperiri eos ju-
bet. Horruere senatores ad hanc vocem, &
perpetrati sceleris infamiæ multitudinē sub-
stituunt, relatu-rosque se ad populum respon-
dent, apud quem nullo suo jussu captivi tene-
rentur. Primo mane tribunos plebis in curi-
am accersunt. Cum quibus etiā Bombergius
intravit, popularibus studiis accinctus. Qui-
ppe jam centuriones ei sacramentum dixerant.
Vni illi patulæ plebis aures erant. Facundia,
& auctoritas aderant, flectendique vulgum
artes, quibus omnem sectariorum factionem
præcipitem egerat. Quem cum senatus horta-
retur ad dimittendos captivos; insigni cavilla-
tione apparitorem ad Silvæducentes, non ad
Calvinistas missum arguebat. Superveniens
mox populus, curiam armis circumvenit, tur-
bidisque clamoribus cuncta permiscuit. Quo-
rum fiducia Bombergius claves civitatis ex-
torfit à consule, & nequis invito se egredere-
tur, validioribus præsidij portæ firmavit. Ap-
paritorem tamen emisit incolumē, renuncia-
re Dominæ jubens, non ante se captivos di-
missurum, quam Brederodius id ipsum man-
dasset. Post hæc fecialis urbem intravit. Bellum
indicere parantem, Cancellarius absterruit ab
intempestivo consilio. Nam si arma in ani-
mo haberet Gubernatrix, id ipsum denun-
ciare

ciare superfluum esse jus gentium violantibus. Perduelles palam judicari non posse, sine suâ pernicië.

Hæc tum in Brabantiâ. Cum interim Flandri obsequio parati, juvere quoque Regias partes collatione pecuniæ. Ex quâ novum delectum militum Egmondanus adornavit; Occidentali Flandriæ futurum præsidio; ne quis à Noircarmio & Rassegemio dissipatos, revocaret ad vexilla, vel irrequietos sectariorum animos ad nova rursus flagitia erigeret. Quadringentos ex his Aldenardæ imposuit, qui sectarios continerent in pace, & armatorum conspectu compararent ad patientiam obsequii. Iam quippe resumpto animo Gubernatrix, occultam inibat viam restaurandæ religionis in pristinum statum. Sectarios concionibus contentos, baptismo, communione, sepulturis, & hujusmodi ritibus in totum abstinere jussit. Tanquam hæc ipsa tabulis fœderis non comprehenderentur. Et si verum volumus, nihil aliud quàm concionandi libertatem tumultuantibus indulserat: cætera quidem hæcenus tolerans ad dissimulationem coacta. Quia intempestivo tempore prohibere non poterat. Nam is rerum status erat, ut amentia popularis componi magis, quàm irritari debuerit. Quod in omni seditione optimum est remedium, si pœnitentiæ spatium iratis concedendo, pauca indulseris, quæ ab oppressis

pressis statim repetas. Proposito itaque edicto
 effrænem sectariorum licentiam ad verborum
 suorum formulam revocavit. Nihil æquè se-
 ctarios perculit. Principium esse credebant, ut
 mox & conciones perverterentur. Per occul-
 tos igitur nuncios Generale suorum conci-
 lium Antverpiæ indicunt. Ex singulis synago-
 gis Minister unus, cum præcipuis aliquot iussi
 sunt adesse. Illuc quoque Brederodius venit, &
 cum illo sexdecim Conjurati delectui mili-
 tum intenti, quem ex omni parte institute
 cœperant. In eo Concilio sectarii Gubernat-
 ricem incusare adorti, magnoperè quere-
 bantur *peccasse in fœdera. Simulationem duntaxat*
fuisse ad decipiendos Fœderatos, vanis promissis
extractos, ut ex voluntate ejus tempus procederet,
quo rebus interim consuleret suis, partâque se-
curitate pacta rumperet. Quem enim sana mentis
non videre, concionis nomine cetera quoque exer-
citia cōtineri? Nec opus fuisse legibus fœderis ea ad-
scribere, sine quibus stare non potest ipsa religio.
Scire quoque Fœderatos haut aliam fuisse mentem
Gubernatricis cum dimitterentur ab illâ. Hoc
ipsum Proceres rectius intelligere, qui eandem in-
terpretationem interrogantibus dederint, plenâque
hactenus libertate frui permiserint. Iam verò ne
conciones quidem inviolatas esse, quas in oppido S.
Amandi, haut dubiè, jussu ejus, Noircarmius dis-
sipasset. Nec Ministrorum supplicijs abstineri, quo-
rum alios in crucem, alios in exilium actos accipe-
rent.

rent. At hoc nihil aliud esse, quàm in sanguinem suum exercere edicta, & atrociorẽ solito Inquisitionem reducere. Valencenenses prasidia in necem religionis suæ conscripta repudiare ausos, obsidione premi. Eandem mox fortunam reliquis civitatibus exspectandam esse. Quas communes hostes duceret Gubernatrix, atque aliam post aliam aggredieretur cum exercitu; donec ecclesias suas undique exstirpaverit. Viderent itaque Fœderati quàm hoc tutum sibi atque honestum esset, & sine morâ principijs occurrerent. Nunquam magis afflictam religionem. Nec aliud sibi quàm in Fœderatis auxilium, quibus pacta conventa tueri incumberet. Brederodius bonum animum habere eos jubens, cum Cõjuratis proficisci constituit ad Gubernatricem. Misitque qui peteret, num pace illius liceret venire. Ad ea Gubernatrix, si veniret, ut in hostem se animadversuram respondit. Neque mora, centurias aliquot militum accersivit in regiam, frequentioresque pro valvis stationem agere jubet. Præsidiariis denique mandavit, ne Brederodium, vel Conjuratorum quemquam in urbem admitterent. Nec Brederodius ausus est accedere. Codicillos autem misit sub communi Conjuratorum nomine Gubernatricem insimulans; quòd nova religionis exercitia adimeret, publicam libaret tranquillitatem, conciones dissiparet, in Ministros fureret, denique nullo metu externo imminente sub signis haberet descriptum militem, commercium ci-

vitatis sibi eriperet, vias obsideret armatis, vim inferre jussis iter sibi facientibus. Satisque intelligi, sanguinem suum peti tot apparatibus, nec publica securitatis rationem haberi. Quid inde aliud eventurum, quàm vastitatem provinciarum, & ruinam publicam? Despiceret igitur, an utilius non duceret, ex auctorato milite abrogari edicta, ad legem fœderis se componere, libertatemque religionis inviolatam relinquere: quàm contra fas jusque gentium violare fidem solemnibus sacramento sancitam. Hanc se benevolentiam ab illâ expectare. Ad hæc Gubernatrix ex sententiâ Viglii generosè respondit. *Qui sunt illi Fœderati, qui ad me scripserint, satis adhuc nescio. Quia communi suffragio dissoluta est societas. Ne adduci possum ut credam, omnes queri, utpote cùm plures in officio perstare videam. Vos tamen quique estis, (nemo enim libello nomen adscripsit suum) mihi certè estis injuri, quòd contendatis, vulgatam à me libertatem religionis. Ad verborum meorum formulam provoco. Scitis quidem quàm agrè promiserim me non imperio, non vi, interversuram conciones, eò locorum ubi tunc fuerant, modò absque scandalo, & confusione agerentur. Quibus verbis utcumque conciones toleraverim: nemo tamen libertatem religionum indultam dixerit. Neque mihi unquam fuit hic animus. Populum in tumultus sublatum, aliquâ ratione mitigare studui; quoad strictos à jugulo meo averterem gladios: mox deinde pacatiorem à concionibus abstraherem.*

rem. *Hæc fuit summa consilij mei. Apage me hercule ut consistoria institui patiar, hoc est; regnum in regno, rempublicam in republicâ, populum in populo. creati ab his magistratus, tributa indici, communionem, baptismata, matrimonia, sepulturas damnato ritu institui, sacrum ordinem, doctrinamque perverti. Non est profectò conscientia mea tantum probare flagitium. Si quis eam vobis libertatem indulserit, ego utique non consensi. Cum illis expostulandum est, non mecum. Atenim in pacta peccavi. Quoniam solemnibus tabulis jussi vos esse securos. De præteritis rebus quidem. Ea cautio ad futura non pertinet. Libellum mensis Aprilis nulli fraudi fore sponendi. Nemo quoque securitatem vestram in hoc sollicitat. Si qui ad magistratus edicto meo pulsantur, imputandum ipsis est, qui verba mea aliter interpretati sunt, quàm oportuit. Magistratus, ut par est, officio funguntur. Si tamen justo dolori plus æquo indulgeant, deserte ad me illorum nomina, ego quod videbitur constituam. Nescio verò quare mihi obijciatis pactorum religionem, quam priores ipsi violastis. Non infero vobis injuriam; sed propulso. Non succurrit vobis, opinor, præteritorum scelerum memoria. Spoliata fana, civitates seditionibus concussas, fœdera cum peregrinis in perniciem provinciarum contracta, delectus institutos privatis auspicijs, nobilium pratoria & monasteria direpta atque incensa, famam Regis petitam maledictis. Quantum abest ut palam in bellum ardeatis, quod clam machina-*

mini? *Hæc mihi causa fuit contrahendorum militum. In hæc facinora edictis intonui. Sine exitio publico arma ponere non possum, ad quæ divini humanique juris necessitate adauctus sum. Si sani esse vultis domum regredimini, revocata curam à negotijs publicis, quæ ad vos utique non pertinent. Minas vestras securus despicio. Desinite eam terrere, quæ supplicia expetere potest. Prudenter vos facturos existimo, si vanam illam & indecoram proterviâ in posterum omiseritis. Scitote Reges non impune despici. Principibus longas esse manus. Pænasque exacturos contempti imperij.*

Non omittebant interim Conjurati clandestino delectu militem efficere. Reliquias cladis à Noircarmio acceptæ, per idoneos homines seorsim aliû ab alio Antverpiam perducebant. Ad quorum famam certatim undique confluebant Iconomachi acerbioræ quæstione domo expulsi. Multi quoque nobiles, privatim degeneres, publicè perniciosi, nullam in pace spem, omne consilium in turbidis reponerant. Wallacriam insulam in Zeelandiâ, atque Amsterdamum in Hollandiâ ex consilio Auriaci occupare susceperant. Ibi in mediis undis nidificantes, Regis vires quassare, ærariumque ejus lassare decreverant. In hæc facinoræ duces electi, Dominus Tholouſus, & Brederodius. Hunc Amsterdamum proficisci volebant, cõtumaciam eorum penes quos civitatis regimen, studio partium viribusque fractu-

fracturum. Zeelandiam Tholousio invadendam destinaverant. Erat hic ex Marnixiorum nobili familiâ, Domini S. Aldegondi frater, manu strenuus, militarium artium gnarus, & turbandis rebus aptissimus.

Nec solutiori curâ Gubernatrix agebat, cui paratus hostium ferè noti. Nec inter tot confcios occulti manere poterant. Tres cohortes Tornaco venere. Iter in Zeelandiam habentes, missus statim nuncius assequitur, ut Axel-læ, & Terneusæ subsisterent. Præmiserat enim Gubernatrix in Walacriam Cattemii Dominum cum ducentis militibus, arcem Rammekins occupaturum præsidio. Cæterum præfectus arcis militares copias detrectavit recipere; fide ambiguus, palam regias partes, occulto favore rebellibus adhærebat. Cattemius inde Middelburgum contendit. Eandem quoque claudentem sibi portas invenit; Petrus Heckius perfidiæ imminens, multitudinis animos in tumultum erexerat. Erat is devinctus Auriaco, cujus suffragio in præturam emerferat. Et hinc dignitatis prærogativa ferox, proditurum se civitatem Tholousio addixerat. Iacebat ergo exclusus miles in littore, nec laceßens quemquam, nec laceßitus. Quippe tanquam mox recessurus exspectare credebatur Gubernatricis imperium. Nam & Cattemius securitatē civium interrumpere timēs, hanc famam rumoribus dederat. Aversis igi-

tur à sinistra suspicione omnium animis , surgente aurorâ , nemine sentiente Vlissingam intravit. Densa enim nebula prospectum abstulerat. Advectis mox tormentis totam insulam terrore consternatam Regii juris fecit.

Interea Gubernatrix Auriacum & Hoochstratanum Antverpię agentes, crebris epistolis admonebat de occulto Brederodii apparatu, atque ut oppido cedere juberetur. Nec moram rebelles fecere. Verebantur enim maximè ne præsidarii Regii Zeelandiam præriperent, quos in procinctu esse cognoverant. Proximâ igitur die cohortes ad parata deduxêre navigia. Brederodius copiarum parte accepta, cursum in Hollandiam direxit. Major numerus Tholousium sequebatur velificantem in Walacriâ. Nunciatur ei in itinere insulam à præsidariis Regiis occupatam, ad obsequium Gubernatricis se componere. Sexcentos non amplius milites habebat, nec armis nec disciplina instructos, cum quibus fortunam bellitentare amentia videbatur. Consilii incertus, retortis puppibus relegit flumen, & propinquum Scaldi pagum, haut procul Antverpiâ Austerwelium nomine, castris occupat, ampliolem delectum habiturus. Multi enim impigrè nomina dabant, studio Ministrorum, variis artibus juventutem subruentium.

Postquam autem de Tholousij machinis certa fide Gubernatrici relatum est, priusquam præ-

præcoces rebelliū apparatus in justum crescerent exercitum , prælio experiri constituit. Philippum Lanoium Beauvoisij dominum egredi adversus hostem jubet. Quadringentos ei milites ex Bruxellensium præfidiarijs attribuit , additâ Ioannis Gravij Brabantix prætoris equitum alâ. Valentinus de Pardieu Motte dominus cohortes jūgere jubetur, quas Axellæ & Terneusæ substituisse diximus. Hanc tantillam manum Beauvoisius tertio Idus Martias promovit in hostem. Frequentem eum per agros palantem invenit. In hos eques invehit jussus, pedes in munimenta incubuit. Multi primo impetu obriti sunt , necdum justis armis instructi. Et statim pavor intravit animos. Fit igitur passim fuga ex castris. Nec consilio, nec imperio ad vexilla revocari poterant metu mortis perculsi. Castra in plano sita erant, & in medio prætorium , quod haut multo ante canonicus quidam ad voluptatem construxerat. In hoc Tholousius, à majori suorum parte destitutus, se recipit cum promptissimis. Qui magnitudine criminum à spe veniæ exclusi, ac necessitatem æstimantes, ad ultimum fortunam experiri decreverant. Sed inde nec vi pelli, nec ad pugnam elici poterant : cum Beauvoisius ignem tectis injici jussit. Ac ne tum quidem deditionem fecere. Pauci viam ferro aperuerant ; & confecti sunt à circumfidentibus. Correpta latius flamma contumaces

maces absumpsit. Cæterum qui fugam acceperant, ab equitibus ferè proterebantur. Quorum impetum ut evitarent, multi se præcipitabant in flumen, declivia ejus prosequentes, quoad eminente aquis vertice lubricisque stantes vestigiis, aut absumerentur ab æstu, aut destinato scloporum ictu conciderent. Sola insequentium tela metuebantur, ad quæ efugienda, non dubitabant etiam barbaro elemento spiritum committere. Duarum non amplius horarum prælium, & incruentum Regiis fuit. Duo tantum desiderati traduntur. Cecidere rebellium circiter mille. Inter eos plurima nobilitas, atrociora supplicia metuens honestæ mortis gloriam quæsierat. Fuerant qui se dederent, & Beauvoisij jussu occisi sunt. Per sequentes verò dies, multi ex fuga retracti, quidam etiam prodebantur ab agricolis petulantix eorum infensis. Quos deinde Gubernatrix in exemplum crucibus affixit. Ioannem Dionysium centurionem torquere jussit, sciscitatura quo consilio conscriptus esset tantus exercitus. Delectum ille in Flandria habuerat. Tormentis admotus exstimulatum se ad arma fatebatur à Petro D'Atheno Ministro. nihil præterea quidquam scire.

Ceterum dum colluctantur acies, populus Antverpiensis à mœnibus arceri non poterat. Ruebant omnes ad spectaculū prælii, in spem aut metum propensi, pro cuiusque affectibus.

Sec̃ta-

Sectariorum tamen animos intentior cura ter-
 rore miscebat , utique posteaquam discusso
 ventis fumo & pulvere, liberius cœlum osten-
 dit in Beauvoisianos inclinare victoriam. Vbi
 verò apparuit transactum esse de fortuna par-
 tium, Tholousiumque prætorio inclusum, ul-
 timo discrimine laborare; clamoribus cuncta
 fervere cœpère. Nec deerat seditiosissimus ille
 Minister Hermannus, voce, manu hortari sin-
 los, ne publicæ libertatis protectores ante suos
 oculos tristissimâ morte perire paterentur.
 Calvinistæ igitur correptis raptim armis , ad
 portam quæ Austerwelium versus ducit, uno
 impetu feruntur. Sed eam Auriacus diligenter
 occludi, firmisque custodiis observari iusserat,
 Beauvoisij adventum suspectans. Ac ne tunc
 quidem aperiri volebat. Calvinistæ furore a-
 mentes, in pontem Merium secedunt densis
 agminibus. Totâ urbe non alia vox audieba-
 tur, quàm clamantium ad arma. Et undique
 tympana pulsari cœperant : cùm tam cives,
 quàm milites sub suis quisque signis conve-
 niunt. Cæterùm miles ad cōtinendam civium
 tranquillitatem in sacramentum adactus, at-
 que in octo cohortes distributus, stationes in
 foro agere consueverat. Nec tum quemquam
 civium propiùs accedere patiebatur. Ea res
 acuit tumultuantium animos , in se armari
 credentium. Consultatum est, an impressio-
 nem

nem in milites facerent. Plus quindecim Calvinistarum millibus stabant in Mereo ponte. Prætor eos quatuor millia Coperbruggiū pontem infederant. Urgebatque asperiora Minister Hermannus. Cum magistratus fama mali perculsus, Auriacū adiit. Hoochstratanus quoque ad eundem pervenit. Illo protenus ad mitigandos Coperbruggios procedere iussu, Auriacus in Merium pontē contendit cum Stralio consule. Propinquantibus obviam venere tumultuantes, quasi per officium. In quorum medium receptus; *Quid, inquit, viri Antverpienses hac sibi vult repentina consternatio? quo ruitis armati? quid vobis vultis? quibus ista secessione excidium machinamini? si quis injurius est vobis, accedam ad partes. Sed ante omnia intelligam in quos undaturus sit ille impetus, utrum in hostes, an, quod abominor, in cives. Ut nemo aliquis audebat loqui: ita atrocissimus clamor oriebatur, indifcretis vocibus foro se excludi frementium. Tum illi: Si nulla alia res concordiam vestram remoretur, armorum contentione non est opus. Continete manus à civili sanguine, nec in viscera vestra armamini. Parum interest utrum vos, an illi forum insideant. Milites quos videtis vestri sunt, vestro ære merent. ducum vestrorum imperia testenturque accipiunt. Pro vobis stant. Pro vobis excubant. Communem civitatis tutelam gerunt. Neque eos utique in cives; sed in seditiosos, pacisque turbatores conscripsimus, in hac potissimum regione*
urbis

urbis custodiam agere iussos. Ita fert rigor militaris disciplina, ut intra fines sibi assignatos, armatum neminem extra commilitones recipiant. Si tamen ita vultis, per me licet, ut pari jure in foro excubetis cum militibus, modo vos quietos, regendosq; præstetis. Hæc dicenti, ij qui ad Coperbrugium confederant, superveniunt. Nequaquã pari modestiã Hoochstratanum ad se venientem exceperant. Cui nec par gratia, nec favor, & minor auctoritas apud vulgum. quia non aperte, ut Auriacus, in causam sectariorum descenderat. Circumstiterant densis agminibus orantem, infano tumultu identidem proditorem appellantes: adeo ut quidam pannitonfor pectori ejus sclopum admovens, minaretur se explosurum, ni statim referarentur portæ civitatis, ac sua jura civibus restitueret. Ille præsentī metu mortis exterritus, cuncta ex voluntate eorum facturum se respondit. Portarum claves Auriaco commissas, nec per se stare quo minus acciperent. Irent secum, & peterent, nullam in illo morã fore. Inde seditiosissimum quemq; verbis permulcēs, flectere cœpit mobiles animos. Signo igitur clamore dato, in pontem Merium viam instituunt. Venientibus Auriacus obviã factus, & incōdita vociferatione portarum claves flagitantibus adferri curavit. Minister Hermannus eas accepit, & per medios erumpens cuneos, ducem se ad portam præbuit. Conclatio-

matione facta universi sequuntur. Auriacus properantibus se inseruit, eos qui proxime veniebant crebro incusans; *quo sic ruerent, inepta bello turba, & disciplina nescia. Trent quo vellent, sexcentos equites in suburbys instructos, amentiam illorum expectare.* Eadem à magistratibus constanti asservatione ingerebantur. Nec à vero aberrabat conjectura. Beauvoisius enim tumultu audito, equitatum omnè præmiserat, ac si res ferret, disiectis obviis, in urbem prorumpere iusserat. Iamque frequens armatorum globus excesserat portis; cum Auriacus ad eos qui sequebantur conversus, *ego me, clamabat, in tempore subducam manifesto discrimini, ut intercessionis vestræ nuncium domi expectem. Sapiet is quidem, qui exemplo meo idem faciet, damnatà illorum temeritate, quos inconditè portis egressos, præsentissimum exitium accersere video.* Simul his pedem referebat. Abeuntem illum primo proximus quisque, deinde qui successerant sequi cœpere. Mox ij qui egressi fuerant, cum nemo amplius sequeretur, & ipsi in urbem revertuntur, cæteris prodicionem identidem exprobrantes. Hermannò auctore signa rursus transferuntur in pontem Merium. Aditus omnes vigiliis firmant. Præsidia & stationes in foro locant. Crebrisque clamoribus, *Vivant Geusij*, exultantes, noctem turbidam & minacem egere. Pavida interim civitas, & prædæ exposita mutuo metu suspens-

spendebatur . Hi qui domi quieti confederant , Calvinistarum pervicaciam extimescebant; incerti quo tanta vis tandem erumperet. Calvinistas econtra anxios habebat, ne ulcerata cæterorum civium patientia , ad Regias partes subsidiaque respiceret. Ortâ luce, in pontem Merium tormenta trahuntur. Quamvis nihil in commune turbaretur, non defuere tamen qui sacerdotibus & monasterijs , potentiorumque civium fortunis illuderent. Crederes urbem ab hostibus infessam. Suspecta tumultuantium avaritia , pari metu omnes concusserat. Nec deerat Auriacus, æquis condicionibus iratos componere. At Ministris immodicâ cupiditate flagrantibus, nullę satis leges placebant. Animi ex seditione creverant. Quibus rebus permotus Auriacus, residuâ plebis partē & ipsam , armatam, furentibus opponere cōstituit. Coacto igitur domi senatu, tribunos simul plebis, atque optimum quemque in concilium adhibuit. Et si pacem habere vellent, ostentandum esse bellum edocuit. Arma armis cōpescerent. Neque enim turbulentos illos spiritus rabiem posituros, quàm si contra paratos aspexerint, qui opes suas possēt defendere. Nemo erat cui non placeret hæc sententia. Missi sunt clanculum per civitatem , qui catholicos atque externos omnes citarēt armatos in crastinū. Lutheranos quoq; Ministri spōdebant venturos.

Multi

Multi enim in civitate catholici, plures Lutherani erant, juxtà Calvinistis infensi, qui in omnes semper imperium usurpant. At hi, tametsi validiores singulis, ab omnibus tamen numero superabantur. Cæterum Lutherani genio sectæ quieti, nec catholicis discordes, hætenus in Kilio pago pari jure divina fecerant. Et hæc quoque inter reliquas sectas à magistratu potissimum fovebatur. Non odio pristinæ religionis; verum ne in tanta novarum opinionum dulcedine, Romanisque ritibus in fastidium versis, omnia ad Calvinistas vergerent. Quorum factio regnantibus gravis; Lutherani civilium patientes, nec adversi sceptris habebantur. Et hinc magistratus æquo animo acceperat, vocatos ab his è Germania plerosque doctores, & inter eos Mathæum Flaccum Illiricum Spangenburgicum, hominem non ineruditum. ut discordias exerceret cum Calvinistis, haut dubie in utriusque sectæ perniciem instructas, quoties secura professione, segni que pace aluntur. Postridie igitur Lutherani, ut constitutum erat, in forum equinum frequentes conveniunt, & Ministri in partibus. Simul ad delubrum S. Michaëlis ingentem planitiem multitudine complent. Catholici autem Oosterlingorum diversorium occupant, atque una cum his Itali, Hispani, Lusitani, cæteræque externæ gentes. Nemo omnino erat, qui in partes non secederet. Non
tam

tam studio reipublicæ, quam privatarum rerum cura, & Calvinistarum formidine spolijs inhiantium. Sed in eo discursu occupari, cum alijs alij occurrerent, invicem suspecti, & quam religionem colerent interrogantes, non sine mutuo terrore ferebantur. Triste mortalibus spectaculum datura videbatur civitas, & sub mutuis ictibus vapulatura; cum Auriacus, cunctis sollicita exspectatione suspensis, & quid futurum esset invicem quærentibus, dandum adhuc pœnitentiæ spatium Calvinistis censuit. Misit itaque ad ministros, qui significarent, usurum se promiscua cæde nisanioribus consilijs flecterentur. Neque multo post à Calvinistis ingenti metu correptis, venire delegati. Ministri una aderant, tanquam ex officio sequestres pacis, quam nimia ferocia concusserant. Illic agi de concordia cœptum. Consensumque in condiciones, quas pridie reiecerant. Pauca omnino erant. *Pacta mensis Septembris rata sunt. Fidem Regi magistratibusque præstanto. Externi milites, nisi consentiente populo, intra mœnia ne admittuntor. Iurata privilegia servantor. Cujusque religionis homines concordiam foverito. Claves civitatis Auriacus obtineto. Nocturnæ, diurnæque vigiliæ, nullo religionum descrimine habentor. Tormenta bellica manibus redduntor. Cavebatur præterea, ut Auriacus, cum magistratibus, & collegijs quadringentos equites legerent, naves ad bellicos usus*

in flumine instruerent. In hanc rem Ecclesiastici cum civibus stipendia conferrent. Publicatis legibus primi omnium Hispani atque Itali arma posuere. Eos mox Calvinistæ secuti sunt. Deinde Catholici, & ad ultimum Lutherani.

Civitas quidem magno discrimine exempta videbatur. At non Gubernatrici jucunda hæc erant. Movebatur præcipue præsidiariorum navium, equitumque mentione fœderibus illata. Et quamvis magistratus fidem faceret, non sua voluntate conditionem hanc adscriptam legibus; sed ut aliquo blandimento amentiam civium ad quietem deduceret: Gubernatrici tamen ad insidias vigilanti suspecta omnia erant. Siquidem Auriacus & Hornanus in verba Regis detrectabant jurare. Trajectenses ad Mosam, & Silvæduceses novos delectus agebant. Nec multò lætiora ex Hollandia nunciabantur. Amsterdamum à Brederodio militibus infessum. Præsidiarias naves à tumultuantibus exstrui. Contractis igitur in concilium Proceribus, quid de his facto opus, consultat. Quorundam suffragia ferebant; *Quærendum ab Auriaco an sacramento tandem obstringi cuperet. Quod si id ipsum detrectaret, provincias eo statu redderet, quo à Rege acceperat. Amsterdamum ab amicis ejus occupatum esse. Ac ni concepti sceleris conscius foret, non dimissurum fuisse Antverpia Brederodium, cum tanta multitudine legibus*

legibus proscripta. Quippe sciebat cum publica paci illu-
surum. Hac tamen ut cumque excusari possint: purgare
certe non posse, quod haut ignaro ipso rebelles in Hol-
landia classem instruerent, militem scriberent, palam
bellum tractarent. Iam quidem ipsum scribere, para-
tum serenuntiare provincijs. Nempe ut excusandum
non haberet, quod ibi peccaretur. Simulationem dun-
taxat esse, ut pro amico facilius imponeret callidissimus
veterator. Nam si provincias dimittere velit, cur id
protenus non facit, ut fidelioribus, quam ipse sit, tradi
possint? Cur reservat sibi gubernaculum Burgundiae?
cur Antverpiensis civitatis? Fastidientem beneficia Re-
gis, alia ex his retinere, alia remittere non posse pro sua
libidine. Denique contra morem facere, quod ordi-
naria turma praefecturam injuratus possideat. In hoc
potissimum sacramentum exigi: ut Regi serviant sui
milites, & eosdem amicos inimicosque habeant, quos
ipse habuerit. At non idem consultioribus pro-
babatur. Nihil adhuc aperte agendum, censebant.
Cum vulpe vulpinandum esse. Pari arte, pari simulatio-
ne, qua ipsos cogitaret pervertere, fallacem eluderent.
Hortandum esse blandioribus litteris, ut ab inceptis
Brederodium avertat, vel contumacem Amsterdamo
eijciat. In hanc rem Hollandiam peteret, & accepto Re-
gis Sacramento provincias curaret, aut aperte denun-
ciaret, quid de his fieri vellet. Sine rectore diutius relin-
qui non posse. Ex hac sententia secretario Ber-
tio ad Auriacum misso, Torrius simul ad Bre-
derodium destinatus est, cum mandatis quæ
juberent eum Amsterdamo cedere. Inter hæc

Gubernatrix Hermannum & D'Athenum Ministros proscriptit. Ingenti pecunia promissa, si quis vivos ad se retraheret. Sed exitiales homines, sua ipsorum solertia supplicio subduxit. Dei ira in rempublicam, quam post aliquot annos nō minus atrociter concussere.

In hac religionum tempestate, III. Idus Mart. primus Gandavi Iesuita sermonem instituit. Quippe Iesuitarum societas surgente Luthero exordium cœperat. Quasi præcauentibus fatis, ut essent, qui effrœnam licentiam, quam ille præscorum hæreticorum vestigia ingressus, torpenti sæculo induxerat, severiori disciplina exemploque corrigerent. Igitur ad excipiendum concionatorem recens alyectum, magno concursu populus affluxit, ut ferme solet ad nova omnia. Multitudinem templa non capiebant. Christianæ religionis rudimenta magno plausu exposuit. Res à prudentioribus hæctenus desiderata, nec frustra cecidit. Multi illo auctore revocati sunt ad ecclesiam. Ut facile appareret, non tam suo, quam doctorem ingenio laborasse provincias. Ministri cæptis ejus æmuli, ac paucitate auditorum contempti, & ipsi acrius concionari cœpere, nec non sordidissimum quemque ex plebe donis illicere. Quibus cognitis senatus interdixit, ne quis sub eleemosynarum specie pecuniam publice distribueret. Cæterum ut ad ordinem historiæ redeam,

redeam, varia legatorum fortuna fuit. Torrium à Brederodio contumeliosius exceptum, Conjurati captivum faciunt. Commentarios & mandata intento mortis metu tradere subigunt. Ac ni magistratus tanti viri calamitate motus, clam emisisset portis civitatis, haut multum aberant à cæde legati, cujus etiam summa semper reverentia valuit apud barbaros. Auriacus autem Bertium benigne habuit. Pari quoque humanitate ad ea quæ rogaretur, in hæc verba respondit. *Renuncia Gubernatrici, quæ hætenus fecerim, omnia contulisse ad salutem imperij. Cur ergo de fide mea dubitare debeat, non intelligo. Multis honoribus à Rege excultus sum. At in auspicijs singulorum sacramentum dixi. Quod in hunc quoque diem illibatum servavi. Idem vero revocare non possum, nisi ut venisse videar in suspicionem perfidia. Ex quo gubernaculis admotus sum, privatis necessitudinibus rempublicam semper antehabui. Brederodium Antverpiæ abire permisi, cum incondita multitudo, quam scripsisse se dicebat in ordinaria turmæ supplementum. Neque enim, quod sciam, Gubernatrix ei præfecturam ademit. Proinde si in Hollandia hostilia coepaverit, fuerit ejus ista excusatio. Scito me perinde falli potuisse, ac ipsam Gubernatricem. Eadem solertia utrisque imposuit. Facturum hoc eum divinare non potui, cum quo consilia non communico. Ego ut primum licuit, quæta turbidis anteposui. Effera tam hanc civitatem pacavi, non sine discrimine vite meæ.*

Nullum ob privatum respectum. Sed ut in obedientia Regis contineam. Et hæc causa fuit, cur in Hollandiam non concesserim. Arctius hic detineor, inconstantia civium, bona fide pacem non colentium. Nec me poenitet obsequii. Quod in obedientia hujus civitatis magnam partem tranquillitatis positam esse videam. Gubernacula vero resignare non possum, nisi volente eo à quo accepi. Per me non stat, quo minus Gubernatrix provincijs consulat, prout expedire ipsa duxerit. Ego omnino manum subtraho. Vnum tamen monitum velim, solidam pacem haberi non posse, nisi ex tota gente Concilium contrahens Rex, præteritarum rerum gratiam sponte fecerit. Quippe eam nemo petiturus est, nisi ut ex propria confessione nocens esse sustineat.

His in aulam relatis, multiplici sollicitudine Gubernatrix tangebatur. Centum & amplius nobiles Conjurati cum Auriaco pacti ferebantur, haut aliter se cum Rege in gratiam redituros, quam si & ipsos, & civitates, decreto suo absolveret. Antverpienses quoque hoc ipsum oraturi, libellum curiæ obtruserant. Adhæc prope tertius mensis erat ex quo Valencenenses obsidione pressi, pertinaciam non consumpserant. Nobilis & potens civitas defectione sua reliquas attraxerat. Eaque dedita pervicacissimorum animi redituri rursus videbantur ad respectum imperij. In quam proinde justa ira stimulabatur. Sed in obsidione perseverando graviora timebat. Ne forte ad Gallorum auxilia oppidani respicerent. In quo-

quorum studia Ministri accendebant. Deinde pudebat hærere circa muros unius civitatis, aliarum opportunitate relicta. Omnia igitur circumspicienti optimum visum, oblatiis condicionibus deditioeni exigere. Ad tentandos obsessorum animos Egmondanus & Arschotanus mittuntur. Valencenensium delegatos Beuvragium evocant. Eos Noircarmius protinus adduxit, ut leges acciperent admonens, quas Gubernatrix præscripserat. *Urbem dederent. Praesidiarios reciperent. Iis quibus placeret, integrum esset proximis diebus quindecim oppido cedere.* Intra quos bona distrahere, vel transportare possent. Cateri sine fraude in urbe agerent. In officia se continerent. Edicta de religione acciperent. Aboleretur memoria rerum præteritarum. Integram cuique fore innocentiam suam testificari coram Rege, coram Status aut Privato, aut Mechliniensi Concilio. Anxij ad hæc delegatis, Egmondanus magnopere suadebat, ne vim, quam clementiam Regis experiri vellent. Nullam spem in armis reliquam. Rebellium copias ad internecionem casas, cum Tholousio duce. Nullam opem restare. Solos in contumacia persistere. Reliquas fere civitates majestatem agnoscere. Dum liceret, voluntate sua facerent, quod coacti mox facturi essent cum pernicie omnium. Inducias in triduum fore. Intra quos responsum opperirentur. Ea postquam Valencenis audita, magis Optimatibus, placebant, quam multitudini. Seditiosissimi quique cum Ministris plebem stimulabant ad

bellum. In proçinctu stare subsidia. Falsaque esse quæ de Tholousio traderentur, Optimates autem in contrarium tendebant. Nec interim multitudo se continuit, quin crebra tormentorum explosione in inducias peccaret. Patrum precibus ad ultimum victa, ita legibus assensa est; *si crimine læsa majestatis cives absolverentur. Edictum quo hostes judicati essent irritum fieret. Vtrunque dimitterentur captivi. Bona in fiscum redacta aut ab eodem distracta, restituerentur. Prasidiarij ære Regis mererent, sine molestia vel incommodo civium. Urbem non intrarent, priusquam hi, qui discedere vellent, fortunas suas extulissent. In hanc rem legitimum tempus præstitueretur.* His perferendis, duodecim ex Optimatibus delecti sunt. Proceres infesto vultu ad se venientes excipiunt; fortunæ eorum non convenire intonantes, victoribus leges præscribere. Clementia vero indignos videri, qui sanctitatem induciarum polluere sustinuerant. Proinde ni civitatem, seque deditum venissent, uti sine mora decederent. alioquin vinctis post tergum manibus in urbem propulsuros. Diriguerunt illi ad hanc vocem, & de multitudinis genio multa questi, Ministros substituebant in crimen. Ad ultimum id modo petebant, ut sibi saltem mitigati esse vellent, ac bona eorum pace extra oppidum liceret persistere. Surdæ erant Procerum aures ad has preces; cum

cùm universi se prostraverunt in terram, genibusque Egmondani advoluti, per illius genium veniam precabantur. Sed ne tum quoque Noircarmius flectebatur. Catenis igitur adferri jussis, contumeliæ metu in oppidum compulit. Timebat enim ne vel invito retinuisse crederetur, vel melioribus oppido abstractis insanæ multitudinis studio cuncta regerentur. Nam in omni seditione tutissimum esse remedium, si & boni in partes secesserint. Quod & legibus suis sanxit Solon. Ut semper essent, qui inconditam multitudinis ferociam sanioribus consiliis imbuerent. Oppidani ergo desperata venia, ad defensionem se convertunt. Multi in civitate veterani erant. Quibus ferocissimus quisque ex plebe permixtus, de corpore suo ducem eligunt, & Cardoniâ portâ in stationes erumpunt. Prælium acriter, nec ut cives sumpsere. Multi ex Noircarmianis cadunt, plures pavore amentes in fugam conjiciuntur, & ingentem trepidationem castris inferunt. Jam terror quoque ad præfectos pervenerat, in suspicionem lapsos, non civium hanc aciem esse, sed externorum militum auxilia ferentium. Ad primum tumultum Noircarmius contra legiones instruxit. Cum parte equitatus victoribus incubuit, & non sine strage in civitatem compulit. Hujus vero cladis dedecore admonitus, intentiore disciplina suos habuit. Militibusque distributis,

qui ad tormenta consisterent, quique vallum tuerentur, Mansveldicam legionem secum assumpsit, & quâ extrema definit fossa, vallum promouet. Deinde portæ Montensis suburbia, nullo suorum desiderato, intempesta nocte occupat. Ibi verò aggerem erigi curat, propè æquantem portarum fastigia. Quo intra secundum diem absoluto, machinas attrahi, & in summitate ejus constitui jubet. Vnum & viginti tormenta erant. Quibus ingens globorum vis fuit excussa. Turris S. Nicolai, in quo oppidani machinas aliquot locaverant, in primis dejicitur. Sub cujus ruina non pauci oppressi sunt. Mox in eminentiores domos tormenta diriguntur. Tunc plura undique funera, & semivivorum hominum amputata, & adhuc palpitantia membra, ipsis funeribus propemodum tristiora. Ejulatus quoque, & tectorum cadentium fragores per totam urbem passim audiebantur. Questusque mulierum præcipuè, & puerorum aliis maritos, aut liberos, aliis parentes desiderantium. Jamque muri civitatis crebro verberati, ictibus cessarent. Portæ quoque nudaverant latera; cum obsessos ingens desperatio incessit. Jam non ambigua bonorum voluntate, iis quoque qui ferocius egerant consensu multitudinis victis, ix. Cal. Apr. caduceator mittitur, condiciones petiturus. Sed majora per contumaciam deliquisse videbantur, quàm quibus igno-

ignosci posset. Deditionem sine exceptione facere jubentur. Hæc vox non sine consternatione audita est. Sed si adversarentur cogi poterant. Itaque ut petebatur, Regis potestati se permittunt. Ingressus urbem miles, per custodias dividitur, ne quis exire aut dimitti posset. Noircarmius civibus arma ademit. His qui seditiosius egerant, catenas injecit. Eos deinde Gubernatrix ad terrorem omnium publicæ paci immolavit. Bona publica privatorumque in fiscum redacta. Insignis calamitas singulorum fuit. Nec multò post Michael Helinus, cum filio, simul Guido Bresseus, & Grangius Ministri, ex fuga in urbem retracti, tanquam principes seditionis damnantur. Helini pecuniâ, potentiâ, & auctoritate; Bresseus & Grangius turbido ingenio, & virulentia linguæ primùm ad cœptandam seditionem, mox ad obsidionem contumacius tolerandam populum erexerant. Et Ministri quidem patibulo suffiguntur. Helini vero gladio percussi. Sed non aliud supplicium spectantium oculos majori misericordia affecit, præteritæ fortunæ magnitudinem recordantium. Quippe tanta vanitas inerat illis hominibus; ut Egmondano se potentia sustinuerint æquare. Cœpta veritne seditionem multitudo ad supplicii spectaculum conglobata, an cœptare credita fuerit, haut satis liquet: miles tamen

cir-

circum theatrum positus, ut intumultuantes impressionem fecit, paucisque interfectis universos discussit.

Valencenensium deditio quantò tristior, eò velocius audita est per provincias. In unius hujus civitatis fortunam intentis omnium animis. Hoc initium Gubernatrici fuit resumendæ potentiae. Sectarii enim contemni passim cœperè. Calvinistæ Cameracenses de salute sua solliciti urbem fugâ destituunt. Ad eam deinde componendam Archiepiscopus processit cum militari præsidio. Magistratus illi obviam venit. Magno plausu à multitudine excipitur, honoratiùs revocante, quem contumeliose expulerat. & hanc ille populi benevolentiam clementia pensavit. In neminem gladio sæviit. Profugorum bona fisco addixit. Reddita ecclesiasticis dignitate religionem restituit.

Hunc finem annus habuit, Gubernatrici haut lætus, multis verò exitiorum causa. In quorum scelera superveniens Albanus acerrimè postea quæstionem exercuit. Fatalis quædam rabies fuit. Cujus causam haut aliam prudentiores inveniunt, quàm amentiam nobilium, de clementia diffidentium. Præteritæ insaniae veniam, quàm Rex, suo pre ingenio ad consilia tardus, cottidiè differebat, per seditio- nes, & crudescentem armorum libidinem ex- torquere nitēbantur. Donec omnia in confusio-

fusionem venirent. Tum iustâ irâ accensus Rex, militares copias ad ultionem instruxit. Et hinc metus quibusdam Proceribus, conscientie stimulo pulsatis; quia sectariis indulgentiores fuerant. Ex metu vero diffidentia nasci cœpit, non habentibus fidem verbis Gubernatricis quam suis detraxerant. Quoad ad ultimum Auriacus, ut vel invito Rege incolumis esse posset, à sceptro defecit. Quem statim secuta est frequens nobilitas, deinde & populus. Nam (ut postea trademus) utriusque patientiam Albanus juxta exasperavit, cum alteruter tantum plectendus fuerit, ut multitudini eriperet capita, quæ sequeretur in Regem: vel capitibus multitudinem, quam Regi opponerent. In summa, tutissimum fuerat, suppressos tumultus in pace relinquere, non adeo inhonestis sopitos conditionibus, nec diutius manfuris, quàm Regi libuisset. Nunquam enim prætextus desunt dominantibus, ut à tranquillis reperant, quod rebelles expressere. Hæc illius temporis sententia fuit. Quam nec affirmare, nec refellere sustineo.

Gubernatrix victoriæ potita, non modica lætitia ferebatur. Quidquid virium sectariis fuisset, illa deditio videbat prostratum. Bredododum, & si qui præterea in armis erant, audebat despicere. Nam quid posset, rebelles admonuerat, claves se civitatum invenisse jactitans. Itaque Billium in Hispaniam delegat,
nun-

nunciaturum Regi de victoria, & ut in provincias maturaret sine exercitu. Sectariorum res planè accisas. Nulloque se negotio totam brevi provinciam sub imperio, legibusque habituram. Deinde religionem erigere adorsam, conventiculis & concionibus, sectariis undique interdixit. Vniversos cives pro Rege ac religione obstringi iussit. Vulgi affectus cum fortuna mutabantur. quod non aliter Principes, quàm ex successibus æstimat. Et semper ii meliores creduntur, quorum virtus timeri meruerit. Sectas quas tanto plausu populus exceperat, pari fastidio detestabatur. Pauci in Flandria, & nisi sectariorum pervicacissimi, jurisjurandi condicionem repudiavêre. Prætor eis arma ademit. Ministri præcepta fuga Antverpiam se contulere. Perculebat animos eorum Valencenensis exempli atrocitas. Et quod ipsis timendum foret, expectare non audebant. Gandavum, Aldenarda, & Ipræ novis cohortibus firmatæ. Et apud eos, qui sacramentum distulerant hospitia jussæ sunt accipere. Duæ aliæ cohortes Axellam missæ, quarum opera in domandis Antverpiensibus uteretur Gubernatrix, & circumjecta regionum à novitatibus abstraheret. Ecloa, Rotnacum, Deinfa, & si quæ alia opulenta municipia, ad Prætores Metropolitanos arma deferre jubebantur. Sectariorum templa everfa. Ac ne quod vestigium

gium sceleris relinqueretur, ipsa etiam fundamenta eruebantur. Certantibus æmulatione populis, ne externus miles hanc laudem incolis præiperet.

In hac rerum facie, Auriacus quoque timida sollicitudine pulsabatur. Egmondanum itaque rursus sollicitare constituit in partes; magnum indole virum, armisq; clarissimum. Qui Gallicanis expeditionibus ita se semper gesserat, ut Albani providentia laudaretur magis, audacia Egmondani timeretur. Cùm Auriacus contra civili prudentia, & consilio insignis, armisque timidior, imperatoris artibus utrique concederet. Dicta est colloquii dies in Willebroeckio pago, non adeo procul Antverpia sito, quâ Bruxellensis alveus Scaldi committitur. Ibi rursus Auriacus Egmondanum hortari cœpit, *ut nunc saltem annoueretur ad tutiora consilia imagine periculi. Et occupata aliqua insigni provincia, conjunctis viribus Albano resisterent, in utriusq; perniciem accincto. Arma & consilia in expedito esse. Populi mobilem animum. Non defutura auxilia, si ducem se partibus ostenderit. Principē præteritis rebus infestum, & vindicem, nunc quidem si et a benevolentia speciem facere. Sed ubi provincias exercitibus infederit, non illi, non Albano securitatem redditurā, nisi sublati capitibus, quibus præteriti furoris insaniam imputant. Hac se crebris litteris ex Hispania admonitum, & de salute ejus sollicitum, non dubitasse denunciare: ne vir tantus infamī caderet exitu,*
& ut

Et ut piacularis victima Regis ira immoletur, spiritumque, quem per virtutem retinere posset, per contumeliam effunderet. Eas voces Egmondanus seignius quàm ante accepit. Neque tantam Regi iracundiam, referebat, ut non maiorem in clementia illius fiduciam poneret. Penè peccare Auriacum, quod in animum induceret tam nefandam perfidiam. Si quid ejusmodi moliri Rex vellet, nemini fuisse proditurum. De officio Procerum queri non posse, qui concionandi licentiam protervis ademerint, Iconomachos justis suppliciis affecerint, forocissimos quosque sustulerint. Hac esse beneficia in Regem sua, quibus vel gratiam sperare meruerit. Quod alioqui tantum suum delictum, ut in corpus suum peccare sustineat? Si tamen ille perseveraret irasci ad ultimum se pro fide moriturum. Paullatim inde Auriacus ad indignationem prolapsum; age ergo, inquit, fidem ei ut voles serva, qui te perfidia sua decipiet. Vter nostrum nimia credulitate peccaverit, tempus aperiet. Hoc unum scio, acturum te aliquando pœnitentiam sprete consilii mei. Trunco corpore pontem substernes, per quem Hispani calcaturi sunt provincias. Post hæc mutuis complexibus functi, invicem valedicunt. Adjecit Auriacus eum se posthac non visurum, nisi amplecteretur saniora consilia. Et sic in præparatam descendens navem, ad Antverpienses, quibus potissimum fidebat, rediit. Egmondanus in curiam regressus, & futurorum sollicitus, Gubernatrici blandissimè adulabatur. Convivia comiter instituebat, quibus ipsa quo-

quoque Gubernatrix frequens intererat, ut ex animo ejus eraderet diffidentia cicatricem; insigni dissimulatione intimos sensus, verbaque recondens.

Interea Noircarmius paucos dies Valence-
nis componendis rebus insumens, & accepto
Gubernatricis imperio, Trajectum ad Mosam
irraduxit exercitum. Duodecim tormenta si-
mul trahebantur. Quorum conspectu cives,
desperatâ urbis tutelâ delegatos misere ad
Gubernatricem, potestati ejus omnia permit-
tentes. Nec ingratus Gubernatrici adventus
fuit. Quippe & hujus urbis obsidio magni o-
peris videbatur. Itaq; factò veniam dedit, splé-
dido exemplo cæteras civitates invitatura ad
deditionem, clementiam ejus doctas. Mini-
stri tamen & seditionis auctores tradi jussi. Sed
illi hoc ipsum metuentes in tempore excessé-
rant. Præsidio Trajecti relicto, Noircarmius
Tornhautum movit; quo propiore metu Ant-
verpienses Silvæducensesq; percelleret, & ter-
rore virium reduceret ad reverentiam maje-
statis. Nam in omni populari tumultu plus fa-
ma, quàm vis potest. Megemus cum Frisica sua
legione eodem contendit, Noircarmioq; jun-
ctus magnum terrorem cunctis injiciunt.

Inter hos dies gravior motus Silvæducen-
ses concusserat. Cives ex edicto Gubernatricis
citabantur ad Sacramentum. Et erant qui præ-
starent. Cùm Bombergius suorum agmine sti-

patus processit in forum, clausasque curiæ fores viperfregit. Nemo violentiæ obstabat. Diuturna tyrannis reverentiâ pepererat. Ergo senatum ingressus supercilium suum verbis ulciscitur ; & quid hoc rei esset, quod injussu populi conscientias obstringerant, interrogat. Senatu contra fortiter loquente , utrimque clamor oritur. Et concursus vulgi ad certamen instructi, fiebat in curiam , cum senatus furori cessit , jussa multitudine ad sua quemque redire opificia. Sic per aliquot dies quies stetit. Donec pavidi agrestes , adventum Noircarmii in urbem referrent , consternatumque fama populum , majori terrore afficerent. Quippe Noircarmius popularium animorum haut nescius, lento agmine Tornhauto movebat , ut contumacibus daret pœnitentiæ spatium , atque ex seditiosorum manibus sine sanguine tela excuteret. Tum oppidani versare animo cœpere , quanto suo cum discrimine exspectarent exercitum. Neque mox parem conditionem habituros, si mora deditiois perseverarent irritare victores. Valencenensium supplicium in oculis erat. Et Bombergiani passim marcebant deposito supercilio. Faciliq̃ue impetu, ut sunt vulgi studia , à multitudine destituebantur. Plurimi cum senatu sentire cœperant ; cum Bombergius , & ferocissimus quisque, urbe excedunt. Nulloque factionis duce jam reliquo , tota respu-

respublica concessit in gremium optimatum: qui cōfestim quadringentos suarum partium cives conscribunt in centurias. Petersemium, & Cancellarium liberos dimittunt, & trecentorum civium præsidio deducunt in regiam. Delegatos denique ad Gubernatricem destinant. Pollicentes se imperata facturos, modò ne cogerentur præsidium accipere: Sed illa conditionem omnem aspernante, rursus alios mittunt qui deditionem offerrent, in quam universus populus sponte, aut metu jam consenserat. Noircarmius civitati præsidium imposuit, & Tornhautum rursus exercitum traduxit.

Siquidem Antverpienses defectione validissimarum urbium, Procerumque in pacem conspiratione perculsi; simul abscessu undique spe, remittebat sensim altiores spiritus, & haut obscurè civium studia nutare cœperant. Nec Gubernatricem fallebant illa consilia. Proinde ostentari potius obsidionem, quàm promoveri jusserrat. Longè tunc alia civitatis facies. Quid de ipsis quoque statueretur, si contumaces esse pergerent, propinquo Valencensium exemplo admonebantur. Redacti itaque sunt ad summam desperationem. Nec tacita consternatio in omnium animis percipiebatur. Ministris impetus exciderat. Metus seditiosissimis furorem excusserat. Sciebat quoque magistratus, nihil salutaris, quàm

pacem experiri , gaudebatque id ipsum non displicere civibus. Auriacus in pristinâ simulatione perseverabat. Eoque auctore missi sunt, qui Gubernatricem deprecarentur, datisque conditionibus invitarent in oppidum. Illa nec se pacem daturam , nec ante venturam respondit , quàm præsidium militare recepissent. Hæc in urbem relata Ministris & seditiosissimis non satis arridebant, querentibus unos se peti, daturos sanguinem vindictæ publicæ. Placuit tamen delegatos ad Gubernatricem rursus proficisci. A quâ tandem has condiciones accepere. *Ministros, apostatas, exules, ceterosque improba nota homines, finibus ejicerent. Illicitas conciones & ministeria tollerent. Religionem catholicam, & delubra restituerent. Sectariorum templa, si ita Regi videretur, diruerent. Nova non adificarent. Cives sacramento Regi obstringerentur. Religionem quam vellent, sine fraude profiterentur. Miles à magistratu lectus, idem sacramentum acciperet. Incolæ obedirent legibus, quæ de religione deinde ferrentur à Rege, vel sine fraude oppido cederent. Ad Iconomachos, perduelliones, reosque majestatis hæc pacta non pertinerent, nec diutius rata essent, quàm Majestati placuisset.*

Dura profecto hæc omnibus videbantur : sed per fortunam recusare non poterant. Ad flectendas vulgi mentes magno momento Auriacus fuit. Non amore pacis, quam tunc potissimum oderat , sed necessitatem æstimando

mando obsequium præferebat. Tacito, quàm professo odio semper perniciosior consiliis publicis. Adventum Gubernatricis opperiri non ausus, Bredam se cum uxore recepit. Ibi paucos dies moratus, privatorum negotiorum obtentu in Nassoviam proficiscitur. Hoochstratanus, & Hornanus eum sequebantur. Post quæ, dimittitur per vicos præco, qui intra horas viginti & quatuor Ministros omnes excedere juberet. Exulibus, apostatis, diaconis, senioribus, breviter omnibus qui è Consistorio fuerant, striduum præstitueret. Tunc primùm tacita indignatio defixit sectariorum animos. Quid agerent, quid secum efferrent consilium præ metu defecerat. Compita & portas implebat continens migrantium agmen. Illi uxores & liberos tanquam ultimum visuri amplectebantur. Hi secum in fugam trahebant. Iram Gubernatricis expectare nemo audebat. Pars ad Brederodium in Hollandiam, pars in Germaniam proficiscitur. Magistratus interim sacramentum Regis accepit. Nec reliqua multitudo, mutari facilis, moram fecit. Quinque urbanæ cohortes exauctorantur. Cùm statim turma equitum supervenit sub Gubernatricis auspicio. Sequebatur Ernestus comes Mansveldius cum sex peditum signis. Et post eum Carolus ejus filius cum plena legione. Dein tria vexilla Beauvoisius induxit. Cujus terga claudebat Lic-

kii dominus, cum ea centuria, quæ Gandavi per aliquot dies steterat. Miles tanquam in hostili solo iter fecit. glande ori inserta sclopos pulvere oneraverat. Tum demum successit Gubernatrix, succincta mille admodum equitibus, armorum fulgore splendentibus. Proceres Dominam sequebantur. Quidam è Finâtiis & Privatâ curiâ comitatum instruxerant. Noircarmius quoque propius admovit exercitum, ut si tumultus in urbe oriretur, in tempore adfisteret. Armati pedites gemino ordine dispositi, intrantem Dominam excipiebât, deducebantque in hospitium quod publice præbebatur. Animis civium expectatione detentis, quid primum actura esset, quatuor captivi repente producuntur. Eos Brabantia prætor ex fugâ retraxerat. Cruce in foro erecta seditiosum spiritum laqueo evomuere. Nec multò post Joannes Onghena (quem Iconomachorum principem Gandavi extitisse memoravimus) eodem supplicio dignam sceleribus mercedem accepit. Tranantem Antverpiæ flumen, Gandavensis consul sibi notaverat, manumque injici fugitivo jusserrat. Octavo Cal. Maij his legibus civitatem ordinavit. *Incola pacem quietemque fovento. Concionatores novæ religionis amissis bonis capite plectuntor. Fautores eorum puniuntor arbitrio Gubernatricis. Parentes & heri, pro familia tenentor. Conventicula ne suntor. Magistratus hæc ipsa dissipanto. Si quis*

quis indicasset, impunitatem habeto, ita tamen si deinceps legibus se accommodaverit. Iconomachi laqueovitam finiunt. Si magistratus non prohibuerint, damnum refundunt. Matrimonia, aliosque ritus nova religionis exercentibus, laquei poenam irrogant. Infantes ab haeticis baptizati, rebaptizantur. Obstetrices intra horas viginti & quatuor puerperas magistratui denunciant. Ludimagistri non publice, non privatim juventutem instruunt, nisi prius examinati, & iurati. Docere illicita capitale est. Magistratus, pratores, visitatores bibliopolarum & typographorum diligentem rationem habent. Qui libros illicitos saepius distraxerit, capite plectitur, ceteri poena extraordinaria. Tributa injussu Regis ne imponuntur. Ne conferuntur. Qui secus faxit quadruplum restituunt, & arbitrio iudicis plectitur. Eleemosynarum collatione pauperes ad novam religionem ne alliciunt. Qui ad legendum militem pecuniam contulerit capite luit. Conventiculorum auctores rebelles habentur. Exules & apostatae, urbe excedunt, similiter & hi, qui in provincias confluxerunt, sine vitae testimonio. Catholicis vel sacerdotibus nemo injurius est. Sin secus, capite & amissione bonorum punitur. Nulli sua religio fraudi est. Ecclesiasticis pareto. priscis legibus edictisque statuto, quod à Rege ex consilio Ordinum aliter statutum fuerit. Gubernatrici interim cura fore, ut generalem gratiam Rex indulgeat. Post hæc sectariorum templa militibus prædæ dedit. Cives arma sua ad magistratus deferre jussit. Imaginatione templis restituit. Sacrificia, & supplicatio-

nes restituit, quæ ipsa ingenti intererat pompa, cum Purpuratis & Optimatibus, ad cæterorum exemplum. Scholas quas erudiendæ juventuti sectarii erexerant, ad alios usus trāsferret, ut nervos eorū paullatim excinderet; & inclinatis ad pœnitentiam seditiosorum animis, impetuque novitatis consumpto, populus amaret redire ad quietem, quam tumultuantium furor excusserat. Urbanus miles reliquus exauctoratus est. Firma præsidia civitati imposita. Vectigal quo idem miles antea lebatur, præsidariis cessit in stipendium. Quibus rebus effectum est ut vinaria, & cetera vitæ vectigalia sine ulla Regis invidia intenderentur per omnes provincias. Semper quidem mansura. Nullo postea fastidio populi oneribus assueti, nec averſantis rerum speciem longouſu conciliatam, quam diuturna patientia legitimam fecerat. Ea tum quidem haut difficulter impetrabantur à magistratibus, hac ratione salutem publicam redimi credentibus. Cùm econtrà paullò post Albanus, nullo necessitatis prætextu eadem augendo, res præſcas novare, vimque Regiam intendere arbitraretur. Populo certè nimia libertati innutrito aliis artibus imponere debuerat. Omnia ipse per externos agebat. Cùm id rectius provinciales faciant. Qui fastidita tributa non favori, non libidini, aut sceptro; sed necessitati publicæ dare credun-

creduntur. Tantum interest quid à quoquam, & qua causa fiat. Populus duci vult, non trahi. regi, non subigi. Nec refert qua via, dum eo quo tendis, pervenias. Ergo rebus in hunc modum Antverpiæ statutis, comes Mansveldius civitati præficitur. Summa benevolentia populum continuit, nulla remedij asperitate laceffitum.

Cum interim in Flandria acerrimæ quæstiones de noxijs haberentur. Civitates tanquam semet absolverent, ultione gaudebant. Multitudo metu perculsa impune contemnebatur. Nam & vis aderat imperium exercentibus. Ipris duo Ministri attolluntur in patibulum. Quibusdam spectatorum fremere ausis, circumfunditur miles, & intento ferro turbatos discutit. Cecidere multi ex plebe, & quidam innocentes in promiscuo discrimine. Nemo deinde ausus est obstrepere. Seditionum auctores per provincias conquisiti varijs suppliciorum generibus afficiuntur. Ioannes Winghene & Bacquerelius, vitam laqueo finiêre. Sectariorum quippe principes fuerant. Illi crimini datum, quod Rotnacenses ad publicandas conciones Gandavum deduxerat. Hic vero Iconomachos in sacrilegium Aldenardæ redemerat, ut supra retulimus. Bona utriusque fisco illata. Reliquum vulgus extra periculum, quod aliena magis infamia, quam proprio ingenio deliquerat. Pro

Rege tamē & religione iuramentum præstare jubetur. Iconomachi passim & undique sine misericordia necantur. Infamati magis, quam convicti relegantur in exilium. Replentur cruces cadaveribus, Germania exulibus. Nullâ tum quidem Gubernatricis invidiâ, quando omnia per magistratus agerentur. Nam & ipsi magistratus non iræ, aut sævitix imputabant supplicia; sed utilitati publicæ. Seditiosissimi quique jure putabantur damnari, tanquam sceleribus suis promeruisent exitium, quod à proprijs civibus irrogabatur. Et hoc re vera in ejusmodi tempestate sincerissimum est remedium, ut optimorum civium suffragijs delicta vindicentur. Qui à nutu Regis pendentes, ex utilitate ejus omnia constituunt. Et si quid severius fecerint, merito facere videntur, sine infamia, vel criminatione Principum. Et si dicere licet, famam Albani nihil magis oneravit, quam quod extraordinaria ratione, & externis in consilium adhibitis, in eadem facinora tam animose surrexerit. Pœnâ remedij loco admoveere non credebatur: sed malis publicis ad occasionem avaritiæ abuti, qui conscientiam magistratuum suspectans, extra ordinem judicia institueret. Quarum rerum documenta apud antiquos multa recensere possem. Sed hæc commodius suo tempore. Igitur Sectarii ad dandum sacramentum passim citabantur. Contumaces ademptis bonis

in

in exilium acti. Et quia promiscua fuga fuerat, ne civitates incolis destituerentur, & ad externas gentes transirent commercia, fugitivis ea lege edicto publico reditus permittitur, si religioni Regique sacramentum dicerent. Fuere qui præferrent exilium, fuere qui reverterentur.

Cæterum Lutherani tam infami proscriptione exulcerati apud Electorem Saxonie fortunas suas deflebant. Nulla culpa provocatam Gubernatricem maximas contumelias in se statuisse. Non se sponte concessisse in Belgium: sed communi consensu invitatos. Ibi quoque in summa magistratuum obedientia egisse, citra cujuspiam injuriam. Civitatem imperij Antverpiam esse. Vnde certe ejci non possent sine religionis sue infamia, quæ non alia esset, quam religio imperij. Quod ergo suum delictum? an quia pro catholicis nuper armati, & ne violarentur, vitam suam obtulissent in discrimen, in quorum perniciem Calvinistæ surrexerant? At si pæniteret obsequij honestius saltem dimitti potuisse, quam sub seditiosorum invidia. Lutheranorum protectorem Electorem esse, ei-que potissimum incumbere, ut innocentiam illorum velit adiutam. Hæc & plura in eam sententiam referentes: pervicere tandem, ut Oratores mitteret in Belgium. Quibus Gubernatrix, habito consilio, in hunc modum respondit. Scitote me, quæ de religione constitui, nihil proprio fecisse iudicio. Regis imperium executa sum, quod sine crimine prætermittere non poteram. Cum illo igitur expo-

expostulandum est vobis. Prudentius tamen facturi, si eodem jure permittatis Regem frui, quo ipsi utimini. Quid vobis cum nostra provincia? quare vultis alijs regnandi modum prescribere, quem ipsimet à nemine accipitis? Quid in Germania Vestra faciatis Regem non sollicitat. Religionem quam libet amplectimini. Paci publicæ, ut placet, consulite. Nemo deposcet à vobis rationem imperij. Relinquite, precor, Regi provincias suas, in quas nemo principum jus sibi vindicat. Ille quidem religionem à majoribus traditam, & solemni sacramento sancitam retinere statuit. Bellum & omnia potius toleraturus, quam libidini populari electionem sacrorum permetteret. Neque enim videri ex majestate, ut his malis tanquam impar, succumbat, ac libertatem indulgeat, quam vulgare non potest, sine sceptri discrimine. Quod & Illustrissimus Elector probe intelligit. Qui extra unos Lutheranos sacrificandi licentiam nemini facit. Ministri ergo vestri quid queri possint, non video. In pacem publicam serpentes, provincijs exegi. In quas injussu meo novas religiones, & nescio quæ turbamentum ausi sunt adferre, & in questionem adducere, qua ratione colenda sint numina. Vt in tanta fidei varietate, nihil sacrum, nihil sanctum, nihil denique de superis certum populus credere assuescat: deinde viribus sceptri contumaciam suam conferat. Audivisse vos arbitror, labefactatam ab his populorum fidem, descriptos exercitus, sublata vexilla in Regem, parumque abfuisse ab omnium perniciæ. Quid si vires illorum hominum patientia nostra adolescant, qui pacem ferre non possunt? Cum hoc responso oratores dimissi sunt.

Dum

Dum hæc Antverpiæ geruntur , Noircarmius interea cum tota exercitus mole contendit ad subigendos eos , qui averfabantur imperium. Arenbergius in itinere conjungitur ei cum sua legione, & non modica Germanorum manu, quos sub præfectis ejusdem gentis, ij quibus imperatum erat, paullo ante in Belgium deduxerant. Brederodius multo armatorum præsidio Amsterdamum tenebat. Sed tolerandæ obsidioni imparem se existimans, uxore atque omni instrumento , & pecunia navigio impositis, fugam adornat. Profectio in Germaniam parabatur cum Conjuratis; militibus vero jussis sibi quemque consulere. Pecunia in stipendium deerat. Nec erat tutum tot armatos, & in illum fortasse peccaturos, sine stipendio dimittere. Circumjecta monasteria prædæ data. Gaudèbatque rapinis miles. Duces è Conjuratis erant. Qui & ipsi insania feroces, imparatos circa agrestes undique diripiunt. Lasciviebant ergo præda graves, expilato per vim Egmondano monasterio, quod in illa regione habebatur lautissimum. Sed in tempore supervenit Megemus. Primum exercitus agmen ducebat. Prægressusque cum parte equitatus, eos omnes qui occurrerunt , fudit. Incondita turba erat, non imperio , non disciplina instituta, neque aliter quam in latrocinij fortitudinem exercere solita. Multi in compositè fugientes occisi.

occisi. Alij refugiebant in civitatem. Plures longius terror abstulit. Centum & amplius in æstuarijs maris securè prædæ incubantes, proteruntur ab equitibus, quos adesse necdum perceperant. Quinque naves Amsterdami stabant in anchoris, quæ ad fugam à Conjuratis conductæ, expectabant vectores. In has non tantum Conjurati, sed & Ministri & exules & flagitiosissimus quisque desiliere. Nulloque jam partium duce reliquo, quia nihil magis Amsterdamentibus, quam deditio placuerat, delegati ad Megemum destinantur condiciones petitori. Quibus impetratis, intra mœnia recipere præsidium. Brederodius propitijs usus ventis Emdam appulit. Vnde se in Germaniam contulit. Vbi paullo post morbo ex mœnore contracto, extinguitur. Vna omnino navis erat, qua vehebantur Conjuratorum præcipui. Hæc Hollandiam Frisiamque inter, pulvino deprehensa, hærebat in brevibus. Quibus prora cumulis arenarum impedita, par esse non potuit. Casu id acciderit, an ira gubernatoris, ebriorum vectorum injuriâ saucij, non satis constat. Et utrumque traditur. Cæterum Mulardus Arenbergij jussu fugitivos persequabatur cum quinque navigijs. Quos cum mira opportunitate comperisset iisdem brevibus occupatos, ad dediti-
onem compulit. Inditis vinculis Harlingæ in
Frisia

Frifia carceribus mancipavit. Superveniens inde Arenbergius, de fingulis quæftionem habuit. Eos qui arma in Regem tulerant, laqueo confecit. Nobilium fanguine abftinuit, Gubernatrici fignificans quid de his fieri vellet. Illa vero ad fe perducijuffit. In feptem gladio animadvertit. Reliquos feptem altiori fanguine genitos, arcta cuftodia Vilvordia habuit. In his duo fuere Battenburgij, fratres admodum juvenes, Hermannus Galama & Sieurtius Bayma Frifij generis. Octo & triginta è captivis, ad Wackemij dominum, ea tempeftate Zeelandia præfectum vincti mittuntur: ut de fingulorum fceleribus ille cognofceret, traderetque fupplicio. Flandri omnes erant, aut fugitivi, aut proſcripti. Apoſtata laqueo necati ſunt. reliqui catenis conſtricti alligantur remigijs.

Omnes jam provincia in gremium Gubernatricis conceſſerant. Albanus tamen tanquam manente adhuc bello iter inſtruebat. Septendecim Hiſpanorum cohortes novis delectibus effecerat. Eas omnes Cartagini Novæ imponit in naves. Quippe Andreas Auria triginta triremium claſſem in portum deduxerat. Rege deinde protenus ſalutato, v. Id. Maij ſolvit à littore. In itinere febricula correptus Nicæam divertit. Ibi curandæ valetudini quatrimum inſumens, ſeptimo demum, poſtquam navigare cœperat die, Genuam ap-
pulis.

pulit. Classis in portum appulsa exposuit militem. Ex his quatuor cohortibus Sardinienſi legioni in ſupplementum adiectis, cæteræ per Inſubriam in præſidia diſtribuuntur. Albanus paucorum dierum intervallum Genuæ traxit, prodagra invalidus : ſed tolerandæ moræ impatiens numerum copiarum iniri juſſit. Hiſpanorum peditum octo millia, ſexcenti & octoginta cenſi traduntur. Alſonſus de Vlca Neapolitanæ legioni præpoſitus duo millia, ducentos & triginta habebat. Decem vexilla Iulianus Romero ex Sicilia traduxerat. Totidem Sanctium de Loudogne ex Inſubria ſequiebantur. Octingenti ex Sardinia appulerant, quibus tyrones illi, ut ante diximus, permixti, mille ſexcentos & viginti milites explebant. Gonſalvus de Bracamont ijs præerat. Hæc pedestris acies, & veteranorum prope tota. Mille & ducentos numerus equitum impleverat. Hiſpanorum cataphractorum duæ turmæ, quinque ex eadem gente levis armaturæ. Itali tres, duas turmas Albani leviter armati explebant. In hunc modum recensitos, Sancto-Ambroſium pergere jubet. Vrbs hæc ſita eſt in radicibus Alpium, Italiam à Germania Galliaque ſeparantium immani ſaſtigio, Albanus Turinam proſectus, aliquot dies fuit cum Sabaudia Duce. Inde ad præmiſſum exercitum ſe recepit, & per Alpium anguſtias iter inſtituit. Acies hoc modo proceſſit, in tres
partes

partes distincta. Frontem Albanus tuebatur, speculatores qui explorarent iter subinde præmittens. Neapolitanicam legionem & cataphractos Hispanos sibi applicuerat. Quos Itali antecedeabant leviter armati, simul itineri parati, & prælio. Medium agmen curabat Fredericus à Tolledo Albani filius. Insubricam legionem habebat, & Hispanorum equitum quatuor turmas. In hoc impedimenta vehantur. Tergum exercitus Sicula, & Sardinica legio cum Albanis equitibus constituebant. Præerat huic Chiapinus Vitellius Marchio Cotonæus, magni in Italia nominis, manu promptus, belloque clarissimus. Arcta erat semita, & occurrentibus sæpe rupibus inclemens, quæ paucos admodum caperet armatos. Viam tamen sic dispensaverant, ut in stativa, quæ primum agmen habuisset, sequenti die secundum succederet. Post alterum diem tertium agmen perveniret, iisdem stativis usurum. Hoc modo exercitus descendit in profundissimam vallem, exigua planitie procumbentem in flumen, cujus fons per prona magno strepitu aquarum decurrens, parvo alveo vehitur, donec Iseræ commissus, haut aliter quam ponte traicitur. Latera utrimque asperis, præruptisque rupibus clauduntur, cacuminibus in immensam altitudinem surgentibus, humano negatis vestigio. Hac semita Annibalem Romanis bellum inferentem, pro-

Z

rupisse

rupisse volunt in Italiam. Neque dubium, quin in his angustijs deprehensus Albani exercitus debellari potuerit, si extitisset, qui modicâ manu resisteret in ulteriori ripa, transitu prohibiturus. Vbi non solum cum hoste, verum etiam cum iniquitate loci præliandum erat, qui tantam multitudinem redegisset ad paucitatem. Vnde sine pernicië, ac nisi victores recipi non poterant. Nam si reverterentur qua venerant, eos ibi deprehendisset inopia rerum omnium, famesq; ferro acutior, cõsumptis alimentis, quæ sterilitas loci suppeditare non poterat. Quippe stativa sic instructa com meatibus fuerant, ut non nisi in unam noctem toti exercitui cibaria sufficerent. Sed continua felicitas exercitum decimis quartis stativis in Burgundiam perduxit. Ibi quatuor turmæ, nuper conscriptæ, Albano junguntur. Militem sociorum terram permeantem, egregiâ severitate & disciplinâ continuit. Flagitiorum militarium insignis vindex, atque implacabilis peccantibus. Quod etiam inter laudes ejus à contrariarum partium scriptoribus numeratum est. Qui tamen ex odio, atque irâ famam illius divisere mortalibus. Cogitaveritne Genevenses Calvinisticæ sectæ artifices & propugnatores ad deditionem compellere, & hoc ipsum cum Sabaudo agitaverit, equidem nescio. Vtrumque tamen calumniatus est rumor. Nec Genevenses solum multo præsidio urbem

bem compleverant: sed & Helvetij montibus suis egressi, ingenti multitudine fines infederant. Gallus quoque subitis delectibus multum militum effecit, Helvetiorum sex millibus mercede conductis. Quacumque incedebat Hispanicus exercitus, paribus ipse passibus obequitabat in confinio regni, laterique Albani suum admovebat exercitum. Sic tandem in Lotharingiam, atque inde in Belgium per-ventum est.


F I N I S.

HISTORIA Belgica , quam ab ANNO
CHRISTI M. D. LVIII. Nobilis at-
que Clarissimus vir, Dominus NICOLAVS
BURGVNDIVS I. C. & Codicisin Vniversita-
te Ingolstadiensi Professor Ordinarius con-
cinnavit ; quia nihil Fidei Orthodoxæ , vel
bonis moribus adversum continet ; adeoque
concinnè ac eleganter conscripta est , ut le-
ctu non utilis minus , quàm jucunda futura
videatur : typis & luce publica digna esse vi-
detur.

Ita censeo

Nominè atque loco Admodum Re-
verendi & Spectabilis Domini
Decani Theologici,

*Leo Menzl. S. Theolog. D. Prof.
& Vniversitatis Ingolstadt.
Procancellarius, &c.*





1.1K

B

4



